


Ĕhwati Gali



Portions of the Holy Bible in the Yalë language of Papua New
Guinea

Ēhwati Gali
Portions of the Holy Bible in the Yalë language of Papua
New Guinea
Buk Baibel long tokples Yalë long Niugini

copyright © 2022 Wycliffe Bible Translators, Inc.

Language: Yalë (Yale)

CC BY-SA required by use of Sweet Publishing CC BY-SA licensed illustrations in the printed edition.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-03-12

PDF generated using Haiola and XeLaTeX on 11 Jun 2026 from source files dated 12 Dec 2025

4a4fca1d-2276-53e5-95b2-a315846297c3

Contents

Mak	1
Luk	60
Aposel	159
Filipai	259
1 Tesalonaika . .	271
Jems	281

Mak Ebë Lale Anebo Gali Kënëgebëye Jisame Gali nene, Mak Yahit tle

*Jon, tu mëta baptais
logotomebë ho, gali të têtatëme*

¹ Ebë lale gali, bu Gotobë nëba Jisas Klaisme gali nene.

² Ètani anebomu ebë lale gali fata tle. Bu mefata latle, Gotobë lowene mago gali të totokweflebë ho, Aisaia, fene yahi tle, “Goto boweneme megali latletle, ‘Aholokwane elo, kwe tokwafe bo ho lime jine nëglëlëme, bobë gali të nalëtagulebëme. Na bu jume loutatëme. Na bu alëge jume fu nalëtagutëme.’

³ Tokwafe, li ho, ho jwa lifeku mëta mewe lëgleme, ‘Sobo tako hobë alëge fu etatelo, alëge sle etatelo.’”

⁴ Jon ebë kë nëgebëye, tu mëta baptais logotomebë ho. Bu ho jwa lifekuwa tuhu tule, Aisaia fene yahi tle. Na onehome gali të têtatëme, “Sobo tëbo lowene aholokwana ti elome na lale lowenewa esogo elelëlome na baptais elome. Na Goto tëbo lowene sle nalëgetatëyome.”

⁵ Na feilawa oneho, Juda lifate mago na feilawa oneho mata Jerusalem lifate mago, Jon belë mutuja. Na bubë tëbo lowene këme olafa mototometla. Na Jon bume Jordan tu mëta baptais totome.

⁶ Jon bu lale ëho hana gelo totle. Bu kamel kleli hobona kë susu mototlabë ëho gelo totle. Na bu bulmakau jibo alitaba mata tehvamë. Na bu mëgou na saule tu mehihi latlekefe.

⁷ Na këme Jon bu gali metë têtakefëtëme, “Ho li bobë nagi ligisime. Na kë ho kë ligisibë bubë afutuku takomu kwe bobë afutuku tokwëfomu. Bo lale ho nane kë ligisibë home kë nëgaitalëme, manawa wege ho fene laitale. Weye. Bo bubë jiteho hana titika nëgletelëme. Bu letitabo homu nëgeme na bo atwati homu.

⁸ Bowe, some tu mëta fwa baptais nëlelëyo, kwe buwe Gotobë Amtëtombana baptais lëglelëyome.”

Jon Jisame baptais totle

⁹ Na kë olëna, Jisas Galili provinsbë tokwëfo lifate Nasaret mago tisi. Na Jon bume Jordan tu mëta baptais totle.

¹⁰ Na Jisas tu kile tle na helefowa fe tokwake. Na bu hwi tokwake, matafa inoha latikawa tle na Gotobë Amtëtomba seuneni foleha Jisame ji têtëkeketle.

¹¹ Na Goto matafa mago gali tle, “Ju bobë lale nëba. Bo jume tako maninibo nanëletë, na tako fleflesu nanëletë.”

Satan bu Jisame tëbo loweneme fene susu totle

¹² Na kë nalëwamu, Gotobë Amtëtomba, Jisame ho jwa tabo elë tlelule.

¹³ Na bu ho jwa tabo mëta niliafewe olë tafa tle. Na

Satan bu tēbo loweneme fene mana susu totle. Bu waluju mago klelina tafa mētla, kwe ensel bume lamētaitala.

Jisas bu Gotobē lale gali, Galili provinsme afina tē tētātēme

¹⁴ Bu Jonme kalabusu lowa watuku mētla, na Jisas Galili provins elē tisi. Na bu Gotobē lale gali tē tētātēme.

¹⁵ Bu megali tle, “Goto kē aniji toglolebē olē wafata lēle. Na Goto iniwa onehobē eso home natafa lēletēmebē olē nounou lalēletle. Sobo tēbo lowene aholokwana ti elome na lale lowenewa esogo elelēlome. Na sobo Gotobē lale gali lowene sle eletelome.”

Jisas bu nilimalē home we tlome na bume nagi mētlēla

¹⁶ Na Jisas bu Galili lake tu hele helefowa tuju. Na bu Saimon name bolijamo Andru name hwi tlome. Bu solo, tu mēta tuku mētelo, mo fa fa namēgelome, bu kē mona baliti glo namēgelome.

¹⁷ Na kēme Jisas bume megali tlome, “Sobo esijomo, bona asē nanēglame. Sobo mo fa fa lowenebē walowene eletelo. Na bo some ho fa fa lowenebēme okokwe nanēglēyome, bu Gotome esogo namēglelēlame.”

¹⁸ Na bubē solo lakilewa mētelo na mana nagi mētelēkaklo.

¹⁹ Na Jisas sogē tuju watle, na bu Jems, bolijamo Jon name hwi tlome. Bu Sebedibē nēbale. Bubē solo holēye tēgletēmeme nēgeme na bu ihe mēta kēme tafa

mētelo na mana tibwa mētelo.

²⁰ Na kēme Jisas tlemalēme we tlome. Na bu bolijayaname, bume kē wege mēgletēmabē ho name, ihe mēta hune mētēkako. Na bu Jisasme nagi mētelēkaklo.

Jisas bu ahwane, hobē ato mago, hehē tletle

²¹ Jisas bu fli hona Kaperneam lifewa mutuja. Na Juda enēnebē tafawa olēna, bubē lotu lowa tēkaklu. Na mana onehome gali tē tētātēme.

²² Bubē gali yafe aholokwane motlola, bu klelego memētla. Bubē gali gena lēbetleme nēgeme kwe Gotobē tafa sle gali lowene sle mēgletlabē hobē galiye ge jwa lēbetēmemu.

²³ Na kē nalē, li ho bu kē life hobē lotu lo mēta tafa tle. Na ahwane kē ho mēta tētabe. Na kē ho meafēflei latle,

²⁴ “Nasaret life mago Jisas, ju seme habelē egētaname esine? Ju seme tēbo naegētaname esine? Bo jume lowene nanēletē, Ju Gotobē lale homu. Ju Goto mago kē egisibē ho.”

²⁵ Kwe Jisas ahwaneme anisasana megali latlole, “Ju kuju ebe na ebē ho mago eiju.”

²⁶ Na ahwane kē home anisasana luluju totle na feilawa juju tēkake na kē home lakilewa totle.

²⁷ Na kwe iniwa oneho klelego memētla na blalo gēgali mētla, “Euowe! Ebē fēye wesibine? Kē ho bu tiho gali tē lotle. Na bubē galiye,

flesu hobë gali fenene. Bu ahwaneme gali loglomena, aholokwanewa lamolole.”

²⁸ Na hokweinawa, Jisas këtëglebë galibë, Galili provinsbë li life li life fifiji mëtletlëla.

Jisas Saimon bokokabë ato sle tëtätë

²⁹ Jisas bu fli hona, lotu lo mago metëkaklija. Na bu Saimonna, Andrunabë lowa mutuja. Jems na Jon buna iniwa mutuja.

³⁰ Na Saimon bokoka ni labuku mëta ni tëbe, bu tëbo tëgleme nëgema na bu ahøjutena sago metle. Na hokweinawa Jissime gali motlola, “Bu tëbo lalë.”

³¹ Na Jisas bu betelë tujutë na bume tobame fa tëtamë na huju tëtamë. Na tëbo latliwa tëbe. Na kë mësebë, bume hi wesibi ahøjume tletëme.

Jisas lebutako onehobë ato sle totometëme

³² Atome hwi olëna, bu tëbo atona onehome Jisas belë mëtlesuma. Na bu mata ahwane kë tëbo mototomebë onehome sei mëtelëfamëtla.

³³ Na feilawa oneho kë life mago, bu Jisas këme kë tafa tëglebë lo ino mëta loko mëtletlëya.

³⁴ Na tako ato elili mëta kë tafa mëtlabë onehome Jisas sle totome. Na bu ahwane tëbome hobë ato mago hehë tletëme. Na kë ahwane bu melowene lamëtla, “Jisas bu Gotobë nëba.” Këme nëgema Jisas bume lëkle totome, “Sobo asa gëgali elo, matëbe.”

Jisas bu Galili provins mëta asë tëbelëfa

³⁵ Na Jisas fole olëmu huju tle na tëkakli. Na ho jwa tabo elë tuju. Na Gotome gëgali tlelële.

³⁶ Na tokwafe Saimon bu huju tle na Jissime hana hwi tlole. Na këme buna, bubë yabena, Jissime hohwi mëtëtatla.

³⁷ Na bu hwi motlola na megali motlola, “Feilawa oneho jume hohwi mëtätëyo.”

³⁸ Kwe Jisas bume megali latlome, “Matëbe. Bo kë lifewa ita hana nuguwime. Sebo fli life elë lolime kë mëgebebë telë manuja. Bo Gotobë gali të nanogoutatemëme. Bo këme tisi.”

³⁹ Na bu Galili provinsbë tokwëtokwë life elë asë tëbelëfa. Na bubë jowa jowa lotu lowa tëkaklutëme na Gotobë gali mana të tëtagutëme. Na bu ahwane tëbo onehobë ato mago hehë tlagutëme.

Jisas bu ato juba jubawa kë tëgehobë home sle totle

⁴⁰ Na ato juba jubawa kë tëgehobë ho Jisas belë tisitle. Na bu sëkefo miti tafa tletle na anisasana gali tlole, “Jisas, ju tole lalëye, ju bobë ato lalowa sle etatenëme.”

⁴¹ Na Jisas bume maninibomu metletle na tobana lu totle na gali tlole, “Bo tole nanelë, ju lalowa tafa egleme.”

⁴² Na kë tëbo bume lakilewa tetokwakle. Na bu lalowa tafa tle.

⁴³ Na Jisas bume jine tlële na anisasana megali tlole,

44 “Ju aholokwane ele. Jubë ato lalowa kë lëgëbetëbë, ho lime asa gali elole. Matëbe. Jubë lowene mëta fwa eholeme. Na jubë ato, lotu home lebotane eoutatleme. Na ju bume sipsip kleli afabo ejuwelëleme, Moses fene gali tle. Na bu kë afabo Gotome ahojume nalëgletleme, bu sinikibo hëhë nalogoleme. Na iniwa oneho bu melowene namëgletëyome, ‘Jubë ato lalowa lëbetëfe.’”

45 Kwe kë ho, bubë ato kësle tëgletlebë gali, iniwa onehome të tëtätëme. Na iniwa oneho Jisas kësle logotlebë gali walowene mëtletla. Këme nëgeme Jisas lifeku mëta hana tafa tle, oneho bume sosalë mogotlalime nëgeme. Na bu ho jwa tabo mëta këme tafa tle. Na iniwa oneho li life li life mago, bu betelë mutujukefëtla.

2

Jisas ato mogowa home sle totle

1 Na tokwafe, li olëna, Jisas Kaperneam lifewa ita tuju. Na iniwa oneho Jisas ita kë tigusibë gali aholokwane mëtla.

2 Na lebutako oneho Jisame lowa loko motokweitla. Lo lakewa tle, afloko hana tëbe tle. Na ino ëfo mata afloko hana tëbe. Na Jisas Gotobë gali onehome të tëtätëme.

3 Bu gali mana të tëtagulebëë, na nilimalë ho, ato mogowa këtëgëbetlebë

home Jisas belë ni labukuna mëtlesula.

4 Bu Jisas belë loliwa yafe mëtlesula kwe lebutako oneho tafa mëtlame nëgeme na lo wake tle, na bu loliwa hana mëtlesula. Na bu lo leli elë mëtehilikola na anabali sësakëfa mëtla, na ni labuku mëta kë ni tëgëbebë ato mogowa home mana tuku mëtëmalitaya Jisasbë elebo li elë.

5 Na kë ho melowene lamëtla, “Jisas ebë ato mogowa home lalowa sle logotlemefe.” Na këme tuku mëtëmalitaya. Na Jisas bubë lowene wahwi tlotëme na kë ato mogowa home gali tole, “O nëba iko. Bo jubë tëbo aholokwana wafi ti nëletë.”

6 Na Gotobë tafa sle gali lowene sle mëgletlabë ho fli, kë lo mëta tafa mëtelula, na bubë lowene nawa melowene lamëtla,

7 “Bu këha gali fëyeme gali lëlene? Bu tëbo homu. Bu Gotome fëyeme boblo lotlene? Bu Gotoha natafa lëglemene? Hee! Ho kwe tëbo lowene aholokwana hana ti lëgleme. Hanane mu. Goto kwe fëyemene, tëbo lowene aholokwana ti lëgleme.”

8 Na Jisas bubë lowenena hokweinawa lalowenewa tletëme. Na bume takune tlome, “Sobo këha lowenena fëyeme lowene elone?”

9 Bo bume megali noglolëna, ‘Bo jubë tëbo aholokwana wafi ti nëletë,’ sobo habelë lowene lalone, bo bubë tëbo lowene aholokwana ti nëletelë. Sobo kë wesibi hwi hana elolo. Kwe bo bume megali

noglolëna, 'Ju huju ele, na jubë lowa ejume.' Na bu huju lëleme, kwe sobo melowene naegelome, 'Bo Gotobë kalëlegona ho, na bo ato tëbona home lalowa sle nogotlëme. Na bo mata hobë tëbo lowene aholokwana lalowa ti nëgletelëme.'

¹⁰ Bo metole nanelë, sobo melowene egelome, 'Bo kë nëgebë kwe, Gotobë life mago ho, bo ebë life mëta, kalëlegona homu nëtabë. Na bo tëbo lowene aholokwana lalowa ti nëgletemëme.'" Na Jisas ato mogowa këtëgëbetlebë home hwi tlole na gali tlole,

¹¹ "Bo jume gali nolë, ju huju ele, na jubë ni labuku glo elëme na jubë lowa ejume."

¹² Na kë ho lahujawa tle na bubë ni labuku glo tle na hokweinawa latugujuwa. Na iniwa oneho klelego memëtla na bu Gotome fleflesu mëtletla na megaliwa mëtla, "Goto lale mu." Na bu gali mëtla, "Ëtani sebo ebëha wesibi hwi hana tlole. Hanane mu."

Jisas Livaime gali tlole, "Ju bome nagi enënë"

¹³ Jisas bu Galili lake tu helefowa ita tuju. Na feilawa oneho bu belë mitisitla na bume Gotobë gali tē tētātēme.

¹⁴ Bu tugujubëë na bu Alfiusbë nëba, Livaime, hwi tlole, bu takis lo tokwëfo mëta tafa tle. *Livai bu takis baliti glo tēglekēfēbē ho.* Na Jisas bume gali tlole, "Ju bome nagi enënë." Na Livai

fotokoke na bume nagi telëkakle.

¹⁵ Tokwafe Jisas Livaibë lo mëta hi tle. Na feilawa takis baliti kë glo mëglekefëyabë ho na fli tēbo enëne, bu tēbo lowene mëta kë tafa mëglabë, bu Jisasna bubë lowene esogo mëglelëtlabë hona hi mëtla. Feilawa këha tēbo lowene esogo mëglelëlabë ho bu Jisasme nagi mëtëlëkakla.

¹⁶ Na Gotobë tafa sle gali lowene sle mëgletlabë ho fli, bu lolime tafa mëtla. Bubë weniji melë lëgëbetëmelalële, Farisi. Na bu Jisasme mehwi motlola, takis baliti kë glo mëglekefëyabë ho name na fli tēbo lowene kë esogo mëglelëlabë ho name hihi tlelëme. Na bu Jisabë lowene esogo mëglelëtlabë home takune motloma, "Bu takis baliti kë glo mëglekefëyabë ho name na fli tēbo lowene kë esogo mëglelëlabë enënename fëyeme hi lëlelëmene? Bu tēbo enëne mu."

¹⁷ Jisas bu kë gali aholokwane tle na kë Farisi home gali tlome, "Dokta bu tēbo jwa mëglabë home hana sle logotomeme, hanane mu. Ho tēbo mëglabë kwe fëyemene, dokta bume fwa sle logotomeme. Na bo kë fenene, bo lale lowene kë esogo mëglelëlabë hobë lowene sleme nane tisi. Weye. Bo tēbo lowene kë esogo mëglelëlabë hobë lowene sleme tisi."

Jisas bu hi wesibi kë yo mëtlabë loweneme gali tle

18 Kë olëna, Jonbë lowene esogo mëgletlabë ho, na Gotobë tafa sle gali lowene sle mëgletlabë ho, Farisi ho, bu hi wesibi yo mëtla, bu Gotome lowene sle namëgletlame. Na fli enëne bu Jisame takune motlola, “Jonbë lowene esogo mëgletlabë ho na Farisibë lowene esogo mëgletlëmabë ho, bu hi wesibi fëyeme yo melekefëyane kwe jubë lowene esogo mëlelëtëyobë ho, bu hi wesibi yo jwa fëyeme melekefëyane? Hi wesibi yo lowene, ebë lale lowene mu.”

19 Na Jisas bume gali tlome, “Ho mëse sei lëglena, bubë yabenino hi wesibi yo mëglamene? Weye. Hanane yo mëglame. Kë ho bubë yabenina mana tafa mëglana, kwe bu hi wesibi hana yo mëglame. Hanane mu. Bu flefesuna feilawa hi wesibi hi mëglame.

20 Kwe tokwafe, bu kë home bu mago mëglelulana, kwe mana bubë hi wesibi hana hi mëglame. Bu iniwa yo mëglame.”

21 Jisas megali latlome, “Ëtanifu lowenena, tiho lowenena iniwa hana sago mëgleme.” Na bu ebëme mewafle gali tle, “Ho li bu hëno ëho, tiho ëho katabona hana susu logotleme. Bu melë lëglena na kë ëho swa logotlana kwe kë tiho ëho katabobë fofogo lëgleme na hëno ëhome laholëyewa lotleme na fuluju takowa lëbeme.

22 Na ho li bu tiho wain taba liji tu, ëtanifu mëmë kleli jibona kë blëge blëge mototlabë botolo mëta hana wë logotleme. Bu melë lëglena, na kë tiho wain taba liji tu sëse lëglena, kwe ëtanifu mëmë kleli jibo botolome bule logotleme na wain taba liji tu na mëmë kleli jibo botolona iniwa tëbo mëgleme. Ho li bu këha melë hana logotleme. Weye. Bu tiho wain taba liji tu, tiho mëmë kleli jibo botolo mëta wë logotleme. Na bu hana bule lëgleme.”

Jisas bu tafawa olëna wege jwa namëglame loweneme gali tlome

23 Jisasna bubë lowene esogo mëgletlabë hona tafawa olëna nuju kukuwa tlelume. Na bubë lowene esogo mëgletlabë ho, witi liji hi wesibi alëge alëge tëtälëwa motokouja.

24 Na Gotobë tafa sle gali lowene sle mëgletlabë ho, Farisi ho, bu Jisame takune motlola, “Ëje, ebë tafawa olë. Jubë lowene esogo mëlelëtëyobë ho, bu tafawa olëna nuju mago hi wesibi fëyeme tëtälë mëlane, bu tafawa olëna fëyeme wege mëlane? Moses bu ëtani kë lowenebëme tako hehë latle.”

25-26 Na kwe Jisas bume gali tafu tëtätëme. “Sobo, sebobë ëtanifu eso ho, Devitbë anebo gali, Gotobë bogo mago, hwi sle hana elotelone? Gotobë bogo megali lala, ëtanimu, Abiatar bu lotu lo mëta wege mëglabë

enënebë eso ho tafa tle. Na Devit, buna kë tafa tēglelēmebë ho, bu hi wesibi hanane na foneme gigli memēṭla. Na Devit bu Gotobë lowa tēkaklu na bu Gotobë naba li mēṭa kë gogwa mēṭlabë bletë nage hi tle. Kë bletë nage, Gotome kë gogwa mēṭletlabë, atwati oneho hana hi mēḡlame. Lotu lo mēṭa kë wege mēḡlabë howa hi mēḡlame. Kwe Devit kë bletë nage fa totle na bume kë tafa tēglelēmebë home sa tētātēme na bu iniwa hi tlelēme. Kwe bu tēbo lowene nane mēṭla. Na bobë lowene esogo mēḡlelēṭenabë ho mata, bu tēbo lowene nane mēṭla.”

²⁷ Na Jisas bu li gali megali tloṃe, “Goto onehome afina blēge blēge totome na tafawa olē mana blēge totle, onehome lēḡaitame nalēḡleme, kë olēna tafawa namēḡlame.

²⁸ Kwe bo kë nēgebë kwe, Gotobë life mago ho, bo tafawa olēbë eso ho nēṭabë.”

3

Jisas, tafawa olēna, toba tēbona home sle totle

¹ Jisas bu lotu lowa ita tēkaklu. Na toba tēbona ho kë mēṭa tafa telule.

² Na Gotobë tafa sle gali lowene sle mēḡletlabë enēne, Farisi enēne, bu Jisame mana hwiwa motlola. Bu melēme hwi motlola, Jisas bu kë toba tēbona home, tafawa olēna sle logotlemene o hanane. Bu melowene namēḡlame, “Jisas bu tafawa olēna kë toba tēbona home sle logotlena, kwe bu Jisame

eso hobë toba elē gwa mogotlame.”

³ Na kwe Jisas bu kë toba tēbona home gali tlole, “Ju ebelē esi.”

⁴ Na Jisas bume takune tloṃe, “Gotobë gali ebelē lēḡēbelalēlene? Sobo habelē lowene lalone? Sebo tafawa olēna lale lowene lalowa esogo nēḡlelēlamene o tēbo lowene esogo nēḡlelēlame. Sebo tafawa olēna onehome lalowa nēḡaitamamene, bu lale tafa namēḡlame o sebo onehome lalowa heḡē nēḡletēmamene, bu gigli namēḡlame.” Kwe bu gali tafu hana mēṭētṭla, bu hilego memēṭla.

⁵ Na Jisas bume hwi tlagume na lowene nawa wame tloṃe. Kë enënebë lowene kalēleḡo lēḡletēmeme nēḡeme na bu kë toba tēbona home hana maninibo mēṭletla. Na Jisas bu këme wabelē tletēme. Na bu kë home gali tlole, “Jubë toba elili etokwakle.” Na kwe bu toba elili tetokwakle na bu lalowa tēbetle.

⁶ Na hokweinawa Gotobë tafa sle gali lowene sle mēḡletlabë ho, Farisi ho, bu lotu lo mago totoho mēṭēkaka. Na bu eso ho Herotna ilawa kë wege mēḡlabë enēnena loko mutulelēya. Na bu blalo, Jisame gali mana fafa mēṭētṭla. Jisame mogo nalē, tēkle namogotlame.

Feilawa oneho lake tu helefome loko mēṭlelēya

⁷⁻⁸ Jisasna bubë lowene esogo mēḡlelēṭlabë hona, kë life kile mēṭla na Galili lake

tuwa mutuja. Na feilawa oneho Jisas belë mitisitla. Fli Galili provins mago na fli Judia lifate mago na fli Idumea lifate mago memitisitla lamëtla. Na fli Jerusalem lifate mago na fli Tair na Saidon lifate mago mata memitisitla lamëtla. Na fli Jordan tu jelëfo elë kē tafa mutulabë, bu mata mitisitla. Kē feilawa oneho bu Jisas kē sle tētagumbë gali aholokwane mëtla na bu belë mitisitla.

⁹ Na Jisas bubë lowene esogo mëglelëtlabë home gali tloime, “Feilawa onehomu bome ekë sosalë mëtana. Te, sobo ihe loliwa ehijo. Na oneho bome feilawa sosalë mëgëtanana kwe bo kē ihe mēta fe nanëkakëme.”

¹⁰ Ètani Jisas bu feilawa tēbo atona home sle tētagume. Kēme nēgeme feilawa tēbo atona oneho, bu kofekofe sigli memëtletlogwaya, Jisasme atome lu namogotlame, bubë tēbo sle nalëgëtatëmeme.

¹¹ Na ahwane Jisasme hwi moglolenana kwe bu kē tēbo mogotomebë enëneme buna iniwa lifeme mitigwëyame na anisasana gali motlola, “Ju Gotobë nēba.”

¹² Kwe Jisas bu ahwaneme itaita lëkle totokwefëme na anisasana gali tlokwekëme, “Sobo onehome megali asa elokwefomo, bo Gotobë nēba, matëbe.”

Jisas we ita tēle home aniji tloime

¹³ Jisas fatiniwa tokwale. Bu metole latle, home aniji

naloglomeme, buna tafa namëglame. Na bu kē home gali telokwakëme. Na bu belë mitisiya.

¹⁴⁻¹⁵ Na bu we ita tēle home aniji tloime, buna tafa namëglame. Bu metole latle, bu Gotobë gali tēme jine nalëgëbelëkwakëmeme na Gotobë afutukuna, iniwa lëlëmeme, ahwane tēbo hehë namëgletëmame. Na bume Aposel weniji fëfë totome. Aposel weniji ebë melë Gotobë gali mëgehila ho.

¹⁶ Bu we ita tēle home aniji tloime. Bu Saimonme aniji tlole. Na Jisas bume li tiho weniji fë totle, Pita.

¹⁷ Na bu Jems, Sebedibë bowene name, na bolijamo Jon name aniji tloime. Na Jisas bu kē tlemalëme li weniji fë totome, “Boanerges.” Ebë wenijiye bu kē gali fenene, “Matafaha kale.”

¹⁸ Na bu Andru, Filip, Bartolomyu, Matyu, Tomas, Jems, Alfiusbë bowene, Tadius na Saimon name aniji tloime. (Saimon bu Selot ho, na bu metole latle, “Li life mago ho bu seme eso home asa tafa malëletëna.”)

¹⁹ Na bu Judas Iskariotme mata aniji tlole. Judas bu tokwafe Jisasme wame home kē yo loglomebë ho.

Bu mweniji lamëtla, “Jisas bu Belsebulna wege melowa”

²⁰ Jisasna bubë lowene esogo mëglelëtlabë hona lowa mutuja. Na lebutako oneho mana ita loko metletëtëmame nēgeme, na Jisas na bubë

lowene esogo mëglelëtlabë hona bu kë nalë hi hana mëtla.

²¹ Na Jisasbë weife mago enëne bu Jisas hi jwa këtëglebë gali aholokwane mutula na bu nome mitisitla. Oneho bu gali mëtla, “Bu wafi yaya lële.”

²² Na Gotobë tafa sle gali lowene sle mëgletlabë ho, Jerusalem lifate mago kë mëtetujulabë, gali mëtla, “Tëbo alibahobë eso ho, Belsebul, (bubë li weniji Satan), bu Jisasbë lowene mëta lelutabetle. Na bubë kalëlego Jisame lëlëkefle. Na bu kë kalëlego nawa ahwane hehë lëlekefëtëme.”

²³ Na Jisas gali telokwakëme na bu betelë mutuja. Na bume wafle gali të tëtätëme. Bu gali tle, “Satan bubë wege enëneme habëna kë lëglëmeme? Weye. Hana kë lëglëmeme.

²⁴ Na jowa lifate mago enëne, bu bwa bwa lowene mëta tafa mëglana na momogli mëgëtayana kwe bu tafa sle hana mëglame.

²⁵ Na jowa lo mëta kë tafa mëglabë enëne, bu bwa bwa lowene mëta tafa mëglana na momogli mëgëtayana kwe bu tafa sle hana mëglame.

²⁶ Na Satanbë ilawa mago alibaho mata, bu blalo wame mëglana na bwa bwa lowene mëta tafa mëglana kwe bu tafa sle hana mëglame. Hanane mu. Bu tëbomu mëglame.”

²⁷ Na bu wafle gali mana të tëtätëme. Bu megali tle, “Tokli ho bu kalëlego hobë

lowa hana felokwakeme na wesibi mana tokli lolëme. Weye. Hanane. Anë bu kë kalëlego home tabana afina lalei lotleme, kwe bubë lo mago wesibi mana toklime glo lëgletleme.”

²⁸ Bo some nëgali gali nanëlëyo, Goto, bu iniwa tëbo lowene, na iniwa gali, oneho Gotome kë tëbo gali moglolibë, aholokwana ti lëgletëme.

²⁹ Kwe oneho, bu Gotobë Amtëtombame tëbo gali moglolana, kwe Goto kë tëbo lowene aholokwana hana ti lëgletëme. Kë tëbo lowene bu mëta unaunalëme tei lëbetëmemu.

³⁰ Jisas bu kë gali këme gali tlome. Bu megali motlolame nëgeme, “Tëbo alibaho bubë lowene mëta lelutabetle.”

Jisasbë bota na bolijamonina yalëne

³¹ Na kë nalëwa, Jisasbë bota na bolijamonina kë lo elë fwa mëtla. Bu lo li mëta mitlija na bu Jisame mana gali mëtelulukwakla, bu belë ligisitëme nalëgleme.

³² Lebutako oneho bume iniwa tafana hwagënë mototla. Na bume gali motlola, “Aholokwane elë! Jubë bita, blijamoni, bimilunina, mana kë tafa melukokwëya na jume kë gali melulubakëyo.”

³³ Na Jisas bu gali metafu tëtätëme, “Bobë beë na keinëbalenino bu habëha enënene?”

³⁴ Na bume kë hwagënë mototlabë onehome hwi tlagume na gali tlome, “Sobo

hwi elo! Bobë beëninino na keinëbalenino ekë tafa mla.

³⁵ Oneho bu Gotobë lowene esogo mlelëkefëtlabë, bu bobë beëninino na keinëbalenino na oneglëni.”

4

Jisas mewafle gali latlome, “Ho aoba liji nujume sike lële”

¹ Jisas Galili lake tu helefo mëta onehome gali ita të tëtätëme. Na feilawa oneho bume loko mëtlelëla na bume goglo mëtëtagulame nëgeme. Na Jisas ihe mëta këme fe tëtëkake na tafa tle. Jisas ihena lake tu mëta temule na oneho tu helefo mëta tafa motokouja.

² Na Jisas onehome feilawa wafle gali të tëtätëme.

Na bu këme megali tlome.

³ “Sobo aholokwane elo. Ho li nujuwa luju, aoba liji sike nalëgleme.

⁴ Bu aoba liji sike lëkou, na fiye alëgeme mitigotle na fole misibë lahiwa mele.

⁵ Na fli aoba lijiye anijina flëke mëta mitigo. Kë flëke feilawa hanane. Këme nëgeme bu hokweinawa këme hulu mëtle.

⁶ Kwe tokwafe kliji bu fëfalewa u tle na kë aoba olo maklëfa mëtle. Bubë tayafo su sle hana mototome, këme nëgeme lakokowa metëbe.

⁷ Na fli aoba lijiye, ikiji taba wayo mëta mititigo. Na kë ikiji taba bubule mëtle na tatako mëtle na kë aoba olome lamu mototome. Na bu liji hana fu mëtle.

⁸ Na fli aoba lijiye bu lale flëkememu mititigo. Na bu lale hulu sle lamëtle na liji fu

mëtle. Fli 30 liji fu mëtle na fli 60 liji fu mëtle na fli we lujuafe we liji fu mëtle.”

⁹ Na Jisas megali latlome, “Sobo ebë gali aholokwane egelona, lowene sle saeletelo.”

Jisas bu fëye lowene nane, wafle gali kë të tëtätëmebëye

¹⁰ Iniwa oneho wafi mutuja. Na Jisasbë lowene esogo mëglelëtlabë ho we ita tële, na kë enëne Jisasna kë tafa mëtlabë, bume takune motlola, “Ju seme kë wafle galibë të sle etatëna.”

¹¹ Na Jisas bume gali tlome, “Ëtani Goto, bu onehome kë tafa lëglelëmebë gali olafa hana tletëme. Kwe ebë olëna bu kë gali some waolafa lëtatëyo. Kwe oneho bu Goto kë tafa lëglelëmebë lifate mëta tafa hana mëglame, bu Gotobë wafle gali aholokwanewa lamla kwe lowene sle hana mëgletlame.

¹² Këme nëgeme, ‘Bu mana itaita hwi mëglekefëyana kwe wesibi lowene sle hana mëgletlame. Na bu gali itaita meaholokwane mëglekefëyana kwe gali wayobë lowene sle hana mëgletlame. Bu wafle gali lowene sle mëgletlana kwe tëbo lowenebë kile mëglame na Gotobë lale lowene mëta tafa mëglame, na Goto bubë tëbo lowene aholokwana ti lëletëmeme.”

Jisas bu aoba liji wafle gali wayobë të sle tëtätëme

¹³ Na Jisas bubë lowene esogo mëglelëtlabë home gali tlome, “Sobo ebë wafle gali

mumu egëbetelona kwe sobo fli wafle gali habëna lowene egletemomene?

¹⁴ Bo some aoba liji wafle gali wayobë të sle nëgetatëyome. Kë ho, bu aoba liji kë sike lëkoubëye, bu Gotobë gali të logotlebë home lëlekujuwa lële.

¹⁵ Na aoba liji alëgeme kë mitigobëye, bu Gotobë gali aholokwane mëglabë enëneme lëlekujuwa mëletëme, kwe Satan ligisibë na kë gali bubë lowene mago lafawa letokwakëtëme.

¹⁶ Na fli oneho, bu kë aoba liji anijina flëkeme mitigobë fenene. Bu Gotobë gali aholokwane mla na hokweinawa lowene mletla na fleflesu mletla.

¹⁷ Kwe Gotobë gali bubë lowene mëta lëgëbetëme sle hana lëletëme, olo wesibi tayafoha su sle hana motometëme. Na kë gali bubë lowene mëta tako lëbetëme hana lële. Kwe bu Gotobë gali lowene mëgletlame nëgeme, fli enëne bume këme tëbo mogotomame. Na bu Gotobë gali hokweinawa lamëglëkëlawa.

¹⁸ Na fli enëne, bu kë aoba liji, ikiji taba wayome kë mitigobë fenene. Kë enëne bu Gotobë gali aholokwane mla,

¹⁹ kwe bu ebë life mago wesibime fwa tako lowene lamëletëma, na feilawa baliti gogwame fwa tole mla, na bu feilawa lale wesibi mëmaune lamëlëma. Na kë wesibiwa Gotobë gali lëlamu mëtatëme. Na bubë lowene eflëbowa

hana lëbetëme na lale lowene lëbetëme hana lële.

²⁰ Kwe fli enëne, bu kë aoba liji lale flëke mëta kë mitigobë fenene. Bu Gotobë gali aholokwane mla, na bu kë gali bubë lowenena kiki motla na bubë lowene mëta eflëbowa lëbetëme. Fli oneho bu lale lowene sogë takoha lëbetëme na fliye lale lowene takoha lëbetëme na fliye lale lowene takomu lëbetëme.”

Oneho bu lamo fiji tabo, iseku lokwalëfe hana gwa mëgëtayame

²¹ Na kwe, Jisas bubë lowene esogo mëgletlëlabë home gali tlome, “Oneho bu lamo fiji tabo, iseku o ni labuku lokwalëfe hana gwa mëgëtayame. Hanane mu. Bu masei mëta gogwa melekefëya.

²² Iniwa wesibi ëho kë mëglebë, kwe tokwafe olafa mëgleme. Na iniwa wesibi oneho ëho kë motomabë, kë mata, tokwafe olafa mëgleme.

²³ Sobo ebë gali aholokwane egelona, lowene sle eletelome.”

²⁴ Na bume ita megali latlome, “Gali sobo kë aholokwane egelobë, lowene sle egletelome. Sobo ebë gali aholokwane sle egelona na tako lowene slemu eletelona, kwe Goto some tako lowene lëglëyome na mata ita fli lowene lëlëyome.

²⁵ Ho bu Gotobë gali lowene sle lëletlena kwe ita Goto bume fli lowene lëglëleme. Kwe ho bu Gotobë gali lowene sle hana lëletlena

kwe Goto kë hobë tokwëfo lowene kë lëglëkakëtleme.”

Olo wesibi kë hulu mëglebë waflë gali

²⁶ Goto kë tafa lëglëlëmebë oneho, bu kë fenene, Ho bu olo wesibi nuju mëta sike lële.

²⁷ Na bu klabë nini tëbagu na kljjina huju tlekëfe na asë tle, bubë wege fa nalogotleme. Na kë olo wesibi hulu mëtle na tatakò mëtle. Kwe kë ho bu olo wesibi hulume lowene hana tletëme.

²⁸ Ebë flëkebë wesibiwa. Flëke bu lalemu nëgеме, olo wesibi këme hulu sle mële na liji këme fufu mële. Laba afina foke mële na tokwafe tahweji fata mële na liji mana fu mële.

²⁹ Na liji niglijji mëglena, kë ho bu kosina tëtletë lotome, bu niglijji mëglebëme nëgеме. (Ebë waflë galibë wayo gali bu melë lëgëbetlelalële. Goto kë tafa lëglëlëmebë oneho, bu feilawa fata mëglame kwe sebo ëje hana hwi noloma na lowene hana nëletëma.)

Mastet inilu lijibë waflë gali

³⁰ Na Jisas ita gali tlome, “Sebo habelë gali nëglame Goto onehome eso home ke tafa lëgletëmebë. Fëye wesibi hane? Bo some ebë, waflë gali të nëtatëyo.

³¹ Goto onehome eso ho kë tafa lëglëlëmebë, bu mastet inilu liji fenene. Fli inilu liji bu tokwëtokwë ha, kwe mastet inilu liji bu tokwëtokwëmu. Ho bu kë tokwëtokwë mastet liji life mëta sike lëleme.

³² Bu sike lëleme, na bu hulu mleme, na takowa mlememu. Fli inilubë ato bu tokwëtokwëha kwe mastet inilubë ato bu tatakomu. Na kë inilubë tikefo tatakomu so mëbelëkakëmemе. Na fole, kë tatakò tikefo tlilego tabo mëta, lo lalowa megigliji mogoleme.” (Goto onehome eso ho kë tafa lëglëlëmebë, bu kë mastet liji fenene. Ebë olëna Goto tëlewa onehome tafa lëlelëme, kwe tokwafe bu feilawa onehome tafa lëglëlëmemе.)

Jisas bu waflë galiwa të tëtatëme

³³ Jisas bu onehome feilawa waflë gali të tëtatëme, bubë lowene niijiwa.

³⁴ Bu onehome gali të sle hana tëtatëme. Bu waflë gali nawa të tëtatëme. Kwe bubë lowene esogo mëglelëtlabë home fwa tafa tlelëkefëme, bu waflë gali mana të sle tëtakefëtëme.

Jisas bu flelume kale tlole na latliwa tëbe

³⁵ Na kë olënawa, taboklë, Jisas bubë lowene esogo mëglelëtlabë home gali tlome, “Te manuja. Sebo lake jelëfo elë su manëkaka.”

³⁶ Na Jisasbë lowene esogo mëglelëtlabë ho, onehome hune mototoma, na Jisas kë tafa lëglebë ihe mëta fëfe mëtla. Na bume mëtlelula. Na fli oneho mata buna fli ihena mutuja.

³⁷ Na tako flelu tisi, na lake tu ihe elë okokli tokoke, na tu ihe mëta tëtafu lëgleme kofene.

³⁸ Na Jisas eso hwesutane mëta gwa totle na ihe elo

mëta mana ni tëbe. Na bume ni mago huju mototla, na gali motlola, “Tisa, ju seme maninibo hana eletënane? Sebo tume susuglu nëglame ekëne.”

³⁹ Na Jisas huju tle na flelumë kale tlole, “Teiyo, kaju ebe.” Na tume mata, kale tlole, “Teiyo.” Na kwe flelu latliwa tëbë na tu sosogli mata lakujuwa tëbe.

⁴⁰ Na bubë lowene esogo mëglelëtlabë home takune tlome, “Sobo fëyeme uli elone, bome lowene sle hana eletënane, hee?”

⁴¹ Na bu tako uli memëtla na blalo gëgali mëtla, “Euowe! Ebë habëtabo hone? Fleunana tuna bubë gali aholokwanewa lamlolefe.”

5

Jisas bu gëgëme këtëglebë hobë ato mago ahwaneme hehë tletëme

¹ Jisas na bubë lowene esogo mëglelëtlabë hona Galili lake tu su mëtëkaka na Gerasabë walujuwa fwa mutula.

² Na Jisas ihe mago fe tëkake na ahwane kë tetëbo mogotlebë ho matëmatë life mago bu belë tisi tle.

³ Kë ho matëmatë life mëta fwa nini tëbekëfe. Ho liha bume senë tabana lei hana totle.

⁴ Olëli olëli bu toba kaba yafe gëgelo mototokwefëmetla, kwe bubluju latotokwefëme. Na senë tabana yafe lei mototokwefla, kwe eluluwa latotokwefëme. Na ho liha bume hana fa logotleme. Bu

afutuku feilawa tëgleme nëgëme.

⁵ Kljina klabëna bu matëmatë life mëta na fatini mëta measasëwa latlekëfe. Na bu afëflei tlekëfe na bubë ato anijina tëtëlë tëbetëfale.

⁶ Bu Jisasmë hwi telëkakle na fëka tokweitle na sëkefo miti latafawa tletle.

⁷⁻⁸ Na Jisas gali tlole, “Ahwane ju ebë ho mago eiju.” Na bu kë gali aholokwane tlole na bu Jisasmë feilawa galina këme gali tlole, “Jisas ju tako kalëlegona Gotobë nëba. Ju bome habelë egëtanëmene? Bo jume Gotobë wenijina gali nolë. Ju bome asa tëbo etanë.”

⁹ Na Jisas bume takune tlole, “Jubë weniji fë etle.” Na bu gali metafu tëtatlë, “Bobë weniji feilawa ho. Sebo lebutako nëgëme.”

¹⁰ Na bu Jisasmë anisasana itaita gali tlokwefle, “Ju ahwane kakë life elë asa jine elëkakëme.”

¹¹ Na kwe lebutako kleli bu fatini mëta lolime memonei mëtla.

¹² Na ahwane Jisasmë gali motlole, “Ju seme kë kleli belë jine elëkakëna, nëkaklutëma nanëglame.”

¹³ Na Jisas gali tlome, “Sobo lalewa eyeu.” Na ahwane kë home kile mototle na kleli belë mëtëkaklutëme. Kë kleli këniji mitlibe 2,000. Na bu fatini mago lake tu elë fëka mëtëmalita na tu mëta lasusugluwa mëtla.

¹⁴ Na kleli mëtlëma ho bu mëtlëbouja. Na kë gali li life li

life asë mëtletlëla. Na lebutako oneho mutuja kë wesibi hwi namoglomame.

¹⁵ Na bu Jisas belë fwa mutula na ahwane ëbame kë tetëbo mototlebë home mana hwi motlola. Bu lalë ëho wateho na këna tafa tle. Na bubë eso hanane yaya tletle. Na bu uli memëtla.

¹⁶ Na ho bubë nabana kë hwi motlomabë wesibime, ho flime gali të mëtëtatëma. Ahwane kë tetëbo mototlebë hobë gali na klelibë gali mata të mëtëtatëma.

¹⁷ Na oneho Jisasme hehë mëtletla. Bubë life mago luguju nalëgleme, li lifewa.

¹⁸ Jisas bu ihe mëta fe tle. Na ahwane ëbame kë tetëbo mototlebë ho anisasa gali tlole, “Bona manëyeuwo.”

¹⁹ Na kwe Jisas këme tole hana tletle. Na bu kë home gali tlole, “Jubë lifewa ejumo na feilawa wesibi Goto jume kë sle tëgetabë gali na jume kë maninibo tëgletëbë wesibi jubë ilawa mago home të eoutatëmeme.”

²⁰ Na fe tëkake, kë ho tuju na Dekapolis magobë life elëme, Jisas bume kë sle togotlebë gali të tëttagutëme. Na iniwa oneho bu aholokwane motlola na kle memëtletla.

Jisas bu gli këtëglebë nëbame huju tëtamë na ko kë tëglekëfebë mëse sle tle

²¹ Na kwe Jisas ihena lake tu jelëfowa ita su tëkake. Na tu helefo mëta lebutako oneho loko mëtletlëla.

²² Na lotu lobë eso ho tisi. Kë hobë weniji Jairus.

Jisasme hwi tlole, na elebolime latitigotlewa.

²³ Na bume anisana takune tlole, “Bobë tamo nëba tako tëbo lalë, gli egleme ekëyo. Ju bobë lowa lalowa egisimene na toba gwa etatëme, ato titika naegleme na mana lalowa tafa naegleme.”

²⁴ Na Jisas buna ilawa mëtëyeu.

Na feilawa oneho mata esogo mëtlagula. Na Jisasna gëgeniwa mutuja.

²⁵ Na jowa mëse kë onehona mutuja. Kë mëse bu we ita tële tlibutu ko tle.

²⁶ Na kë mëse lili dokta belë yafe asë tëbelëfa, kwe bubë ato titika sle hana tletë. Na bubë baliti doktame yawe latlometëme. Na kwe bubë tëbo mana tëbetë. Titika hana tle.

²⁷ Na kë mëse bu Jisasbë kë ato sle gali aholokwane tletëme. Na bu onehonabë Jisasnabë nagi këme tuju. Na bu Jisasbë leluju elëme tujutle. Na bubë ëho tobana lu tëtattle.

²⁸ Na bu melowene tëgleme nëgeme, “Bo tobana ëho mëta lu nogotlëna, bobë ato titika nalëgleme.”

²⁹ Bu ëho lu tëtattle na ko latewa tle. Na bubë ato melowene tletle, “Tëbo hana nelëfe, watitika nelëfe.”

³⁰ Na Jisas bu melowene latle, “Bobë kalëlego bome wali wafi kile lëtanëfe.” Këme nëgeme, bu swaya tle, na takune tle, “Bobë ëho ya lu lëtanëne?”

³¹ Na bubë lowene esogo mëglelëtlabë ho bume gali

motlola, “Ju hwi hana elomene, lebutako oneho juna gëgeniwa kē egiyeubëye. Na ju fëyeme gali elene, ‘Bobë èho ya lu lëtatënëne?’”

32 Kwe Jisas hwi tëbebokwake.

33 Na kē mëse lowene tle, “Bubë kalëlogo bobë ato mago tëbo wasle lëtatënëfe.” Na bu uli tëglebë, lili namëtë. Na Jisasme loliwa tisi tle. Na elebolime sëkefo miti tafa tletle. Na bu Jisasme iniwa gali ble tëtatlë.

34 Na Jisas gali tolë, “Mola, ju bome lowene sle egletënëme nëgeme, jubë ato kēme titika lëletë. Na ju eiju. Tutune asa ele, lalowa tafa eoule. Na jubë tëbo tei sle lëletë.”

35 Na Jisas mana gëgali tlelëbëë, na ho, Jairusbë lo mago wofu mana fata tlelëkakile. Na Jairusme gali motlola, “Jubë nëba wagli elo. Ju tisame ita welili asa eletle. Matëbe.”

36 Kwe Jisas bubë gali boblo tëtatëme. Na lotu lobë eso ho, Jairusme gali tlole, “Ju tutune asa ele, bome fwa lowene sle egletënëme.”

37 Na bu feilawa home hehë tletëme, bume esogo jwa namëglagulame. Pita, Jems, na bolijamo Jonname fwa tlelume.

38 Na bu Jairusbë lowa fwa mutula. Na Jisas, bu se lego aholokwane tlome na ye lego mata aholokwane tlome.

39 Jisas lowa tëkaklu na gali tlome, “Sobo fëyeme ye elone? Sobo fëyeme se etlone? Kë nëba gli hana elo.

Ni tekwe egëbe.”

40 Kwe bu Jisasme tako soso memotlola. Na Jisas bume lo mago hehë tletëme, “Sobo kē mago këkle ekako na eyeumo.” Na Jisas kē nëba bolijayaname botaname na bubë lowene esogo mëglelëtlabë ho aomalë, kēme fwa tlelëkakume, nëba mogo kēme egëbebë lowa.

41 Na Jisas toba mëta fa tëta na bubë galina megali tolë, “Talita kumi.” Ebë galibë wayo melëgëbelalële, “Mësenëba tokwëfo, bo jume gali nolë, ju huju ele!”

42 Na bu lahujuwa tle na kē lo mëta asë tëbelëfa. Kë nëba bu we ita tële tlibutu këniji tafa tle. Na bu kēme hwi mëtla, na klelego memëtla.

43 Na Jisas bume gali tlome, “Sobo ebë wesibi ho lime asa gali elolo. Na sobo bume hi wesibi elëyome.”

6

Nasaret life mago oneho Jisasme tëbojiwa motlola

1 Jisas kē lifate kile tle na bubë lifatewa Nasaretwa tuju. Na bubë lowene esogo mëglelëtlabë ho nagi mëtlëla.

2 Tafawa olëna bu lotu lowa tuju na bu Gotobë gali onehome mana të tëtatëme. Na lebutako oneho, bu kē gali aholokwane motlola, na bu klelego memëtletla na gali mëtla, “Kë ho bu kē gali na kē lowene hamago fa lotlene? Na bu kē tiho wesibi na kē klelegowa wesibi bu melë kē logotomebë, habelë lalotomene?”

³ Sebo melowene nanëletla, 'Kë ho bu lo gliji howa. Bu Mariabë nëba. Na bu Jems, Josep, Judas, Saimon nabë bolijahafe. Na bubë bomolunino bu sebona tafa nëlafe. Bu sebobë life mago hofe na bu kë lowene hamago fa lotlene?' Bu megali mëtla, na bume tëboijiwa memëtletla.

⁴ Kwe Jisas bume gali tlome, "Iniwa fli life mago oneho bu Gotobë lowene mago gali të lotokweflebë home tole mletla na gali mëtla, 'Kë ho bu lale homu.' Kwe bubë life mago oneho, na bubë ilawa mago oneho, na bubë weife mago oneho bume tole hana mletla na bu melowene hana mletla, 'Bu lale ho.' Hanane mu."

⁵ Na Jisas bu kë life mëta feilawa klelegowa wesibi blëge hana totometëme. Hanane. Bu jowa, jowa tëbo atona onehome fwa, toba gwa tëttagutëme na sle totome.

^{6a} Na bume kë lowene sle jwa mëgletlabë onehome tako tutune latletëmemu.

Jisas bubë lowene esogo mëglelëtlabë ho, Gotobë gali têname na hobë tëbo ato slename jine tëbelëkakëme

^{6b} Na kwe Jisas bu kë lifate mëta gali të tëbetokwakle.

⁷ Na Jisas bubë lowene esogo mëglelëtlabë ho we ita tële kënijime gali telokwakëme na bu mitisitla. Na bu tlemalë tlemalë home jine tëbelëkakëme. Na bu wesibi fenene blëge lotome, këha afutuku bume gwa

tëtatëme. Bu ahwane onehobë ato mago kë afutukuna hehë namëgletëname.

⁸ Na bu këme mana tafa mëtla, na gali tlome, "Sobo egëyeuna, sobo feilawa wesibi asa ehoujo, asë lijiwa egehousjome. Sobo hi wesibi, musu, baliti musuna asa ehoujo. Matëbe.

⁹ Na sobo juba jibowa ehwëyome, kwe sobo hihijika ëho asa ehoujo. Ato mago ëhowa egehousjome."

¹⁰ Na bume ita gali tlome, "Sobo li lifatewa tuhu egulona na ho some no lëglëyona, sobo kë lo mëta fwa tafa elome. Sobo kë lo mëta tafa egelobëë, na ita mana eyeume.

¹¹ Na sobo li lifewa tuhu egulona na ho some nëno hana mëglana na sobobë gali aholokwaneme tole hana mëglana, kwe sobo kë life lakilewa elome. Sobo kë life kile egelona, kwe sobobë juba mago flëke bubë naba li mëta bu elome. Bu some këme hwi mëlëyome na melowene namëglame, 'Fëyeme tëbo nilitayane? Goto seme tëbo lëgëtanamefe.'"

¹² Na kwe bubë lowene esogo mëglelëtlabë ho mana mutuja. Na bu iniwa onehome megali mëtlaguma, "Sobo tëbo lowene aholokwana ti elome na lale lowenewa esogo elelëelome."

¹³ Na bu feilawa ahwane, onehobë ato mago hehë mëtlagumetëma. Na bu lëkaluwa welë tu tëbo atona onehome tefo mëtëttagumetëma na bume sle

mototoma na bu lalowa tafa mëtla.

Eso ho Herot bu Jisasmeweniji latle, “Home kë baptais togotomebë, Jonfe”

¹⁴ Iniwa lifatebë oneho, bu Jisas onehome kë sle togotomebë gali waaholokwane motokouja. Na eso ho Herot bu kë gali mata aholokwane tle. Fli oneho bu megali motokouja, “Jisas ebë kwe, onehome kë baptais togotomebë Jon, tekwe nëge, matëmatë mago huju tle. Këme nëgeme, kë klelegowa wesibi melë blëge këme lotome.”

¹⁵ Na fli oneho megali lamëtla, “Ebë kwe, Elaija tekwe nëge, matëmatë mago huju tle.” Na fliye kwe megali lamëtla, “Ebë kwe, Gotobë lowene mago gali të lotokweflebë ho, tekwe nëge, matëmatë mago huju tle. Bu ëtanifu Gotobë lowene mago gali të motokweflabë ho fenene.”

¹⁶ Na eso ho Herot bu kë gali aholokwane tle na gali tle, “Bu home kë baptais togotomebë Jonfe. Èbame bu wame home boblo logotomebë home gali tlole, na bu tuju na Jonme mou lokwati tlë tujetle. Na bu matëmatë mago wahuju tle.”

¹⁷⁻¹⁹ Ètani eso ho Herot bu bolijamobë, Filipbë, mëseme hijika totle. Kë mësebë weniji Herodias. Jon Herotme itaita megali latlokwefle, “Blijamobë mëseme kë hijika egotlebë, kë lale lowene nane. Weye.” Këme nëgeme,

Herodias bu Jonme tako enisusu latletlemu na bume mogo nalë tëkleme tole tletle. Herodias bu Jonme wame togloleme nëgeme na eso ho Herot bu home këme jine tlële, Jonme senë tabana lei lotleme na kalabusu lowa tuku lëleme, Herodias bume tëkle egotlelime.

²⁰ Eso ho Herot bu Jonme melowene latletle. “Bu lale homu na Gotobë lale lowene esogo lëglelëtlebë ho.” Na bu Jonme uli këme tletle na bume ululu sle këme totle, bubë mëse Herodias tëkle egotlelime. Bu Jonbë gali yafe aholokwane tole, maninibona tëbo metletle na tako tutune metle. Kwe bu Jonme aholokwaneme tako tole latletlemu.

²¹ Na kë nalëwa, eso ho Herot bu feilawa hi wesibi loko tëtamë, bota bume këna fu totlebë olëna fleflesu hi nalëglelëmeme. Na Herodias bu melowene sle latle, “Bo metole nanelë, kë fleflesu hi nalë, Jonme mana tëkle nogotlëme, mogo nalë.” Na Herotbë gavmanbë eso ho, na wame home boblo mogotomabë eso enëne na Galili provins magobë letitabo ho bu kë fleflesu wesibi hime mitisiya.

²² Kë enëne bu mana hi motokouja na Herodias boko mana tisi tëme, elefi naegleme. Na kë layo mëse bu elefi tle. Na eso ho Herot na buna kë hi mëtla bë ho bu kë elefi hwi motlotëya, mëmaune lamëtlëtëyamu na bubë elefime tako fleflesu memëtletëya. Na eso ho bu kë layo mëseme këme gali tolë,

“Ju fëye wesibi tole eletlene? Ju wesibi tole laletlëye, bo jume kë wesibi nëglëme.”

²³ Na eso ho Herot bume iniyafememu gali tolë, “Bo jume nëgali galimemu gali nolë. Ju wesibi tole laletlëye, bo jume kë wesibi nëglëme. Na ju metole eglena, bobë iniwa wesibi fu notometëme na jume nëlëme, na bobë lifate mata tlë nētātēme na jebelëfu jume yo nolëme, ebë lalowa, bo tako tolemu nanelë.”

²⁴ Na kë layo mëse bu tuju na botame takune tolë, “Bo bume fëye wesibime gali noglolëmene?” Na bota këme gali tolë, “Ju bume, home kë baptais togotomebë, Jonbë esome gali eglonëme, kë eso nalëglëme.”

²⁵ Na këme kë layo mëse bu eso ho belë ita hokweinawa tuju na gali tlole, “Bo metole nanelë, ju eli, home kë baptais togotomebë, Jonbë eso mou lokwati tlë etatle, na kë eso bletë ëhou mëta tuku elëme na kë manogwa bome enënëme, hwi nanoglolëme.”

²⁶ Eso ho bu kë gali aholokwane tolë na bu tako maninibo metle. Kwe bu kë hi tēglelëmebë oneho, bubë iniyafe gali aholokwane motlolame nëgeme na bu këme tiniji tletëme. Këme nëgeme bu kë mësebë gali hana boblo lētātēme.

²⁷ Na këme, bu wame home boblo logotomebë home, gali tlole, “Ju ejume, na Jonbë eso mou lokwati tlë etatleme na bome ehitenëme.” Na kë wame home boblo logotomebë ho, bu kalabusu

lowa tuju na Jonbë eso mou lokwati tlë tētātle.

²⁸ Na bu Jonbë eso bletë ëhou mëta gwa tētātle na tehile na layo mëseme tlëkakiji. Na layo mëse kë eso tehule na botame tujuwelë.

²⁹ Na Jonbë lowene esogo mëglelëtlabë ho bu Jonme kë tēke toglolebë gali aholokwane mëtla na bu mutuja na Jon mogome fa mototla na aniji fuluju matëmatë mëta gwa mutujetla.

Jisas bu hi wesibi 5,000 home sa tētātēme

³⁰ Jisas, Gotobë gali tēme kë jine tēgelëkakëmebë ho, ita mitisiya na Jisas mëta loko mëtlelëkakëjaya. Na bu iniwa wesibi kë mëtlabë na onehome kë tē mëtëtagutëmabë gali Jisame tē mëtëtatla.

³¹ Kwe feilawa oneho mitisikefëtëmame nëgeme na Jisasna bubë lowene esogo mëglelëtlabë hona bu kë nalë këme haha tafu hana mototla na hi hana mëtla. Na Jisas bubë lowene esogo mëglelëtlabë home këme gali tlome, “Te, mana manuja, hojwa tabo elë. Tafa sle nanëglame.”

³² Na bu ihe mëta fëfe mëtla na buwa hojwa tabo elë mutuja.

³³ Na feilawa oneho bu hwi mëttaguma na lowene mëtla, “Jisas lalëlelumefe, bubë lowene esogo mëglelëtlabë home.” Na këme nëgeme lilife lilife mago oneho bu Jisasna kë mutujabë life elë këme fëka motokouja na kë lifewa

bu afina fwa mutula. Na Jisas bubë lowene esogo mëglelëtlabë home nagi fwa tuletëme.

³⁴ Këme nëgeme, Jisas bu jelëfowa fwa tule na bu kë feilawa onehome hwi tlome. Bume mehwi latlome. Bu sipsip kleli, ho lëglëme jwabë fenene. Ho bume hana taitame. Na bu bume tako maninibo këme tletëme. Na bume feilawa gali të tëtätëme.

³⁵ Tokwafe, taboklë mu, Jisasbë lowene esogo mëglelëtlabë ho bu belë mitisiya na bume gali motlola, “Ebë taboklëmu na ebë hojwa life. Sebo hi wesibi hamago fa nogotlamene? Hanane mu.

³⁶ Te, ju onehome mana jine ebelëkakëme. Loli life elë fwa matliwaya, hi wesibi balitina glo namëglame.”

³⁷ Kwe Jisas bubë lowene esogo mëglelëtlabë home gali tafu tëtätëme, “Hi wesibi bume sobo eglëmome.” Na bu Jisasme takune motlola, “Eëë, ju melowene lalene, ‘Sebo bletë nage 200 balitina glo nëlamene na bume nëlëmame?’ Sebo këha baliti hanane.”

³⁸ Na bume takune tlome, “Habenuju bletë nage mëbetëyone? Sobo hwi ejuwelëmo.” Na bu hwi mutujuwelëma na ita mitisiya na Jisasme gali motlola, “Sebo tobali bletë nage mëbe na mo tële mëbe.”

³⁹ Na Jisas bume gali tlome, “Sobo lale agosaba mëta loko elagujome na tafa

ekoujome.”

⁴⁰ Na bu iniwa tafa motokouja. Fli tafa mëtlabë we lujafe we oneho na fli tafa mëtlabë 50 oneho.

⁴¹ Na Jisas kë tobali bletë nage na tële mo glo tle na hwi tokwake na Gotome lale gali tlole, “Ebë bletë nagenana mona yaha fëyeme enënane?” Na bu klelegowa wesibi blëge totle na kë bletë nage fufu totome na bubë lowene esogo mëglelëtlabë home tlëme, onehome sa namëgëtatëmame. Na bu kë tële mo mata fufu totome na sa mëtëtagutëma.

⁴² Na bu iniwa hi mëtla na imo sosolo mototoma.

⁴³ Na bu bletë nage lënena, mo lënena we ita tële basketë musu mëta mëteselokwaya. Na kë basketë musu ëfowa lakalewa mëtle.

⁴⁴ Feilawa oneho bu kë bletë nage hi mëtla na hobë tabëi kë niji 5,000 bu onename nëbalename hana tabei mëtla.

Jisas bu lake tu matawa asë tole

⁴⁵ Na kë nalëwamu, Jisas bubë lowene esogo mëglelëtlabë home, gali tlome, “Sobo ihe elë fëfe elome na jelëfo elë Betsaida lifatewa su ekakome.” Na bu iniwa onehome jine tëbelëkakëme. Buwa lëtabe nalëgleme.

⁴⁶ Onehome afina jine tëbelëkakëme, na bu fatiniwa tokwale, Gotome gëgali nalogolelëleme.

⁴⁷ Na atome hwi olëna, bubë lowene esogo mëglelëtlabë ho lake tu ku

mëta ihena kakëha mëtemula na Jisas lake tu helefo mëta tlibe.

⁴⁸ Na Jisas bu hwi telokwakëme, bu ihena yafe yegu motokouja, kwe flelu ihe yelu boblo tégëtatëmeme nêgeme, na ihe alabuju këme tiwatëme. Tokwafe, fole olëna Jisas lake tu matawa wa bu belë tisi tëme. Bu sigli lëgetokwakëmeme kofene.

⁴⁹ Kwe bubë lowene esogo mëglelëtlabë ho bume hwi motlola, tu matawa wa asë tole. Na bu meweniji lamëtla, “Alibahowa.” Na bu afëfleina memëtla.

⁵⁰ Na iniwa bume hwi motlola na uli memëtla. Kwe Jisas bume hokweinawa gali tlome, “Sobo uli asa elo. Bo tekwe nêge. Sobo lalowa tafa elo.”

⁵¹ Na bu ihewa fe tokwake na buna mëtëtabëya. Na flelu latliwa tékake. Na bu klelego memëtla.

⁵² Jisas tobali bletë nage feilawa onehome sa tëtätëmena, bubë kalëlego olafa tëtätëme. Kwe bubë lowene esogo mëglelëtlabë ho kë lowenebëme lowene sle hana mëtletla, aholokwana timu mëtla. Këme nêgeme tu matawa wa kë asë tégëlebë na flelu kë tli tégëbebëme klelego këme mëtletla. Bubë lowene mana yaya tletëmemu. Bu bubë kalëlego, lowene sle jwa mëgletlame nêgeme.

Jisas bu feilawa tëbo atona onehome Genesaret lifate mëta sle totome

⁵³ Jisas, bubë lowene esogo mëglelëtlabë hona, lake tu su mëtëkaka na Genesaret

lifatewa fwa mëtëtekekëya na ihe kesi mëtëtaya.

⁵⁴ Bu ihe mago, helefo elë fëfe motokwaka, na hokweinawa oneho bu Jisame hwi motlola na wenyane mana mëtëselëla sle mëtla.

⁵⁵ Na ho bu kë lifate li mëta kë lëgëbagubë lifatewa fëka fëka mëtëbelëfaya na onehome gali mëtlaguma. Na oneho, bu Jisas kë tafa tuglebë gali, aholokwane mëtla na bu tëbo atona onehome sanëneme gogwa mëtla na bu belë mëtlesuma.

⁵⁶ Na iniwa tatakoli lifate elë Jisas bu kë tuhu tokoubë, oneho kë mëta loko mëglelëkefëyabë lifeku elëme, tëbo atona onehome kë belëme mëtleluma. Na bu Jisame anisasana gali motlola, “O masiwafe, kë tëbo atona oneho, jubë ëho mëta fwa lalowa lu mëtomene, sle namëglame.” Na iniwa oneho melë kë mëtlabë, bu laslewa mëtla.

7

Gotobë tafa sle gali homubë tafa sle galime boblo lalotle

¹ Farisi enëne na Gotobë tafa sle gali lowene sle mëgletlabë enëne fli, Jerusalem lifate mago kë mitisiyabë, bu Jisame loko mëtlelëtlä.

² Na bu mehwi motloma, Jisasbë lowene esogo mëglelëtlabë ho fli, bu hi wesibi hi mëtla kwe bu toba afina swa swa hana motoma, bosemnenibë tafa sle gali fene lëbetëme.

³ Farisi enëne na fli Juda life mago enëne bu bubë bolijafujunibë lowenewa esogo mëtletëtëma. Bu melowene mëta tafa mëtla. “Toba afina swa hana motomana, bosenlenibë tafa sle gali fene tëbetëme, kwe bu hana hi mëglame.”

⁴ Na bu maketwa mugujana na migisiyana na tu tetefo jwa mëglana, bosenlenibë tafa sle gali fene tëbetëme, kwe bu hana hi mëglame. Na bu lili lowene mëta tafa mla, bosenleni fenene tafa mëtla. Bu mëlamelekefëya, bu blete, kabo, sospenë, na ni labuku mata swa motokwefëma. Bu bosenlenibë lowenewa esogo metletëtëmame nêgeme.

⁵ Na Farisi enëne na Gotobë tafa sle gali lowene sle mëgletlabë enëne, bu Jisame takune motlola, “Jubë lowene esogo mëglelëlabë ho bu sebobë semlenibë lowene esogo jwa fëyeme mëlelëlane? Bu hi wesibi manawa fëyeme hi mëtlekefëyane? Bu toba afina swa hana motomana, bosenlenibë tafa sle gali fene lëbetëme.”

⁶ Na Jisas bume gali tlome, “Ëtani anebo, Gotobë lowene mago gali të totokweflebë ho, Aisaia, bu some nêgali galime gali tolëyo. Sobo sosogëna hofe bu fene yahi tle. Bu Gotobë gali meyahi latle, ‘Kë oneho bu bome bubë ëfalëbo nawa mefë mëgëtanana, “Goto lale homu.” Kwe bu bome bubë lowenena iniwa tole hana mëtletëna, na lowenena, lowene sle hana mëtletënamu.

⁷ Bu melë lamëtla, bu onehobë tafa sle galiwa të mototokwefla kwe mesosogëna lamotloma, “Kë tafa sle gali ebë Gotobë gali.” Bu bome megali kë moglonabë, “Goto ju lale ho, sebo jume tako tole nanëletëyo,” kwe bome lowene sle hana mëletëna bubë lowene mëta. Këme nêgeme bu kë galina bome blawa gali molona.”

⁸ Jisas ita megali tle, “Sobo Gotobë tafa sle gali aholokwana wati telo. Eholo hana elo. Na sobobë bisemlenibë lowenewa eholo. Sobo Gotobë gali, bisemlenibë lowenena lëlamu latatelo.”

⁹ Na Jisas bume fli gali megali latlome, “Sobo Gotobë tafa sle gali kaiselo boblo etokweflo na sobobë lowene mëta fwa etabo. Sobo kë lowene tako lëbeteyo.

¹⁰ Ëtanifu ho Moses gali tle, ‘Sobo bitaname, blijayaname boblo asa etomo na bubë galiwa esogo elëletëmome.’ Na bu li gali megali tle, ‘Ho botaname o bolijayaname tëbo gali loglomena kwe ho bume mogo nalë tëkle mogotlame.’

¹¹ Moses kë gali megali latlëyo kwe sobo megali latlekefo, ‘Ho bolijayaname botaname megali loglomena kwe ebë lalowa, “Ayana beëna masiwafe, ebë wesibi some nêgaitome fene kwe bo ebë wesibi Gotome wafi aniji tlometelëfe.”’

¹² Ho bu kë gali, bolijayaname, botaname gali loglomena, na bu botaname,

bolijayaname, lëgaitame jwa nëgena sobo megali egelome, 'Ebë lalowa. Bu Gotome wafi aniji tlometle.'

¹³ Sobo kë gali megali egelona, sobo bisemlenibë lowene mago galiwa të etatemo na Gotobë gali këna lëlamu latlo. Na sobo feilawa tëbo wesibi këha memelë latokwefëmofe."

Jisas, bu Gotobë naba lime, home kë tëbo mogotomebë wesibime, gëgali tle

¹⁴ Na Jisas onehome gali telokwakëme na bu mitisitla na bume ita gali të tëtatëme, "Sobo iniwa aholokwane elome na lowene sle eletelome.

¹⁵ Iniwa wesibi, ho bu kë hi mëglekefëyabë, kë wesibi Gotobë naba lime home tëbo hana mogotomeme. Hanane. Kwe wesibi hobë lowene mëta kë lëgelubebë na lëkaklibë, kë wesibiwa Gotobë naba lime home bu tëbo motomeme.

¹⁶ Ho bu aholona, bu ebë gali sa aholokwane sle lële."

¹⁷ Jisas kë onehome hune totome na bubë lowene esogo mëglelëtlabë hona lowa mëtëkakluja. Na bubë lowene esogo mëglelëtlabë ho bume kë wafle gali wayome takune motlola.

¹⁸ Na bume gali tlome, "Sobo mata wayo gali yaya laletelone? Sobo kë wafle gali lowene hana elone? Sobo aholokwane elo. Iniwa wesibi, ho bu kë hi mëglekefëyabë, kë wesibi Gotobë naba lime home tëbo hana mogotomeme.

¹⁹ Këha wesibi hobë lowene elë nane muju.

Weye. Bu aliji elë fwa muju na gu namela. Këme nëgeme bu home tëbo hana mogotomeme." Jisas bu kë galina seme melë lëlekuju latletëna, sebo lalowa iniwa hi wesibi hi nëglame. Hi wesibi bu seme Gotobë naba li mëta hana tëbo mëgëtaname.

²⁰ Na Jisas bu ita gali tle, "Wesibi hobë lowene mëta lëgelubebë na lëkaklibë, kë wesibi Gotobë naba lime home buwa tëbo mogotomeme.

²¹ Bo këme gali nelë, hobë lowene mëta kë lelubebë wesibi bu melë: Tetëbo lowene, lisë lowene, tokli lowene, home mogo nalë tëkle lowene,

²² hona mëseme lisë eglelëbë lowene, mëmaune lowene, sosogëna lowene, aholabu lowene, gëglë lowene, li home gali fa lowene, home agalëklebë lowene na yayaha lowene.

²³ Kë iniwa tëbo lowene, hobë lowene mëta melubetëme na mëkakli na Gotobë naba lime home bu tëbo motomeme."

Fonisia lifate mago mëse bu Jisame lowene sle latletle

²⁴ Jisas, bubë lowene esogo mëglelëtlabë hona, kë lifate kile mëtla na Tair lifatebë tokwëfo lifekuwa mutuja. Bu fwa mutula na Jisas bu li lowa hwelutuwa tēkaklu, oneho bume sosalë mogotlalime. Kwe bu mogweliha hana tafa lëgleme, oneho bume wahwi motlola.

25-26 Na mëse li bu megali aholokwane tloime, “Jisas bu lo mëta kë tafa lële.” Na bu hokweinawa bu belë tuju tle. Ahwane tëbo kë mësebë nëbabë ato mëta lëtabetëme nëgame na bota Jisas belë hokweinawa këme tisi tle na elebo lime bubusu tletle. Na bu Jisasme anisasana gali tlole, “Jisas, ju ahwane tëbo bobë nëbabë ato mago kë elëkakëtë.” Kë mëse bu li lifate mago mëse. Bu Siria lifate mago na bubë lifekumu Fonisia. Bu Juda lifate mago mëse hanane.

27 Na Jisas bu melowene latle, “Juda life mago oneho bu nëbaleha na fli life mago oneho bu amale ha. Na bo Juda lifate mago onehome afina naitamëme.” Na bu kë mëseme wafle gali latolë, “Bo nëbalebë hi wesibi amaleme afina hana nëglëmëme. Weye. Bo nëbaleme afina nëlëmëme.”

28 Kwe kë mëse bume gali tafu têtatle, “O tako ho, jubë gali nëgali gali. Kwe ama mata, lo malu mëta kë tafa mëlekëfebë, bu nëbalebë lëne hi wesibi, kë mitigokëfebë mehihi mëlekëfe. Na ju bome mata lëne hi wesibiha aitanë.”

29 Na Jisas bume gali tolë, “Ju bobë gali lale lowenena tafu etatenëfe. Këme nëgame, kë ahwane tëbo jubë nëbabë ato mago wakile lëtamë, jubë lowa ita lalowa ejume.”

30 Na kë mëse bubë lowa ita tuju. Na bubë nëba ni labuku mëta hwi tolë na bu lalowa tafa tletë. Kë ahwane bume wakile tëta.

Jisas bu aholo titiji tabo na gali mumu tabo home sle totle

31 Kë nalëwa Jisas Tair lifatebë tokwëfo lifeku kile tle na Saidon lifate sigli têtagule na Dekapolis provins sigliwa têtagule, na Galili lake tu elë fwa tule.

32 Na bu aholo titiji tabo na gali mumu tabo home bu belë mëtlesula. Na bu Jisasme anisasana gali motlola, “O masiwafe, jubë toba kë hobë ato mëta gwa etatle, sle nalëgleme.”

33 Na Jisas kë home no tlële na onehome hune mëtelo. Na Jisas toba ku bubë aholo fuluju elëme sei tlëmetle. Na tokwafe bubë toba ku mëta nagutaba tihele tle na kë hobë aleji mëta gogwa tletle.

34 Na Jisas heven lifewa hwi tokwake, na tako maninibo lowenebë haha tafu totle. Na bu kë home, bubë galina, megali tlole, “Efata.” Kë galibë wayo melë lëgëbelalële, “Tika eletelo.”

35 Na kë hobë aholo latikawa metletle na bume gëgali lëglebë lowene tisitle na bu lalowamu gëgali tle.

36 Na Jisas onehome hehë latletëme na fli onehome gali moglomalime, “Bo kë nogotlëbë wesibime fli onehome asa gali elomo. Matëbemu.” Bume yafe hehë tletëme, kwe bu boblo lamototla, na Jisas togotlëbë wesibime gëgali motokoutla.

37 Na oneho kë hobë sle gali, aholokwane mëtla, na klelego memëtletla. Na bu gali mëtla, “Euowe! Iniwa wesibi bu melë kë lotomebë,

lalowamufe. Bu aholo titiji tabo hobë aholo titika lotometëme na gali mumu tabo enëneme mata sle lotometëme.”

8

Jisas bu 4,000 onehome hi wesibi tlëme

¹ Kë olëna, feilawa oneho Jisame ita loko mëtletlëta. Na bu hi wesibi hanane. Na Jisas bubë lowene esogo mëglelëtlabë home gali telokwakëme. Na bu mitisitla. Na Jisas bume gali tlome,

² “Bo ebë onehome maninibo nanëletëmë. Bu bona aona olë tafa nëla na bu hi wesibi jwa.

³ Na bo bume fonoba jine nëgelëkakëmëna, kwe bu alëgeme foneme nabasahoba mëglame na migitigwëyame. Fli bu kakë mago mitisiyame nëgeme.”

⁴ Na bubë lowene esogo mëglelëtlabë ho, bume takune motlola, “Sebo hi wesibi hamago fa nogotlamene, kë onehome kë nëglëmame? Ebë afloko mëta ho tafa jwa, mëglame nëgeme.”

⁵ Na Jisas bume takune tlome, “Sobo habenuju bletë nage mëbetëyone?” Na bu megali motlola, “Sebo tobali ita tële kënijiwa nehwëyafe.”

⁶ Na Jisas onehome gali tlome, “Sobo tafa ekoujome.” Na bu kë tobali ita tële bletë nage glo tle, na Gotome gali tlole, “Weë, ebë bletë nage, yaha fëyeme enënane.” Na bu klelegowa wesibi blëge totle

na kë bletë nage fufu totome na bubë lowene esogo mëglelëtlabë home tlëme. Na bu onehome sa mëtëtagutëma.

⁷ Na bu tëlewa mo mata mëtehwëya. Na Jisas bu kë mo glo tle na Gotome gali tlole, “Weë, ebë mo yaha fëyeme enënane.” Na bubë lowene esogo mëglelëtlabë home gali tlome, “Sobo ebë mo mata, onehome sa etatëmo.” Na bu kë mo mata sa mëtëtatëma.

⁸ Na oneho bu yafe hi mëtla, kwe bubë imo sosolo mototomame nëgeme, na lëne mana sigenë metletëme. Na kë lëne hi wesibi mëtëselokwaya na bu tobali ita tële basketë musu tëtafu mototoma.

⁹ Kë onehobë tabei këniji 4,000.

Na Jisas onehome jine telëkakëme.

¹⁰ Na kwe, bubë lowene esogo mëglelëtlabë home ihe mëta fe tlelëme, na Dalmanuta lifate elë mutuja.

Farisi enëne, Jisame takune motlola, klelegowa wesibi blëge lototlëbëme

¹¹ Bu Dalmanuta lifatewa fwa mutula na Farisi enëne bu Jisas belë mitisitla na mana Jisasna kofe kofe gali mëtletlogwaya. Bu Jisame sogëname su namogotlame fene na gali motlola, “Ju seme klelegowa wesibi li lebotane etatëna. Sebo jume melowene nanëgletëyome, ‘Goto jume kë jine tëgelëbakëbë hofe.’”

¹² Na Jisas wabelë tle na gali tlome, “Sobo, ebë olëna

kë tafa egelobë oneho, bome klelegowa wesibi lebotane nogotlëbëme, fëyeme takune enonane? Bo some nëgalimu nanëlëyo, bo klelegowa wesibi lebotane hana nogotlëme, sobo melowene naegletëname, ‘Goto bome jine tlënëfe.’ Matëbe mu.”

¹³ Na bume hune mototoma, na ihe elë fëfe mëtla, lake tu jelëfo elë su namëkakame.

Jisas bu Farisi enënebë na Herotbë tëbo loweneme ululu sle galime gali tlome

¹⁴ Bu lake tu mëta mana mëtemula na bubë lowene esogo mëglelëtlabë ho bletë nage mëtehouja hana mëtla, aholokwana ti memëtla. Bu jowa bletë nagewa, ihe mëta tëbe.

¹⁵ Na Jisas anisasana gali tlome, “Sobo Farisi enënebë na Herotbë bletë nage sëse wesibime ululu sle saelo.”

¹⁶ Na kwe bubë lowene esogo mëglelëtlabë ho bu blalo gëgali mëtla, “Bu kë gali fëyeme gali lëlene? Sebo bletë nage nëgehwëja jwa nëglame nëgeme na bu këme gali lëlenawa.”

¹⁷ Kwe Jisas bubë gali walowene tletëme, na bume megali tlome, “Sobolalo megëgali fëyeme elone, ‘Sebo bletë nage alujawa.’ Sobobë lowene lëgëbetëyo hana lëlene? Hee! Sobobë lowene yaya lalëletëyone? Hee!

¹⁸ Sobo nabana, kwe sobo hwi hana elomo. Na sobo aholona, kwe sobo aholokwane hana elo. Bo bletë nage kë sa tégëtatëmëbë lowenebëme, lowene hana

elone, aholokwana fëyeme ti telone?

¹⁹ Èbame, bo tobali bletë nage 5,000 home kë fufu totometëmëbë, lili kë mëglebë bletë nagenä, habenuju basketë musu tëtäfu totomone?” Na bu gali motlola, “Basketë musu we ita tële këni.”

²⁰ “Na èbame, bo tobali ita tële bletë nage 4,000 onehome kë fufu totometëmëbë, lili kë mëtëglebë bletë nagenä, habenuju basketë musu tëtäfu totomone?” Na bu gali motlola, “Basketë musu tobali ita tële këni.”

²¹ Na bu gali tlome, “Sobo kë wesibi wahwi tloföfe kwe sobo aholokwana fëyeme ti elone, bo some këha wesibi melë lalowa nëgetatëyome.”

Jisas bu naba titiki tabo home, Betsaida life mëta, sle totle

²² Jisas, bubë lowene esogo mëglelëtlabë hona, Betsaida lifewa tuhu mëtla. Na naba titiki tabo home bu belë mëtlesula. Na Jisäme anisasana gali motlola, “Masiwafe, ju ebë home toba gwa etatle, sle nalëgleme.”

²³ Na Jisas kë naba titiki tabo hobë tobame fa totle na bume lifeku mëglëbo elëme fe tlelëkake. Na bubë naba mëta nagutaba tihele tletle. Na bu toba kë home gogwa tletle na takune tlole, “Ju wesibi hwi elome o hanane?”

²⁴ Na kë ho hwi tle na gali tlole, “Bo home asëna mehwi nanolomë kwe bume ti fene hwi nolomë.”

25 Na Jisas toba bubë naba mëta ita gogwa tletle. Na kë ho ita hwi tækake, na bubë naba lalowa mëtëbetle. Bu iniwa wesibi hwi sle tlagume.

26 Na Jisas bume bubë lowa jine telëkake. Na gali tlole, “Ju lifeku elë asa ekaklu.”

Pita megali latle, “Jisas, ju ebë ho kë nëgebë, Goto jume kë aniji tëglebë ho, onehome nëno naegleme”

27 Jisas bubë lowene esogo mëglelëtlabë hona, Sisaria Filipai lifate li mëta kë mëgëbagubë lifatewa asë mëtëbelëfaya. Bu alëge mëta mana asë mëtla, na mana takune tlole, “Oneho bome habelë lowene lamëletënëne?”

28 Na bu gali metaflu mëtëtatla, “Fli howe megali lamla, ‘Onehome kë baptais togotomebë Jon, tekwe nëge, matëmatë mago huju tle.’ Na fliye megali lamla, ‘Elaija, tekwe nëge, matëmatë mago huju tle.’ Na fliye megali lamla, ‘Ëtanifu Gotobë lowene mago gali të totokweflebë ho, tekwe nëge, matëmatë mago huju tle.’”

29 Na Jisas bume takune tlole, “Na sobo ee, sobo bome habelë lowene lalone?” Na Pita bubë gali tafu tëtatlë, “Ju ebë ho kë nëgebë, Goto jume kë aniji tëglebë ho, onehome nëno naegleme.”

30 Na Jisas bume meheheë latletëme, “Sobo kë galibëme onehome asa gali elomo. Matëbe.”

Jisas gali tlole, “Bo gli nëgelëme na huju nelëme”

31 Jisas bubë lowene esogo mëglelëtlabë home, meokokwe sle wafi tlole, “Tokwafe bome, Gotobë life mago home, lebutako elili na hobota migisitenëme na bo kë mëta tafa nelëme. Na lotu letitabo ho na Gotobë lo mëta wege mëglabë eso enënëne, na Gotobë tafa sle gali lowene sle mëgletlabë ho, bome hehë mëgletëname na mogo nalë tëkle mëtaname. Na bo tële olë nebëme kwe aona olëbëye huju nëgelëme.”

32 Na bu kë gali të sle tëtätëme. Na Pita Jisasme mëglëbo elë fe tlelëkake na bume anisasana këkale tlole, “Ju këha gali fëyeme gali elene? Kë galime asa gali ele. Matëbemu.”

33 Na Jisas swaya tokoketëme na bubë lowene esogo mëglelëtlabë ho flime hwi tlole na Pitame anisasana këkale tlole, “Ju Satanha gali elë. Ju kë mago fe ekake. Ju këha wesibi lowene egletëmena, kwe ju Gotobë lowene mëta nane tafa ele, weye, ju hobë lowene mëta fwa tafa ele!”

34 Jisas bu onehome na bubë lowene esogo mëglelëtlabë ho name gali telokwakëme. Na bu mitisitla na bume gali tlole, “Ho bome na bobë loweneme esogome tole lëglëna kwe bu ebë life magobë lale wesibi, bu kë tole lëgletëmebë, aholokwana timu sle sa lële na glime ulijwamu lëleme. Ho bume wame gali moglolana na bume mogo

nalë tëkleme gali mëglana, bu uli jwa lëleme na bome mana esogo lëlenënëme.

³⁵ Ho bu melowene lëglena, ‘Bo Jisame esogo nëgletlëna fli ho bu bome tëbo mëgëtaname.’ Na bu, bubë ato uli lëgletlëna na bome hana esogo lëglenënëna, kwe këha ho bu tëbo liglitame. Kwe ho bu bome lowene lëgletenëna na Gotobë lale anebo galiwa lowene lëgletlëna na bubë ato uli hana lëgletlëna kwe kë ho bu hana tëbo liglitame. Ho bu kë home mogo nalë tëkle mogotlana, kë gli sle nane lële, weye, bu unaunalëme lale tafa lëgleme.

³⁶ Ho bu ebë life mago iniwa wesibi glo lëglena, na kë ho bu hel life mëta tëbo liglitana, kwe kë wesibi bume habëna mëgaitalemene? Weyewa. Hana mëgaitalememu. Bu blawa glo lële.

³⁷ Ho bu Gotona unaunalëme tafabë, wesibina hihijika lëglemene? Weye. Hanane mu.

³⁸ Tokwafe, bo kë nëgebë kwe, Gotobë life mago ho, bo ita nigisime. Bo bobë ayabë klijiha, kë u lëglebë elulegona na Gotobë enselna iniwa nigisime. Oneho bu Gotome tëbojiwa mëgletlame na tetëbo lowene mlame. Na bu mago ho li, bo kë okokwe noglëyobëme na bome tiniji lëgletenëna kwe tokwafe bo nigisina, bo mata kë home kofayame tiniji nëgletelëme.”

tloime, “Bo some nëgali galime gali nolëyo. So mago emëta kë eglibobë bu mana neme na Goto onehome kë tafa lëgletëmebë olë mana tako kalëlegona fata lëgleme. Na bu kë olë mana hwi mololame.”

Jisasbë ato bu li wenianena fata tle

² Tobali ita jowa olë yawe motlola, na kwe Jisas, bu Pita, Jems, Jon name nëno tle. Na tako fatiniwa tilekome. Na buwa tafa mëtla. Bu Jisame hwi moglola bë na mana bubë ato li wenianena hihijika tletle.

³ Na bubë ato mago ëho, olëha mëtëbetle, na bu tatiwamu mëtëbetle. Ebë life mago oneho bu ëho itaita swa mogotomana, kwe bu Jisasbë tatiwa ëho fenene këha hana mëtëbetëme. Bubë ëho tatiwamu nëgеме.

⁴ Na bubë lowene esogo mëgletlëtabë ho, bu ëtanifuho Elaijaname, Mosesname hwi motloma, bu Jisasna gëgali mëtla.

⁵ Jisa bu këme hwi tloime, na Jisame gali tlole, “O Tisa, bo tako fleflesu nanelë, sebo ebë life mëta kë tafa nëglabë. Sebo aomalë, aona afeteni tli lo gigliji nëglame. Li jubë lo, li Elaijabë lo na li Mosesbë lo.”

⁶ Kë aomalë ho bu tako uli mëtlame nëgеме, na Pita gali lowene sle jwa tēgleme nëgеме, na bu kë galime blawa këme gali tle.

⁷ Na oloba tetujule na bume iniwa lamu totome. Na Goto kë oloba mago gali tle, “Ebë bobë nëba, bo tako

9

¹ Na Jisas bume ita gali

tole nanëletelë. Sobo bubë gali aholokwane elolome.”

⁸ Na bubë lowene esogo mëglelëtlabë ho yafe hwi mëtebokwaka, kwe bu Jisasme kë gëgali mëtlelëlobë home hana hwi motloma. Bu Jisasme fwa hwi motlola. Weniyaneme aotome fene hwi motlotla, këhawa ita hwi motlola.

⁹ Bu fatini mago kle mëtëmalitaya, na Jisas bume gali tlome, “Sobo ëje kë hwi eglolobë wesibi lili onehome asa gëgali elelëmo. Awi. Kwe tokwafe bo Gotobë life mago ho, bo matëmatë mago huju nokokwëna, sobo kë hwi eglolobë wesibi li li onehome mana kwe lalowa gëgali elagumome.”

¹⁰ Na bu Jisasbë gali aholona aholokwane mëtla. Na bu kë gali lowene mëta fwa gwa mototla, na bu li li onehome hana gëgali mëtlelëma. Na bu blalo gëgali mëtla, “Jisas bu matëmatë mago habëna huju lëglemene? Kë matëmatë mago huju lëglebë gali ebë fëye galine?”

¹¹ Na bu Jisasme gali motlola, “Gotobë tafa sle gali lowene sle mëgletlabë ho bu fëyeme gali mëlane, ‘Elaija bu afina ligisime na Goto kë aniji toglolebë ho bu nagi ligisime?’”

¹² Na Jisas bume gali tafu tëtätëme, “Ebë gali, nëgali mu, ‘Elaija bu afina lisime na iniwa wesibi sle lotomeme.’ Kwe bu Gotobë bogo mëta bome meyahi lamëtletëna, ‘Gotobë life mago ho, bu

lebutako elili fa logotleme, na oneho bume hehë mëgletlame.’ Na bo some takune nolëyo, bu kë gali Gotobë bogo mëta fëyeme yahi mëtlane?”

¹³ Kwe bo some gali nëlëyo. Elaijaha ho, bu watisife, na oneho bubë tetëbo lowenewa esogo esogo mëtlelëla na bume tetëbo mototla, ëtani Gotobë bogo mëta fene yahi mëtletla.”

Jisas bu ahwane kë tëbo lotlebë nëbame sle totle

¹⁴ Jisas bu kë aomalë lowene esogo mëglelëtlabë home tlelume na bubë lowene esogo mëglelëtlabë ho flime esune mëtlëma. Na bu lebutako oneho hwi motloma, bume hwagënë mototoma. Na Gotobë tafa sle gali lowene sle mëgletlabë ho fli, bu Jisasbë lowene esogo mëglelëtlabë ho flina kofaya kofaya gali mëtlelogwaya.

¹⁵ Na kë oneho bu Jisasme hwi motlola na klelego memëtletla. Na bu belë fëka motokouja na bume gali motlola, “Lalemu. Yahala fëyeme esine.”

¹⁶ Na Jisas bume takune tlome, “Sobo buna kofaya kofaya gali fëye wesibime gali elelëgone?”

¹⁷ Na ho li, bu kë onehona kë mitlijabë bu Jisasme gali tafu tëtätle, “Tisa, bobë iko nëba ahwane tëbo lëtätenë. Kë ahwane bubë ëfalëbo geni lëtätle. Na bo ju belë nëlesulë, sle naegotleme.

¹⁸ Kë ahwane bume itaita feilawa kiki totokwefle, na

bume life mēta itaita meenogli enogli latlekēfe. Na bu nēnafuna, enino kēkēna melatlekēfe. Na iniwa ato toulego metlekefētle. Na bo jubē lowene esogo mēglelētēyobē home metakune yafe tlomē, ‘Sobo bobē nēbabē ato mago ahwane kēē elekakētelo.’ Kwe bu yafe kēē mētletla kwe hanane mu.”

19 Jisas kē gali aholokwane tle na bume gali tlome, “O masiwafe, sobo bome lowene sle jwa fēyeme eletēname? Bo sobona habenuju afe olē tafa nēglelēyomene na mana lowene sle eletēname? Bo sobobē hobota habenuju afe olē fa nēgetatēyomene? Kē nēba bo belē elesulo.”

20 Na bu kē nēba bu belē mētlesula. Na kē ahwane Jisasme hwi tlole, na kē nēba anisasana lili tle, na bu lifeme latitigowa, na lifeme obobwelē tle, na nēnafu ēfalēbo elē motowelibetle.

21 Na Jisas bolijayame takune tlole, “Melē kē lēglekefēbē, habenuju afe olēne?” Na bolijaya gali tlole, “Tokwēfome nēgena, kē gēgēme tēglebēē, mana ekē.

22 Kē ahwane tēbo bume itaita ahoju mēta na tu mēta metuku tuku latlekēfe, bume tēkle sle nalogotleme fene, mogo nalē. Ju bobē nēba lalowa sle egētatenēna kwe ju seme maninibo eletēname na aitaname.”

23 Na Jisas gali tlole, “Ju megali fēyeme elene, ‘Ju bobē nēba lalowa sle egētatenēmene?’ Ju bome

lowene sle egletenēna, kwe ju iniwa wesibi melē egotomeme.”

24 Na kē nēba bolijaya anisasana lagaliwa tlole, “Bo jume tokwēfo lowene nanēletē, kwe ju bobē kē lowenebē aiatenē, bo jume lowene slemu nanēgletēme.”

25 Jisas bu hwi tlome, feilawa oneho bubē li elē fēkana mitisiyame nēgēme, na bu kē ahwane hokweinawa kēme wame gali tlole, “Ju, ēfalēbona aholona kē titiji mēgletēbē ahwane, bo jume gali nolē, ju ebē nēbame kile etole na bubē atowa ita asa ekaklutle.”

26 Na kē ahwane, tēbo afēfleiwa yēē tlēle, na nēba anisasana lili tle, na bume lakilewa tetokwakle, na latugujuwa. Na kēme nēba mogo fene tēbe. Na feilawa oneho bume hwi motlola na gali mētla, “Wagli lēlefe.”

27 Kwe Jisas bubē tobame fa totle na huju tetēbakle, na bu lalowa tlibe.

28 Tokwafe, Jisas lowa tuju na bubē lowene esogo mēglelētlabē ho kēme hwelutuwa gali motlola, “Sebo kē ahwane hehē jwa fēyeme nēletlane?”

29 Na bume gali tlome, “Sobo kēha ahwane manawa hana hehē egletelome. Sobo Gotome fwa gēgali egletlēkeflona, kwe fēyemene, sobo kēha ahwane lalowa hehē egletelome.”

Jisas ita gali tle, “Bo gli nelēme na huju nelēme”

30 Jisas, bubē lowene esogo mēglelētlabē hona, kē lifate

kile mëtla na Galili provins kukuwa mutuja. Jisas bu melëme tole tle; ho bume melowene mëgletlalime, “Bu ekë tafa lëlefe.”

³¹ Bu bubë lowene esogo mëgletlëtabë home fwa okokwe naloglomeme nëgeme. Na bume gali tlome, “Bo, Gotobë life mago ho, bu bome wame hobë toba elë gwa mëgëtaname. Na bu bome mogo nalë tëkle mëtaname. Na bo tële olë nebëme na aona olëbëna kwe huju nëgelëme.”

³² Kwe bu bubë gali lowene sle hana mëtletla. Bu Jisame uli mëtletlame nëgeme, na bu kë galime takune jwa këme motlola.

Tako letitabo ho yalëne

³³ Na kwe, Jisasna bubë lowene esogo mëgletlëtabë hona Kaperneam lifatewa fwa mutula. Na bu lowa tlelëkakume. Na Jisas bume takune tlome, “Sobo alëgeme, fëye wesibime gëgali ekweijone?”

³⁴ Kwe bu gali kujuna tei tafa mëtla. Bu Jisame tiniji mëtletlame nëgeme. Bu alëge mutujana, na blalo kofaya kofaya megali mëtletlogwayame nëgeme, “Semago, tako letitabo ho tafa, ya lëgletënamene?”

³⁵ Na Jisas tafa tle na bume gali tlome, “Ho tako letitabo home tafame tole lëglena, kwe bu iniwa onehome luglunuta asa malëletëme. Na manawa wege hoha satafa lëletëme na iniwa onehome lëgaitame nalëgleme.”

³⁶ Na Jisas bu nëba no tlële na bubë naba li mëta tlebitëme, na hwë tlële, na bubë lowene esogo mëgletlëtabë home gali tlome,

³⁷ “Ho bome lowene lëgletenëna, na ebëha nëbame lëgaitalena, kwe bu bome laitanë. Na ho bu bome lëgaitanëna, bu bome fwa nane laitanë. Weye, bome kë jine tëglënëbë ayame laitale.”

Ho seme wame hana lolonana, kë ho sebobë yabe

³⁸ Jon bu Jisame gali tlole, “Tisa, sebo mehwi latlola, ho bu jubë weniji fë tëta na ahwane tëbo hobë ato mago hehë tletëme. Kwe kë ho sebona hana tuja na këme nëgeme sebo bume gali tlole, ‘Ju, Jisashë wenijina, ahwane tëbo asa hehë eletëme.’”

³⁹ Na Jisas gali tlome, “Sobo këha home asa lëkle etomo. Ho bu bobë weniji fë logotlona, na bu Gotobë afutuku fenene, wesibi melë logotlona, kwe bu bome hokweinawa tëbo gali hana loglonëme.

⁴⁰ Ho seme wame hana lolona, kë ho sebobë yabe.

⁴¹ Ho some melowene lëgletëyona, ‘Bo kë home nëgaitamëme, bu Goto kë aniji toglolebë home yonane mëgletlëlame nëgeme.’ Na kë ho some hi tume lëgaitona kwe bo some nëgalimemu gali nolëyo, Goto kë tokwëfo wesibi hwi loglolona, na kë home aholokwana hana ti lëgleme. Bu tokwafe bume lale wesibi lëglëleme.”

Tëbo lowene ho, bu lale lowenena hobë lowene tëbo mëtakefëtëma

⁴² Jisas ita gali tle, “Ho li bome kë lowene lëgletenëbë nëbame tëbo lowene elë tëbo logotlena na kë nëba bome kë lowene lëgletenëbë lowene kile lëglena kwe ebë tëbo wesibimu. Goto kë home habelë logotlemene? Kwe fli ho, kë home aniji mou mëta takuliji mëtatlana na bume nutu elëme tuku mëtëkakana kë kwe lalowa. Bu kë nëbame tëbo hana logotleme na Goto kë home hana tëbo logotleme.

⁴³ Jubë toba jume tëbo lowene mëta gwa lëgëtana, kwe ju kë toba tlë etokwakleme na tuku ekakeme. Ju jowa tobanawa nëgena na ju kë tëbo lowene hana egotlena kwe ju Gotobë lale lifate mëta unaunalëme tafa egleme. Kë kwe lalemu. Kwe ju tële tobanawa nëgena na kë tëbo lowene eglena kwe bu jume tokwafe hel lifewa tuku lëgleme. Kë kwe lale nane, kë tëbo. Kë life mago ahoju lële hana lëgleme.

⁴⁴ Kë life mëta, ‘Fotë bubë ato unaunalëme hi mokoukefëtëmeme na ahoju melë bubë ato mëta unaunalëme tei lëlegokefëtëme.’

⁴⁵ Jubë kiju jume tëbo lowene mëta gwa lëgëtana, kwe ju kë kiju tlë etokwakleme na tuku ekakeme. Ju jowa kijunawa nëgena na ju kë tëbo lowene hana egotlena, kwe ju Gotobë lale lifate mëta unaunalëme tafa egleme. Kë

kwe lalemu. Kwe ju tële kijuna nëgena na kë tëbo lowene eglena kwe bu jume tokwafe hel lifewa tuku lëgleme. Kë kwe lale nane, kë tëbo. Kë life mago ahoju lële hana lëgleme.

⁴⁶ Kë life mëta, ‘Fotë bubë ato unaunalëme hi mokoukefëtëmeme na ahoju melë bubë ato mëta unaunalëme tei lëlegokefëtëme.’

⁴⁷ Jubë naba jume tëbo lowene mëta gwa egëtana, kwe ju kë naba lemo etamëme na tuku ekakeme. Ju jowa nabanawa nëgena na ju kë tëbo lowene hana eglena, kwe ju Goto, onehobë eso home kë tafa lëgletëmebë life mëta unaunalëme tafa egleme. Kë kwe lalemu. Kwe ju tële nabana nëgena na kë tëbo lowene eglena, kwe bu jume tokwafe hel lifewa tuku lëgleme. Kë kwe lale nane, kë tëbo. Kë life mago ahoju lële hana lëgleme.

⁴⁸ Kë life mëta, ‘Fotë bubë ato unaunalëme hi mokoukefëtëmeme na ahoju melë bubë ato mëta unaunalëme tei lëlegokefëtëme.’

⁴⁹ Këji hi wesibi fene sle motome, tokwafe ahoju mata onehome mesle logotomeme.

⁵⁰ Këji lale wesibi mu. Kwe këji iji hana mëglena, habelë notomamene na ita iji namëgleme. Hanane mu. Këji bu hi wesibi sle wesibi, na feilawa hi wesibi bu ijina mle. Na sobo onehome melë sle egotomome, këji fenene

iji mle na sobolalo tafa sle naegelome.”

10

Jisas bu noninome heheëbëme gali tlome

¹ Jisas na bubë lowene esogo mëglelëtlabë ho, kë lifate kile mëtla na Judia lifatebë tokwëfo lifekuwa mutuja. Na bu Jordan tu su mëtëkaka. Na lebutako enëne bume ita loko mëtlelëtla. Na bu Gotobë gali ita të têtatëme bu ëbame fene të têtakëfëtëme.

² Na Farisi enëne Jisas belë mitisitla. Bu Jisame su namogotlame fene. Bu bubë gali tëbo tafu lëtatëmenawa na bu mana tëbo namogotlame fene. Na këme takune motlola, “Sebobë, Juda life mago enënebë tafa sle gali, melë lëgëbetëmelalëlene o hanane? Ho noninome lalowa hehë mëgletëmamene o hanane?”

³ Na Jisas gali tafu têtatëme, “Ëtanifu ho, Moses, bu fëye tafa sle gali yahi tletëyone, bimësemeninome hehë egletemobë galibëye?”

⁴ Na bu gali tafu mëtëtatla, “Moses megali latle, ‘Ho nome heheëme tole lëglena, bu hehë gali laba mëta yahi lëletëme na bume lëlëme. Na këna lalowa hehë lëkaketëme.’”

⁵ Na kwe Jisas bume gali tlome, “Sobo aholabu enëne nëgeme, Moses kë tafa sle gali këme yahi tletëyo.

⁶ Kwe ëtanimu, Goto iniwa wesibi blëge totome. Gotobë bogo megali lalatle. ‘Goto

home blëge totle na mëse blëge tëtamë.

⁷ Këme nëgeme ho bu botaname, bolijayaname hune lële na nona weife mëtabome.

⁸ Na bu jowaha tafa melome.’ Bu tlemalëha hana tafa mëgelome. Weye. Bu jowa atoha mëtabome.

⁹ Goto, buwa, home mëse wayo tole na bu weife këme mëtabo. Na ho hana hehë lëgletëme.”

¹⁰ Tokwafe, Jisas na bubë lowene esogo mëglelëtlabë hona, bu lowa ita mutuja. Na bubë lowene esogo mëglelëtlabë ho bume kë nonino hehë galibëme takune motlola.

¹¹ Na bume gali tlome, “Ho, nome hehë lëgletëna na li mëseme sei lëglena, kë ho bubë auto mëseme sisile lalëta na lisë lowene mëta tafa lële.

¹² Na mëse boheme hehë egletlena na li home sei eglëlena, kë mëse bu lisë lowene mëta tafa ele.”

Jisas gali tle, “Sobo nëbale lëkle asa etomo, bo belë matisiya”

¹³ Onoho bu nëbale Jisas belë metlesumëtla. Bu metole lamëtla, Jisas bubë toba gogwa naloletëmeme na Gotome takune lololeme, bume lëgaitame nalëgleme. Kwe Jisasbë lowene esogo mëglelëtlabë ho bume hwi motloma na lëkle mototoma, “Teife. Sobobë nëbale bu belë asa elesumo.”

¹⁴ Jisas këme hwi tlome na bu wame tlome. Na bubë lowene esogo mëglelëtlabë

home megali tlome, “Sobo nēbale lēkle asa etomo. Bo belē matisiya. Oneho kē nēbaleha nēgena, kwe bu Goto onehobē eso home kē tafa lēgletēmebē lifatewa, mugujame.

¹⁵ Bo nēgalimu nanolēyo, ebēha nēbale bu Gotome hokweinawa lowene sle lamēletla. Na oneho bu ebē nēbale ha, Gotome lowene sle mēgletlana kwe bu Goto onehobē eso home kē tafa lēgletēmebē lifatewa mugujame.”

¹⁶ Na bu nēbaleme nēno tle na hohwē tle. Na toba gogwa toletēme na Gotome takune tlole, bume lēgaitame nalēgleme.

Wesibi lebutakona ho, bu Jisasna gēgali mētelo

¹⁷ Jisas na bubē lowene esogo mēgleletlabē hona huju mētla na mutuja. Na ho li bu Jisas belē fēka tokwei na bubē li mēta bubusu tēmalita na sēkefo miti tafa tletle. Na bume takune tlole, “O Tisa, ju lale ho. Bo jume takune nolē. Bo habelē nēgelēmene, bo Gotona unaunalēme lale tafa nanēgelome?”

¹⁸ Na Jisas bume gali tlole, “Ju bome lale fē fēyeme etanēne? Ebē life mago ho bu lale nane. Goto buwa lalemu.

¹⁹ Ju Gotobē tafa sle gali walowene eletle. Bu megali lalamē, ‘Sobo onehome mogo nalē asa tētēkle etomo. Sobo liseēliseē asa elo. Sobo tokli asa elo. Sobo li home blawa asa so etatelo. Sobo hobē wesibi sogēna galina manawa asa mēmē eletemo. Sobo bitaname blijaname

boblo asa etomo. Bubē galiwa saesogo elelētemo.”

²⁰ Na kē ho Jisame gali tlole, “O Tisa. Bo tokwēfome nēgena bo kēbē tafa sle gali iniwa melē esogo sle nēlagilē na bo ebē olēna mana esogo nēlelēlē.”

²¹ Jisas bume hwi tlole na maninibo latletle na tole latletle na bume gali tlole, “Ju li lowenewa mana afolo eletle. Ju melē egleme. Jubē iniwa wesibi balitina hihijika eleme na kē baliti glo eleme na wesibi jwa onehome elēmeme. Ju melē laleye kwe Heven lifate mēta lale wesibimu lamēbetē. Na ju bome esogo elenēnēme.”

²² Kē ho bu kē gali aholokwane tlole na lawabelēwatle na witina latugujuwa. Bu feilawa wesibimu mētēbetleme nēgema na fli onehome lēglēmeme tole hana tle.

²³ Jisas bubē lowene esogo mēgleletlabē home hwi tlome na gali tlome, “Wesibi lebutakona enēne, Goto onehobē eso ho kē tafa lēgletēmebē lifatewa mugujabēme, ebē kalēlego lalēletēme.”

²⁴ Na bubē lowene esogo mēgleletlabē ho, bu kē gali aholokwane mētla na klelego memētletla. Kwe Jisas bume fli gali megali tlome, “O nēbale, iniwa oneho, Goto onehobē eso ho kē tafa lēgletēmebē lifatewa mugujabēme, ebē kalēlego lalēletēme. Hafēna mugujamene?”

²⁵ Kamel kleli, bu ēho susu nili fulujuwa lēkaklubēme ebē

kalëlegomu lalële, kwe wesibi lebutakona enëne, Goto onehobë eso ho kë tafa lëgletëmebë lifewa mugujabëme ebë kalëlegomu lalëletëme.”

²⁶ Kwe bubë lowene esogo mëglelëtlabë ho bu klelego memëtla na blalo gëgali mëtla, “Kë melë nëgena, kwe Gotobë ëhwati tafa yalë fa logotlemene?”

²⁷ Na Jisas bume hwi tlome na gali tlome, “Oneho bu kë wesibi hana mogotlame kwe Goto kë wesibi lalowa logotleme. Goto iniwa wesibi lalowa logotomeme.”

²⁸ Na Pita Jisasme li gali megali tole, “Jisas, ju seme hwi enona. Sebo iniwa wesibi wahune tla na jume waesogo tlelëyo.”

²⁹ Na Jisas gali tole, “Bo nëgalimu gali nolë, oneho bome tolemu mëgletënana na Gotobë lale gali të mogotlana na bubë lo o bolijamoni o blijahani o mësenëbani o bolijaya o bota o nëbale o nuju hune mëglana, kwe Goto bume lebutako wesibimu lëglëmeme.

³⁰ Bu ebë life mëta mana tafa mëglana, Goto bume lebutako wesibimu lëglëmeme. Ètani kë hune mëtlabë wesibi bu tëlëwaha kwe Goto bume kë lëglëmebë wesibi bu lebutakomu. Goto bume lebutako lo na, bolijahani, bolijamoni, mësenëbani, botani, nëbale, na nuju lëglëmeme. Kwe, masiwafe, fli enëne bume tëbo mogotomame, bu bome lowene sle mëgletëname

nëgeme. Na tokwafe bu lale tafa memokoukefëyame.

³¹ Lebutako enëne bu ebë olëna letitabo hoha kë tafa mëglabë, bu tokwafe Gotobë olëna bu atwati hoha tafa mëglame. Na lebutako enëne bu ebë olëna atwati hoha kë tafa mëglabë bu tokwafe Gotobë olëna letitabo hoha tafa mëglame.”

Jisas bu ita gali tle, “Bo gli nelëme na huju nelëme”

³² Jisas na bubë lowene esogo mëglelëtlabë hona, Jerusalem lifate alëge elë motokwala. Jisas bu toutatëme. Na bubë lowene esogo mëglelëtlabë ho tutune motokouja. Na oneho bume kë nagi mëtlëmabë bu uli memëtla. Na bubë lowene esogo mëglelëtlabë home loko tëta na bume tëbo namogotlabë galime gali tlome.

³³ Bu megali tle, “Sobo aholokwane elo. Sebo Jerusalem lifatewa ekë nuja. Na bo, Gotobë life mago ho, bu bome, lotu lo mëta wege mëglabë eso enëne na Gotobë tafa sle gali lowene sle mëgletlabë honame yo molomame. Na bu tetahë melëmame na bome mogo nalë tëkle mëgëtanabë gali sle namogotlame. Na bu bome, Israelbë afenëboni mëtabëya jwa mëglabë enëneme, yo namoglomame.

³⁴ Na kë enëne, bu bome tiniji galina gali namogloname. Na bome ssonatlé namëgëtaname. Na bome nagutaba kokose mogloname. Na bome taba

afona feilawa lëlafa mëtaname. Na bome mogo nalë tëkle mëtaname. Na bo mogo tële olë nebëme na aonabëna huju nëgelëme.”

Jemsna Jonna bu metole lamëtelo, eso home tafa namëgelome

³⁵ Na këme, Sebedibë nëbale, Jemsna Jonna, Jisas belë mitisijo. Na bume takune motlolo, “Tisa, sebo jume wesibime takune nëlëyo. Na ju seme kë wesibi lalowa egotometenomene?”

³⁶ Na Jisas bume takune tlome, “Bo fëye wesibi nogotometëyomene, sobo habë tole lalone?”

³⁷ Na bume gali motlolo, “Tisa, ju tokwafe tako eso home watafa eglena, sebo metole nanelo, sebo juna onehome eso ho tafa nanëgletëmame. Li jubë tobamu toba elëme tafa lëleme na li jubë yemane toba elëme tafa lëleme.”

³⁸ Kwe Jisas bume gali tlome, “Sobo bome kë takune eglonabë, kë wesibime sobo lowene sle hana eletelo. Tokwafe bo tako elili fa nogotlëme, sobo këha elili lalowa fa egotlomene? Na tokwafe bo gli nëgelëme, sobo këha megli lalowa egelomene?”

³⁹ Na bu gali motlolo, “Sebo melë lalowa nëgelome.”

Na Jisas bume gali tlome, “Nëgali. Bo elili mefa notlëme, sobo mata këha elili mefa egotlome, na bo megli nëgelëme, sobo mata këha megli egelome.

⁴⁰ Kwe ho bu bona eso home kë tafa nëgletëmabë na bobë tobamu toba elë tafa lëglebë o bobë yemane toba elë tafa lëglebë, ebë bobë wesibi nane bo kë aniji noglomëme. Weye. Ebë Gotobë wesibiwa. Bu, bona eso home kë tafa nëgletëmabë home waaniji tlome.”

⁴¹ Na fli we ho, bubë lowene esogo mëglelëtlabë, bu Jemsna Jonna, Jisame kë takune motlolobë gali aholokwane mëtlana, bu wame memotloma.

⁴² Kwe Jisas bubë lowene esogo mëglelëtlabë ho iniwame gali telëkakëme. Na bu mutujutla na bume këme gali tlome, “Sobo walowene elo, Israelbë afenëboni mëtabëya jwa mëglabë enënebë eso ho, bu melamela, onehome baba të motoma, bubë wege manawa fa namëgëtatëmame.

⁴³ Kwe, kë eso ho fene mëtabëya, sobo këha lowene mëta asa tafa elo. Weye. Matëbe. So mago ho, bu sobobë eso home tafame tole lëglena, bu melë lëglëme, some wege lëgletëyobë hoha lëtabeme.

⁴⁴ Na somago ho, bu iniwa onehobë logouta home tafame tole lëglena, bu melë lëgleme, iniwa onehobë manawa wege hoha tafa lëletëmeme.

⁴⁵ Na bo, Gotobë life mago ho, bo melëme nane tisi, oneho bome mëgaitana namëglame. Weye. Bo melëme tisi, onehome nëgaitamë nanëgelëme. Na

bobë gli lebutako onehome
laitame nalëgleme. Bubë tëbo
lowene bobë glina hihijika
nanogotometemëme.”

*Jisas bu naba titiki tabo hobë
naba sle totometle*

⁴⁶ Jisasna bubë lowene
esogo mëglelëtlabë hona,
Jeriko lifatewa fata mëtla. Na
Jeriko lifate kile mototla. Na
buna bubë lowene esogo
mëglelëtlabë hona, feilawa
onehona mutuja. Na
Bartimeus, Timeusbë
bowene, alëge mëglëbo lime
tafa tlekëfe. Bu naba titiki
tabo ho. Na bu onehome
balitime gëgëba
latlokweñëme.

⁴⁷ Na bu kë gali
aholokwane tle, “Nasaret life
mago Jisas, bu lisi.” Na bu
anisasana we tlole, “Jisas,
Devitbë bosemle, ju bome
maninibo eletenë!”

⁴⁸ Na feilawa oneho bume
këkale motlola, “Euowe! Ju
kujü ebe.” Kwe bu anisasana
we tlole, “Devitbë bosemle,
ju bome maninibo eletenë!”

⁴⁹ Na Jisas bubë we lego
aholokwane tlole na këme
tlibe, na gali tle, “Sobo gali
elëbaklo, ligisi nalëgleme.” Na
bu kë naba titiki tabobë
home we mëtelëkakla na gali
motlola, “Ju fleflesu ele. Ju
huju ele. Bu jume ekë we
lelebakë.”

⁵⁰ Na kwe bubë tli lime kë
gelo totokweflebë ëho hwaga
totle na hokweinawa huju
tëkake, na Jisas belë tuju.

⁵¹ Na Jisas bume takune
tlole, “Bo jume fëye
nëgëtëmene?” Na kë naba
titiki tabo ho bume gali tlole,

“Tisa, ju bobë naba sle
etometenë, bo hwi
nanëgelëme.”

⁵² Na Jisas bume gali tlole,
“Ju bome lowene sle
eletenëme nëgëme, jubë naba
këme sle meletë. Ju lalowa
eiju.” Na hokweinawa bubë
naba lalowa memëtletlemu.
Na bu hwi tëkake. Na bu
Jisasma alëge elë nagi
telëkakle.

11

*Jisas bu tako eso ho ha,
Jerusalem lifatewa tëkaklu*

¹ Jisasna, bubë lowene
esogo mëglelëtlabë hona,
Jerusalem lifatewa lololi
mëtla, na bu Betfage
lifekuwa na Betani lifekuwa
loliwa fwa mutula. Kë lifeku
bu Oliv fatini li mëta metëbe.

² Na Jisas bu tlemalë
lowene esogo mëglelëtlabë
home jine tlëme na bume gali
tlole, “Sobo kë hwi
egelëkakëlobë lifekuwa
eyeume. Sobo eyeume, na ti
mëta takuliji tabo afeku
donki kleli hwi eglolome.
Ëbame, ho kë donki kleli
matawa hana tafa tle. Sobo
taba tohwa etatelome na
elesutëname.

³ Na ho li some metakune
loglëyona, ‘Sobo ebë donki
kleli fëyeme elelulone?’ Kwe
sobo bume metafu saetatelo,
‘Sebobë tako ho bu tole
lëletle. Bu këna asü lëleme na
bu seme hokweinawa ita
jine lelebakëname, ebë donki
kleli ita nëglesutëyome.’”

⁴ Na kwe bu mëtëyeu, na
bu afeku donki kleli, alëge li
mëta kë liglibebë hwi
motlolo. Fli ho bu kë donki

kleli, lo ino li mēta watakuliji mototla. Na kwe kē tlemalē ho bubē taba tohwa mētētatelo.

⁵ Na lolime kē mitlijabē ho takune motloma, “Sobo kē donki kleli fēyeme tohwa etlone?”

⁶ Na tlemalē bu gali tafu mētētatemo, Jisas bume fene gali tlome. Na kē enēne, bume gali motloma, “Sobo lalowa eelulo.”

⁷ Na kwe tlemalē, kē donki kleli Jisasme sei mētłkakitelo. Na bubē heletabo ēho donki klelibē amlebo mēta kahēba motolo. Na Jisas kē ēho matawa tafa tole.

⁸ Na feilawa oneho bubē heletabo ēho totohwa mētla na alēge mēta kahēba motokouja. Bu Jisasme fleflesu mētletla, eso hoha fata tēgleme nēgeme. Na Jisas donki kkelina kē matawa luguju nalēgleme, eso ho fene asē mētla. Na fli oneho bu yagibeha laba mata glo mētla na alēge mēta kahēba motokouja.

⁹ Na oneho bu Jisasna kē motoutayabē na oneho fli nagi kē mitlijabē, bu kēme memomolē motokouja, “Yahala fēyemene. Sebo Gotome fleflesu nēgletlame. Goto bu jine tlēle. Bu Gotobē kalēlegona tisi. Goto kē home ululu sle nalogotleme.

¹⁰ Kē ho bu seme eso home tafa nalēgletēname tisi, Bosemle Devit, sebo bē semlenime eso home fene tafa tletēme. Goto kē eso home ululu sle nalogotleme. Sebo Gotome tako fleflesu nēgletlamemu.”

¹¹ Na Jisas bu Jerusalem lifatewa fwa tule na tako lotu lowa tēkaklu. Na bu iniwa wesibi hwi tlagume. Kwe olē ki lēgēbeme nounou latle na buna bubē lowene esogo mēglelētlabē hona Jerusalem lifate kile mētla na Betani lifekuwa hokweinawa mutuja.

Jisas atowaiha time anisasana hana tlole, “Ju liji ita asa fu ele”

¹² Tokwafe li olēna bu Betani lifeku kile mētla na bu alēge mēta mana asē mētla. Na Jisas foneme gli tle.

¹³ Na bu atowaiha ti kakē manogwa hwi telokwakle na bu lebutako labana. Na kwe bu loliwa tuju tle, lijime hohwi nalēgētame, kwe bu liji hwi hana tlometle labawa hwi tlome. Ebē atowaiha ti logowalē jwa lēglebē olē nēgeme hwi jwa kēme tlome.

¹⁴ Na Jisas kē time anisasana hana tlole, “Ju liji ita asa fu ele na oneho bu liji ju mago hi hana mēglekefēyame. Hanane mu.” Na bubē lowene esogo mēglelētlabē ho kē gali aholokwane motlola.

Jisas bu wesibi balitina hihijika home, Gotobē lo mago hehē tletēme

¹⁵ Jisas na bubē lowene esogo mēglelētlabē hona Jerusalem lifatewa fwa mutula. Na Jisas tako lotu lo kē mēta liglibebē life elēme tēkaklu. Na bu wesibi balitina kē glo mēglabē enēneme na wesibi balitina kē hihijika mētlabē enēneme hehē teluletēme. Bu melatotome.

Bu li life li life enënebë baliti këme kë hihijika mëtlabë enënebë masei obobwelë tetokwakëmetëme. Na bu seuneni fole balitina kë hihijika mëtlabë enënebë tafa labuku mata obobwelë totometëme. (Bu kë fole Gotome ahojume ahojume mëtlekefëtlabë.)

16 Oneho bu wesibina, tako lotu lo li mago lëglesli tabo life elëme mëtlelekkaklukefëma. Na Jisas bu kë onehome hehë tletëme.

17 Na bu gali tlome, “Gotobë bogo megali lala, ‘Li life li life mago oneho bobë lo elëme migisiyabë, bome gëgali namëlelekkëfëname.’ Kwe sobo ebë lo tēbo latlo na bu tokli enënebë loha lilibetëyo.”

18 Na lotu lo mëta wege mëglabë eso enëne na Gotobë tafa sle gali lowene sle mëgletlabë ho bu kë gali aholokwane motlola, na alëge hohwi mëtëtatla, Jisame mogo nalë tēkle namogotlame. Iniwa oneho bu Jisame tako tole lamëtletla. Melëme nëgame bu kë tētë togotlebë gali kle klelego lamëtkefëtla, na lotu lo eso enëne bu Jisame këme uli mëtletla.

19 Na atome hwi olë, Jisana bubë lowene esogo mëgleletlabë hona Jerusalem lifate kile mëtla na mutuja.

Ho bu Gotome lowene sle lëgletlena na bume mana gëgali

lëglelëlena kwe bu wesibi glo lëgleme

20 Na li olëna, olobalëwa, Jisana bubë lowene esogo mëgleletlabë hona, Jerusalem lifatebë alëge mëta mana asë mëtlabë, na bu kë atowaiha ti ita hwi mëtelëkakla, bu wakoko tēbefe.

21 Na Pita bu Jisas kë time këhana toglolebë gali ita lowene tletle na gali tle, “Euowe, Tisa, yame ju kë atowaiha time anisasana mehana tlole, ‘Ju liji ita asa fu ele.’ Na ëje bu wakoko lëbe.”

22 Na Jisas megali tlome, “Sobo Gotome melowene sle egletelome, bu kalëlego ho.

23 Bo some nëgali gali nanëlëyo. Ho bu fatinime megali loglëna, ‘Ju huju elëme na ju nutu elëme okli ekakeme.’ Na kë ho bu tēle lowene hana lëglëna na Gotome lowene sle lëgletlena kwe Goto bu melë logotleme, kë ho fene gali lële.

24 Sobo Gotome wesibime takune eglolona na sobo melowene sle egletelona, ‘Goto bu seme kë wesibi lëglënamefe,’ kwe Goto bu some kë wesibi lëglëyome, sobo fene takune elolo.

25-26 Sobo Gotome gali eglolona, na sobo li ho, some kë tēbo tēgëtobë lowenebë, ita lowene egletelona, kwe sobo kë hobë tēbo lowene aholokwana ti egletelome. Sobo melë eglolona, kwe sobobë aya, heven life mëta

* 11:25-26 Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Kwe sobo iniwa onehobë tēbo lowene aholokwana hana ti egletemona, kwe sobobë aya, heven life mëta kë tafa lëglelebë bu sobobë tēbo lowene mata aholokwana hana ti lëgletëyome.”

kë tafa lëglebë bu sobobë tēbo lowene mata aholokwana ti lëgletëyome.”*

Bu Jisame takune motlola, “Ju kë egotomebë wesibime, ya gali tolëne”

²⁷ Jisasna, bubë lowene esogo mëglelëtlabë hona, Jerusalem lifatewa ita fwa mutula. Na Jisas bu tako lotu lo li mago lëglesu tabo mëta asë tle. Na lotu lo mëta wege mëglabë eso enëne fli, na Gotobë tafa sle gali lowene sle mëgletlabë enëne fli, na lotu letitabo enëne fli, bu belë mitisiya.

²⁸ Na bu metakune motlola, “Ju kë kalëlego hamago fa totlene?”

²⁹ Na Jisas bume gali tlome, “Bo mata, some li wesibime takune nolëyo. Sobo bobë gali tafu sle latatëna kwe bo some kalëlego kë mago kë fa nogotlëbë gali, gali noglëyome.

³⁰ Bo some metakune nëlëyo, onehome tume kë baptais totomebë Jonme ya jine tlëlene? Goto bu jine tlëlene o ho jine mëtlëla? Sobo bobë gali tafu etatëna.”

³¹ Na bu blalo gëgali mëtla, “Sebo megali noglolana, ‘Goto bu jine tlële,’ kwe bu seme megali logloname, ‘Kë nëgali nëgebë, sobo bume lowene sle egletelo jwa fëyemene?”

³² Kwe sebo megali noglolana, ‘Ho jine mëtlëla,’ kwe oneho bu seme habelë mëgëtanamene?” Bu kë gali fëyeme gali mëlane? Bu onehome uli mëtletëmame

nëgeme. Inywa oneho bu melowene lamëtletla, “Jon bu Gotobë lowene mago gali tē lotokweflebë homu.”

³³ Na bu Jisame gali metafu mëtëtatla, “Sebo, Jonme kë jine tēglëlebëme, lowene hana nëla.” Na Jisas bume gali tlome, “Bo mata sobobë takune tafu hana nëgetatëyome. Na bo kalëlego kë mago kë fa nogotlëbëme hana gali nëglëyome.”

12

Ebë wain taba liji nuju kë hwi motlolabë tēbo enënebë wafle gali

¹ Jisas, Juda life mago lotu letitabo home, wafle gali tletëme. Bu megali latle, “Ho bu wain taba, nuju mëta ola tle na lëglesu tle. Na bu life ha totle na fuluju yefi tle, wain taba liji kë mëta fëfe namëglame, bubë tu hi namëglekefëyame. Na bu akolalo, kë nuju mëta gliji tle, ho kë lo mëta sei namogowelëkeflame, ho tokli mëglalime. Na bu fli home gali tlome, ‘Sobo bobë wain taba nuju hwi elotëna. Na tokwafe liji mogwalëna, fliye sobobë na fliye bobë.’ Na kë ho hune totome na kakë lifewa tuju.

² Tokwafe, wain taba liji nigliji mëtle, bubë wege home, bubë nuju kë hwi moglotlabë ho belë jine tletëme, bubë hi wesibi kë nuju mago glo nalëgleme. Na bu tuju.

³ Kwe nuju kë hwi motlotlabë ho, bu belë kë

tigisitēmebē home anisasana tēkle mētētagula na kē mago hehē mētēkaketa. Na bu kē mago manawa latēglēbouwa.

⁴ Na ita nuju bolijaya, li home jine tletēme. Kwe kē enēne kē hobē eso labulewa mētētatla na bume tēbo mototla.

⁵ Na ita li home jine tletēme. Kwe bu kē home mogo nalē tēkle mototla. Na kēme, bu feilawa home kē enēne belē jowa jowa jine tlēkefēmetēme. Na bu fli home tētēkewa mētla na flime mogo nalē tētēke mētla.

⁶ Na jowa howa tafa tle. Kē ho kē nēgebēye nuju bolijayabē bowene, na bume tako tole latletlemu. Na yawememu, boweneme, bubē nuju kē hwi motlotlabē ho belē jine tletēme. Bolijaya melowene latle, ‘Bu bobē nēbabē gali aholokwanewa moglolame.’

⁷ Kwe bubē bowene alēge mēta mana asē tēkeke na nuju kē hwi motlotlabē ho bu blalo gēgali mētla, ‘Ebē ho kē ligisibē ebē kē nujubē bolijayabē bowene. Tokwafe bolijaya gli lēglena, kwe bu kē nuju bolijaya tafa lēgleme. Te, mana mogo nalē tēkle manotla na kē nuju seme lēbetēname.’

⁸ Bu tisitēme na hohwē mētlēla na mogo nalē tēkle mototla. Na mogo fa mototla na nuju mēglēbo elē tuku mētēkaka.”

⁹ Na Jisas lotu letitabo home takune tlome, “Sobo habē lowene lalone, kē nuju bolijaya bubē nuju kē hwi motlotlabē home habelē

logotomemene? Sobo aholobō eto. Bu ligisina, bu kē home mogo nalē tēbo logotomeme. Na ita kē wain taba liji nuju fli home yo loglomeme, hwi namoglotlame.

¹⁰ Sobo Gotobē bogo mēta kē lēgēbebē gali hwi hana tlolone? Ēye wahwi tlolo. Ebē gali mētēbe latle, ‘Lo gliji ho, bu lo, anijina gliji mētla. Na kwe bu li anijime meweniji lamētla,

“Tēbowa.”

Kēme nēgeme, mēglēbo elē fo mētetokwakēya. Kwe kē aniji mēglēbo elē kē fo mētetokwakēyabē bu lale anijimu ebamē.

Lo bulego kē aniji mēta lotle. Kē aniji jwa nēgena, kwe lo fli lēgleme.

¹¹ Goto melē tēgleme nēgeme, kē wesibi kēha kēme fata lēle.

Sebo yafe hwi nololamu, lale wesibimu tlēna.”

¹² Lotu letitabo ho bu melowene lamētla, “Jisas seme waflē gali lēletēnafe.” Kēme nēgeme, bu Jisame ējeha fa motlame. Kwe bu oñehome uli mētletēmame nēgeme. Na bu Jisame kēme kile mētla na bu mitliwaya.

Bu Jisame takune motlola, “Ho takis baliti, Rom life mago eso ho, Sisarme, lalowa mēglēlamene o hanane?”

¹³ Lotu letitabo ho, bu Farisi enēne fli na eso ho Herotbē wege enēne fliname, Jisas belē jine mētlēma. Bu

metole lamëtla, Jisasme sogëname takune namoglolame na bu Rom life mago eso ho, Sisarme, tëbo gali naloglome. Kë tëbo galime fwa bume këna so namëgëtatame fene.

14 Na këme mutuja na gali motlola, “Tisa, sebo lowene nanëla, ju nëgali gali homufe na ju hobë tëbo loweneme na tëbo galime uli hana eletëme. Ju nëgali galimu të etagule. Ju baliti musuna home na baliti musujwa home, lili gali hana gali tlagume. Weye. Ju iniwa home, jowa gali mefwa gali tlagume. Ju iniwa onehome, Gotobë lale anebo galiwa të tëtägutëme. Na ju habelë lowene lalene? Sebo takis baliti Rom life mago eso ho, Sisarme, lalowa nëglëlamene o hanane? Këha lowene lalowa nëglamene o hanane?”

15 Kwe Jisas bubë sosogëname wafi lowene tletëme na bu kë enëneme megali tlome, “Sobo bome fëyeme su etanane? Sobo jowa baliti bome ehitëna, hwi nanoglëme.”

16 Na baliti mëtëhitla. Na Jisas takune tlome, “Ebë amtëtomba yalëbëne, na weniji yalëbëne?” Na këme gali motlola, “Ebë Sisarbëyo.”

17 Na Jisas bume gali tlome, “Sisarbë wesibiye, kwe Sisarme eglëlome. Gotobë wesibiye, kwe Gotome eglëlome.” Na bu kë gali aholokwane motlola na klelego memëtla.

Sadyusi enëne, Jisasme, lebo enëne huhuju mëglabëme,

takune motlola

18 Na këme Sadyusi enëne Jisas belë mitisiya. Kë enënebë lowene metëbetëmelatle, “Lebo mëgebëyabë oneho, hana huhuju mëglame.” Na këme Jisasme takune motlola,

19 “Tisa, ëtani, Moses ebë gali meyahi latletëna, ‘Ho nëba jwa lebo lëgëbena, na bubë mëse sei ju mana tafa eleme, kwe ita bolijamo sei lëlëme, na nëbaneni lëlelëme. Na kë nëbale, lebo kë tëglebë hobë wenijina mëtabetla namëglame. Na bu kë hobë nëbaleha tafa namëglame, na lebo kë lëgëbebë hobë weniji hana te lëgletleme na aholokwana hana ti mëglame.’

20 Ëtani, ho li tobali ita jowa bolijamonime këniji tlebime. Bolijaha afina mëse sei tlë na kwe bolijaha nëba jwa gli tle.

21 Këme nëgeme, ita kë sei ju bolijamo sei tlë, na bu mata nëba jwa gli tle. Na ita kë sei ju tafa tle ita li bolijamo sei tlë, na bu mata, melatle, kë fenene.

22 Bu iniwa bolijamoni melamëtla, kë seijume fwa fifiji mëtletlëya na iniwa nëbale jwa gigli mëtla. Na tokwafe kë mëse, bu mata, gli tle.

23 Na sebo jume takune nëlëyo. Tokwafe gigli kë mëglabë oneho huhuju mëglana, kë mëse fëye home tafa egletlemene? Ju wafi lowene ele, bu këniji mitlibëya, tobali ita tële bu kë mëseme iniwa sei mëtletlëya.”

24 Na kēme Jisas bume gali tlole, “Sobo Gotobē bogo mēta kē lēgēbebē gali na Gotobē afutuku lowene sle hana eletelo. Kēme nēgeme sobo yaya lowene kēme elo.

25 Tokwafe, gigli kē mēglabē oneho huhuju mēglana, kē lebo enēne, one hana sesei mēglame. Weye. Bu heven life mago ensel fene mētabēya, bu one sesei jwa mēglame.

26 Na eli, bo lebo enēne huhu mēglabē gali tē nēgetatēyome. Sobo Mosesbē bogo mago yahi hwi hana tlolone? Ēye wahwi tlole. Kē gali melē lēgēbelalēle. ‘Ahuju, ti abo mēta u tle, kwe kē ti abo koko hana tēbe. Moses bu kē hwi tlole na Goto ahoju kē u tēglebē ti abo mēta tētabe na bume gali telulubakle, “Bo blijafujunibē Goto mana ekē tafa nelē, Abraham, Aisak, na Jekopnabē.”

27 Gotobē lowene melē lēgēbetlelalēle, ‘Kē aomalē ho wagigli mētla, kwe amtētomba mana mētabēya, na bubē Goto mana ekē tafa lēletēme.’ Ebē Goto kē nēgebē lebo enēnebē Goto nane. Weye. Mana kē tafa mēglabē enēnebē Goto. Sobo melowene kē egelobē, ‘Lebo enēne hana huhuju mēglame.’ Kē yaya lowene lēbetēyo.”

Gotobē lale tafa sle galimu habelēne?

28 Gotobē tafa sle gali lowene sle lēgletlebē ho li kēme tētabe. Na bu Sadyusi enēne Jisasna kē gēgali mētlelogwayabē gali

aholokwane tlole. Na bu melowene latle, “Jisas bume lale tafa lalētatēmefe.” Na bu Jisasme kēme takune tlole, “Gotobē fēye tafa sle gali blo lotomene, iniwa tafa sle galibēme.”

29 Na Jisas bume tafa tētātēme, “Gotobē lale tafa sle gali kē lēgēbebēye melē, ‘Israel life mago ho sobo aho! Goto buwa sebobē tako letitabo lētabetēna. Sebobē li Goto hanane lētabe. Jowa Gotowa lētabetēna.

30 Sobo Gotome anisasana tole egletelomemu, lowenena ini tolewa egletelomemu.’

31 Na li lale tafa sle gali kē lēgēbebēye melē, ‘Ju iniwa onehome anisasana tole egletēmeme, jume fene tole ele.’ Fli tafa sle gali bu kē tēle tafa sle galiha hana mēbe. Kē telē tafa sle gali bu fli tafa sle galime boblo lamotome.”

32 Na kēme Gotobē tafa sle gali lowene sle lēgletlebē ho Jisasme gali tlole, “Tisa, ju gali kē tafa etatenēbē lalowamu. Ebē nēgali, Goto buwa tako letitabo lētabe. Na li Goto hana lētabe. Jowa Gotowa tafa lēle.

33 Sebo Gotome anisasana tole nēgletlamemu, lowenena iniwa tole nēgletlamemu. Na sebo iniwa onehome anisasana tole nēgletēmame, seme fene tole nēla. Kē tēle anebo gali nēgehwyana na esogo nēglelēmama ebē lalemu. Kwe Gotome afabo kē ahojume ahojume nēglekefētlabē lowene na iniwa wesibi Gotome kē nēglēlabē lowene ebē laleha.”

³⁴ Jisas kë home aholokwane tlole na melowene latle, “Lale tafu lalotlefe.” Na Jisas bume gali tlole, “Ju Gotome lowene sle egletleme nounou lale, na Goto jume eso home tafa lëgletëme nounou lalëlemu.”

Na bu Jisasmë li takune, takune moglolabëme uli memëtletla.

Jisas onehome takune tlome, Goto kë aniji toglolebë hobë galime

³⁵ Jisas tako lotu lo lifeku mëta tafa tle na bu gali kë mëta të têtatëme. Na bu megali latlome, “Gotobë tafa sle gali lowene sle mëgletlabë ho bu megali lamëtla, ‘Goto bume kë aniji toglolebë ho, onehome nëno nalëgleme, kë ho bu Devitbë bosemle.’ Sobo habelë lowene laletelone, bu kë gali fëyeme gali mletlane?”

³⁶ Ètani Gotobë Amtëtomba Devitme lowene tlële na Devit bu kë lowene megali latle,

‘Goto, bu bobë tako home megali lalolole,
 “Ju bobë tobamu toba elë tafa egletenëme na ju bona onehome eso home tafa nëletemome. Sebo onehome mana tafa nëlelëmome na bo jume kë wame mëglëyobë home boblo nogotomëme na bu jubë gali hana boblo mëtome.”’

³⁷ Devit kë aniji toglolebë home mefë latotle, ‘Bobë tako ho.’ Na bo some takune nëlëyo, Gotobë tafa sle gali

lowene sle mëgletlabë ho, mefëwa fëyeme mototlane, ‘Kë ho Devitbë bosemle,’ kwe bu mefë jwa fëyeme mototlane, ‘Devitbë tako ho?’ Bo some gali nëlëyo, bu Devitbë bosemle kwe tako home tètabe. Këme nëgëme, Devit bu tako ho fë këme totle.” Na kë feilawa oneho buna kë mëtëtabëyabë, Jisasbë gali fleflesuna aholokwane motlola.

Gotobë tafa sle gali lowene sle mëgletlabë ho tëbo lowene esogo mëlelëkefla

³⁸ Na Jisas bume okokwe tlome na megali tle, “Sobo Gotobë tafa sle gali lowene mëgletlabë home ululu egelome. Sobo bubë lakale asa esogo elëlëtemo. Bu memelë lamla, heletanëno ëho mehwëa na iniwa onehobë naba lime asë mëbebokwaka. Oneho bu melowene namëgletëmame, ‘Bu lale letitabo enënefe.’ Na bu oneho këme kë tafa mëglabë lifeku mëta asë mëglana, bu metole namëgletëmame, oneho bume megali namoglomame, ‘O letitabo ho. Lale klijimu.’

³⁹ Bu lotu lome tafa mëglana, bu metole lamla, onehobë naba li mëta, letitabo ho këme tafa mëglekefëyabë tafa labume tafa mlame. Na tako hi olëna, bu metole lamla, onehobë naba li mëta, letitabo ho këme tafa mëglekefëyabë tafa labume tafa mlame, oneho bu melowene namëgletëmame, ‘Lale letitabo enënefe.’

40 Bu seiju oneme sosogëna moloma na bubë iniwa wesibi manawa mëglëma namëglame. Na bu memelë lamelekefëya, onehobë naba li mëta, Gotome feilawa gëgali mëlëlä, oneho bu melowene namëgletëmame, 'Lale letitabo enëne fe.' Bubë tëbo lowene këna lëlamu motla. Tokwafe, Goto fli enëneme tëbo logotomena, kwe kë enëneme tako tëbo logotomememu."

*Wesibi jwa mëse bu baliti
Gotome tlële*

41 Jisas, baliti Gotome këme sisike melekefëtlabë bokis li mëta tëtabe, tako lotu lo mëta. Na bu onehome hwi tlome, bu baliti Gotome kë bokis mëta sisike mëtletla. Na feilawa oneho bu feilawa baliti sisike mëtla.

42 Na kwe wesibi jwa seiju mëse tisi. Na bu baliti tokwëtokwë tële sike tle.

43 Na Jisas bubë lowene esogo mëglelëtlabë home gali telokwakëme. Na bu mitisitla na gali tlome, "Sobo kë mëseme hwi elëkakëyo. Bo some nëgali nanëläyo. Fli oneho bu kë bokis mëta feilawa baliti sisike mla, kwe Goto kë wesibi jwa seiju mëseme melowene lalëletë, 'Bu feilawamu baliti sike ele.'

44 Fli oneho bubë feilawa baliti mëtëbetëme kwe tëlëwa sike mëtla na fli mana mëtëbetëme. Kwe kë seiju mëse bu baliti iniwamu tlële, fli hana mëtëbetë. Na tokwafe hi wesibi fëye balitina glo eglemene? Hanane mu. Bubë iniwa baliti wayawe tolë."

13

*Jisas bu melëme gali tle,
"Gotobë tako lo tëbo lëgletleme"*

1 Jisas na bubë lowene esogo mëglelëtlabë hona, tako lotu lo mago metëkaklija na mana bubë lowene esogo mëglelëtlabë ho li gali tlole, "Euowe, Tisa, ju hwi elome. Anijina kë gigliji mëtlabë lo bu lale klisomu. Bu aniji tatakumu na lale klisomu."

2 Na Jisas bubë gali tafu tëtatlë, "Bo sobo, lo kë hwi eglomobë gali, të nëtätëyo. Tokwafe bu ebë iniwa lo yayei mogotomame. Fli aniji matawa hana mëgëbëme. Weyewa. Iniwa sisike mëkakame."

*Jisas bu megali latle,
"Tokwafe tëbo olë
folokokwëme"*

3 Na bu Oliv ti fatiniwa motokwala. Na Jisas kë fatini lufu mëta tafa tole na tako lotu lo hwi tëtëlokwakle. Na Pita, Jems, Jon, Andruna buwa bu belë mitisitla, na takune motlola,

4 "Ju seme gali enona. Gotobë lo yayeime, kë gali toglonabë gali, habenalë fata lëglemene? Sebo fëye wesibi afina hwi noglomamene na këme lowene nëlame, 'Hai, kë olë nounou ekë lële.'"

5 Na Jisas bubë gali tafu tëtätëme, "Sobo ululu slewa saelo. Ho some sogëna mogleyolime.

6 Unina feilawa ho migisiyame na sogëname gali mlame, 'Bo kë nëgebë kwe Gotobë life mago ho, onehome nëno nëgelëbë ho.'

Na bu feilawa onehome
sosogëna mlagumame.

⁷ Na tokwafe, sobo tako
wame mëglabë gali
aholokwane egelona, na li
life elë wame gali fafa
mogotlabë gali aholokwane
egelona, klelego asa elo. Kë
wame kwe melëmane, kwe
ebë life tëbo lëglebë olë mana
lebokwetle.

⁸ Li life li life mago ho, li
life hona momogli mëtayame.
Na li life li life nano
ekoujamëme. Na li life li life
mago oneho, foneme gigli
mokoujame. Kë wesibi bu
tokwëtokwë eliliha, mëse
nëba amlebo fene fale etamë.
Kwe tokwafe tako elili fa
mëtagulame.

⁹ Kë olëna, sobo ululu sle
saelo. Sobo bome fwa
lowene sle eglëtename
nëgeme na bu some bubë
letitabobë toba elëme
mëglelujome. Na bu some lotu
lo mëta tëtëke mëgelulame. Na
bu some gavman ho belë na
eso ho belë sei
mugujelëyome. Na kwe sobo
Gotobë lale gali të
eoutatemome.

¹⁰ Bu Gotobë lale gali iniwa
lifeku mago onehome afina
të mëtatëmame na yawe olë
mana fata lëleme.

¹¹ Bu some fafa mëglana, na
hobë gali aholo bo lëgëtabë
ho belë mëlelujona, sobo uli
asa elo na melowene asa elo,
'Sebo habë gali nëglamene?'
Weye. Iniwa gali, Goto some
kë olëna kë lëglëyobë, të
etlome. Sobowa të egotlome
nane. Weye. Gotobë
Amtëtomba lowene lëlëyome

na kë lowenena të
etatemome.

¹² Wali ho, fli home melëkei
melëmame, bolijahanime
mogo nalë tëbo
namotomame. Na wali
bolijaya mata bubë nëbaleme
kë fene, melë mogotomame.
Na wali nëbale bubë
botaname bolijayaname
wame molomame na wame
home melëkei melëmame,
mogo nalë tëbo
namotomame.

¹³ Sobo bome lowene sle
egletëname nëgeme, iniwa
oneho some këme gëglë
mëgletëyome. Kwe ho bome
fwa esogo lëglënënëna na
bubë gli olë nëgena, bome
mana esogo lëglënënëna,
Goto bume no lëglëleme."

Tëbo wesibimu fata lëgleme

¹⁴ Na Jisas ita gali tlome,
"Tokwafe sobo mehwi
egelome, afefi life mëta
home tëbo logotomebë
wesibi fata lëgleme. Ho ebë
gali hwi loglolena, lowene
sle salëletle. Na kë olëna,
oneho Judia lifate mëta kë
tafa mëglabë, bu fatinina
tabo elë matlebouja.

¹⁵ Na ho lo sebatu mëta
lëtabena, bu lowa bubë
wesibi glome asa malëkaklu.
Weye. Lëglëbouwa malële.

¹⁶ Na ho nuju mëta
lëtabena, bubë lowa ëho
glome asa maluju. Matëbe.
Lëglëbouwa malële.

¹⁷ One, kë olëna, nëbale
imonabë na one nëbale
kolëbo nabë, bo bume tako
maninibo nanëletemëmu.
Masiwafe, bu habëna
mëglënëboujamene?

18 Sobo Gotome kēme gali eglolome, haliji tu olēna kē wesibi fata jwa nalēgleme.

19 Kē tēbo olēna tēbo tafamu lēgēbeme. Kēha hobota ētani hana fata tletēme. Ētanimu, Goto iniwa wesibi blēge totomebē olēna, kēha tēbo wesibi hana tēbe. Na ēje mata, kēha tēbo wesibi hana lēbe. Na tokwafe kēha tēbo wesibi hana lēgēbeme.

20 Goto bu kē tēbo olē lēkle jwa logotlebē kwe iniwa oneho tēbo miglitayame fene. Goto fli onehome melowene latletēme, 'Bo ebē onehome waaniji tlomē, bu bobēmufe.' Na bu kē onehome maninibo tēgletēmeme nēgeme na bu kē tēbo olē kēme lēkle totle.

21 Kē tēbo olēna, ho some megali lēglēyona, 'Hwi elo, Goto onehome nēnome kē aniji toglolebē ho, ekē lētabe,' o bu megali lēglēyona, 'Hwi elo bu ekē tafa lule,' sobo bubē gali asa aholokwane elolo.

22 Fli ho migisiyana sogēname megali mēglame, 'Bo ekē, Goto onehome nēnome kē aniji toglobebē ho.' Na fli ho mata sogēname megali mēglame, 'Bo Gotobē gali nēgehilēbē ho, bo ekē.' Na bu Gotobē afutuku fenene, klelegowa wesibi melē blēge motometēmame. Oneho bu meweniji namēglame, 'Kē enēne Gotobē life mago enēnefe.' Na bu feilawa onehome sosogēna mlagumame na metole lamētla, Goto bu kē aniji toglobebē onehome mata, sosogēna mlagumame fene.

23 Kēme nēgeme, ululu sle saelo. Bo some iniwa wesibi, unina mefata mēglebēme, wagali nēlēyo."

Unina Gotobē life mago ho ligisime

24 Na Jisas ita gali tle, "Kē tēbo olē yawe lēkakeme na mana kliji yemena u jwa mēgleme.

25 Na sēgetoba matafa mago luklu mēleme na mitigome. Na iniwa matafa mago wesibina lili mēleme na tēbo mēleme.

26 Na kwe, bo, Gotobē life mago ho, bo oloba nagi netujulēme. Na bobē tako lolokwēnena, na tako kliji elulego fenene kēhana iniwa nigisime.

27 Na kē olēna, bobē enselme jine nēbelēkakēmēme. Na Goto kē aniji loglomebē onehome loloko mētagujayame. Na Gotobē onehome iniwa life mago nēno mokoujame. Matafana, lifena kēme tou mēglebē mago."

Sobo binibwe time lowene sle egletemome

28 Jisas ita gali tle, "Sobo binibwe time lowene sle egletemome. Bubē laba luklu lēglena na tahweji foke lēglena sobo kēme lowene elome, 'Ebē wanagli tei fe.'

29 Kē fenene. Sobo kē tēbo olē hwi eglolona, sobo melowene naegletelome, 'Bo nigisibē olē nounoumu lalēle.'

30 Bo some nēgali nanēlēyo, fli oneho bu ebē olēna kē tafa mēglabē, bu mana

mëtabëyame na kë iniwa tëbo wesibi mana fata mëgleme.

³¹ Lifena matafana tëbo mëgleme, kwe bobë anebo gali unaunalëme melë lëgëbekëfeme.”

Ho liha bo këna nigisibë olë lowene hana lëletle

³² Jisas bu ita gali tle, “Ho liha bo këna nigisibë olë, lowene hana lëletle. Heven life mago ensel mata lowene hana mletla. Na bo, bubë bowene, mata lowene hana nëletelë. Aya buwa lowene lëletle.

³³ Bobë nigisibë olë, sobo lowene hana eletelome nëgeme. Këme nëgeme sobo ululu sle saelo na walena satafa elo.

³⁴ Bo nuguwibë na ita nigisibë, ebë ho bubë lo kile lëglebë fenene na li lifewa luju. Bu bubë mëta kë wege mëglekefëyabë home afina gali tleme, ‘Bobë wesibi sahwi elokwefëmetëna.’ Na bu wege bwa bwa tlëwagume. Na bubë lo mëta kë sei lëglëkeflebë home gali tlole, ‘Bo nigisibë olëme, ju walena satafa ele.’

³⁵ Na sobo mata mehwi egletëname, kë ho fene hwi lële. Bo lo bolijayaha ho. Na sobo bobë nigisi olëme lowene hana elo. Bo fole olëna nigisimenawa o olobalë nigisimenawa o taboklë nigisimenawa o klabë kuna nigisimenawa. Sobo kë olë lowene hana eletelo.

³⁶ Bo hokweinawa nigisina, na bo some nina hwi noglokwakijona, kwe kë lale nane? Weye. Kë tëbomu.

³⁷ Ebë gali, kë gali noglëyobë, bo iniwa onehome gali nolomë. Sobo sagli elolome na mana walena satafa elo.”

14

Lotu letitabo ho, gali fa mototla, Jisasmë mogo nalë tëkle namogotlame

¹ Tële olë mana mëtebokwe na Israelbë afenëbobë tako lotu olë mana folokoke tëmeme. Israelbë afenëbo bu kë olëna, Goto ëtani bolijafujunime këna tëgaitamebë olë na Isip lifate këna kile mëtëglabë olë, lowene mëtëkefëtle. Na li lotu olë, bu sëse wesibina afulu jwa mëglabë bletë nage hi mëtëkefëya. Na lotu eso enëne na Gotobë tafa sle gali lowene sle mëgletlabë enëne bu kë olëna blalo gëgali mëtla, “Sebo Jisasmë hwelutuwa habëna fa nogotlamene na mogo nalë tëkle notlame.

² Sebo kë wesibi, Juda life onehobë tako lotu olëna asa manotla. Sebo tako lotu olëna melë nëglana kwe oneho tako wame huju mogotlame.”

Mëse li, lëkaluwa tu Jisasbë eso mëta wë eotatle

³ Jisas bu Saimonbë lo mëta tafa tle, Betani life mëta. Ètani, Saimonbë ato juba jubawa tëgëbetlena na Jisas sle totle. Na Jisas bu masei li mëta tafa tle. Na mëse li mana tisi. Na bu lalë lëkaluwa tu aniji botolona tehitle. Kë tubë baliti feilawamu. Na bu kë botolobë ëfo tika totle na

lëkaluwa tu Jisasbë eso mëta wë totatle.

⁴ Kwe fli ho kë tafa mëtlabë, bu hwi motlola na witi mëtla, na blalo gëgali mëtla, “Bu kë lale lëkaluwa tu blawa fëyeme wë etatlene?”

⁵ Sebo kë lëkaluwa tu li hona balitina hihijikame nëglëlana kwe sebo 300 baliti kënjiji glo nëglame na kë baliti, baliti jwa home nëlëmame.” Na bu kë mëseme wame gali motlëya.

⁶ Na kwe Jisas gali tlome, “Matëbe. Bume asa gali elëyo. Bume fëyeme wame gali elëyone? Bu bome slemu latanëyo.

⁷ Baliti jwa enëne, sobona unaunalëme tafa eglekefome. Na sobo agaitamome tole egletemona, lalowa egaitamome. Bo kwe sobona unaunalëme hana tafa nëglame. Bo sobona tafa jwa nëglana habëna egaitanamene, ebë mëse ëje fene aitanë?”

⁸ Ebë mëse wesibi melë kë egëtatënëbë këwa melë tei etle. Bu melë, bu lëkaluwa tu bobë eso mëta wë eotatenë na bobë ato kë tuna matëmatëme nëgebëbëme sagli elëtenë. Bo some nëgalimu nanëlëyo.

⁹ Bu tokwafe iniwa life, Gotobë lale gali të mëtagulana, kwe bu mëse kë wë tëtatlëbë galime të namëtakefëtëyame na bu këme lowene namëgletëyame.”

Judas lotu eso home gali sle tëtatëme, “Bo some Jisasmë yo

noglëyome”

¹⁰ Kë nalëwa, Judas Iskariot, bu lotu eso home tujutëme na gali tujuwelëme, “Bo tokwafe Jisasmë yo noglëyome.” Judas bu we ita telë Jisasbë lowene esogo mëglelëtlabë ho, bu mago li.

¹¹ Na lotu eso ho bu kë gali aholokwane mëtla na maninibona sle memëtla. Na bume gali sle motlola, “Sebo jume baliti nëglëyome.”

Jisas bubë lowene esogo mëglelëtlabë hona hi mëtla

¹² Na sëse wesibina afulu jwa mëglabë bletë nage kë hi mëtlekefëyabë olë wafolokoke. Kë olëna bu afeku sipsip kleli tëtëkle mëtëtakëfëya na hi hi mëtla. Goto bubë bolijafujunime kë taitamebë olëbë lowene namëgletlame nëgëme, bu sipsip kleli këme tëtëkle mëtëtakëfëya. Na Jisasbë lowene esogo mëglelëtlabë ho, bume gali motlola, “Sebo kë tako hi wesibi fëye lo mëta sle nogotomamene, Goto sebobë afuninome kë tęgaitamebë olë lowene nanëgletlame?”

¹³ Na Jisas bubë lowene esogo mëglelëtlabë ho tlemalëme jine tlëme na gali tlome, “Sobo lifate takowa eyeumo. Na tu kë lëgehulebë ho some alëgëme esune lëglëyome. Sobo bume nagi elëkklome.

¹⁴ Bu lowa lëkakluna, sobo mata saekaklujo na kë lo bolijaya home megali elujololome, “Tisa bu megali lalële, “Hi lo hametane? Na

bo na bobë lowene esogo mëtletëtë nabë hona kë hi lo mëta, sipsip kleli hi nanëglelëmëme, Goto bu sebobë afuninome kë taitamebë olë lowene nanëgletlame.”

15 Na kwe bu some nogowelë kë logobebë lo lebotane lëgëtatëyome. Kë lo bu maseina, tafa labuna, na bu këna iniwa wasle totome. Na sobo kë hi lo mëta sebobë hi wesibi sle etomome.”

16 Na kwe kë lowene esogo mëtletëtëlobë ho mëtëyeu. Na bu lifate takowa fwa mutulo, na bu iniwa wesibi hwi motlomo, Jisas fene gali tlome. Na bu hi wesibi sle mutujetomo. Na bu Jisas belë ita mëtëyeu.

17 Na taboklë, Jisas bubë we ita tële lowene esogo mëglelëtlabë home tlesume.

18 Na bu masei labu li mëta tafa motokouja. Na mana hi motokouja na Jisas mana gali tlome, “Bo some nëgalimu nanëlëyo, ho li, sobona kë tafa egelobë, bome wame home yo loglomeme. Kë ho bu bona ekë hi nelo.”

19 Na bubë lowene esogo mëglelëtlabë ho këbë gali yafe aholokwane motlola na kwe bubë lowene mëta sle hana tletëme na witina tafa mëta. Na jowa jowa ho bume takune motlola, “Ju bomeha gali elene?”

20 Na Jisas gali tlome, “Kë ho bu sobo we ita tële hobë ku mëta kë lëtabetëyo. Kë ho bu bona weife hi nelo. Bo buna bletë nage, hi wesibi tu mëta weife fuflu notomo.

21 Ètani, bu Gotobë bogo

mëta meyahi lamëtla, ‘Gotobë life mago ho, bu gli lëgleme.’ Na bo, Gotobë life mago ho, bo gli nëgelëme ekë, Gotobë bogo fene gali tla. Masiwafe, bome, Gotobë life mago home, wame home kë yo loglënëbë ho, bo bume tako maninibomu nanëletelëfe. Tokwafe bu tëbo liglitamemu. Bota kë home fata jwa egotlebë kwe ebë lalowamu.”

Jisas bu bletë nage na wain taba liji tu bubë lowene esogo mëglelëtlabë home tlëme

22 Bu mana hi motokouja na Jisas bletë nage fa totle, na Gotome fleflesu gali tlome, na fufu totle na bubë lowene esogo mëglelëtlabë home satëtagutëme. Na gali tlome, “Sobo hi elo, ebë bobë ato.”

23 Na bu wain taba liji tuna kabo fa tëtätëme na Gotome lale galimu tlome, na mana tlëme. Na iniwa kë kabo mago hi motokouja.

24 Na Jisas gali tlome, “Ebë bobë wino. Bobë wino kë lugujubë, feilawa onehome lëgaitame nalëgleme. Bobë wino kë lugujubë këme lëlekuju tle, Gotobë gali nëgali galimufe na Goto bu melë lëgleme bu ètani fene gali sle tle.

25 Bo some nëgalimu nanëlëyo, bo wain taba liji tu eli hana hi nëgelëme. Kwe tokwafe, Goto bu onehobë eso home kë tafa lëgletëmebë life mëta fwa, bo tiho wain taba liji tu mana hi nëgelëme.”

26 Na kwe bu Gotobë fleflesu sawa jowa fë

mētētaya, na bu lifate tako kile mētla na Oliv ti fatiniwa mutuja.

Jisas megali latle, “Pita bu bome kē lowene lēgletenēbē lowenebēme able lēgleme”

²⁷ Jisas bubē lowene esogo mēglelētlabē home megali latlome, “Sobo tokwafe bome ulime kile egētaname. Goto, bubē bogo mēta megali tēgleme nēgeme, ‘Bo sipsip kleli lēglēme home mogo nalē tēbo nogotlēme na sipsip kleli ulime mēglēnboume.’

²⁸ Kwe bo gli nelēme na huju nelēme na bo afina some Galili provinswa noutatēyome.”

²⁹ Pita bume gali tlole, “Kē enēne jume kile mēgētona, kwe bo jume hana kile nēgētēmemu. Hanane mu.”

³⁰ Na Jisas bume megali latlole, “Bo jume nēgali gali gali nolē, eli klabē, kakalo tēlafe huju jwa lēglena, ju bome kē lowene egletenēbē lowenebēme aowafe able eglomeme.”

³¹ Kwe Pita Jisame anisasana gali tlole, “Bo juna ko nēgelona, bo jume kē lowene nēgletēbē lowenebēme hana able nēgelēme. Hanane mu.” Na bubē iniwa lowene esogo mēglelētlabē ho mata megali motokouja, Pita fene gali tle.

Jisas bu Getsemani nuju mēta Gotome gēgali tlelēle

³² Jisas bubē lowene esogo mēglelētlabē hona nujuwa fwa mutula. Kē nujubē weniji Getsemani. Na Jisas

bume gali tlole, “Sobo emēta tafa elo. Bo Gotome gēgali nanēglelēlēme.”

³³ Na bu Pita, Jems, Jonname tlelume. Na bubē lowene mēta tako hobota fata tletle na tutune tle.

³⁴ Na bume gali tlole, “Bo tako hobota nanēlēyo. Kē tako hobota lowenebē bome tako boblo laletanē. Sobo ni asa ebo, emēta hwina tafa elo.”

³⁵ Na sogē fewa tēkake. Na life mēta latitigowa na Gotome gēgali tlelēle. Bu metole latle, ebē enisusu na tēbo wesibi bume kē migisitlebē, bume sigli namogotleme fene.

³⁶ Na bu Gotome megēgali latlelēle, “O aya. Ju iniwa wesibi melē lalowa egotomeme. Na bo metole nanelē, ju ebē tēbo wesibi bome kē migisitenēbē, bo mago sike ekaketenē, na bome migisitenē jwa namēgleme. Kwe ju bobē tole asa esogo elelētenē. Weye. Matēbo. Jubē tolewa esogo eglelēleme.”

³⁷ Na Jisas bubē lowene esogo mēglelētlabē ho aomalē betelē tujutēme. Na bume nina hwi tlole. Na Saimon Pitame takune tlole, “Pita, ju fēyeme ni ebene? Ju tako tafa hana ele na hokweinawa fēyeme ni ebene?”

³⁸ Sobo ni asa ebo. Tafawa elome na Gotome gēgali elelēlome. Satan some su lēgētolime, sobo tēbo lowene esogo jwa naeglelēlome. Sobobē lowene lalowa lēbeteyo kwe sobobē ato mogowa lēbetēyo.”

39 Na Jisas bu ita tuju na bu Gotome ita gëgali tlelële, otome fene gëgali tlelële.

40 Na bubë lowene esogo mëglelëtlabë hobëtelë ita tisitëme, na bume nina hwi tlokwakime, bu tako nilafalemu memëtlä. Na Jisas bume huhuju totome, na bume tiniji na hwë memëtletla na lowene mëtlä, “Habë gali noglölamene?” Bu ni mëtëbeyame nëgeme. Na Jisame hwiwa motlola.

41 Tokwafe Jisas aowafeme tisitëme. Na bubë lowene esogo mëglelëtlabë home gali tlome, “Sobo itaita fëyeme ni ebekefone? Tatei! Bo, Gotobë life mago ho, bu bome tëbo lowene esogo mëglelëlabë home yo loglomebë olë, ekë folokoke.

42 Hwi elo. Bome yo loglomebë ho ekë fata lële. Sobo huhuju elo na bu belë nuguja nanëglame.”

Judas Jisame wame home yo tlome

43 Jisas mana gëgali tle na Judas mana tujutëme. Judas, ebë Jisasbë lowene esogo lëglelëtlebë ho li. Jisasbë lowene esogo mëglelëtlabë ho këniji, we ita tële. Na feilawa ho Judasna mitisiya. Na bu kosina, atobeilana mëtehweija. Na lotu lo mëta wege mëglabë eso enëne na Gotobë tafa sle gali lowene sle mëgletlabë ho na lotu letitabo ho, bume jine mëtelëkakëma.

44 Èbame, Jisame yo gali kë loglomebë ho, bume megali latlome, “Bo tokwafe some

melë lëlekuju nëgletëyome. Bo ahino mëta momotlë notlëme na sobo mehwi elome kë ho, ebë Jisas. Sobo kë home fa etlome na kiki sle etlome na eelulome.”

45 Na ebë olë Judas tisi, na Jisas belë hokweinawa tujutle, na gali tole, “O Tisa.” Na bume ahino momotlë tletle.

46 Na bu Jisame fa mototla na kiki mototla.

47 Kwe li ho, kë mëta kë tiglibebë, bu Gotobë lo mëta wege mëglabë eso hobë, wege hobë aholo kosina sika metëtatlë. Na aholo life mëta latitigotlewa.

48 Na Jisas bume gali tlome, “Sobo kosina atobeilana bome fame fëyeme esijone, tokli home fame fene mutujutla?”

49 Iniwa olë, bo tako lotu lo mëta kë tafa tëglekëfëbë na onehome gali kë të tëgëtakefëtemëbë, sobo bome mana fa tëtana jwa fëyemene? Kwe matëbe. Gotobë bogo mago gali metëgëbetenë watle, kë nëgali galimu lëgëbeme.”

50 Na Jisasbë lowene esogo mëglelëtlabë ho iniwa ulime lamëtlënëboujawa.

Falake ho latlëboukakuwa

51 Na falake ho, tatiwa lablab ëhowa kë sabu togotlebë, Jisame nagi esogo tlagile. Na bume yafe fa mototla,

52 kwe bu kë tatiwa ëhowa kile tëkake na flatabowa latlëboukakuwa.

Jisame hobë gali aholokwane mëglabë letitabo home tetahë mëtlëma

⁵³ Jisasme kë fa mototlabë ho, lotu lo mëta wege mëglabë enënebë eso hobë lowa mëtlelula. Na lotu lo mëta wege mëglabë eso enëne, na letitabo enëne, na Gotobë tafa sle gali lowene sle mëgletlabë enëne, iniwa loko mëtlelëya.

⁵⁴ Na Pita, Jisasme nagi nagiwa esogo tlagule. Na bu lotu lo mëta wege mëglabë hobë eso hobë lo li mago lëglesli elë tēkaklu. Na bu lo mëta kë sei moglokweflabë hona tafa mëtla na ahojume satle.

⁵⁵ Lotu lo mëta wege mëglabë eso enënena hobë gali aholokwane mëglabë letitabo ho, fli onehome, gali tuku mētletēma, “Sobo Jisasbë tēbo lowene hwi eglotelona, kwe sobo esijome na kë galibë tē etatēname.” Bu metole lamētla, Jisasme so mētatlame na bume mogo nalē tēkle namogotlame. Kwe oneho bu gali tē sle hana mētētatla.

⁵⁶ Feilawa ho bume sogēna gali so mētētatēma, kwe bubë gali bwa bwa lowene mëta tēbetēme na jowa lowene mëta hana tēbetēme.

⁵⁷ Na fli ho bu Jisasme gali meso mētētatla,

⁵⁸ “Sebo waaholokwane tlola, bu megali latle, ‘Bo ebë tako lotu lo, ho tobana kë gliji mëtlabë, yayeri nogotlēme. Na bo aona olēnawa li gliji nēgelēme, kwe bo tobana hana gliji nēgelēme.’”

⁵⁹ Kwe kë gali bu kë gēgali mëtlabë, bu mata bwa bwa lowene mëta gēgali mëtla na

jowa lowene mëta fwa hana gali mëtla.

⁶⁰ Na lotu lo mëta wege mëglabë enënebë eso ho, bu hobë gali aholokwane mëglabë letitabo hobë li mëta tlibe na Jisasme takune tlole, “Kë enëne jume so namētātēyo. Ju bume kofaya gali gali eglome jwa fēyemene?”

⁶¹ Kwe Jisas mogweliha latiglibewa na bume gali hana tafu tētātēme.

Na lotu lo mëta wege mëglabë enënebë eso ho bume gali tlole, “Ju ebë ho kë nēgebēne, Goto jume kë aniji toglēbë, onehome nēno naeglemene? Ju kë hone? Ju lale Gotobë nēbane?”

⁶² Na Jisas gali tlole, “Bo ta kë hofe. Na tokwafe, sobo mehwi egloname, bo, Gotobë life mago ho, bo tako kalēlegona Gotobë tobamu toba elë tafa nēgelēme. Na bo heven life mago oloba nagi nēgetujulēme.”

⁶³ Na lotu lo mëta wege mëglabë enënebë eso ho bu Jisasbë gali aholokwane tlole, na bubë ato mago ēho kaka totle, bu Jisasbë galime hobota tēgletleme nēgeme. Na bu gali tle, “Sebo fli enēneme hana gali noglomame, seme kë hobë nēbo loweneme gēgali namēglame. Weye. Matēbemu.

⁶⁴ Sobo bubë gali waaholokwane tlolo, bu megali latle, ‘Bo Goto fenene.’ Kë gali tēbomu. Bu Gotome tēbo gali latlole. Na sobo habelë lowene lalone,

sebo habelë nogotlamene?" Na iniwa anisasana jiyakle mëtla, "Bu tēbo lowenena ho, gli malële."

⁶⁵ Na fli ho bume nagutabana kokose mëtälëla. Na bubë naba ëhona lamu mototmetla na bume mana tēkle mototla na takune motlola, "Ju iniwa wesibi lowene egletëmena kwe ju seme gali elona, jume ya tēkle lëtane?" Na lo mëtä kē sei mëglëkeflabë ho bume mata tēkle mototla.

Pita bu Jisame kē lowene lëgletlebë loweneme aowafe able lëgleme

⁶⁶ Pita lo li mago lëglesu tabo lifeku mëtä mana tlibe. Na lotu lo mëtä wege mëglabë enënebë eso hobë wege mëse tisi.

⁶⁷ Na bu Pitame hwi tlole, ahøjume sa tle. Na kē wege mëse bume hwi sle tlole, na gali tlole, "Ju mata, Nasaret life mago Jisasna, kē tafa tēgelobë ho li."

⁶⁸ Kwe Pita bu able tle, "Ju kē gali eglebë gali bo lowene hana nëletelë. Hanane mu." Na bu ino ëfo elë tujü na ino ëfo mago lëglesu mëtä mana telutabe. Na hokweinawa kakalo huju tle.

⁶⁹ Na kē wege mëse bume ita hwi tlole na bu kē tafa mëglabë home gali tlome, "Ebë ho kē nëgebë, buna kē asë mëtëglabë ho li ekëyo."

⁷⁰ Kwe bu ita able tle, "Hanane mu."

Na Pita sogë tëtälëkakewatle, na buna kē mitlijabë ho Pitame gali motlola, "Nëgali mu. Ju buna kē asë tēgelobë ho li ta ekë. Ju

mata Galili provins mago ho nëgëme."

⁷¹ Na Pita bu anisanamu gali tlome na kakëne tletëme, "Iyëmanemu! Bo kē home lowene hana nëletelëmu. Hanane mu. Bo nëgali gali hana nëgelëna na Goto bu bome tēbo lëgëtanëna kwe tēbo malëtanë."

⁷² Bu wagali tle, na kakalo mana huju tle. Na Pita, Jisas kē gali toglolebë gali ita lowene tletle, "Eli klabë, kakalo tëlafe huju jwa lëglëna, ju bome kē lowene egletenëbë loweneme aowafe able eglomeme." Na Pita kē gali ita lowene tletle na bu wabelë tle na tako yemu kletotle.

15

Bu Jisame eso ho Pailat belë mëtlelula

¹ Olobalëwamu, lotu eso enëne, na lotu letitabo ho, na Gotobë tafa sle gali lowene sle mëgletlabë ho, na hobë gali aholokwane mëglabë letitabo ho, bu iniwa loko motokweija na blalo gali sle mototla wesibi mogotlabëme, "Sebo habelë nëglamene?" Bu gali wasle mototla na Jisame tabana lei mototla na eso ho Pailat belë mëtlelula.

² Na Pailat Jisame takune tlole, "Ju Juda enënebë tako eso hone?" Na Jisas tafu tëtätle, "Nakwefëyemene. Ju fene gali ele."

³ Na lotu eso ho Jisame lebutako gali so mëtëtätla.

⁴ Na Pailat bume ita gali tlole, "Bu feilawa gali jume

so mētatēyo, na ju gali tafujwa fēyeme etatēmene?”

⁵ Kwe Jisas gali tafu hana tētatile, bu mogweliha tētabe. Na Pailat bu kēme tutune tle.

Pailat gali tle, “Jisasbē ato nilina ti mēta bu eletelo”

⁶ Jowa jowa tlibutuna, bubē tako lotu olēna, oneho kalabusu lo mago hobē weniji fēfē mototokwefēma na Pailat bu kē hobē weniji aholokwane lēletle na kē home kalabusu lo mago jine lelēkakētēme.

⁷ Ebē olēna, li ho bu kalabusu lo mēta tafa tle. Bubē weniji Barabas. Ēbame Barabasna fli hona, bu gavman enēneme tako wame motloma na ho flime mogo nalē tētēkle mototoma. Na gavman enēne bu kē home kalabusu lowa sike mēta.

⁸ Na oneho Pailatme mitisitla na gali motlola, “Ju seme jowa kalabusu lo mago home jine elētēna, ju seme ēbame ho li kalabusu lo mago fene jine tlētēna.”

⁹ Na Pailat bume takune tloime, “Sobo metole lalone? Bo some, Juda life mago onehobē eso ho, Jisasme, kalabusu lo mago jine nēglētēyomene?”

¹⁰ Pailat bu megali fēyeme lēlene? Bu melowene lēgleme nēgeme. “Lotu lo mēta wege mēglabē eso enēne bu Jisasme tēbojiwamu lamletla na bu bo mēta kēme melesula.”

¹¹ Kwe lotu lo mēta wege mēglabē eso enēne, bu onehome anisasana gali tloime, “Sobo Pailatme, gali

elēlo, ‘Jisas matēbo. Barabasme fwa kalabusu lo mago jine elobakētēna.’”

¹² Na Pailat bume metakune tloime, “Kē ho, sobo mēfē kē egotlobē, ‘Israelbē afenēbonibē eso ho,’ bo bume habelē nogotlēmene?”

¹³ Na bu feilawa anisasana jiyakle memētletlēla, “Bume ti mēta nilina bu elo.”

¹⁴ Kwe Pailat takune tloime, “Sobo fēyeme gali elone? Bu fēye tēbo wesibi fa totlene? Bu fēye tlene?” Kwe bu feilawa anisasana jiyakle memētletlēla, “Bume ti mēta nilina bu elo.”

¹⁵ Pailat bu melēme tole tle, oneho bume fleflesu namēgletlame nēgeme, na bu Barabasme kalabusu lo mago kēme jine tletēme. Na bu fli home gali tloime, “Sobo Jisasme taba afona feilawa lēlafa etloime.” Na bu Jisasme taba afona feilawa lēlafa mototla. Na tokwafe bu Jisasme wame home boblo mogotomabē enēneme tlēme, bume ti mēta nilina bu namēglame.

Wame home boblo mogotomabē enēne Jisasme tiniji galina memotlola na bume ssonatlē memototla

¹⁶ Fli wame home boblo mogotomabē enēne, bu Jisasme eso hobē tako lowa mētletlēkakula, na bu fli wame home boblo mogotomabē enēneme gali mētelokwakēma. Na bu iniwa mitisiya.

¹⁷ Na bu Jisasme winowa ēho mētehvatla, eso hoha nafata lēgleme. Na bu analēbana taba glo mēta, na

eso hobë eso afeteniha
hwatë mêtletla, na bubë eso
mëta gelo mêtëtatla.

18 Na bu tiniji galina gali
motlola, “O Israelbë
afenëbonibë eso ho, lale
lobalë?”

19 Na bubë eso elëme
atobeilana tëke motlola na
bume nagutabana kokose
mëtlëla. Na bu Jisabë elebo
li mëta bubusu mêtletla, eso
home fene bubusu mletla.

20 Bu Jisame këbë iniwa
tiniji galina wafi gali
motlola. Na bu kë winowa
ëho tika mêtëtatla na bubë
ëhomu gelo mêtëtatla. Na
bume mëtlelula, bume ti mëta
nilina bu namëglame.

*Bu Jisabë ato ti mëta nilina
bu mëta*

21 Bu Jisame mëtlelula na li
ho, bubë weniji Saimon,
Sairini lifate mago ho, bu li
lifate mago tisi na lifate
takowa tuju. Kwe wame
home boblo mogotomabë
enëne bume alëgeme esune
mëtlëla na enisusuna gali
motlola, “Se! Ju Jisabë ti
mana ehule.” Na bu mana
tehule. Saimon bu
Aleksandernabë, Rufusnabë
bolijaya.

22 Na bu Jisame Golgota
lifekuwa mitilekola. Golgota
weniji bu ebëha gali fenene,
“Hobë eso eleboha life.”

23 Na bu Jisame wain taba
liji tu, malasini na sago, yafe
fwei mëtlëla, tako elili fa jwa
nalogotleme fene. Kwe bu yo
latletëme na hana hi tle.

24 Na kwe, wame home
boblo mogotomabë enëne bu
Jisame ti mëta nilina bu
mëtla. Na bubë ato mago ëho
melëna sa mêtëtaya. Bu satu
salë mëtla na ho mana aniji
motloma jowa jowa wesibi
glo namëglabëme.

25 Olobalë, kljina, bu
Jisame ti mëta nilina bu
mëtla.

26 Na bu ti katabo, eso
matawa elë fla mêtëtatla. Na
bume kë so mêtëtatlabë gali,
kë mëta yahi mëtla. Bu
meyahi lamëtla, “Juda lifate
magobë eso ho.”

27-28 Na bu Jisabë ti li
mëta, tlemalë tokli home ti
mëta bu mëtla. Lime tobamu
elë lë mototla na lime
yemane toba elë lë mototla.*

29 Na lifate mago kë
mitisiya, mutujabë oneho,
bubë eso luluju mototoma
na Jisame sosonatletlë
memototla, “Te, ju ëbame
megali latle, ‘Bo ebë tako lotu
lo yayei notlëme na aona
olënawa li gliji nelëme.’

30 Te, ju këha afutukuna ho
kwe ju eli jubë ato mana
aitale na kë ti mago kle
etëkekeme.”

31 Na lotu lo mëta wege
mëglabë eso enëne na Gotobë
tafa sle gali lowene sle
mëgletlabë ho bu mata
Jisame tëtane lamëtëbetla na
blalo gëgali mëtla, “Bu fli
home taitame na kwe bubë
ato lëgaitale hana lëgleme.

32 Kë ho bu ëtani megali

* 15:27-28 Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, Gotobë bogo mëta kë lëgëbebë gali bu olafamu këme tëbe. Kë gali melë lëgëbelalële, “Oneho bume mehwi lamotlola, tëbo ho fenene.”

latle, 'Bo kë ho kë nëgebë, Goto bome kë aniji toglonëbë ho, onehome nëno nanëgelëme.' Na bu mata megali latle, 'Bo Israel life mago onehobë eso ho.' Te, sebo kë home nabana mehwi noglolana, ti mago kle loleme, kwe sebo mana bume lowene sle nanëletlame." Na ebë tlemalë tokli ho, Jisasbë li mëta ti mëta kë bu mëtlabë, bu mata, Jisasme tiniyi galina gali motlolo.

Jisas gli tle

³³ Kliji kuna, kwe klabëha ki tëbetëme. Na kë tēgemolebëë na taboklë kljina ita fetiha tëbetëme.

³⁴ Na taboklë, kljina Jisas anisasana we tlole, "Eloi, Eloi, lama sabaktani!" Kë galibë ebëha gali fenene, "Bobë Goto, bobë Goto, ju bome fëyeme kile etanëne?"

³⁵ Fli ho, lolime kë tafa mëtlabë, bu kë we lego aholokwane motlola na gali mëtla, "Aholokwane elo. Elaijame we lolole."

³⁶ Na li ho fëka tlagutle, na bu sufa iniluha wesibi, wain taba liji tu mëta flu tētatle na klenëba mëta lei tētatle. Na këna Jisasme mana fwei telokwakle, wain taba liji tu slo nalëgleme. Na bu gali tle, "Awiya, sebo hwi nolola, bale Elaija bu ligisina na kle lētletēbakleme nawa o hanane."

³⁷ Na Jisas feilawa aflei tle na lagliwa tle.

³⁸ Na kë tako ëho, bu tako lotu lo ino ëfo mëta këkesi

tēglebë, lakawa tēmalita kufe lokwati.

³⁹ Na wame home boblo mogotomabë enënebë eso ho, bu Jisasbë li mëta tlibe. Bu Jisasbë aflei lego aholokwane tle na kë gli tēglebë hwi tlole na gali tle, "Euowe, nëgali fe, bu Gotobë nëbafë."

⁴⁰ Na aomalë one bu kakëha mëtelubokwëya na hwi mëtelokwakëma. Li mësebëye, buna tafa mëtla, bubë weniji Maria, Makdala lifate mago. Na li mata, bubë weniji Maria, Jems tokwëfo nabë, Josep nabë bota, na li mësebë weniji Salome.

⁴¹ Èbame Jisas Galili provins mëta tafa tēglena, kë aomalë one bume nagi esogo esogo mëtlelëla na mana mëtaitatefla. Na fli lebutako one mata, kë mëta kë mitlijabë bu iniwa Jisasna Jerusalem lifatewa mitisiya.

Bu Jisas mogome aniji fuluju mëta gwa mototla

⁴²⁻⁴³ Na taboklë, Arimatea life mago Josep, tisi. Bu hobë gali aholokwane mëglabë letitabo ho li. Bu lale homu. Bu mata, Goto iniwa onehobë eso ho kë tafa lēgletëmebë olë hwi loglolebëme hwi lalëlekëfe. Ebë olë ebë Fraide, wesibi sle mototokwefëmabë olë. Uniji ebë bubë tafawa mëgla olë nëgeme, na bu kë olëye wesibi hana sle motomame. Na Josep bu eso ho Pailat belë tujutle. Bu bume uli hana tletle. Na takune tlole, "Bo Jisas mogome ti mago

lalowa tohwa nogotlēmene o hanane?”

⁴⁴ Na Pailat bu klelego latle na melowene latle, “Bu waglinawa.” Na bu wame home boblo mogotomabē enēnebē eso home gali tujuwelēle, ligisinalēgleme. Na bu belē tisi na Pailat bume takune tlole, “Jisas wagli lēlene o mana hwi lētane?”

⁴⁵ Na kē ho bume gali tlole, “Nēgalimu. Wagli lēle.” Bu kē gali aholokwane tle na Josepme gali tlole, “Ju Jisas mogome lalowa tohwa etle.”

⁴⁶ Na kwe Josep bu lale tatiwa ēho heletabo, balitina fa tētlatle na bu Jisas mogome kē ēhona lalei totle. Na bu mogo tehule na aniji fuluju matēmatē mēta gwa telujuwetle. Ho bu kē aniji fuluju tobana go mētlelēya. Na Josep aniji tako obobwelē tētagiji na kē aniji fuluju ēfo tiji tletle.

⁴⁷ Na Makdala life mago Maria, na li Maria, Josep bota, bu lolime tafa mētelo. Na bu Jisas mogome kēme gwa togotlebē aniji fuluju hwi mētlēyo.

16

Jisas bu matēmatē mago lahujuwa tle

¹ Tafawa olē yawe tle, na Makdala life mago Maria, na li Maria, Jems bota, na Salome, bu lēkaluwa welē tu, balitina glo mētla, Jisas mogome kēna tefo namogotlame.

² Na Sande, olobalēmu, bu aniji fuluju matēmatēwa mutuja.

³ Bu mutujabē, na alēgeme blalo gēgali mētla, “Seme ya lēgaitanamene, kē tako aniji, matēmatē fuluju ēfo mago obwelē nanēgētayame.”

⁴ Kwe bu mitisiya na lolime mitlija na hwi mētēkaka, “Aniji, matēmatē ēfo mēta hana ebamēfe. Kē aniji waobobwelē mētagujayafe.” Kē aniji tako anijimu.

⁵ Na bu kē aniji fuluju matēmatē elē mētēkakluja. Na bu falake home, tobamu elē kē tafa tēglebē, hwi mētelējuwelēla. Bubē ēho heletabo na tatiwamu. Bu kē home hwi motlola na klelego memētletla, na ulina memētletla.

⁶ Na bume gali tlome, “Sobo klelego asa elo. Bo walowene nelē, sobo Nasaret life mago Jisasme hohwi etatelo, ti mēta kē bu mētlabē home hohwi etatelo. Bu eme hana tafa lēle. Bu wahuju lēle. Sobo hwi elo, eme kē gwa mototlabē tala alujawa ekē lēbe.

⁷ Kwe sobo Pita name, bubē lowene esogo mēglelētlabē ho fli name sagali ejuwelēmo, ‘Jisas bu afina Galili provinswa waloutatēyo. Na sobo bume kēme hwi egujuwelēlome, bu ēbame fene gali tēlēyo.’”

⁸ Na kwe, one bu aniji fuluju matēmatē mago mētēkaklija na mētlēbouja. Bu klelego memētla na lilina hwei memētla. Na bu kēme fli

enëneme li gali meha hana gali motloma, bu uli mët lame nêgeme.

Makdala life mago Maria bu Jisame hwi tole

⁹ Jisas bu Sande olobalëmu matëmatë mago huju tle. Na bu Makdala life mago Mariame afina tuhu tlelë. Jisas bu étani tobali ita tële ahwane, kè mësëbë ato mago hehë tletëme.

¹⁰ Maria bu Jisasna kè asë mët labë onehome gali tujuwelëme. Kè enëne bu maninibo mëtletla na ye mët lekefëta.

¹¹ Na Maria bume gali tlome, “Jisas mana tafa lële na bo wahwi nololë! Na kè enëne bubë gali aholokwane mëtla kwe melowene lamëtla, ‘Bu sogëna lale.’”

Jisasbë lowene esogo mëglelëtlabë ho tlemalë bume alëgeme esune mët lëlo

¹² Na tokwafe bubë lowene esogo mëglelëtlabë ho tlemalë, lifate kile mëtelo na alëge alëgewa mëtëyeu. Na Jisas kè tlemalëme li weniyanena esune tlëme.

¹³ Na bu kè gali, bubë lowene esogo mëglelëtlabë ho flime, gali mutujuwelëmo. Bu kè gali aholokwane mëtla kwe bubë lowenena hana sle mët lamu, sogëna tokwë mëgelo.

Jisas bubë lowene esogo mëglelëtlabë home fata tletëme

¹⁴ Na tokwafe bubë lowene esogo mëglelëtlabë ho we ita jowa këniji hi mëtla na Jisas bume mana fata tletëme. Na bume wame galina gali

tlome, “Sobo lowene sle jwa fëyeme elone? Na sobo bome, matëmatë mago huju tëgelëna kè hwi motlonabë onehome fëyeme boblo totomone na bubë gali aholokwane toglo mo jwa fëyemene?”

¹⁵ Na bume ita gali tlome, “Sobo iniwa lifate Gotobë lale gali, asë elëlëtelo. Na Gotobë lale gali iniwa onehome të etagutemome.

¹⁶ Oneho bu Gotobë lale gali lowene sle mëgletlana, na wafi baptais mëglana, kwe Goto bume lëgaitameme na nëno lëgleme, buna unaunalëme tafa nalëglelëmeme. Kwe oneho bu Gotobë lale gali lowene sle hana mëgletlana, Goto bume hehë lëgletëmeme na tëbo miglitayame.

¹⁷ Bome kè lowene sle mëgletë nabë oneho, bu Gotobë afutuku fenene, wesibi melë mogotomame. Bu bobë weniji fë mogotlana, na ahwane hehë mëgletëmame. Na bu lili anigawa galina gëgali mëglame.

¹⁸ Na bu wametabo taiju tobana atineha fa mogotlana, bume hana tëbo logotomeme. Na bu motaba foha wesibi atineha hi mëglana, bu tëbo hana miglitayame na bu gigli hana mëglame. Na bu tëbo atona home, toba gwa motatëmana, na bu ato titika mlame.”

Goto Jisame heven life elë watilekole

¹⁹ Tako Ho Jisas, bume gali watë tëtatëme na Goto bume heven life elë tilekole. Na bu

Gotobë tobamu toba elë tafa
tletle, Gotona onehome eso
home tafa namëgletemome.

²⁰ Na bubë lowene esogo
mëglelëtlabë ho mutuja na
lale gali të mëtëtagula, li life,
li life memëtla. Tako Ho Jisas,
bume lataitame, na bubë
afutuku lafijiwa tlëme. Na
bu, Gotobë afutuku fenene,
wesibi melë lamototoma. Na
oneho këme hwi mëtla na
lowene mëtla, “Bu kë të
mëtatë nabë gali nëgalimufe.”

Luk Ebë Lale Anebo Gali Kënëgebëye Jisame Gali nene, Luk Yah tle

Luk bu kë lale gali Tiofilusme yahi tletle

¹ O letitabo ho, Tiofilus. Ëbame feilawa ho bu, Jisas wesibi sebobë li mëta, melë kë totometënabë yahi mëtla. Kwe bu iniwa gali yahi hana mëtla.

² Fli enëne, bu iniwa wesibi Jisas kë totomebë bubë nabana hwi motloma. Na bu kë gali boname na fli enënename të mëtëtatëna. Na kë enëne bu kë aholokwane motlola bë gali yahi mëtla.

³ Këme nëgëme, bo metole nanelë, bo mata kë lale gali yahi nelëme na jume nelëbakëme. Bo iniwa wesibi, Jisas melë kë totomebë, onehome itaita takune latlokwe fëmë. Na bo kë wesibibëme walowene sle nëletemë. Na bo ëje kë wesibi, yahi sle nelë.

⁴ Ju bobë yahi hwi sle eglomena, na melowene sle naegletëmeme, “Kë gali bu jume ëbame kë okokwe mëtëglëyobë, nëgali gali mu.”

Ensel Sekaraiame megali latlole, “Jubë mëse Elisabet nëba fu egotleme”

⁵ Herot bu Judia provins mago eso home tafa téglena, na lotu lome wege lëglebë ho li këme tètabe. Bubë weniji Sekaraia. Bu Abiyabë ilawa

mago ho. Abiyabë ilawa mago ho, bu lotu lome wege mëtlekefëya. Bu na bubë mëse mata, lotu lome wege lëglebë letitabo ho Aronbë bosomele. Bubë nobë weniji Elisabet.

⁶ Nona, bohena, Gotobë naba lime lale tafamu lamëtelo. Na bu Gotobë galiwa lowene sle mëtletelo. Na bu këme fëye wesibiha hana mëtelo.

⁷ Kwe bu nëba jwa mëtëtabo. Elisabet layame tlibeme nëgëme. Na bohe hoti tle na no mëseti tle.

⁸ Li olëna, Sekaraiabë ilawa mago enëne, Gotobë tako lotu lo mëta, Gotobë wege fa mëtëtatla. Na Sekaraia mata, Gotobë wege fa tëtatlë.

⁹ Ètani home fene aniji motlokwe fëma, kë fenene Sekaraiame aniji motlola, lale lëkaluna wesibi Gotome ahojume nalëgletleme, Goto bubë lale ahëya lëkalu hëhë nalëgleme. Bu Sekaraiame melëna aniji motlola bu satu salë mëtla na Sekaraiabë weniji fata tletle. Na bu Gotobë tako lotu lowa təkaklu, lale lëkaluna wesibi Gotome ahojume nalëgeluletleme.

¹⁰ Na Sekaraia lale lëkaluna wesibi Gotome kë ahojume tletlebë olëna, feilawa oneho Gotobë tako lotu lo li mëta loko mëtlelëya na Gotome mana gëgali motlokwe fla.

¹¹ Sekaraia lale lëkaluna wesibi Gotome mana ahojume lëgletlebë, na kwe Gotobë ensel bume mana olafa tletle na lale lëkaluna wesibi këme ahojumbë masei li mëta, tobamu elëme

tlibetle.

¹² Sekaraia, enselme hwi tole na klikina metletlemu na ulina metletle.

¹³ Na kēme ensel bume gali tole, “Sekaraia, ju uli asa ele. Goto jubē mēse nēba egehlebē gali waaholokwane tolē. Kēme nēgame jubē mēse Elisabet nēba fu egotleme. Na ju bubē weniji mefē saetle, ‘Jon.’

¹⁴ Kē nēba fu egotlena, jubē lowene lalowamu nalēbetēme na fleflesuna etabeme. Feilawa oneho mata fleflesuna mētabēyame.

¹⁵ Tokwafe Goto bume mehwi nalogloleme nēgame, lale homu. Bu wain taba liji tu na bia tu na hana hi lēglememu. Bu botabē imo mēta manane na Gotobē Amtētomba bu mēta mana lelutabetleme.

¹⁶ Na bu, Israelbē afenēbome lowene hihijika mēglabēme laitameme na ita bubē Gotome esogo melelēlame.

¹⁷ Gotobē lowene mago gali tē totokweflebē ētanifu ho, Elaija fenene, bu kēha lakalena kalēlegona tafa nalēgleme. Na Tako Home leoutatleme. Bu bolijaya name, nēbale name melē logotomeme, yonane lowene mēta fwa tafa mlame. Na bu Gotobē gali kē momata mēgētatabē enēneme sle lotomeme na bu metafa namēglame, lale lowenena enēnebē lowene fene lēbetēme. Na bu onehome sagli lēlelēmeme na Gotobē kalēlegona ho ligisibē olēme mana hwi namēgletlame.”

¹⁸ Na Sekaraia enselme

gali tole, “Bo habēna lowene nēgletelēmene, kē gali nēgali gali mu? Ju hwi ele! Bo wahoti nelē na bobē mēse mata wamēseti ebefe.”

¹⁹ Na ensel Sekaraiame gali metafu tētatle, “Bo Gebriel. Bo Gotobē li mēta kē niglibekefēbē ho. Goto bu jine lelēfakēnē, jume gali nanoglēme na ebē lale gali tē nanētātēme.

²⁰ Te! Ju aholokwane ele. Ju bobē gali lowene sle jwa egletleme nēgame, elē ju gali mumu egēbeme. Ju gali mumu tabo tafa eglebēē, na jubē mēse nēba mana fu totleme. Bobē gali olafa lēglebē olē, Goto waaniji lolole.”

²¹ Oneho Sekaraiame yafe hwi mētletla na metutune lamētletla, “Bu lotu lo mēta tako tafa fēyeme lelulene, wesibi liha fata leluletlene?”

²² Tokwafe tekaklina, gēgali lēgleme fene kwe bu hana gēgali tle. Bu tobanawa lēlekuju tēbebokwaketēme. Bu gali wamumu tēbe. Oneho bume yafe hwi motlola na melowene lamētletla, “Gotobē tako lotu lo mēta, Gotobē klelegowa wesibi hwi lelujelēlefe.”

²³ Tokwafe, Sekaraia, Gotobē tako lotu lo mēta kē wege tēglebē wege yawe tole na bubē lifatewa mana tuju.

²⁴ Na tokwafe bubē mēse Elisabet nēba imona tētabe. Na bubē lo mēta fwa tobali yeme tafa tle. Na bu megali tle,

²⁵ “Goto maninibo tletenē. Bome kē fata lēgletenēbē wesibi, ebē Gotobē wesibi.

Bo onehobë naba lime,
layame kë tiglibebë tiniyi,
Goto wasle totle.”

*Ensel Mariame megali tolë,
“Jisame egehole naegleme”*

²⁶ Elisabet bu nëba imona
tobali ita jowa yeme tafa tle
na Goto, bubë ensel
Gabrielme, Galili provinsbë
tokwëfo lifate Nasaretwa
mana jine tlële.

²⁷ Na bu layo mëse belë
tujutë, bubë weniji Maria. Kë
mëseme, eso ho Devitbë
afenëbo mago ho, Josep sei
lëglebëme wafi aniji motlëya.

²⁸ Na Gabriel gali tolë, “Bo
nisiyo. Goto juna etabo na
jume lataita na tako tole
latletë.”

²⁹ Maria kë gali
aholokwane tole na klelego
metletle na tutune tle na
melowene tle, “Kë habëtabo
galine?”

³⁰ Na ensel gali tolë,
“Maria, ju uli asa ele. Goto
jume fleflesumu lalëletë.”

³¹ Aholokwane ele. Ju nëba
egeholeme. Na ju iko nëba fu
egotleme. Na ju bubë weniji
mefë egotleme, ‘Jisas.’

³² Na bu flesu hoha
lëgëtabeme. Na bu mefë
namogotlame, “Tako
kalëlegona Gotobë nëba mu.’
Na Goto bume eso home
aniji loglome, bosome
Devit fene tafa tle.

³³ Na bu Jekobë ilawa
mago enënebë eso home
unaunalëme lëtabetëme
nalëgleme. Na bu eso home
iniwa olë metafafa
lokoukëfeme.”

³⁴ Na Maria enselme gali
tole, “Euowe. Bo nëba

habëna nëgeholëmene? Bo ho
sei hana nëlëlefe.”

³⁵ Na ensel bubë gali
metafu tëtatë, “Gotobë
Amtëtomba jume ligisi tëme
na kalëlegona Gotobë
afutuku jume lamu lëgëtabeme.
Këme nëgeme, kë nëba ju
tokwafe fu egotlena bu
Gotobë lale homu lëgëtabeme.
Na bu mefë namogotlame,
‘Gotobë nëba.’

³⁶ Ju aholo bo eta! Binabi
Elisabet bu mësetimu kwe bu
mata nëba ehole. Onoho
megali kë mëtlekefëtëyabë,
‘Bu layame eliboo,’ kwe aona
yeme neme na bu nëba mana
tafa egleme.

³⁷ Goto bu Elisabetme nëba
melë lële na jume mata nëba
lëglëme. Gotome li wesibiha
hana lëkle logotleme, bu
lalowa iniwa wesibi melë
logotomeme.”

³⁸ Na Maria bume gali
tole, “Aholokwane ele. Bo
Gotome wege nëgletelëbë
mëse. Bu bome melë
malëtanë, ju fene gali ele.”
Na kwe ensel bume kile tëta.

*Maria Elisabetme hwime
tujutë*

³⁹ Kë nalëwa, Maria bu
hokweinawa fatini mëta kë
tëgëbebë lifatewa tokwale,
Judia provins mëta,
Elisabetme hwi naegwelëme.

⁴⁰ Na bu Sekaraiabë lowa
tëkaklu na Elisabetme gali
tole, “Bo nisiyo.”

⁴¹ Elisabet kë gali
aholokwane tolë na nëba imo
mago klikinamu metletë. Na
Gotobë Amtëtomba Elisabet
belë tisi të na buna mëtëtabo.

⁴² Na bu Mariame
anisasana gali tolë, “Goto

jume fleflesumu lalëletë na
 jume tako lëgaitamë lalële
 kwe fli oneme, melëgaitame
 hana lële. Na kë nëba jubë
 imo mëta kë nëgebë, Goto
 bume mata tako lëgaitale
 lëglememu.

⁴³ Bo lale mëse nane na
 bobë Tako Hobë bota, bo
 belë kë egisibë.

⁴⁴ Aholokwane ele! Bo
 jubë gali meaholokwane
 noglëna, 'Bo nisiyo,' kwe
 bobë nëba fleflesu lalëlule na
 klikinamu melëluletenë.

⁴⁵ Ju Gotome melowene sle
 tletle, 'Goto kë wesibi jume
 kë gali toglëbë, melë lëgleme,
 këme nëgeme ju fleflesu këme
 egleme.'"

*Maria Gotome kë fleflesu
 tëgletlebë sawa*

⁴⁶ Maria gali tle,
 "Bobë lowene mago
 lowenena
 Gotome fleflesu
 nëlekefëtelë,
 na bibita notokweflë,
 'Goto bu lale mu.'

⁴⁷ Na bo Gotome fleflesu
 nëletelë.
 Bu bome lëgaitanë ho,
 bo tafa sle këme nelë,
 bu melë lëgëtanëme
 nëgeme.

⁴⁸ Bo bubë wege mëse,
 bo lale mëse nane.
 Kwe bu bome hwi tlonë
 na maninibo tletenë.
 Elina, unina mata,
 iniwa oneho megali
 mokoukefëtename,
 'Goto bume tako fleflesu
 latletë.'

⁴⁹ Na Tako Afutukuna Goto,
 bome lale
 wesibimume laitanë.
 Ebë kë nëgebë Goto,

tëbo lowene hanane,
 lale lowene nawa lëtabe.
⁵⁰ Bubë gali momata jwa kë
 mogotlabë onehome,
 Goto bume maninibo
 lëglekefëtememe.

Bu itaita melë
 lotokefëmememe,
 ebë olëna kë tafa mëglabë
 onehome
 na tokwafe fu onehome
 mata
 itaita melë
 lotokwefëmememe.

⁵¹ Goto bubë afutukuna melë
 totome.

Onho bu melowene
 mëtlana,
 'Sebo kwe lale enënefe.
 Fli enëne bu seboha
 nane. Weye.'

Na bume fwa fleflesu
 mëtletëma
 na bibita mototoma,
 bu këha enëneme hehë
 tletëme,
 na bu mitliwaya.

⁵² Bu kalëlegona eso home
 boblo totome,
 kwe atwati home
 taitame.

⁵³ Bu foneme gigli mëtlabë
 onehome,
 lale wesibi tlëme
 na bubë imo sosolo
 memëtëtaya.
 Kwe feilawa wesibina
 onehome hehë tletëme
 na bu alujawa
 mitliwaya.

⁵⁴⁻⁵⁵ Bu bubë wege enëne,
 Israelbë ilawa mago
 enëneme taitame.
 Na bu Abraham name,
 sebobë semlenino
 name,
 gali kë sle tëtatëmebë gali
 aholokwana hana ti tle.
 Bu bume megali sle tle,
 bume na bubë tokwafe
 fu afenëbome

itaita memaninibo
lëkoukefëtémeme.”
56 Maria bu Elisabetna
aona yeme mëtëtabo na bubë
lifatewa tuju.

Elisabet Jonme fu totle

57 Elisabetbë nëba fu olë
fata tletë, na bu iko nëba
mana fu totle.

58 Bubë life mago oneho na
weife mago enëne, Goto
bume kë maninibo tégletëbë
gali aholokwane mëtla na
buna iniwa fleflesu
mëtlelëya.

59 Nëba tobali ita aona olë
këniji tètabe, na bu loko
mëtlelëya, kë nëbabë ato jibo
tlë namëtatlame. Na bu
metole lamëtla, bolijaya
Sekaraiabë wenijina
lëtabeme.

60 Kwe bota gali tlome,
“Matëbe. Bubë weniji Jon.”

61 Na bume gali motlëya,
“Ju kë weniji fëyeme fë
etlene? Jubë afenëbo mago
hobë weniji li këha hana
lëbe.”

62 Na bu kë nëbabë
bolijayame tobana lëlekuju
mëtletla, “Weniji habelë fë
egotlemene?”

63 Na bu yahi laba
mëglëlabëme, tobanawa
lëlekuju tletëme. Na bu
mëtlëla na bu kë laba mëta
meyahi latle, “Bubë weniji
Jon.” Na bu kë weniji hwi
motlola na klelego memëtla.

64 Na Goto Sekaraiabë gali
laslewa tëtatile na bu ita
mana gali tle na Gotome
fleflesu latletle na bibita
totle.

65 Na bubë life mago oneho
kë wesibi hwi motlola na
klelego memëtletla. Na kë

gali, Judia provinsbë fatini
mëta kë tégëbagubë lifatewa
fifiji mëtlagula.

66 Na bu kë gali
aholokwane motokouja na
tako tutune memotokouja na
takune mëtla, “Tokwafe kë
nëba habëtabo hoha
lëgëtabemene?” Bu melowene
mëtlame nëgeme, “Gotobë
kalëlego bu mëta lëtabetle.”

*Sekaraia Gotobë lowene
mago gali të totle*

67 Gotobë Amtëtomba, kë
nëbabë bolijaya, Sekaraia
belë tisi tle na buna
mëtëtabo. Na bu Gotobë
lowene mago gali metë totle,

68 “Sebo Israelbë Gotome
fleflesu manëletla na
bibita manotla.

Bu seme, bubë onehome,
lëgaitana nalëgleme tisi
tëna,
na seme nëno nalëgleme
tisi tëna.

69 Goto, bubë wege ho
Devitbë afenëbo mago,
kalëlegona ho seme
jine tlëtëna,
seme lëgaitana nalëgleme,
na nëno nalëgleme.

70 Ètani anebomu, Goto bu kë
galime gali sle latlona.
Na bubë lowene mago
gali të
mototkweflabë ho,
bu kë gali sle toglobebë
gali të mototla.

71 Bu wagali sle tle, seme
lëgaitana nalëgleme.
Na seme kë wame
moglonabë enëne
magome
na gëglë kë moglonabë
enëne magome nëno
lëgleme,

- bu seme tēbo hana
mēgētaname.
- 72 Bu ēbaimē sebo bē
sem leninome megali
sle latlome,
'Bo some maninibo
nēgletēyome na
nēgaitome.'
Na bume kē gali sle
toglome bē gali,
mana lowene
tlekefētēme,
aholokwana hana ti tle.
- 73 Bu sebo bē semle
Abrahamme gali
wasle tētatlē.
Na ebē olē, Goto bu
metole lalēletēna,
kē wesibi seme mefata
lēgletēname,
bu ētani fene gali sle tle.
- 74 Bu metole lalēle,
bu seme kē wame
moglonabē enēnebē
magome
nēno lēgleme.
Na sebo Gotome esogo
sle nanēglelēlame
na wame home uli jwa
nanēletēmame.
- 75 Kēme nēgēme, sebo ebē life
mēta mana
nētābēyame,
sebo bubē li mēta lalē
lowene mēta natafa
nēglame.
Na sebo bē lowene mēta
bubē lalē lowenewamu
lēbetēname.
- 76 Na ju, bobē nēba, tokwafe
jume mefē mēgētome,
'Tako kalēlegona Gotobē
lowene mago gali tē
totokweflēbē ho.'
Ju Gotobē kalēlegona
hobēme eoutatlēme
na bubē alēge fu
naegetatlēme.

- 77-78 Ju Gotobē onehome
okokwe
na bu melowene
namēglame,
'Goto bume tako
maninibo lalēletēme,
na bubē tēbo lowene sle
nalētātēmeme
na bume laitameme.'
Na bu heven life mago
elulego seme
lēglēname.
- 79 Na oneho bu tēbo lowene
mēta kē tafa mēglabē,
kē elulego bume lalē
lowene olafa
lētātēmeme.
Bu lalē tafa lowene seme
olafa lētātēname
na sebo bē lowene
lalowa nalēbetēname."
- 80 Tokwafe, Jon, sigli lēleme
na bubē lowene lalēmu
lēbetlēme. Bu ho jwa tabo elē
lutabeme. Bu lutabebē na
mana Israelbē afenēbobē
naba li mēta, bubē wege
mana fa lotlēme.

2

Maria Jisame fu totle

- ¹ Elisabet bu Jonme wafu
totle, na kē nalēwa, Rom
lifate mago eso ho Ogastus,
bu kē tafa lēglelēme bē
onehome tabēi mēglabēme
wasle totle.
- ² Gavman ēbame onehome
hana tabēi tle. Ebēnawa tabēi
lēgleme. Na kē nalēwa,
Kwirinius bu Siria provins
magobē eso ho tētābetēme.
- ³ Kēme nēgēme iniwa
oneho bubē lifekuwa kēme
mitliwaya, Gavman bubē
weniji gogwa nalēgletēmeme.
- ⁴ Na Josep Mariana Galili
provinsbē tokwēfo lifeku
Nasaret kile mētelo na Judia

provinsbë tokwëfo lifeku
Betlehemwa mitimo, bubë
bosemlebë life nëgeme.
Josepbë bosemlebë weniji
Devit, Israelbë ètanifu eso ho.

⁵ Na bume sei lëglëbëme, kè
aniji mototlabë Mariana
mitimo, weniji bubëna iniwa
sle namogotometëmame. Na
kwe Maria nëba imona.

⁶⁻⁷ Betlehem lifewa fwa
mutulo. Na kè lifeku mago ni
lobë ke mëtlame nëgeme na
bulmakaubë ni lo mëta këme
ni mëtebo. Na bu kè lo mëta
mana mëtëtabo na Maria
amlebo mana fale tëta. Na bu
abwa nëba mana fu totle. Na
èhona lei totle na
bulmakaubë hi wesibi iseku
mëta tuku tle.

*Gotobë ensel, sipsip kleli kè
mëglëmabë home gali
mëtehitëma*

⁸ Na kwe Betlehem life li
mëta, sipsip kleli mëtlëmabë
ho mana tafa mëtla. Na bu
klabëna bubë sipsip kleli
këme mëtlëkefëma.

⁹ Mëtlëmabëë, na Gotobë
ensel fata tletëme na Gotobë
elulego klijiha sisigli tëtagule
na bume hwagënë totome.
Na bu tako ulimu memëtla.

¹⁰ Kwe Gotobë ensel gali
tlome, “Sobo uli asa elo.
Aholokwane elo! Bo some
lale galimu nehityo. Iniwa
oneho bu ebë lale gali
aholokwane mëglana, kwe bu
tako fleflesu mëglame.

¹¹ Ebë gali melë
lëgëbelalële, ebë olëna,
Devitbë lifeku mëta, mëse li
nëba fu etle. Kè nëba bu some
lëgaito nalëgleme, tëbo lowene
mago nëno nalëgleme. Bu
tako ho, na Goto bume wafi
aniji tlole, onehome lëgaitame

nalëgleme, tëbo lowene mago
nëno nalëgleme.

¹² Sobo mehwi eglolome.

Èhona leitabo nëba
bulmakaubë hi wesibi iseku
mëta ni lëbe.”

¹³ Ensel wagali tlome na
feilawa ensel lafatawa
mëtletëme. Na bu Gotome
fleflesu mëtletla na bibita
mototla, na Gotobë sawa
mefë lamëtëtata,

¹⁴ “Goto bu heven life mëta
kè tafa lëglebë bu lale na tako
mu. Oneho Goto kè fleflesu
lëgletëmebë, bubë lowene
lëgëbetëme sle malëletëme.”

*Sipsip kleli kè mëtlëmabë ho,
Jisame hwime mutujutla*

¹⁵ Na kwe ensel bume
hune mototoma na heven
lifewa motokwala. Na sipsip
kleli kè mëtlëmabë ho mana
gali mëtla, “Te, mana
manuja, Betlehem lifekuwa.
Goto seme kè gali toglonabë
wesibi hwi nanugujelëlame.”

¹⁶ Na bu hokweinawa
mutuja. Na bume hohwi
mëtëttagutla. Na Josep na
Maria name mana hwi
motloma. Na bulmakaubë hi
wesibi iseku mëta kè ni
tëgëbebë nëbame mata hwi
motlola.

¹⁷ Bu hwi motlola na bu
ensel kè gali toglobebë gali
të mëtëtätëma.

¹⁸ Na iniwa oneho, bu
sipsip kleli kè mëglëmabë
hobë gali aholokwane
motloma, na klelego
memëtla.

¹⁹ Kwe Maria kè wesibi
aholokwana hana ti tle na
itaita lowene tlekefëtla.

²⁰ Na sipsip kleli kè
mëtlëmabë ho, kè
aholokwane mëtlabë gali na

kë hwi motlomabë wesibime
Gotome fleflesu motokoutla.
Iniwa wesibi melë mëtlemë
nëgëme, Gotobë ensel fene
gali tlome.

*Bu kë nëbabë weniji mefë
mototla, "Jisas"*

²¹ Tobali ita aona olë tètabe
na bubë ato jibo mana tlë
mëtëtatla, na bubë weniji
mana fë mototla, "Jisas."
Maria kë nëba tehole jwa
nëgena kwe Gotobë ensel
këbë wenijibëme mana gali
tolë.

*Simeonna Anana Jisasme
tako lotu lo mëta hwi
mëtélujëlëlo*

²² Na kë olë fotokoke tëme,
Josep Mariame Jerusalem
lifatewa tleouli, toba mago
sasu ko, Gotobë naba li mëta
sle naegotomeme, Mosesbë
gali fene tëbetle. Mëse bu
nëba tafa eglëna, toba sasu
kowa egehona, kwe Gotobë
naba li mëta tëbo lalëta. Na
kwe bu nëba Jerusalem
lifatewa mëtletlulo, Gotome
mëglëlo namëgelome.

²³ Tlemalë bu metole
lamëtelo, Gotobë gali kë
lëgëbebë, kë galiwa esogo
mëtletlëtelo. Kë gali melë
lëgëbelalële, "Sobo abwa
mago iko nëba kë nëgebë,
Gotome eglëlome."

²⁴ Na Gotobë tafa sle gali
mata melë lëgëbetlëlalële,
"Sobo tële seuneni o tële
yolime nëbale, Gotome
egehotelome, Gotobë naba li
mëta, toba mago sasu ko këna
sle naegotomeme." Na bu
fole këme mëtehoujo, lotu
lome wege lëglebë ho, kë fole

Gotome ahojume
nalëgletleme.

²⁵ Na kë nalë, ho li
Jerusalem lifate mëta tètabe.
Bubë weniji Simeon. Kë ho
kë nëgebë bu lale lowenewa
esogo tlelële na bu Gotome
fwa lowene slemu tletle. Na
Gotobë Amtëtomba bu mëta
telutabetle. Simeon bu Goto
kë jine lëglelebë hobëme hwi
tletle. Israelbë ilawa mago
onehome lëgaitame
nalëgleme.

²⁶ Gotobë Amtëtomba bume
megali sle latlole, "Ju ilawa
hana gli egleme. Ètani Goto
bu megali slemu latle, 'Bo ho
jine nëglëlëme, onehome tëbo
lowene mago nëno lëgleme.'
Ju kë home afina hwi
eloleme na ju mana gli
elëme."

²⁷ Na kwe Gotobë
Amtëtomba Simeonme tisi tle
na bu Gotobë tako lotu lowa
këme təkaklu. Na Jisasbë
botana bolijaya name,
Jisasme Gotobë lowa
mëtletlulo, kë nëbame melë
namogotlame, Gotobë gali
fene lëbetle.

²⁸ Na Simeon kë nëbame
hwi tole na fa totle. Na bu
Gotome fleflesu tletle na
bibita totle na megali tle,

²⁹ "Tako ho, jubë gali sle gali
watëbetë,
na bo, jubë wege ho, bo
maninibona wasle
nelë,
bo mana lalowa gli nelë.

³⁰ Seme nëno lëglebë home,
ju kë jine tëglëlebë ho,
bo nabana wahwi
nololë.

³¹ Ju kë home,

iniwa onehome ekë
lebotane etatëme.
32 Na kliji elulegoha, bu
Gotobë lowene,
Israelbë afenëboni
mëtabëya jwa mëglabë
enëne
olafa lëgëtatëmeme.
Na bu Israelbë
afenëbome,
lëgaitame nalëgleme
jubë lowene esogo
mëglelëlabë.
Kë oneho ebë jubë.”

33 Jisasbë botana,
bolijayana, Simeon nëbame
kë gali toglolebë gali
aholokwane mëtelo na
klelego memëtletelo.

34 Na Simeon Gotome
gëgali tlelële, bume lëgaitame
nalëgleme. Na bu kë nëbabë
bota, Mariame, gali tolë,
“Aholokwane ele! Goto ebë
nëbame meaniji latlole,
Israelbë lebutako afenëbome
melë logotomeme. Lebutako
oneho bume kë lowene sle
mëgletlabë lowene, kile
mlame na lebutako oneho
bume kë lowene mëgletlabë
lowene esogo sle meletlëleme.
Ebë nëba kë nëgebëye, Gotobë
lale lowene, onehome
lebotane lëtatëmebë ho. Kwe
feilawa oneho bume tëbo
gali moglolame,

35 na bubë lowene mago
tëbo lowenebë olafa
lëgletëmeme. Na tokwafe ju
tako hobota egleme, sëfa yo
sle eglëbë fenene.”

36 Na Gotobë lowene mago
gali të egotlebë mëse li kë
mëta tafa tle. Bubë weniji
Ana. Bu Aserbë afenëbo
magobë mëse, Fenuelbë
nëba. Ètani bu ho sei tlële na

bu kë hona tobali ita tële
tlibutu kënjiji tafa mëtelo
37 na bohe mana gli tletë.
Na bu sei ju tètabe. Na èje bu
84 tlibutu kënjiji etabe. Bu
Gotobë tako lotu lo kile hana
tletle. Bu hi wesibi itaita yo
tlekëfe, Gotome lowene sle
naegletleme. Na bu Gotome
mana gëgali tlelëkefle. Klijina,
klabëna Gotome fwa lowene
tlekefëtële.

38 Na kë nalë, Ana bu nëba
loliwa tisi tle na Gotome
mana gali tlole, “Ebë nëba,
yaha fëyeme enënane.” Na
feilawa oneho bu mehwi kë
mëtlekefëyabë, Goto bu
Jerusalem lifate mago
onehome nëno lëgleme. Na
bu kë nëbabë gali kë
onehome të tëtatëme.

*Josep, nona, Jisasna, Nasaret
lifewa ita mutuja*

39 Bu iniwa wesibi, Gotobë
gali fene tëbe, melë
wamototoma. Na kwe bu
Galili provinsbë tokwëfo
lifeku Nasaret lifekuwa ita
mutuja. Ebë bubë life.

40 Na kë nëba sigli lëleme na
lolokwëne lëgleme. Na lale
lowene bubë lowene mëta
lëbetleme na Goto bume tako
tole lëletleme na bume
laitaleme.

*Jisas, falake tokwëfo nëgena,
na botana bolijayana tako
lotu lowa bume iniwa
mëtlelulo*

41 Iniwa tlibutuna, Jisas
bolijayana, botana,
Jerusalem lifatewa itaita
lamëtëyeoukefo, Gotobë tako
lotu olë lowene mëtletelome
nëgeme. Israelbë ilawa mago
oneho, bu kë tako lotu olë,
Goto ètani bosemnime kë

tëgaitamebë olë na Isip lifate këna kile mëtëglabë olë, lowene mëtkefëftla.

⁴² Jisas bu we ita tële tlibutu këniji watle. Na kwe bu Jerusalem lifatewa ita mutuja bu ëbame fene mutujukefëya, Gotobë tako lotu olë lowene mëgletlame nëgeme.

⁴³ Kë tako lotu olë yawe motlola, na kwe bu Jerusalem lifate kile mëtla na bubë lifekuwa mutuja. Kwe falake tokwëfo Jisas, Jerusalem lifate mëta mana tafa tle. Botana bolijayana melowene hana mëtletelo, "Jisas mana tafa lële."

⁴⁴ Weye, bu meweniji lamëtelo, fli enënena mana asë melawa. Këme nëgeme olë jowa buwa mëtëyeu. Tokwafe, bubë ilawa mago onehome na bubë yabe home, tëtakune mëtlagumo.

⁴⁵ Bu yafe tëtakune mëtlagumo, kwe hana hwi motlolo. Këme nëgeme bu lu mëtelo na Jerusalem lifatewa ita mëtëyeu, hohwi namogutatelome.

⁴⁶ Bume aona olë yafe hohwi mëtëtatelo. Na tokwafe bume tako lotu lo mëta hwi motlolo. Bu Gotobë gali okokwe moglomabë hobë ku mëta tafa tletëme. Na bubë gali mana aholokwane tlagukefëme na bume tëtakune tlokefëme.

⁴⁷ Iniwa oneho, bubë lowene yafe hwi motlotla na bubë tafu gali yafe aholokwane motlotla, klelegomu memëtletla.

⁴⁸ Botana bolijayana hwi

motlolo, na klelego memëtletelo. Na bota bume gali tlole, "O hëyai, ju seme melë fëyeme etanone? Sebo blijayana jume yafe hohwi nëtatëyo na manibona tëbo menëletëyo."

⁴⁹ Kwe bubë gali tafu tëtätëme, "Sobo bome fëyeme hohwi etatenone? Sobo bome melowene hana eletënanane, 'Bo bobë ayabë lo mëta tafa manelë?'"

⁵⁰ Kwe bubë gali lowene hana mëtletelo bu yaya lamëtletelo.

⁵¹ Na kwe buña Nasaret lifewa ita mutuja. Na bubë lowenewa esogo esogo tlelëkefëtëme. Kwe Maria bowene meta kë hwi toglometlebë wesibi, bubë lowene mëta mana tehotle.

⁵² Na Jisas sigli tle na bubë lowene lalemu lëbetleme. Na Goto bume flelesu lëletleme na iniwa oneho mata bume tole mëgletlame.

3

Tu mëta baptais logotomebë ho, Jon, gali të tëtätëme

¹ Eso ho Taiberius, bu we ita tobali tlibutu këniji, Rom life enënebë tako eso home tafa tletëme. Kë nalëwa, Pontius Pailat Judia provins enënebë eso home tafa tletëme. Na Herot Galili provins enënebë eso home tafa tletëme. Na bolijamo Filip bu Ituria na Trakonitis provins enënebë eso home tafa tletëme. Na Lisantias, bu Abilene provins enënebë eso home tafa tletëme.

² Na Anas na Kaiafas bu lotu lo mëta wege mëglabë enënebë eso ho mëtëtabo. Kë

nalëwa, Sekaraia bowene Jon, ho jwa tabo mëta tafa tle na Gotobë gali bubë lowene mëta mana fata tletle.

³ Këme nëgеме, Jon bu Jordan tu lime kë tafa mëtlabë lifekuwa tuju na gali metë tëtagutëme, “Sobo tëbo lowene aholokwana ti elome na lale lowenewa esogo elelëlome na baptais elome. Na Goto bu sobobë tëbo lowene aholokwana ti lëgletëyome na hana lëgeholeme.”

⁴ Kë wesibi mefata latle, Gotobë lowene mago gali të totokweflebë ho, Aisaia, fene yahi tle. Bu meyahi latle, “Tokwafe, li ho, ho jwa tabo mëta mewe lëgleme, ‘Sobo tako hobë alëge fu etatelo, alëge sle etometelo.

⁵ Bu iniwa klukulego tabobë na iniwa fofu tabobë sle motomame. Na iniwa alëge, ekekë mëglebë sasle mëtaguma. Na iniwa alëge tëbo mëglebë, sasle motoma.

⁶ Na iniwa oneho, Goto onehome kë nëno lëglebë wege hwi moglotlame.”

⁷ Feilawa oneho Jon belë mitisitla, bume baptais nalogotomeme. Kwe Jon bume gali tlome, “Sobo tëbo taijuha. Sobo tëbo enëne. Goto tako wame loglëyome na tëbo lëgëtome. Sobo melowene lalone hee! Bo some baptais nëgëtona kwe Gotobë wame some hana tëbo lëgëtomene? Weyewa.

⁸ Sobo tëbo lowene aholokwana ti egelona na Gotobë lale lowenewa esogo eglelëlona, ta kë lowene

saolafa etlo, bu melowene namëgletëyome, ‘Bubë tëbo lowene aholokwana wati mëlafe na Gotobë lale lowenewa esogo melelëlafe.’ Na sobolalo megëgali asa elo, ‘Sebo Abrahambë afenëbo, këme nëgеме Goto bu seme hana tëbo lëgëtaname.’ Weye. Bo some gali nolëyo, Abrahambë afenëbo ebë tokwëfo wesibi. Goto ebë anijime, Abrahambë afenëbome lalewa fata lotomeme.

⁹ Gotobë wame bu onehome fata lëgletëmeme nounou lalëletëmemu, yasi ti wayome wafi lëbe. Na iniwa ti, lale liji mogwalë hana mëglena, kwe Goto kë ti tëtëka lëgleme na ahojume sike lëleme.”

¹⁰ Oneho bu Jonbë gali aholokwane motlola, na bume metakune motlola, “Sebo habelë nëglamene na Goto seme tëbo jwa nalëgëtaname?”

¹¹ Na bume megali tlome, “Fli enëne bu gelowa ëho tële tële nëgena, bu fli alujawa kë nëgebë enëneme sa mëlëma. Na fli enëne hi wesibina nëgena, bu hi wesibi jwa kë nëgebë enëneme sa mëlëma.”

¹² Takis baliti glo mëglabë ho fli, bu belë mitisiya, bume mata baptais nalogotomeme. Na bu takune motlola, “Tisa, sebo habelë nëglamene?”

¹³ Na bume megali tlome, “Sobo takis baliti meglo egletemome, gavman fene gali tlëyo. Sobo fli baliti manawa asa glo eletemo.”

¹⁴ Na wame home boblo mogotomabë enëne fli, bu

mata takune motlola, “Na sebowa, sebo habelë nēglamene?” Na bume gali metafu tētātēme, “Sobo fli enēneme gēglē asa elelēmo na bubē baliti toklime glo elome. Na sobo fli onehome gavmanbē naba lime blawa asa so etatemo na bubē baliti blawa glo eletemome. Na gavman some wege baliti kē lēglēyobē, kēme fwa fleflesu egelome. Fli baliti glome asa tole elo.”

¹⁵ Na oneho Jonme hwi motlola, na bubē lowene fotokoke tēme na bubē lowene nawa melowene mētla, “Jon bu kē ho nawa, seme na nēno lēglebē ho nawa. Goto kē aniji toglolebē ho nawa.”

¹⁶ Kēme nēgeme Jon bubē gali metafu tētātēme, “Bo some tu mēta fwa baptais nēlelēyo. Kwe tokwafe bobē nagi ho li ligisime. Na kē ho kē ligisibē bubē afutuku takomu kwe bobē afutuku tokwēfomu. Bo lale ho nane kē ligisi home kē nēgaitalēme, manawa wege ho fene laitale. Weye. Bo bubē jiteho hana titika nēgletelēme. Bu letitabo homu nēgeme na bo atwāti homu. Bu some Gotobē Amtētombana, ahojuna baptais lēglēlēyome.

¹⁷ Na kē ho kē ligisibē bu tēbo lowenenabē enēneme na lale lowenenabē enēneme lēselokwame, nuju bolijaya hwetikina witi liji mago fene lēselokwa. Na bu lale lowene enēneme heven life elē sei lēlēmeme, nuju bolijaya bu witi liji, lale lo mēta fene gogwa lēle. Kwe bu tēbo

lowene enēne lēle jwa ahoju life elēme sike lēgleme, nuju bolijaya witi liji mago hwetiki ahojume fene sike lēle.”

¹⁸ Jon bu feilawa gali tē tētātēme, onehobē lowene huju tētātēme, lowene sle namēglame. Na kē esome fwa, Gotobē lale gali kēme tē tētātēme.

Herot bu Jonme kalabusu lowa tuku tle

¹⁹ Herot, Galili provinsbē eso ho, bu bolijamobē mēseme, Herodiasme, hijika totle na sei tlē. Na Jon bume kēme wame gali tlole. Na iniwa fli tēbo lowene Herot bu kē tēglebēmeha bume wame gali tlokwefle.

²⁰ Na Herot bu li tēbo lowene tle. Bu melēme, Jonme kalabusu lowa tuku tle.

Jon Jisame baptais totle

²¹ Kē nalēwa, Jon kalabusu lome tafa jwa tēglena. Bu iniwa onehome wabaptais totome, na bu Jisame mana baptais totle na Jisas Gotome mana gēgali tlole. Bu Gotome mana gēgali tlelēlebēē, na heven inoha latikawa tle.

²² Na Gotobē Amtētomba seuneni foleha ji tētēkeketle. Na bu matafa mēta gali tle, “Ju bobē lale nēba. Bo jume tako tole nanēletē, tako fleflesu nanēletē.”

Jisasbē bosemnenibē weniji

²³ Jisas bubē aowafewe tlibutu mutuju tle na bubē wege mana fa totle. Na kwe oneho bume meweniji

lamëtletla, Josepbë
bowenefe.

²⁴ Josep Helibë bowene.
Na Heli Matatbë bowene. Na
Matat Livaibë bowene. Na
Livai Melkibë bowene. Na
Melki Janaibë bowene. Na
Janai Josepbë bowene.

²⁵ Na Josep Matatiasbë
bowene. Na Matatias
Amosbë bowene. Na Amos
Nahumbë bowene. Na
Nahum Eslibë bowene. Na
Eslî Nagai bë bowene.

²⁶ Na Nagai Matbë
bowene. Na Mat Matatiasbë
bowene. Na Matatias
Semenbë bowene. Na Semen
Josekbë bowene. Na Josek
Jodabë bowene.

²⁷ Na Joda Joananbë
bowene. Na Joanan Resabë
bowene. Na Resa
Serubabelbë bowene. Na
Serubabel Sealtielbë
bowene. Na Sealtiel Neribë
bowene.

²⁸ Na Neri Melkibë
bowene. Na Melki Adibë
bowene. Na Adi Kosambë
bowene. Na Kosam
Elmadambë bowene. Na
Elmadam Erbë bowene.

²⁹ Na Er Josuabë bowene.
Na Josua Elieserbë bowene.
Na Elieser Jorimbë bowene.
Na Jorim Matatbë bowene.
Na Matat Livaibë bowene.

³⁰ Na Livai Simeonbë
bowene. Na Simeon Judabë
bowene. Na Juda Josepbë
bowene. Na Josep Jonambë
bowene. Na Jonam
Eliakimbë bowene.

³¹ Na Eliakim Meleabë
bowene. Na Melea Menabë
bowene. Na Mena Matatabë
bowene. Na Matata Natanbë
bowene. Na Natan Devitbë
bowene.

³² Na Devit Jesibë bowene.

Na Jesi Obetbë bowene. Na
Obet Boasbë bowene. Na
Boas Salmonbë bowene. Na
Salmon Nasonbë bowene.

³³ Na Nason Aminadapbë
bowene. Na Aminadap
Atminbë bowene. Na Atmin
Arnibë bowene. Na Arni
Hesronbë bowene. Na
Hesron Peresbë bowene. Na
Peres Judabë bowene.

³⁴ Na Juda Jekopbë
bowene. Na Jekop Aisakbë
bowene. Na Aisak
Abrahambë bowene. Na
Abraham Terabë bowene.
Na Thera Nahorbë bowene.

³⁵ Na Nahor Serukbë
bowene. Na Seruk Reubë
bowene. Na Reu Pelekbë
bowene. Na Pelek Eberbë
bowene. Na Eber Selabë
bowene.

³⁶ Na Sela Kainanbë
bowene. Na Kainan
Arpaksatbë bowene. Na
Arpaksat Siembë bowene.
Na Siem Noabë bowene. Na
Noa Lamekbë bowene.

³⁷ Na Lamek Metuselabë
bowene. Na Metusela
Enokbë bowene. Na Enok
Jaretbë bowene. Na Jaret
Mahalalelbë bowene. Na
Mahalalel Kenanbë bowene.

³⁸ Na Kenan Enosbë
bowene. Na Enos Setbë
bowene. Na Set Adambë
bowene. Na Adam Gotobë
bowene.

4

*Satan bu Jisame tëbo
loweneme fene susu totle*

¹ Gotobë Amtëtomba, Jisas
mëta telutabetle na bu
Jordan tu mago ita tuju. Na
Gotobë Amtëtomba bume ho
jwa tabo elë tlelule.

² Na Satan bume niliafewe
olë tëbo loweneme fene susu
totokwefle.

Na kë nalë, Jisas hi hana tle na bu foneme gli tle.

³ Satan bume gali tlole, “Ju Gotobë nëba nëgebë kwe, ju ebë anijime gali eolëme na bu bletë nageme fata naeglamëme. Na ju hi elëme.”

⁴ Kwe Jisas bume gali tafu têtatle, “Gotobë bogo megali lala, ‘Hi wesibiwa, onehome, lale tafame hana lëgaitameme.’”

⁵ Na kwe Satan bume kë mago mana tilekole. Na bume iniwa tatako lifate lalebotanewa totometle.

⁶ Na gali tlole, “Bo jume tako afutukume nëgaitëme, kë iniwa lifatebë onehome eso ho tafa naegletëmeme na ju tako eso home tafa elëme. Na bo kë lifatebë iniwa lale wesibi jume yo noglëme. Kë iniwa lifate na wesibi ebë bobë, bu bome wayo tlonë. Na bo li home yo noglolëbëme tole nëgelëna, kwe bo lalowa yo noglolëme.

⁷ Ju bome sëkefo miti tafa eletenëna na bome megali eglonëna, ‘Ju bobë lale tako eso ho tafa eletenë, bo jume tako tole nanëletë,’ kwe bo kë iniwa lifate na iniwa wesibi jume yo noglëme.”

⁸ Kwe Jisas bume gali tafu têtatle, “Gotobë bogo megali lala, ‘Goto buwa jubë eso home tafa lëletë. Ju bume fwa satole eletle na saesogo elelële.’”

⁹ Na Satan Jisame Jerusalem lifatewa tlelule na tako lotu lo leli elë tilekole. Na bume gali tlole, “Ju Gotobë nëba nëgebë kwe, ju lalowa emagowa okli etëkake

na ju tēbo hana eglitame. Hanane mu.

¹⁰ Gotobë bogo megali eglamëme nëgeme, ‘Goto, bubë enselme jine lëglëmetëme, na bu jume ululu mëgëtome.’

¹¹ Na bu mata megali lala, ‘Bu jume fa mëgëmalitome bubë tobana, na jume aniji yo hana sle eglëme.’”

¹² Na Jisas bubë gali tafu têtatle, “Gotobë bogo megali lala, ‘Jubë tako Gotobë afutuku asa su etatle.’”

¹³ Satan bu Jisame memelë wesibina wasusu tēbetēfale, na bume kile totle, li olë nalë ita su nalogotleme.

Jisas bu Gotobë lale gali, Galili provins mago onehome afina tē têtatëme

¹⁴ Jisas bu, Gotobë Amtëtombabë afutukuna, Galili provinswa ita tuju. Na Jisas kë tafa tēglebë gali, Galili provinsbë li life li life mago onehome fifiji mëtlagutëma.

¹⁵ Na bu li life li lifebë lotu lo mëta, Gotobë gali onehome okokwe tlagukefëme. Na iniwa oneho bume fleflesu mëtletla na bibita mototla.

Nasaret life mago oneho Jisame enisusu memëtletla

¹⁶ Jisas bu Nasaret lifewa tuju. Ètani bu kë lifeme sigli tle. Na bubë tafawa olëna, bu lotu lowa tēkaklu, bu ëbame fene tlekefe. Na bu hujuna tlibe, Gotobë gali hwi naloglotëmeme.

¹⁷ Na bogo kë ululu sle logotokwefëmebë ho, Gotobë

lowene mago gali të totokweflebë, Aisaiabë bogo, bume tlële. Na bu bogo ya tètamë. Na këme kë galibë hwi tlome, kë gali melë lëgëbelalële,

18 “Gotobë Amtëtomba bo mëta tètabe. Këme nêgeme, Goto bu bome waaniji tlonë, bubë lale gali, wesibi jwa onehome të nanëgëtatemëme. Na bu bome këme jine tlënë, kalabusu mëta kë tafa mëglabë onehome megali nanoglomëme, ‘Sobo kalabusu lo lalowa kile elo.’ Na naba titiki tabo onehome megali nanoglomëme, ‘Sobo lalowa hwi elo.’ Na bu bome këme jine tlënë, gëglë kë mëglelëmabë onehome nanëgaitamëme na bubë afowelili sle nanogotometemëme.

19 Na bu bome jine tlënë, onehome megali nanoglomëme, ‘Goto, bubë onehome kë lëgaitamebë olë, ekë folokoketle.’”

20 Na Jisas bogo geni tëta, na bogo kë ululu sle logotokefëmebë home tlële na mana tafa tle. Na iniwa oneho, lotu lo mëta kë tafa mëtelulabë, Jisame fwa wëya mëtlelëla.

21 Na kwe bume gali tlome, “Ebë gali, sobo Gotobë bogo mago kë aholokwane egelobë, bu ëje iniyafememu ekë fata lële.”

22 Lale gali të totleme nêgeme na bume këme fleflesu mëtletla na bibita mototla. Na bume kë të tëtatëmebë gali mana lowene mëtletla. Kwe, bu megali mëtla, “Bu ebë galime, kë gali

loglonabë, habelëme gali lëlene? Bu seme kë gali loglonabëye, kwe Josepbë nëba tekwe nêge.”

23 Na Jisas bume gali tlome, “Bo walowene sle nëletëyo. Tokwafe sobo kë ëtanifu anebo gali bome të egëtatëname, ‘Dokta, jubë ato elili sle egotleme, na ilawa mago hobë ato elili mata sle etome tēmeme.’ Na sobo mata gali egloname, ‘Ju Kaperneam lifeku mëta wesibi melë kë totomebë sebo waaholokwane tletëyo. Na sebo metole nanëla, ju ebë lifekume mata, kë wesibi melë egotomeme.’

24 Bo some iniyafeme gali nolëyo, bubë life mago oneho, Gotobë lowene mago gali të mototkweflabë hobë gali aholokwaneme, tole hana mëtla.

25 Bo some iniyafeme gali nolëyo, Gotobë lowene mago gali të totokweflebë ho, Elaija mana tëtabena, na seiju one feilawa, Israel provins mëta tafa mëtëkouja. Na kë nalë wanagli tako temotëme na aona tlibutu na tobali ita jowa yeme tu hana teto. Na tako fone iniwa lifateme fata tokoutëme.

26 Kwe Goto bu Elaijame Israelbë ilawa mago seiju mëse belë hana jine tletëme. Weye. Bu li ilawa mago seiju mëse belë fwa jine tlëtë, bume lëgaitame nalëgleme. Kë mëse bu Saidon provinsbë tokwëfo lifeku Sarefat mago mëse na bu Israelbë ilawa mago nane.

27 Na kë mata, Gotobë

lowene mago gali të totokweflebë ho, Elisa mana tètabela, na feilawa ato juba jubawa kë mëtëgehobabë oneho, Israel lifate mëta mëtëtabëya. Kwe, Elisa kë mago juba jubawa onehome li hana sle totle. Weye. Bu Siria life mago ho, Namanme fwa sle totle. Naman bu Israelbë afenëbo nane, li afenëbo mago ho.”

²⁸ Na oneho, lotu lo mëta kë tafa mëtëlabë, bu kë gali aholokwane mëtla na melowene mëtla, “Bu seme, Israelbë afenëbome, gali lëlefe” na tako enisusu memëtletla.

²⁹ Na fe mëtëkaka na Jisame fa mototla, na bume lifeku tiniju elëme so mëtlagula, fatini mleibu elëme so namëtëkaklame fene. Bubë lifeku fatini mëta tobetëme.

³⁰ Kwe bu kukuwa lateiwa tëttagwi na latugujuwa.

Jisas ahwane hobë ato mago hehë tletëme

³¹ Na kwe Jisas Galili provinsbë tokwëfo life, Kaperneamwa tëmature. Na bubë tafawa olëna, onehome Gotobë gali të tëtatëme.

³² Bubë gali aholokwane motlola, na klelego memëtla. Bubë gali flesu hobë galiha nëgeme, kalëlegona tlëme.

³³ Na kë nalë, li ho lotu lo mëta tafa tle na ahwane bubë ato mëta telutabetle. Na bu feilawa afleli tle,

³⁴ “Nasaret life mago Jisas, ju seme habelë egëtaname esine? Ju seme tëbo naegëtaname esine? Bo jume wafi lowene nëletë, ju kë ho

kë nëgebë, Goto jume kë jine tëglëbë homu. Ju Gotobë lale homu.”

³⁵ Kwe, Jisas kë ahwaneme anisasana gali tlole, “Ju kuju ebe na ebë home kile etoleme.” Na ahwane kë home life elëme so telëkakle na masana ku mëta titigo. Na kë ahwane, bume li atoha hana tëbo tëtatile na bume kile togotlena.

³⁶ Na iniwa oneho klelego memëtla na blalo gëgali mëtla, “Euowe! Ebë fëye galine? Bubë gali flesu hobë gali fene, kalëlegona tlëme. Bu ahwaneme anisasana gali tlole na bu home lakilewa mototome.”

³⁷ Na iniwa wesibi, Jisas melë kë totomebë, kë galibë, Galili provinsbë li life li life mago onehome fifiji mëtletëtëma.

Jisas bu Saimonbë bokokame sle tëta

³⁸ Jisas lotu lo kile tle, na Saimonbë lowa tëkaklu. Saimonbë bokokabë ato, tako ahojute latletë. Na bu Jisame takune motlola, sle nalëgëtamë.

³⁹ Na kwe, Jisas bu loliwa tujutë, na kë ahojuteme anisasana gali tlole, bume kile nalëgëtamëme. Na ahojute bume lakilewa tëta na bu lahujuwa tëkake na hi wesibi ahojume tletëme.

Jisas feilawa onehome sle totome

⁴⁰ Atome hwi olë, oneho bubë yabenime, ato elili kë mëtlabë, Jisas belë mëtlesuma. Na bubë toba iniwa ato elili

enëneme gogwa tokoutême na bu iniwa sle têtägume.

⁴¹ Na bu ahwane hehë tletême. Na bu feilawa onehome hune mêtêtägume na meafëflei lamëtla, “Ju Gotobë nëbafë.” Kwe Jisas bume anisasana gali tlome, na gëgalime lëkle totome. Kë ahwane bu melowene mëtleme nëgeme, “Bu Goto kë aniji toglolebë ho, onehome nëno nalëgleme.”

Jisas li life li life asë tëbelëfa

⁴² Olobalë mu, Jisas kë life kile tle na ho jwa tabo elë tuju. Na oneho bume hohwi mêtëtatla na bume mana hwi motlola. Na bume yafe lëkle mototla, bume kile jwa nalogotomeme.

⁴³ Kwe bume gali tlome, “Goto onehobë eso home kë tafa lëgletëmebë lale gali, fi lifateme mata të nëtägutemëme. Goto bome këme jine tlënë.”

⁴⁴ Na bu Judia provinsbë, li life li life measë tëbelëfa na lotu lo mëta gali të têtägutême.

5

Jisas mo fafa home gali tlome, na bume nagi mëtälëla

¹ Li olëna, Jisas, Genesaret lake tu helefome tlibe, na feilawa oneho mitisiya na bume lolime loko mëtletlëta, Gotobë gali aholokwane namëglame.

² Na Jisas bu lake tu helefo mëta, tële ihe, hwi tlome. Kë ihe, mo fafa enënebë ihe. Kwe ihe bolijaya enëne bu ihe wahune mëtla na solo swa mototoma.

³ Na Jisas bu Saimonbë ihe mëta fe tle. Na bu Saimonme gali tlole, “Ju iheme fe elëme na so elëkakëme, helefo tokwëfo kilewa naegotleme.” Na Jisas iheme tafa tle, na mana onehome gali të têtätême.

⁴ Bu gali watë têtätême, na Saimonme mana gali tlole, “Te, ku tako elë yegu ekake na sobo solo sike etëkakome, mo fafa naegelome.”

⁵ Na Saimon gali tlole, “O tako ho, ëje klabë yafe sike sike nëla na olë feti na loko menëlebla, kwe sebo mo liha hana buhe notla. Kwe lalowa, jubë gali esogo nëgletëyome na solo sike nëglame.”

⁶ Na bu melëmëtla, na mo feilawa tëkeji bubuhe mëtla, na solo ëjeha holëye mëleme.

⁷ Këme nëgeme bubë weife wege ho flime, li ihe mëta kë tafa mëgelobëme, we motlomo, bume mëgaitamo namëgelome. Na bu mitisi temo, na mo, kë tële ihe mëta sisike mëtla. Na ihe mo hobota manogwa, ëjeha flu mëleme.

⁸ Na Saimon Pita këme hwi tlole. Na Jisasbë elebo lime sëkefo bubusu totometle na gali tlole, “O, tako ho, ju bome kile etanë. Bo tëbo homu.”

⁹ Saimon na kë tafa mëtlabë ho, kë feilawa mo hwi motloma na klelegomu memëtletëma.

¹⁰ Na Saimonbë yabe, Jems na Jon, Sebedibë nëbale, bu mata klelego memëtelo. Kwe Jisas Saimonme gali tlole, “Ju tutune asa ele. Èje ju mo fafa

ele, kwe tokwafe ju onehome bo belë eglesumetenëme, bome esogo namëglenëname.”

¹¹ Na kwe bu yegu motokouja na yenëba mëta fla mëtla na ihe yenëbawa kiki motokwaka na bubë iniwa wesibi këme hune mëtla na Jisame nagi mëtlëla.

Jisas bu ato juba jubawa kë tëgehlebë home sle totle

¹² Li olëna, Jisas li lifate mëta tafa tle. Na ato juba jubawa kë tëgehlebë ho kë mëta tafa tle. Bu Jisame hwi tole, na bu belë tisi tle na sêkefo miti bubusu totometle na gali tole, “Tako ho, ju tole eglena, ju bobë ato lalowa sle etatenëmene na bo Gotobë naba lime lalowa nanëtabëme.”

¹³ Na Jisas toba gwa totatle na gali tole, “Bo tole nanelë, ju lalowa etabeme.” Na kë juba juba lalujuwa mëtletle. Na bu lalowamu tètabe.

¹⁴ Na Jisas bume anisanamu gali tole, “Jubë ato lalowa kë lëgëbetëbë, ho lime asa gëgali eelële. Matëbe. Ju ejume na jubë ato, lotu lome wege lëglebë home lebotane eoutatleme. Na ju bume wesibi ejuwelëleme, Moses fene gali tle. Na bu kë wesibi Gotome lëlëleme. Na iniwa oneho melowene namëgletëyome, ‘Jubë ato lalowa lëbetë.’”

¹⁵ Na iniwa wesibi, Jisas melë kë totomebë, kë gali, li life li life feilawa fifiji mëtlagutla. Këme nëgeme,

lebutako onehomu mitisitla, bubë gali aholokwane namoglolame na bubë tëbo sle nalogotometëmeme.

¹⁶ Kwe bu lebutako olë, onehome hune tlekëfe na ho jwa tabo elë, Gotome gëgalime, tuju kefë tle. Na Jisas bubë lowene wahwi tlotëme na kë ato mogowa home gali tole, “O nëba iko. Bo jubë tëbo aholokwana wafi ti nëletë.”

Jisas ato mogo tabo home sle totle

¹⁷ Li olëna, Jisas onehome gali mana okokwe tlome. Na Farisi ho* na Gotobë galime okokwe moglomabë hona kë mëta tafa mëtla. Bu Galili provins mago, na Judia provins mago, na Jerusalem lifate mago, na li life li life mago mitisiya. Na Gotobë afutuku Jisas mëta mana tëbe, na bu onehome këbë afutukuna sle totome.

¹⁸ Na fli ho, ato mogo tabo home sanënenä mëtlesula. Na bume lowa mëglelukakulame yafene, Jisasbë elebo lime gwa namugujetlame fene.

¹⁹ Kwe lebutako oneho lo mëta tafa mëtlame nëgeme, na lo wake tle, na bu loliwa hana mëtehila. Këme nëgeme, bu lo leli elë mëtehilikola, na anabali tatë mototaya, na ni labuku mëta kë ni tëgëbebë ato mogo tabo home onehobë ku mëta alabujuwa gwa mëtëmalitala, Jisasbë li mëta.

* **5:17** Farisi ho bu Mosesbë gali feilawa esogo mëglelëtlabë hobë weniji. Bu metole lamëtla, Gotobë naba li mëta lalë tafa namëglame. Bu Jisasbë olë mëta tafa mëtla.

20 Kë enëne melowene mëtla, “Jisas ebë ato mogowa home lalowa sle logotlemefe.” Na Jisas bubë lowene wahwi tlotëme na kë ato mogowa home gali tlole, “O yabe. Bo jubë tëbo lowene aholokwana wafi ti nëletë.”

21 Na Gotobë galime okokwe moglomabë ho fli, na Farisi ho fli bubë gali aholokwane motlola na blalo gëgali mëtla, “Eëë! Bu habëtabo hone, Gotoha kë fata lëglebëye? Bu këha gali fëyeme gali lëlene? Bu tëbo homu. Bu Gotome fëyeme boblo lotlene? Ho kwe hobë tëbo lowene aholokwana hana ti lëgletleme. Hanane mu. Goto bu kwe fëyemene, tëbo lowene aholokwana lalowa ti lëgleme.”

22 Na Jisas bubë lowene walowene tletëme. Na bume takune tlome, “Sobo këha lowenena fëyeme lowene elone?”

23 Bo bume megali noglolëna, ‘Bo jubë tëbo aholokwana wati nëletë,’ sobo habë lowene lalone, bo bubë tëbo lowene aholokwana wati nëletelë? Sobo kë wesibi hwi hana elolo. Kwe bo bume megali noglolëna, ‘Ju huju ele, na jubë lowa ejume.’ Na bu huju lëleme, kwe sobo melowene egelome, ‘Bo Gotobë kalëlegona ho, na bo tëbo atona ho lalowa sle nogotlëme. Na bo mata hobë tëbo lowene aholokwana lalowa ti nëgletemëme.’

24 Kwe bo metole nanelë, sobo melowene egelome, ‘Bo, Gotobë life mago ho, bo

ebë life mëta, kalëlegona homu nëtabë. Na bo tëbo lowene aholokwana lalowa ti nëgelëme.” Na Jisas ato mogo tabo home hwi tlole na gali tlole, “Bo jume gali nolë, ju huju eleme, na jubë ni labuku glo eleme na jubë lowa ejume.”

25 Na kë ho, kë ni tégëbebë, onehobë naba li mëta lahujuwa tle, na këme ni tégëbebë ni labuku glo tle, na Gotome fleflesu tletle na bibita totle na bubë lowa tuju.

26 Na iniwa oneho bu klelego memëtla, na Gotome fleflesu mëtletla na bibita mototla. Na megali mëtla, “Eje sebo lale klelegowa wesibi fli hwi noloma.”

Jisas Livai me gali tlole, “Ju bome nagi enënë”

27 Tokwafe, Jisas tuju, na takis baliti kë glo lëglekefëtëmebë home hwi tlole. Bu takis lo mëta tafa telule. Bubë weniji Livai. Na Jisas bume gali tlole, “Ju bome nagi enënë.”

28 Na Livai huju tle, na iniwa wesibi hune tle, na Jisame nagi telëkakle.

29 Na kwe Livai Jisame lebutako hi wesibimu bubë lo mëta ahojume tletle. Na lebutako takis baliti kë glo mëglekefëyabë ho na fli ho mata, buna tafa mëtla na hi mëtla.

30 Na Gotobë galime okokwe moglomabë ho, na fli Farisi ho, Jisasbë lowene esogo mëglelëtlabë home momata mëtletlëma na megali motloma, “Sobo, takis baliti

kë glo mëglekefëyabë ho na fli tëbo lowene kë esogo mëglelëlabë enënename fëyeme hihi elelëkefëmone? Bu tëbo enëne mu.”

³¹ Na Jisas bubë gali tafu têtatëme, “Dokta bu tëbo jwa mëglabë home hana sle logotomeme, hanane mu. Ho tëbo mëglabë kwe fëyemene, dokta bume fwa sle logotomeme.

³² Na bo kë fenene. Oneho bu meweniji lamëtla, ‘Sebo, Gotobë naba li mëta, lale enënefe,’ bo këha onehobë lowene sleme nane tisi. Weye. Kwe oneho bu melë lowenena kë tafa mëglabë, ‘Sebo Gotobë naba li mëta tëbo enënefe,’ kwe bo këha onehobë tëbo lowene sleme tisi, bubë tëbo lowene aholokwana ti namëglame na Gotobë lale lowenewa esogo namëglelëlame.”

Jisas bu hi wesibi kë yo yo mëglabë lowenebëme gali tle

³³ Na fli ho Jisame gali motlola, “Lebutako olë, Jonbë lowene esogo mëglelëtlabë ho bu hi wesibi yo yo mëtlekefëya, Gotome lowene sle namëgletlame na Gotome gëgali mëtlelekefla. Na Farisibë lowene esogo mëtlelëtëmabë ho, bu mata melamëtla. Kwe jubë lowene esogo mëglelëtëyobë howe, bu kë lale lowene esogo hana mëlelëla, bu hihi melekefëya.”

³⁴ Na Jisas wafle gali tlome, “Ho bu mëse sei lëglëna, na mëse sei lëglëbë hi wesibi salë fata logotlena, na kë ho buna mana tafa mëglana, kwe bu hi wesibi yo

mëglamene? Weye. Hanane mu.

³⁵ Kwe tokwafe, wame ho bu kë mëse sei home mëglelulana, na bu bubë yabe hona tafa jwa mëglana, kwe kë olëna bu hi wesibi mana yo mëglame.”

³⁶ Jisas bume wafle galime gali tlome. Bu megali latlome, “Ho li tiho gelowa ëho hana ka logotleme, na kë tiho ëho katabo hëno gelowa ëho mëta hana susu logotleme. Weye. Bu melë lëglëna, kwe bu tiho gelowa ëhome tëbo logotleme, na kë tiho ëho ka tabo na hëno gelowa ëhona weife weniyanena hana mëgebome.

³⁷ Na ho li bu tiho wain taba liji tu, ëtanifu mëmë kleli jibona kë blëge blëge mototlabë botolo mëta hana wë logotleme. Bu melë lëglëna, na kë tiho wain taba liji tu sëse lëglëna, kwe ëtanifu mëmë kleli jibo botolome bule logotleme na wain taba liji tu lifewa owë lëkakeme.

³⁸ Këme nëgëme, ho li bu tiho wain taba liji tu, tiho mëmë kleli jibo botolo mëta wë logotleme na bu hana bule lëgleme.

³⁹ Oneho bu hëno wain taba liji tu wahi mëglabë, kwe bu tiho wain taba liji tu tole hana mletëma. Bu megali lamla, ‘Hëno wain taba liji tu ebë lalowa mu.”

6

Jisas, tafawa olëna wege jwa mëgla galibëme gali tlome

¹ Jisas tafawa olëna, witi liji nuju kukuwa bule

mëtëtagujaya. Na bubë lowene esogo mëglelëtlabë ho, witi liji têtëlë mëtla, na sosa mototoma, jibo foke namëgletëmeme. Na mana afabo hi mëtla.

² Na Farisi ho fli, bume hwi motloma na këme takune mëtla, “Euowe! Ebë kwe sobo sogëna lalo. Ebë kwe tafawa olë fe. Sobo tafawa olëna, hi wesibi, fëyeme têtëlë elone? Fëyeme wege elone? Moses bu ëtani kë lowenebëme tako hehë latle.”

³ Na Jisas bubë gali tafu têtatëme, “Sobo, sebobë ëtanifu eso ho, Devitbë gali, Gotobë bogo mago, hwi sle hana elolone? Bo melëme gali nolëyo. Ëtani Devitna, kë tafa mëtëglabë ho, foneme gigli memëtla.

⁴ Na Devit Gotobë lowa tækaklu, na bu Gotobë naba li mëta kë gogwa mëtlabë bletë nage glo telule. Kë bletë nage, oneho hana hihi mëtla, lotu lome wege mëglabë ho, buwa hihi mëtla. Kwe Devit wali hi tle na bume kë tafa tëglelëmebë home wali sa têtatëme na bu hi mëtla. Sobo kë gali hwi hana elolone? Èëë?”

⁵ Na Jisas bume ita gali tlome, “Kwe bo, Gotobë life mago ho, bo tafawa olëbë tako ho.”

Tafawa olëna, Jisas toba mogo tabo home sle totle

⁶ Li tafawa olëna, Jisas lotu lowa tækaklu, na onehome gali tē têtatëme. Na tobamu toba mogo tabo ho këme tafa telule.

⁷ Na Gotobë galime okokwe moglomabë ho, na

Farisi ho, Jisasme mana hwiwa motlola. Bu melëme hwi motlola, bu tafawa olëna, onehome sle logotomemene o hanane? Bu melowene namëglame, “Jisas bu tafawa olëna onehome sle logotomena, kwe bume onehobë gali aholokwane moglomabë letitabo hobë naba li elëme mëglelula namëglame, bume tēbo namogotlame. Bu tafawa olëna wege lëgleme nëgeme.”

⁸ Kwe Jisas bubë lowene walowene tletëme. Këme nëgeme, kë toba mogo tabo home gali tlole, “Ju bo belë esime na emëta elikakime.” Na kë ho bu belë tuju tle na bubë lime tlibetle.

⁹ Na Jisas bume takune tlome, “Sebobë semle Mosesbë gali habelë lëgëbetle lalëlene? Sebo tafawa olëna lalë lowene lalowa esogo nëglelëlamene o tēbo lowene esogo nëglelëlamene? Sebo onehome lalowa nëgaitamamene, bu lalë tafa namëglame o tēbo nogotomame?” Kwe bubë gali tafu hana mëtëtatla.

¹⁰ Na Jisas bume hwi tlagume, na kë home gali tlole, “Jubë toba elili etokwakle.” Na bu melë totle, na bubë toba lalowa tēbetle.

¹¹ Kwe Gotobë galime okokwe moglomabë ho, na Farisi ho, bu tako enisusu memëtletla, na blalo gëgali mëtla, “Euowe, Sebo Jisasme habelë nogotlamene?”

Jisas bu we ita tēle home aniji tlome

12 Na kë nalëwa, Jisas fatiniwa tokwale, Gotome gëgali nalëgleleleme. Na bu klabë tako, Gotome gëgali tęgëmaitalebëë na mana feti na loko metleble.

13 Kliji fe tole, na bubë lowene esogo mëglelëtlabë home gali telokwakëme, bu belë migisitla namëglame. Na bu belë mitisitla. Na bu we ita tële home aniji tlome, na Aposel* wenijina fëfë tötome.

14 Bu Saimonme aniji tlole. Na Jisas bume li tiho weniji fë totle, "Pita." Na bu Saimonbë bolijamo, Andrume mata aniji tlole. Na bu Jems, Jon, Filip, Bartolomyu,

15 Matyu, Tomas, Alfiusbë bowene Jems, Saimon name aniji tlome. Saimon bu Selot ho.†

16 Na bu Jemsbë bowene Judas name aniji tlome. Na Judas Iskariot name mata aniji tlome. Judas Iskariot bu Jisasmë wamehome kë yo toglomebë ho.

Jisas lebutako onehome sle totome

17 Jisas, bu kë aniji toglomebë ho name, fatini mago kle mëtëmalitaya. Na buna fli lowene esogo mëglelëtlabë hona, lale tabo mëta tlebime. Na feilawa oneho, Judia provinsbë li life li life mago, na Jerusalem lifate mago, na Tair na

Saidon nutu helefo li mago, bu mata kë mëta mëtëtabëya.

18 Bu këme loko mëtëlelëta, Jisasbë gali aholokwane namoglolame na bubë tëbo sle nalogotometëmeme. Na ahwane kë tëbo mototomebë onehome, sle totome.

19 Na iniwa oneho bume yafe lu mototla. Tako afutuku bu mëta tęgëbetleme nëgeme, na kë afutuku bume laslewa totome.

Atwati enëne fleflesu matla

20 Jisas swaya tletëme na bubë lowene esogo mëglelëtlabë home hwi tlagume na këme gali tlome, "Sobo tëlewa wesibina enëne, kwe fleflesu egelome. Sobo Gotobë oneho etabetelo, na Goto bu some eso home tafa lëletëyo.

21 Sobo fonoba kë tafa egelobë enëne, kwe fleflesu egelome. Tokwafe sobo hi wesibina memelë wesibina matahëna fe egelome.

Sobo ye kë eglekefobë enëne, kwe fleflesu egelome. Tokwafe sobo soso egelome.

22 Sobo bome, Gotobë life mago home, esogo eglenëname nëgeme, bu some tëboijiwa këme mëglëyome, na këme hehë mletëyome na këme klëi galina gali moglëyome na këme sobobë weniji sisile mogotometëyome. Oneho bu some këha melë mëgëtona, kwe sobo fleflesu egletemome.

* **6:13** Aposel weniji ebë Jisasbë wege kë fa nogotlabë enënebë weniji. Jisas, Gotobë gali tëme kë jine tęgëlebë enënebë weniji. † **6:15** Selot enëne bu metole lamla, li life mago ho bu seme eso home asa tafa malëletëna.

²³ Sobo fleflesu elome na tètane ebome. Tokwafe, Goto some heven life mēta feilawa wesibi lēglēyome. Ètani bubē bosemnenino, bu Gotobē lowene mago gali tē mototokweflabē home mata melamototokwefēma.

²⁴ Kwe sobo feilawa balitina enēne. Sobo hai! Sobo, sobobē lale wesibi wafi glo elo na sobobē lale tafa wafi fa etlo. Sobo tokwafe naba lalawa egotome.

²⁵ Sobo hi wesibi mēta kē egemulubē na imo feilawa kē tētafu egotomobē enēne. Sobo hai! Kwe tokwafe sobo fone egelome na naba lalawa etome.

Sobo sostonawa kē egētabobē enēne. Sobo hai! Tokwafe sobo ye egelome. Na naba lalawa etome.

²⁶ Na iniwa oneho some fleflesu mēgletēyona na bibita mēgētona. Sobo hai! Ètani bubē bosemnenino bu Gotobē lowene mago gali tē mototokwefēmabē sosogēna enēneme kē fene melē lamototoma.”

Some kē wame moglēyobē enēneme tole sle egletemome

²⁷ Jisas ita gali tlome, “Sobo bobē gali kē aholokwane egletēnabē enēneme gali nolēyo, some kē wame moglēyobē enēneme tole sle egletemome. Na ho some gēglē mēgletēyona, sobo bume tole sle egletemome na maninibo egletemome.

²⁸ Fli ho some hana mēglēyona, sobo Gotome gali elēlome, bume lēgaitame nalēgleme na bume lale wesibi lēglēme nalēgleme.

Some kē gēglē mēgletēyobē enēneme, Gotome gali elēlome, bume maninibo nalēgletēmeme.

²⁹ Na ho jume ahino elē bu lēglena, kwe bu malēle, ju bume kofaya asa tēke elole. Weye. Ju jelē ahino elē obwelē etatleme, bu jubē jelē ahino elē mata bu nalēgleme. Na ho jubē gelowa ēho li fa logotlena kwe fa malotle, na kwe li gelowa ēho mata elēleme.

³⁰ Ho fli jume wesibime takune mēglēyona, ju bume eglēmewa egleme. Na ho jubē wesibi fa logotlena, ita lēgleme asa takune elole.

³¹ Iniwa wesibi sobo fenene tole eletemo, some melē lamēto, sobo kē wesibiwa bume melē egotomome.

³² Ho some kē tole mēgletēyobēme fwa tole egletemona, kwe ho sobobē lakaleme habēna lowene mēgletēyomene? Tēbo lakalena enēne mata bume kē tole mēgletēmabē enēneme, bu tole lamēletēma.

³³ Ho some kē mēgaitobē, sobo bume fwa egaitamona, kwe ho sobobē lakaleme habē lowene mēgletēyomene? Tēbo lakalena enēne mata, bume kē mēgaitamabē enēneme memaitama.

³⁴ Sobo melowene egelona, ‘Bu sobobē baliti seme kofayame lalawa mēglēnamefe.’ Na sobo bume fwa baliti esokwaneme eglēmona, kwe ho sobobē lakaleme habēna lowene mēgletēyomene? Tēbo lowene enēne bu fli tēbo lowene

enëneme baliti esokwaneme memelë melëma. Bu melowene mëgletëmame nëgeme, 'Kofaya seme mata mëglënamefe.'

³⁵ Kwe sobo, sobobë wame home tole eletemome na lale lowenenawa yonane elëlëmome. Sobo bume baliti elëmome, na melowene asa elo, 'Bu seme tokwafe ita mëglëname.' Weye. Sobo melë lalowa, kwe tokwafe sobo lale wesibi fa egotlome, na sobo tako kalëlegona Gotobë nëbale egëtabome. Gotome fleflesu jwa mëglekefëtlabë enëneme, na tëbo enëneme mata, Goto bume lalowa lëgaitameme.

³⁶ Sobobë heven life mago blijaya, fli enëneme fene maninibo lëletëme, sobo mata melë maninibo egletemome."

Sobo fli enënebë lakale asa hwi eletemo. Matëbe

³⁷ "Sobo fli enënebë lakale asa hwi eletemo na megali asa elomo, 'Bu tëbo enëne.' Sobo melë egelona, kwe kofaya Goto mata sobobë lakale hwi sle lëgletëyome, na megali lëlëyome, 'Sobo tëbo enëne.' Sobo fli hobë tëbo lakale aholokwana ti egletemome na lowene asa elekefëtemo. Na Goto sobobë tëbo lakale mata aholokwana ti lëgletëyome na hana lowene lëglekefëtëmeme.

³⁸ Sobo ho lime wesibi elëlome na Goto bu mata some kofayame wesibi lëlëyome. Bu some feilawa wesibimu lëglëyome. Bu wesibi ëfomemu kale lotomeme, owë mëkaketleme.

Na some lëlëyome. Sobo wesibi home këniji elëmowe, kwe Goto mata some kënijiwa lëglëyome."

³⁹ Jisas bume wafle galime gali tlome, "Naba titiki tabo ho, li naba titiki tabo home alëge lalowa lebotane lëgëtagutlemene? Weye. Bu melë mëgelona kwe bu iniwa fulujuwa mitigwëyome.

⁴⁰ Tisa kë okokwe loglolebë nëba bubë tisabë lowene hana sigli lëtatleme. Kwe tokwafe bu tisabë lowene, lowene sle lëletlena, kwe bubë tisabë lowene fene lëbetle, bu këha melë lëgleme.

⁴¹ Ju hwetiki tokwëfo, blijahabë naba mëta kë egëbatlebë, fëyeme hwi elotlene na kwe jubë naba mëta tako ti bule tabo tako kë lëgëbetëbë, lowene jwa fëyeme eletlene?

⁴² Ju tako ti bule tabo tako jubë naba mëta kë lëgëbetëbë hwi hana eglolena kwe ju li afame habë gali eglolemene, 'O afa, bo jubë naba hwetiki tokwëfo, lalowa tufiji nëgëtatëmene?' Weye. Ju sosogëna ho. Tako ti bule tabo, jubë naba mëta kë lëgëbetëbë afina tufiji etokwakleme. Na tokwafe ju hwi sle ekakeme na tokwëfo hwetiki, blijahabë naba mëta kë egëbatlebë, mana lalowa tufiji egëtatleme."

Tëbo ti, tëbo liji mogwalëme

⁴³ Jisas ita wafle gali tle, "Lale ti, tëbo liji hana mogwalëme. Na kë fenene, tëbo ti mata, lale liji hana mogwalëme.

44 Ho bu ti liji afina hwi molola na weniji lowene mletla. Ho bu atowai liji, walëlëba ti mago hana têtëlë lëgleme na bu wain taba liji, ikiji taba mago hana têtëlë lëgleme.

45 Lale ho bu feilawa lale lowene bubë lowene mëta lëbetle. Këme nëgeme bu lale lowenena këme tafa lële. Kwe tëbo ho bu feilawa tëbo lowene bubë lowene mëta lëbetle këme nëgeme bu tëbo lowenena këme tafa lële. Tëbo lowene bu mëta lëbetlena, kwe tëbo galime gali lële. Kwe lale lowene bu mëta lëbetlena, kwe lale galime gali lële.”

Lale lo gliji ho na tëbo lo gliji ho

46 “Sobo bome mefë fëyeme etanane, ‘Sebobë tako ho,’ kwe bobë gali esogo jwa fëyeme elelëtënanane?”

47 Ho bu bo belë ligisina na bobë gali aholokwane lëglena na esogo lëglelëlena, bo këha hobë lowene some gali noglëyome.

48 Kë ho bu lale lo gliji lëglebë ho fenene. Bu life afina kakë yefi lële, na mësëbahiha ti këme lë lëtamë. Na lo kë matawa gliji lole. Na tokwafe haliji tu ligisina na kë lo yafe bëbë logotlena kwe bu hana fli logotleme, bu lale kalëlego lo gliji tëgleme nëgeme.

49 Kwe ho bobë gali aholokwane lëglena na esogo hana lëglelëlena, bu tëbo lo gliji lëglebë ho fenene. Bu life hana yefi lëgleme na kalëlego jwa ti lë sle hana lëgëtamë.

Tokwafe haliji tu ligisina na kë lo bëbë logotlena kwe bu lafliwa lotleme na tëbo lëleme.”

7

Jisas bu wame home boblo mogotomabë enënebë eso hobë wege home sle tëtatlë

1 Jisas onehome gali watë tëtatëme na Kaperneam lifewa tuju.

2 Na wame home boblo mogotomabë enënebë eso ho kë life mëta tëtabe na bubë wege ho jowa. Bu kë wege home tako tolemu latlekefëtletle, kwe bu tako tëbomu latletle na ëjeha gli lëletleme.

3 Na wame home boblo mogotomabë enënebë eso ho Jisas kë tafa tëglebë gali aholokwane tle, na kwe bu Israelbë afenëbonibë letitabo enëne fli, Jisas belë jine tlëme, bume takune namoglolame, bu ligisi nalëgleme na bubë wege home sle nalëgëtatleme.

4 Bu Jisas belë mutuju tla na bume anisasana gali motlola, “Kë wame home boblo mogotomabë enënebë eso ho, bu lale homu. Ju lalowa egaitalëmene?”

5 Bu seme, Israelbë afenëbonime, tole latletëna, na bu sebobë life mago lotu lo gliji tletëna.”

6 Na kwe Jisas buna mutuja na loliwa fwa mutula na kë wame home boblo mogotomabë enënebë eso ho, bubë yabe home Jisas belë jine tlëme, bume megali namoglolame, “Tako ho, matëbe, menuju asa këkë ele.

Bo lale ho nane, ju bobë lowa kë ekaklime. Weye. Bo tēbo ho.

⁷ Na bo mata, bo lale ho nane, ju belë kë nigisime. Weye. Bo tēbo ho. Kwe, ju galiwa elëme, na bobë wege ho lalowa nalëgetabetenëme.

⁸ Bo ebëha gali këme gali nelë. Fli eso ho bu bome tafa mlelëna na bo mata wame home boblo mogotomabë enëne tafa nëlelëmë. Na bo ho lime megali noglolëna, 'Ju eiju,' kwe bu lalugujuwa. Na bo ho lime megali noglolëna, 'Ju esi,' kwe bu laligisiwa. Na bobë wege home megali noglolëna, 'Te, ju wege ele,' kwe bu lawegewa lële."

⁹ Jisas kë hobë gali aholokwane tlotle, na klelego metletle, bume tako lowene sle lëgletleme nëgëme. Na bume kë esogo mëtletlëlabë onehome swaya tletëme na gali tlome, "Bo some gali nolëyo, bo Israelbë afenëbo ku mëta, këha lowene sle lëgletenëbë home hana hwi nololë. Kë wame home boblo mogotomabë enënebë eso ho bu bome tako lowene sle lëletënë kwe Israelbë afenëbo bu iniwa këha nane, bu bome tokwëfo lowene slewa lamletëna."

¹⁰ Na kë ho, kë jine tëglëmebë, bu kë eso hobë lowa ita mitisiya, na kë wege home yafe hwi motlola, kwe wasle tle.

Jisas bu seiju mësebë nëba huju tëtätë

¹¹ Tokwafe, Jisas bu li lifekuwa tuju. Kë lifekubë weniji Nain. Na bubë lowene

esogo mëglelëtlabë hona na fli feilawa onehona, bu nani iniwa mutuja.

¹² Na bu kë lifekubë lëglesini elëme loliwa fwa mëtëkakija, na bu u mogo kë mëtletlëkakilabë home esune mëtletëma. Na kë u mogobë bota, nëba jowa na bu seiju tafa ele. Na feilawa oneho kë lifeku mago, bu kë seiju mëseme nani mëtlesujaya.

¹³ Jisas kë mëseme yafe hwi tolë na tako manibomu metletë na gali tolë, "Asa ye ele."

¹⁴ Na bu loliwa tuju tle na u mogo kë lëgëbebë sanëne lu totome. Na u mogo kë mëtehilabë ho mana këme fwa mitlija. Na Jisas gali tle, "Falake, bo jume gali nolë, ju mana huju ele."

¹⁵ Na gli këtëglebë falake, huju tle na tafa tle na mana gëgali tle. Na Jisas botame tlë.

¹⁶ Na iniwa oneho klelego memotokouja na Gotome fleflesu mëtletla na bibita mototla na gali mëtla, "Goto bubë lowene mago gali kë të togotlebë ho tako kalëlegona ekë jine lëletëna. Goto bu wafi lisi tëna, bubë onehome lëgaitame nalëgleme."

¹⁷ Na Jisas kë nëba kë huju totlebë gali, Judia provinsbë li life li life fifiji mëttagula na kakë elë mago life mata fifiji mëttagutla.

Tu mëta kë baptais totokwefëmebë Jon, bubë lowene esogo mëtletlëtelobë ho, Jisas belë jine tlëme

¹⁸ Jonbë lowene esogo mëglelëtlabë ho, iniwa wesibi

Jisas kë sle totomebë, Jonme gali motlola.

¹⁹ Na Jon bubë lowene esogo mëtlelêtelobë home, gali telokwakëme, na bu mitisijo. Na bu kë tlemalë home Jisas belë jine telokwakëme, bume metakune namoglolome, “Goto jine gali kë lëglelebë ho, kë ho ju ekênene, o kwe sebo li home hwi nêgletlamene?”

²⁰ Na kë tlemalë ho, Jisas belë mitisijo. Na bume gali motlolo, “Tu mëta, kë baptais totokwefëmebë Jon, seme ju belëme jine lëlëbakëno, na bu jume metakune lalolë, ‘Goto jine gali kë lëglelebë ho, kë ho ju ekênene o kwe sebo li home hwi nêgletlamene?’”

²¹ Kë nalëwa, Jisas, bu lebutako onehobë memelë ato elili sle sle totometëme, na onehobë ato mago lebutako ahwane hehë tletëme. Na bu lebutako naba titiki tabo onehome sle totometëme.

²² Na Jisas Jonbë lowene esogo mëtlelêtelobë hobë gali tafu têtatëme, “Iniwa wesibi sobo kë hwi eglomobë na kë aholokwane egelobë sobo Jonme sagali ejuwelëlo. Naba titiki tabo oneho wahwi mla, na elebo tëbona oneho asë sle mla, na ato juba jubawa kë mêtëbetëmebë oneho, bu lale tafa mla, na aholo titiji tabo oneho bu waaholokwane mla, na gigli kë mëgebéyabë oneho wahuhuju mla, na bu Gotobë lale gali, wesibi jwa enëneme të mëtatëma.

²³ Oneho bome kë lowene sle mëgletë nabë lowene kile

jwa mëglana kwe bu fleflesu matla.”

²⁴ Jonbë gali kë mëtehilobë ho wamëtëyeu, na Jisas Jonbë gali onehome megali tlome, “Sobo ëbame ho jwa tabo elë kë tégëyeubë, sobo habëtabo home hwime tëyeune? Sobo li li lowenena home hwime tëyeune, flelu agosaba fene abeiabei lotome? Weyewa.

²⁵ Sobo fëye wesibi hwime tëyeune? Sobo, lale ëho kë gelo togotlebë home hwime tëyeune? Weyewa. Ho bu lale lale ëho ato mëta kë mëgëbetëmebë na lebutako lale wesibi kë mëgëbetëmebë, bu walujume nane tafa mla. Weyewa. Bu tako lifatebë eso hobë lo mëta tatafa mla.

²⁶ Sobo fëye wesibi hwime tëyeune? Gotobë lowene mago gali të totokweflebë home hwime tëyeune? Kwe nêgali fe? Na bo some gali nolëyo, kë Gotobë lowene mago gali kë të togotlebë ho bu lalowa mu, kwe fli Gotobë lowene mago gali kë të mogotlabë ho bu sogë lalowaha.

²⁷ Gotobë bogo, Jonme, megali lalatlë, ‘Aholokwane elo, kwe tokwafe bo ho lime jine nêglëlëme, bobë gali të nalëtaguleme. Na bu jume loutatëme. Na bu alëge jume fu nalëgëtagutëme.’

²⁸ Bo some gali nolëyo, Iniwa oneho bu ëtani kë tafa motokweijabë na ëje mana kë tafa mokouja, bu letitabo hoha kwe Jonye bu tako letitabo homu. Kwe, Goto eso home kë tafa lëgletëmebë oneho mago, li atwati homu

kë tētābēbē, bu letitabo homu kwe Jonye bu sogē letitabo ho.”

²⁹ Na iniwa oneho na takis baliti kë glo mëglekefēyabē hona bu kë gali aholokwane mētla na gali mētla, “Gotobē lowene ebē lale mu.” Jon bume wafi baptais totomeme nēgēme na bu kë galime këme gali mētla.

³⁰ Kwe Farisi ho, na Gotobē galime okokwe moglomabē hona bu Jon mēta baptaisme iweniji lamētla. Kēme nēgēme bu, Goto kë lebotane tētātēmbē lale loweneme, tēboijiwa këme molola.

³¹ Na Jisas bu ita gali tlome, “Ebē olēna kë tafa mëglabē oneho bu fēye wesibihane? Bo some wafle galina lēlekuju nēletēyo.

³² Kë oneho bu fli hobē gali tole hana mletēma. Bu nēbale lifeku kume kë salē mëglabē fenene. Bu fli nēbaleme gali melēkakēma, ‘Iniwa wesibi sebo metole kë nēgletēmbē, sobo kë wesibime tole hana eletemo. Sebo some ifeife nēletēyo, sebo sobona sawa nanēglame kwe sobo sawame tēboijiwa lalo. Na sebo maninibo ye nēla kwe sobo tēboijiwa lalo na ye hana elo.”

³³ Na Jisas ita gali tlome, “Jon, onehome kë baptais totomēbē ho, bu tisi na bu bletē nage na wain tabo liji tu hana hi tle. Kwe sobo gali telo, ‘Ahwane tēbo bu mēta tafa lēle.’

³⁴ Na bo, Gotobē life mago ho, bo tigusibē na bo hi wesibi hi telē na wain taba liji tu hi telē na sobo gali

tlekefo, ‘Sobo hwi elo, bu feilawa hi lēglekefēbē ho na feilawa wain taba liji tu hi lēglekefēbē ho. Na bu takis baliti kë glo mëglekefēyabē hobē yabe na tēbo lowene kë fa motokweflabē hobē yabe.’

³⁵ Sobo këha gali gali elekefo, kwe oneho bu Gotobē lowene kë fa mogotlabē, bu seme melebotane mētātēname, Gotobē lowene ebē nēgali mu.”

Mēse li, Jisasbē juba lēkaluwa tuna swa totometle

³⁶ Farisi ho, bubē weniji Saimon, Jisame no tlēle, buna hi namēgelome. Na Jisas kë hobē lowa tēkaklu na hi labuku mēta tafa tle.

³⁷ Na lisei lisei tēglebē mēse, li kë lifeku mēta tētābe. Kë mēse, gali meaholokwane tle Jisas Farisi hobē lo mēta kë lētābe. Na bu lale anijina kë blēge blēge mētētayabē botolona lēkaluwa tu fa totle.

³⁸ Na bu Jisas kë mēta tafa lēglebē lowa tlelēkakule, na Jisasbē elebo li mēta tlibetle. Na mana ye tle. Bu ye tlebē na nabatu Jisasbē juba mēta tuha tetotē. Na bubē eslehuba heletanēnona, Jisasbē juba mago nabatu sosa totometle. Na bubē juba ēfalēbona itaita momotlē tletle na lale lēkaluwa tu juba mēta wē tētātle.

³⁹ Na kë Farisi ho Jisame bubē lowa hime kë notēglēlebē, kë mēse, Jisame kë fa tēgētalebē wesibi yafe hwi tole na bubē lowenenawa melowene tle, “Kë ho, Gotobē life mago

nëgebë, kwe bu melowene lëgletëme fene, ‘Bu tëbo lakalena mëse.’”

⁴⁰ Jisas bu kë hobë lowene walowene tletle na bume gali tlole, “Saimon, bo jume li galime gali nolëme.” Na Saimon bume gali tlole, “Tisa, jubë gali të etle.”

⁴¹ Na Jisas gali tle, “Tlemalë ho bu baliti li hobë toba mago esokwaneme glo mëtelo. Li ho bu we lujuafe we baliti esokwaneme kënjiji glo tle na liye we lujua balitiwa esokwaneme kënjiji glo tle.

⁴² Kwe tokwafe kë tlemalë ho kofaya baliti mëglëlome fene kwe bu baliti hanane. Na këme nëgеме bu kë tlemalë hobë kofaya baliti glo lëglebë lowene aholokwana ti lëletëmeme na kë balitime ita hana takune loglomeme. Na ju habë lowene lalene, bu mago tlemalë ho ebë kë nëgebë feilawa tole yalë lëgletlemene o sozi tolewa yalë lëgletlemene?”

⁴³ Na Saimon bume gali tafu tëtatlë, “Bo melowene nanelë, we lujuafe we baliti esokwaneme kë tëglëlebë ho, bume tako tole latletle.” Na Jisas bume gali tlole, “Jubë gali nëgali galimu.”

⁴⁴ Na Jisas mëseme swaya tokokwetë na Saimonme gali tlole, “Saimon, ju ebë mëse kë eglëbebëme hwi hana eolëne? Bo jubë lowa nëkaklina, kwe ju bobë juba tuna swa hana etometenë. Kwe ebë mëse kë nëgebë, bubë nabatuna bobë juba swa etometenë. Na

bubë esolehubana sosa etometenë.

⁴⁵ Na ju bome ëfalëbona sësle hana etanë, kwe ebë mëse bobë juba ëfalëbona sësle etometenë.

⁴⁶ Na ju bobë eso mëta welë tu hana wë etatenë, kwe ebë mëse, bobë juba mëta lëkaluwa tu wë etatenë.

⁴⁷ Këme nëgеме bo jume gali nolë, ebë mëse kë nëgebë, bo bubë feilawa tëbo lowene aholokwana wati nëletë. Këme nëgеме bu bome tako tole këme eletenë. Kwe ho bubë tëbo lowene tokwëfo, na Goto kë tëbo lowene aholokwana wati lëletle kwe bu Gotome tokwëfo tolewa lëletle.”

⁴⁸ Na Jisas kë mëseme gali tolë, “Bo jubë tëbo lowene aholokwana wati nëletë.”

⁴⁹ Na buna masei li mëta kë tafa mëtlabë ho, bu kë gali aholokwane mëtla na blalo mana gëgali mëtla, “Ebë habëtabo hone? Bu sogëna lalële, tëbo lowene aholokwana habëna ti eglemene?”

⁵⁰ Na Jisas kë mëseme gali tolë, “Ju bome lowene sle egletenëme nëgеме, na Goto jubë tëbo lowene aholokwana këme ti lëletë. Jubë lowene wasle nëtatë. Ju fleflesuna eiju.”

8

Jisasna kë mutujabë one

¹ Tokwafe, Jisas li life li life asë tëbelëfa na onehome, Goto onehobë eso home tafa lëgletëmebë, lalë gali të tëttagutëme. Na bubë lowene esogo mëglëtlëlabë ho we ita tële, buna mutuja.

² Na fli one mata, ebame ahwane tëbo bubë ato mago kë hehë tëgletëmebë na tëbo kë sle totometëmebë, buna mutuja. Liye, Makdala life mago Maria. Ebame Jisas, tobali ita tële ahwane tëbo, bubë ato mago hehë tletëme.

³ Na liye Joana na Susana na fli feilawa one mata buna mutuja. Kë one kë nëgebë, bu Jisasna bubë lowene esogo mëglelëtlabë hona, bubë balitina, hi wesibina mëtaitama. Joana ebë Kusabë no. Na Kusa, eso ho Herotbë lo tafa lëlelëkefëtlebë eso ho.

Jisas mewafle gali latlome, "Ho aoba liji nujume sike lekou"

⁴ Li life li life mago oneho Jisas belë mitisiya. Na feilawa oneho bume loko mëtlelëtle. Na bume wafle gali të têtatëme,

⁵ "Ho li nujuwa luj, aoba liji sike nalëkoume. Bu aoba liji sike lëkoubëë, na fliye alëgeme mititigo tle. Na oneho jubana fëfe melekefëya na fole jiwa mëtëkekebë lahiwa mële.

⁶ Na fli aoba lijiye anijina flëke mëta mititigo. Na liji hulu mële kwe kë flëke tu jwa nëgeme, na lakokowa mëbe.

⁷ Na fli aoba lijiye, ikiji taba wayo mëta mititigo. Na kë ikiji tabana aoba liji weife hulu mëtle na kë aobame lamuwa mototome.

⁸ Na fli aoba lijiye bu lale flëke mëtamu mititigo. Na bu hulu mëtle na bubë liji feilawamu motowalë. Bubë liji këniji motowalëwagu, we lujaafe we, we lujaafe we."

Jisas kë wafle gali watë têtatëme na onehome gali tlome, "Ebë gali aholokwane lalo, sobo salowene sle eletelo."

Jisas bu fëye lowene nane, wafle gali kë të têtatëmebëye

⁹ Jisasbë lowene esogo mëglelëtlabë ho bume kë wafle gali wayobëme takune motlola.

¹⁰ Na bu këme gali tlome, "Ëtani, Goto, onehobë eso home kë tafa lëglelëmebë gali olafa hana tletëme. Kwe ebë olëna bu kë ëho gali some waolafa têtatëyo. Kwe bo fli onehome wafle galinawa gali tlome. Bo wafle galiwa këme gali tlome, bu mana itaita hwi mëglekefëyana kwe wesibi lowene sle hana mëgletlame. Na bu gali itaita meaholokwane mëglekefëyana kwe gali wayobë lowene hana mëgletlame."

Jisas bu aoba liji wafle gali wayobë tohwa sle têtatëme

¹¹ Na Jisas ita gali tlome, "Kë aoba liji wafle gali wayobë melë lëgëbetlëlalële. Aoba lijiye, Gotobë galime lëlekuju ne.

¹² Na aoba liji alëgeme kë mititigobëye, bu Gotobë gali aholokwane mëglabë enëneme lëlekuju ne, kwe Satan ligisiwa lëglebë na kë gali bubë lowene mago lafawa letokwakëtëme. Satan bu melowene lalële, 'Gotome lowene sle mëgletlalime na Goto bume nëno lëglelime.'

¹³ Na aoba liji, anijina life mëta kë mititigobëye, bu

ebēha enēneme lēlekuju ne. Bu Gotobē gali aholokwane mla na hokweinawa lowene mletla na flelesu mletla. Kwe bubē gali bubē lowene mēta lēgēbetēme sle hana lēletēme, olo wesibi fenene tayafu su sle hana motometēme. Kēme nēgēme, kē nalēwa kēme lowene mletla. Kwe hobota olē yafe fata lēletēme, Gotome aholokwana latiwa mla.

¹⁴ Na aoba liji, ikiji taba wayome kē mititigobēye bu ebēha enēneme lēlekuju ne. Bu Gotobē gali aholokwane mla na lowene mletla, kwe bu ebē life mago hobota wesibime fwa tako lowene lamletēma, na feilawa baliti glo mēglame fwa lowene mla, na bu ebē life mago lale wesibime fwa flelesu mla. Na kē wesibiwa Gotobē gali lēlamu mētatle, na bu Gotobē gali lowene sle jwa kēme mletla. Bu tētetabo hi wesibi fenene.

¹⁵ Na aoba liji lale flēke mēta kē mititigobēye bu ebēha enēneme lēlekuju ne. Bu Gotobē gali aholokwane mla, na bu kē gali bubē lowenena kiki motla. Bubē lowenena maninibona lalowa mēbetēmēmu. Na bu kē gali aholokwana hana ti mla na bubē lowene li wesibi mētaha hana soslo lēletēme na bu lale lowene mēta fwa tafa mla.”

Oneho lamo fiji tabo isekuna hana lamu mēgētayame

¹⁶ Jisas ita gali tle, “Oneho bu lamo fiji mētayana, na isekuna hana lamu mēgētayame o ni labuku

lokwalēfe mēta hana ēho mēgētayame. Hanane mu. Bu masei mēta gwa mētaya. Na oneho lowa mēkaklijana, bubē elulego hwi namoglotēyame.

¹⁷ Na wesibi elulego mēta fene olafa tletēme, iniwa wesibi ēho kē mēglebē, kwe tokwafe Goto olafa lotomeme. Na iniwa wesibi oneho ēho kē motomabē, kē mata, tokwafe Goto olafa lotometēmeme na oneho bu hwi molomame.

¹⁸ Sobo ululu sle saelo, gali aholokwane sle naegelome. Ho bu Gotobē gali lowene sle lalēletlee kwe ita Goto bume fli lowene lēglēleme. Kwe ho bu Gotobē gali lowene sle hana lēletlee kwe Goto kē hobē tokwēfo lowene ita hijika logotleme na bu kē lowene aholokwana ti lēleme.”

Jisasbē bota na bolijahanino na bolijamonino yalēne

¹⁹ Na kē nalēwa, Jisasbē botana bolijamonina mitisiya, bume hwi namoglolame. Kwe feilawa oneho bume loko mētletlētame nēgēme na bubē li elē hana mutuju tla.

²⁰ Na bume gali motlola, “Bitana, blijamonina, jume hwime misiya. Bu lo mēglēbo elē ekē milija.”

²¹ Kwe bume gali metafu latētātēme, “Oneho Gotobē gali aholokwane mēglabē na esogo melelēkefētlabē, buwa bobē beēnino na keinēbalenino na afanino.”

Jisas tu name flelu name gali tlome na latliwa mētēbe

22 Na kë nalëwa, Jisasna bubë lowene esogo mëglelëtlabë hona, ihe elë fëfe mëtla. Na megali tlome, “Te, sebo lake tu jelëfo elë mana su manëkaka.” Këme nêgeme bu mutuja.

23 Ihe tigiwabë na Jisas ni tëbe. Na tako flelu lake tu mëta fata tletëme, na lake tu ihe elë okokli tokoke, na tu têtäfu lëgleme kofene, tëbo namigitayame kofene.

24 Na bu Jisasme ni mago huju mototla na gali motlola, “Tako Ho, huju ele. Sebo tëbo niglitayame ekëyo.” Na bu huju tle na tu susugli name, flelu name kale tlome. Na kwe fleluna tu susuglina latliwa mëtëbe. Na tu mëgelimeha latëgemulewa.

25 Na bubë lowene esogo mëglelëtlabë home takune tlome, “Bome lowene sle jwa fëyeme eletëname?” Kwe bu Jisasbë kalëlego hwi motlolame nêgeme na bu ulina tutunena memëtla na blalo gëgali mëtla, “Euowe! Ebë habëtabo hone? Bu galiwa lëglena, na fleluna tuna bubë gali laaholokwanewa molole.”

Jisas ahwane tëbo, hobë ato mago hehë tletëme

26 Jisasna bubë lowene esogo mëglelëtlabë hona Galili provins kile mototla na Galili lake tu jelëfo elë ihena su mëtëkaka na Gerasabë walujuwa fwa mutula.

27-29 Jisas ihe kile tle na helefowa fe tokwake, na ahwane kë tetëbo mogotlebë ho bume esune tlële. Kë ho bu feilawa olë, ëhona nane

tëtäbekëfe na bu lome fwa nane tatafa tlekëfe. Weyel! Bu matëmatë life mëta fwa tatafa tlekëfe. Olëli olëli ho bume itaita fa mototokwefla na bu senë tabana, toba kabana yafe gëgelo mototokwefëmetla, kwe bu laeluluwa totokwefëme. Na kë ahwane tëbo bume ho jwa tabo elë memëtlukefle lamëtla. Kë ho Jisasme hwi tlole, na tako afëflei metle na bubë elebo lime latitigotlewa. Na Jisas kë ahwaneme megali tlole, “Ju ebë home kile ele.” Na bu anisasana këme afëflei tle, “Jisas ju tako kalëlegona Gotobë nëba mu. Ju bome habelë egëtanëmene? Masiwafe, ju bome asa tëbo etanë.”

30 Na kwe Jisas bume takune tlole, “Jubë weniji fë etlemo.” Bume feilawa ahwane mëtëkaklu tleme nêgeme na bu metafufu këme tëtätla, “Bobë weniji feilawa ho.”

31 Na kë ahwane Jisasme anisasana itaita gali motlokwefla, “Ju seme ahøjuna fuluju elë asa jine enëna. Matëbe.”

32 Na kwe lebutako kleli bu fatini mleibu li mëta monei mëtla. Na ahwane Jisasme anisasana gali motlole, “Ju seme kë kleli belë jine elëkakëna, nëkakluja nanëglame.” Na kwe Jisas gali tlome, “Sobo lalowa eyeumo.”

33 Na ahwane kë home kile mototle na kleli belë mëtëkaklutëme. Na bu fatini mago lake tu elë fëka mëtëmalita na tu mëta

lasusugluwa mëtële.

³⁴ Na kleli mëglëmabë ho bu kë wesibi hwi motlola na mëtëlbouja. Na kë gali li life li life të mëtëtagula.

³⁵ Na iniwa oneho mutuja kë wesibi hwi namoglomame. Na bu Jisas belë fwa mutula na ahwane bume kë kile mototlebë home mana hwi motlola. Bu lalë ëho wateho na bubë eso hana yaya tletle. Na bu Jisasbë elebo lime tafa tletle. Na bu iniwa uli memëtla.

³⁶ Oneho Jisame ahwane kë hehë tégletëmebëme kë hwi motlolabë, bu tokwafe kë mitisiyabë onehome kë gali të mëtëtatëma.

³⁷ Na Gerasa lifate li mago life enëne bu kë gali aholokwane mëtla na bu tako uli memëtla na Jisame këme hehë mëtletla, bubë lifeku mago luguju nalëgleme. Na këme nëgeme Jisas ihe mëta fe tle, muguja namëglame fene.

³⁸ Kwe ahwane kë kile mototlebë ho Jisame anisasana takune tlole, “Bona lalowa nëgëyeumene?” Na kwe Jisas bume hehë metletle na këme gali tlole,

³⁹ “Jubë lifekuwa ejumo, na Goto jubë tëbo wesibi kë sle totometëbë gali të eoutatëmeme.” Na kë ho tuju, na kë lifate mago onehome, Jisas bume kë tégaitalebë gali të tutatëme.

Jisas bu gli këtëglebë nëbame huju tëtamë, na tëbo atona

mëseme sle tëtamë

⁴⁰ Na kwe Jisas ihena lake tu jelëfowa ita su mëtëkaka. Na feilawa oneho bume hwi mëtëkefëtla na bume hwi motlola na tako fleflesumu memëtletla.

⁴¹⁻⁴² Na lotu lo hwi loglokweflebë eso ho tisi, bubë weniji Jairus. Jisame hwi tlole, na elebo lime latitigotlewa. Kë hobë nëba gli egleme kofene na bume anisasana këme takune tlole, bubë lowa lëglelule nalëgleme. Kë ho bu jowa nëbawa. Na kë nemosana nëbabë tlibutu tabei këniji, we ita tële.

Na kwe Jisas tuju na feilawa oneho buna gëgeniwa mutuja.

⁴³ Na mëse li kë oneho buna iniwa mutuja. Kë mëse bu we ita tële tlibutuna ko latëkougëfe. Ho bubë ato yafe sle sle mëtëtatëya kwe wino te hanatle.*

⁴⁴ Kë mëse Jisasbë leluju elëme tuju tle. Na bubë heletabo ëho mëta tobana lu totle na ko kë téglebë latewa tle.

⁴⁵ Na Jisas gali tle, “Bome ya lu lëtanëne?” Na iniwa oneho bume gali motlola, “Sebo kwe hanane.” Na Pita bume gali tlole, “Tako Ho, ju hwi hana elene, lebutako oneho juna gëgeniwa kë egëyeubë?”

⁴⁶ Kwe Jisas gali tle, “Bo melowene nanelë, ho li bome tobana lu lëtanë. Bo mesu nanelë, bome fli afutuku wakile mëtanë.”

* **8:43** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Bu lili dokta belë yafe asë tëbelëfa kwe bubë baliti dokta enëneme yawe tlotëme.”

47 Na kë mëse melowene tle, “Bu walowene lëlefe, bo hana ëho nëgelëmefe.” Këme nëgeme bu lilina metle na tisi tle na Jisasbë elebo lime latitigotlewa. Na iniwa onehobë naba lime gali tle, “Bubë ëho, bo lu nëtatelëfe. Melëme nëgeme, bobë ato sle nalëgletenëme. Na bobë ato elili laslewa lëletenë.”

48 Na Jisas gali tolë, “Mola, ju lowene sle egletenëme nëgeme, jubë ato këme titika lëletë. Na ju eiju. Tutune asa ele, lalowa tafa eguleme.”

49 Jisas mana gëgali tlelëbëë, na ho, lotu lo hwi loglokweflebë eso hobë lo mago nëba wofu mana fata tlelëkakile. Na Jairusme gali tlole, “Jubë nëba wagli elo. Ju tisame ita sosalë asa etle. Matëbe.”

50 Jisas kë gali aholokwane tle na Jairusme gali tlole, “Ju tutune asa ele, bome fwa lowene sle egletenëme na jubë nëba lalowa egëtabetëme.”

51 Na Jisas Jairusbë lowa tuju. Na bu onehome buna mëkaklujame hehë latletëme. Bu Pita, Jems, Jon, kë nëba bota, bolijayaname fwa tlelëkakume.

52 Na kë lo mëta kë tafa mëtlabë oneho bu kë nëbame tako maninibo memëtletëya, na ye mëtlëlekefëya. Na Jisas gali tlole, “Sobo fëyeme ye ye elëlyone? Kë nëba gli hana elo. Ni labe tekwe nëge.”

53 Kwe bu Jisasme tako soso memëtlëlamu. Bu melowene mëtlame nëgeme,

“Kë nëba wagli sle elefe.”

54 Kwe Jisas kë nëbabë tobame fa tëta na anisasana gali tolë, “Nëba, ju huju ele!”

55 Na bubë amtëtomba ita tisitë na lahujuwa tëkake. Na Jisas bume gali tlole, “Sobo bume hi wesibi elëyomo.”

56 Na kë nëba botana bolijayana klelego memëtelo. Kwe Jisas bume anisasana gali tlole, “Sobo ebë wesibime ho flime asa gali elomo. Matëbe.”

9

Jisas bubë lowene esogo mëglelëtlabë home jine tëbelëkakëme

1 Na Jisas, bubë lowene esogo mëglelëtlabë ho we ita tèle kënijime gali telokwakëme na bu mitisitla. Na bu tako afutuku bume tlëme, bu ahwane onehobë ato mago kë afutukuna hehë namëgletëmame na tëbo kë mëglabë onehome sle namogotomame.

2 Na bu, Goto onehobë eso home tafa lëgletëmebë gali të name na onehobë tëbo ato sle name, jine tëbelëkakëme.

3 Na bume gali tlole, “Sobo egëyeuna, sobo wesibi asa ehoujo. Sobo liji, musu, hi wesibi, baliti, hihijika ëhona asa ehoujo. Matëbe.

4 Sobo li lifekuwa tuhu egulona na ho some nëno lëglena, sobo kë lo mëta fwa nini ebekefome. Kë lo mëta nini ebekefobëë, na mana kë magowa eyeume.

5 Na sobo li lifekuwa tuhu egulona na kë lifeku mago oneho some nëno hana mëglana, kwe sobo kë lifeku

lakilewa elome. Sobo kë life mago egëyeuna, kwe sobobë juba mago flêke bubë naba li mëta bu elome. Bu some këme hwi mëglëyona na melowene namëglame, 'Fëyeme tëbo nilitayane? Goto seme tëbo lëgëtanamefe.'

⁶ Na bubë lowene esogo mëglelëtlabë ho bu mana iniwa lifeku elë mitliwaya. Na bu Gotobë lale gali të mëtëtagumetëma na iniwa onehobë ato elili sle mëtëtagumetëma.

Herot Jisame yaya tletle

⁷ Galili provins enënebë eso ho Herot, bu Jisas kë totomebë wesibi aholokwane tle, na bu feilawa këme tutune tlekëfe. Fli oneho megali mëtlame nëgeme, "Ebë kwe, onehome kë baptais togotomebë, Jon, matëmatë mago wahuju tle."

⁸ Na fli oneho megali lamëtla, "Ebë kwe, ëtanifu ho, Elaija tekwe nëge, matëmatë mago huju tlefe." Na fliye kwe megali lamëtla, "Ebë kwe, Gotobë lowene mago gali ëtani kë të mogotlabë ho li, tekwe nëge, matëmatë mago huju tle."

⁹ Këme nëgeme Herot megali latle, "Ëbame, bo wame home boblo logotomebë home gali tlole, na bu Jonbë eso, mou lokwati iniwa tlë tëtatlë. Kwe kë fëye homune? Bo ho mago meaholokwane nanolokwefëmë, bu klelegowa wesibi blëge lotokwefëme." Na bu Jisame hwime tole tletle.

Jisas bu hi wesibi 5,000 home sa tëtätëme

¹⁰ Gotobë gali tëme kë jine tēgelëkakëmebë ho, ita loko mëtëkakija na bu iniwa wesibi melë kë mëtlabëme, Jisame të mëtëtatla. Na Jisas bume nëno tle, na bu fli onehome hune mëtla na bume fwa li lifekuwa tlelume. Këbë life weniji Betsaida.

¹¹ Tokwafe lebutako oneho melowene mëtla, "Bu wafi mujafe." Na kwe bu nagi esogo mëtlaguma. Bu belë mitisitla na Jisas gali tlome, "Sobo lalowa esijo." Na bu, Goto onehobë eso home kë tafa lëgletëmebë gali, të tëtätëme. Na bu tëbo atona onehome sle totome.

¹² Na taboklë mu, Jisasbë lowene esogo mëglelëtlabë ho we ita tële, bu belë mitisiya na bume gali motlola, "Te, ju onehome mana jine ebelëkakëme, lolime kë mëgëbebë lifeku elë mana migliwaya, hi wesibime hohwi namëtayame na ni lo mata hohwi mëtatlame. Ebë ho jwa life nëgeme."

¹³ Kwe Jisas bume gali tlome, "Sobowa hi wesibi elëmo." Na bume gali motlola, "Sebo feilawa hi wesibi hanane. Sebo tobali bletë nage na mo tële, këwa ekë mëbe. Ju melowene lalene, 'Sebo hi wesibi kë iniwa onehome balitina glo nanëgletëmamene, hee?'"

¹⁴ Ebë hobë tabei këniyi 5,000.

Na Jisas bubë lowene esogo mëglelëtlabë home gali tlome, "Sobo onehome gali

elomo, 50, 50 mēta tafa namokouja.”

¹⁵ Na bu melē mētla na iniwa oneho tafa motokouja.

¹⁶ Na Jisas kē tobali bletē nage na mo tēle glo tle, na matafa elē hwi tokwake na Gotome lale gali tlole, “Ebē bletē nagenā mona yaha fēyeme enēnane?” Na bu klelegowa wesibi blēge totome na kē bletē nagenā mona fufu totome na bubē lowene esogo mēglelētlabē home tlēme, onehome sa namēgētātēmame.

¹⁷ Na bu iniwa hi mētla na hahana memētlelēma. Na bubē lowene esogo mēglelētlabē ho, lēne hi wesibi loloko mētētaya na we ita tēle kēniji basketē musu tētafu mototoma.

Pita megali latle, “Jisas, ju ebē ho kē nēgebē, Goto jume kē aniji toglēbē ho, onehome nēno naegleme”

¹⁸ Kē nalēwa, Jisas, buwa Gotome gēgali tlelēle, na bubē lowene esogo mēglelētlabē ho bu belē mutuju tla. Na Jisas bume takune tlome, “Oneho bome habē weniji lamlane?”

¹⁹ Na bume gali tafu mētētatla. “Fli onehowe megali lamētla, ‘Onehome kē baptais togotomebē Jon, tekwe nēge, matēmatē mago huju tle.’ Na fliye megali lamētla, ‘Gotobē gali, ētani kē tēgehilebē ho, Elaija, tekwe nēge, matēmatē mago huju tle.’ Na fliye megali lamētla, ‘Gotobē gali ētani kē mētehilabē ho li, tekwe nēge, matēmatē mago huju tle.’”

²⁰ Na Jisas bume takune tlome, “Na sobo bome habē weniji lalone?” Na Pita bubē gali tafu tētatlē, “Ju ebē ho kē nēgebē, Goto jume kē aniji toglēbē ho, onehome nēno naegleme.”

Jisas gali tlome, “Bo gli nelēme na huju nēgelēme”

²¹ Na Jisas bume anisasana gali tlome na meheheē latletēme, “Sobo kē galibēme fli onehome asa gali elomo. Matēbemu.”

²² Na Jisas bubē lowene esogo mēglelētlabē home gali tlome, “Tokwafe bo, Gotobē life mago ho, lebutako elili na hobota fa nogotlēme. Na letitabo enēne na lotu lome wege mēglabē eso enēne, na Gotobē galime okokwe moglomabē ho, bu bome hehē mēgletēname na bome mogo nalē tēkle mēgētaname. Na bo matēmatē mēta tēle olē nebēme kwe aona olēbēye mana huju nelēme.

²³ Ho bome na bobē loweneme esogome tole lēglēna kwe bu ebē life magobē lale wesibi, bu kē tole lēgletēmebē, aholokwana satimu sle lēletēme na glime uli jwamu lēleme. Ho bume wame gali moglolana na bume mogo nalē tēkleme gali mēglana, bu uli jwa lēgleme na bome iniwa olē mana esogo lēlenēnēme.

²⁴ Ho bu melowene lēglēna, ‘Bo Jisasme esogo nēglelēlēna fli ho bu bome tēbo mēgētaname.’ Na bu, bubē ato uli lēglelēlēna na bome hana esogo lēglēnēnēna, kwe kēha

ho bu tēbo liglitame. Kwe ho bu bome lowene sle lēgletenēna na bubē ato uli jwa lēglelēna kwe kēha ho bu hana tēbo liglitame. Ho bu kē home mogo nalē tēkle mogotlana, kē ho gli sle nane lēle. Weye. Bu unaunalēme lale tafa lēgleme.

²⁵ Ho bu ebē life mago iniwa wesibi glo lēglēna, na kē ho bu hel life mēta tēbo liglitana, kwe kē wesibi bume habēna mēgaitalemene? Hanane. Bu blawa glo lēle.

²⁶ Tokwafe, bo, Gotobē life mago ho, bo tako elulegona nigisime. Bo bobē ayabē na bubē enselbē klijiha, kē u lēglebē elulegona nigisime. Na ho li, onehobē naba li mēta bobē galibēme able loglomena na bome able lēglēna kwe tokwafe bo nigisina, bo mata kē home kofaya able nēgletelēme.

²⁷ Bo some nēgali nanolēyo. So mago emēta kē tafa egelobē bu mana neme na Goto onehobē eso home kē tafa lēgletēmebē olē mana fata lēleme. Na bu kē olē mana hwi mololame.”

Jisasbē ato li weniyanena fata tletle

²⁸ Jisas kē gali wagēgali tle. Na tokwafe toballi ita aona olē mētlēbou na kwe Jisas, Pita, Jems Jonname nēno tle. Na tako fatini lufuwa tilekome, Gotome gēgali nalogolelēleme.

²⁹ Bu Gotome mana gēgali tlelēlebēē, na bubē weniyanē li weniyanena mana fata tletle na bubē ēho melē

tatiwamu fata tletle na feilawamu u tletle.

³⁰ Na tlemalē ho lafatawa mētletelo na bume gēgali mētletelēlo. Kē tlemalē hobē weniji, Elaija na Moses.

³¹ Na bu Gotobē elulegona fata mētletelo. Na bu Jisame, Jerusalem lifate mēta wesibi fata mēgletlebēme na bu gli lēglebēme na ebē life kile lēglebēme kē galime gēgali mētletelēlo.

³² Pita bume kē tafa tēglelēmebē ho bu feilawa nilafale mētla na ni mētebēya. Na bu ni mago huhuju mētla na Jisasbē elulego, na bume kē mētlebilobē elulego, hwi motlotēma.

³³ Na tokwafe, kē tlemalē ho, Jisame kile mogotlome kofene kwe Pita gali tlole, “O tisa, sebo eme tafa nēglabē, ebē lalowa. Sebo aomalē, aona afeteni tli lo gigliji nēglame. Li jubē lo, na li Elaijabē lo na li Mosesbē lo.” Pita bu yaya hoha gali tle na bu kē gali tēglebē gali lowene hana tletle. Bubē efalēbowa lēleguli tletle.

³⁴ Pita mana gēgali tlebēē, na oloba mana tetujule na bume iniwa lamu totome. Na bubē lowene esogo mēglelētlabē ho uli memētla.

³⁵ Na Goto kē oloba kweli mana gēgali tle, “Ebē bobē nēba. Bo bume wafi aniji tlole, bobē wege fa nalētatenēme. Sobo bubē gali aholokwanewa eglolome.”

³⁶ Kē gali wayawe tlole, na bu Jisaswa tlibe. Na bubē lowene esogo mēglelētlabē ho, kē olēna, kē hwi

motlomabë wesibi, ho flime hana gali motloma.

Jisas bu ahwane kë tëbo lotlebë nëbame sle totle

³⁷ Li olëna, Jisas na bubë lowene esogo mëglelëtlabë ho aomalëna, fatini mago kle mëtëmalitaya. Na feilawa oneho Jisame alëgeme esune mëtlëla.

³⁸ Na ho li kë onehobë ku mago we tole, “Tisa, bo jume anisasana gali nolë, bobë nëba hwi naegloleme. Bobë jowa nëba nëgemel!

³⁹ Ahwane bume itaita lalëkaklukefëtle na bu afëfleina mëtlekëfe. Na kë ahwane bume lilina lalogotlewa na nënafu bubë ëfalëbo elë mowelëbetle. Na këbë ahwane bubë ato tëbo lëtakefëtle na bume hokweinawa hana kile logotleme.

⁴⁰ Na bo jubë lowene esogo mëglelëtëyobë home anisasana yafe takune tломë, këbë ahwaneme hehë namëgletlame fene. Kwe bu hana hehë mëtletla.”

⁴¹ Na Jisas metafu tëtatile, “Sobo oneho, sobo lowene sle hana elo. Sobo tëbo lowene eholo. Bo sobona li olë tafame tole hana nelë. Bo sobobë hobota ita fa nogotlëbëme tole hana nelë.” Na bolijayame gali tole, “Te! Jubë nëba ebelë elesutëna.”

⁴² Kë nëba Jisas belë loliwa tisi tle, na ahwane bume lifewa so telëkakle na life mëta tujetigo, na bume feilawa lili totle. Na Jisas këbë ahwaneme anisasana kale tole na kë nëbame sle totle na bolijayame tlële.

^{43a} Na iniwa oneho klelego memëtla, Gotobë tako afutuku hwi motlolame nëgeme.

Jisas, bubë glime ita gali tle

^{43b} Jisas kë togotlebë wesibime, oneho mana lowene mëtlekefëya, na Jisas bubë lowene esogo mëglelëtlabë home gali tlome,

⁴⁴ “Te, sobo aholo bo sle eto. Bo, Gotobë life mago ho, bu bome home yo moglomame.”

⁴⁵ Kwe bubë lowene esogo mëglelëtlabë ho, këbë gali wayobë lowene hana mëtletla. Goto, kë gali wayo bume ëho tégëtatëmeme nëgeme na bu kë gali wayo lowene sle jwa këme mëtletla. Bu Jisame uli mëtletlame nëgeme, na bu kë gali wayobëme takune jwa këme motlola.

Logouta ho yalëne

⁴⁶ Li olë na, bubë lowene esogo mëglelëtlabë ho, blalo kofaya kofaya megali mëtlogwaya, “Semago, logouta home, ya tafa lëlene?”

⁴⁷ Na Jisas bubë lowene walowene tletëme. Këme nëgeme bu nëba tokwëfo no tlële na bubë lime tlibe.

⁴⁸ Na bubë lowene esogo mëglelëtlabë home gali tlome, “Ho bome lowene lëgletenëna, na ebëha nëbame lëgaitalena, kwe bu bome laitanë. Na ho bu bome lëgaitanëna, bu bomewa nane laitanë. Weye, bome kë jine tégilënëbë ayame laitale. Na ebë nëba fenene, ho somago

atwati hoha metafa lëglena
kwe kë ho logouta home tafa
lëgletëyome.”

*Ho some wame hana
loglëyona, bu sobobë yabe*

⁴⁹ Jon bu Jisame gali tlole,
“Tako Ho, sebo ho li mehwi
latlola, ho jubë wenijina
ahwane tēbo hobë ato mago
hehë tletëme. Kwe ahwane
kë hehë lëgletlebë ho bu
sebona jume hana esogo
nëglelëyome nëgеме, sebo
bume këme fene lëkle totla.”

⁵⁰ Kwe Jisas gali tlole,
“Sobo këha home asa lëkle
etlo. Ho some wame hana
loglëyona, bu sobobë yabe.”

*Samaria provinsbë li lifeku
mago enëne, Jisas bu belë
ligisime tole hana mëtletla*

⁵¹ Goto, Jisame heven
lifekuwa kë no lëglelebë olë
nounou lalële. Këme nëgеме,
Jisas lowene fa sle totle,
Jerusalem lifatewa
nalugujume. Na bu tuju.

⁵² Na bu fli home jine
tlëme, mogoutaya
namëglame. Na bu
motoutaya na Samaria
provinsbë, lifeku tokwëfo elë
mëtëkakluja, Jisasbë wesibi
sle namogotometlame.

⁵³ Kwe kë life mago oneho,
Jisas bu belë ligisime tole
hana mëtletla, Jisas bu
Jerusalem lifatewa tugujume
nëgеме. Bu melowene
lamëtla, “Bu sebona lotume
tole hana lëletëna^{awa} na bu
Jerusalem lifatebë tako lotu
lowa këme luju.”

⁵⁴ Na bubë lowene esogo
mëtletelëtelobë ho, Jems na Jon,
kë lifekubë onehobë lowene

hwi motlometemo na
Jisame takune motlolo,
“Tako Ho, ju metole lalene,
sebo Gotome takune
nanoglolome, kë onehome
heven life mago, ahoju tuku
nalëtëkakëtëmeme, temu
namëgebëyame?”

⁵⁵ Kwe Jisas swaya
tëkakëtëme na këkale tlome.

⁵⁶ Na bu li lifekuwa
mutuja.

*Jisame esogome tole mëglabë
enëne*

⁵⁷ Jisasna bubë lowene
esogo mëglelëtlabë hona,
alëge elë mutuja na ho li
Jisame gali tlole, “Iniwa
lifeku ju egujuna kwe bo
jume nagi nëglagwime.”

⁵⁸ Kwe Jisas bume gali
tlole, “Mëgali bu ni mëgebebë
fuluju nane na fole mata ni
tiji nane. Kwe, bo, Gotobë
life mago ho kë nëgebë, bo
kwe ni nëgebëbë lo hanane.”

⁵⁹ Na kwe Jisas li home gali
tlole, “Ju bome nagi enënë.”
Kwe kë ho gali tlole, “O tako
ho, bo bobë ayame matëmatë
mëta afina lalowa gwa
nugujetlëmene na mana
jume nagi nëlëme?”

⁶⁰ Na Jisas bume gali tlole,
“Gigli mëglabë ho, buwa, gigli
mëgebëya home lalowa
matëmatë motoma. Kwe
juwe, Goto onehobë eso
home tafa lëgletëmebë gali të
etagutëme.”

⁶¹ Na li ho Jisame gali
tlole, “Tako ho, bo jume nagi
nëglëme, kwe bobë weife
mago enëneme kaiyo afina
lalowa nugujelëmene?”

62 Na Jisas gali tlole, “Ho bu ihena yegu lëglena kwe bu miti nagi itaita hwi lokoukëfena kwe bu ihe yegu sle hana lëglelëme. Na kë fenene, ho bome nagi lëglënëna kwe bu wesibina honame kë hune tëglebëme lowene lëglekefëtëmena, kwe këha ho bu Goto onehobë eso home tafa lëgletëmebë wege hana fa logotleme.”

10

Jisas bu 72 home jine

tëbelëkakëme

1 Tokwafe, Tako Ho Jisas, bu 72 home mata aniji tlome. Na bu tlemalë tlemalëme jine tëbelëkakëme, bume mogoutatla namëglame. Iniwa lifate na iniwa lifeku bu kë belëme lugujume kë tole lëglebë, bu kë enëneme kë iniwa lifate na lifeku elëme jine tëbelëkakëme.

2 Na bume wafle gali tlome, “Feilawa hi wesibi bu nuju mago wanigliji mëbe, kwe lebutako wege ho hana mëtabëya, kë hi wesibi fa namogotlame. Këme nëgeme sobo nuju bolijaya, Gotome, sagali elolo, bu wege home jine nalëglëmeme, bubë nuju mago hi wesibi fa namëgëtatlame.”

3 Na bume gali tlome, “Sobo eyeumo. Aholokwane elo. Bo some kë jine nëglëyobëye, sobo sipsip kleli nëbale, wame tabo amalebë ku mëta fene mëtabe.

4 Sobo baliti musu o wesibi sisike musu o juba jibo asa ehujjo. Na some alëgeme kë esune mëglëyobë onehome,

tafana asa gëgali eelëmo. Weye. Sobo hokweinawa saeyeu.

5 Na sobo lowa ekaklujona, sobo kë lo mago onehome afina megali eglomome, ‘Sobo ebë lo mëta kë tafa egløbë lowenena sle elo.’

6 Na tu taba ka ho, kë lo mëta tafa lëglena, kwe sobobë lowene sle gali bu mëta malëbetle. Kwe këha ho, kë lo mëta tafa hana lëglena kwe sobobë lowene sle gali sobelë lukwaiji lëkeketëyome.

7 Sobo kë lo mëta fwa sani ni ebekefo. Li lo li lo asa elo. Na iniwa hi wesibi some kë lo mago kë mëglëkefëyobë sahi hi elo. Bo ebë galime fëyeme gali nelëne? Ho wege lëglekëfena, kwe bubë wege wesibi lalowa glo lëgleme. Na kë fenene, ho bu Gotobë wege, wege lëgletlana, kwe bubë wesibi glo lëgleme.

8 Sobo li lifatewa tuhu egelona na ho some bubë lowa no lëglëyona, kë hi wesibi some kë mëglëyobë, sahi elo.

9 Sobo kë life mago ato elili onehome sasle etomo. Na sobo gali metë saetatemo, ‘Goto bu sobobë eso home natafa lëgletëyobë olë nounou lalëletëyo.’

10 Na sobo li lifatewa tuhu egelona na kë life mago oneho some nëno hana mëglana, kwe sobo kë lifatebë alëge mëta elibome na megali elëmome,

11 ‘Sobobë lifate flëke sebobë jubame kë lesili mëglebë sebo sosa nanotoma. Some melebotaneme nëgeme, ebë

wesibi sobo kē egelobē wafi tēbo elito. Kwe sobo lowene sle elo, Goto bu sobobē eso home natafa lēgletēyobē olē nounou lalēletēyo, kwe sobo kē olē tole hana eletelo.’

¹² Bo some gali nolēyo, Goto, iniwa onehobē gali aholokwane loglomebē olē na onehome fufu logotomebē olē fata lēglena, kwe bu ebē lifatebē onehome tako tēbo logotomeme kwe bu Sodom lifatebē onehome sogē tēbowa logotomeme.”

Jisas, bume lowene sle jwa enēneme, maninibo tletēme

¹³ Na Jisas ita gali tlome, “Sobo Korasin lifate mago oneho na sobo Betsaida lifate mago oneho, masiwafe, tokwafe tēbo wesibi somēta fata mēgletēyome. Ēbame, bo sobobē ku mēta Gotobē afutukuna, klelegowa wesibi blēge blēge tētātēyo, kwe sobobē tēbo lowene aholokwana ti hana elo. Ētani, bo Tair na Saidonbē onehome kēha klelegowa wesibi hana blēge blēge tētatemē. Kwe bo Tair na Saidonbē onehome, kēha klelegowa wesibi blēge blēge nēgētatemēbē, kwe bu ētani anebo bubē tēbo lowene aholokwana wati mēglame fene na lale lowenewa esogo mēglelēlame fene. Na bu tēbo ēho wafi gēgelo motomame fene na atikafa wafi ju mēglame fene, bu melēme lēlekuju mētla, bubē tēbo lowene wahune mētla.

¹⁴ Goto, iniwa onehobē gali kē aholokwane loglomebē

olē na onehome kē fufu logotomebē olē fata lēglena, bu some tako tēbo lēgētome kwe bu Tair na Saidon life mago onehome sogē tēbowa logotomeme. Sobo kē klelegowa wesibi hwi toglomome nēgeme kwe sobobē tēbo lowene aholokwana hana ti elo.

¹⁵ Na sobo Kaperneam life mago oneho, sobo melowene lalone, ‘Sebo lale enēnemu nēgeme na Goto seme heven life elē nēno lēgleme.’ Weye. Hanane mu. Goto some tēbo lēgētome na hel lifewa sike lētēkakeme.”

¹⁶ Na Jisas bubē lowene esogo mēglelētlabē home gali tlome, “Oneho sobobē gali aholokwane sle lameletēyo bu mata bobē gali aholokwane sle mēgletēname. Na oneho some hehē lameletēyo bu bome mata hehē mēgletēname. Na oneho bome hehē lamēletēna, bu bome kē jine tēglēnēbē ho, Gotome mata hehē lamletla.”

Jisas kē jine tēglēmēbē 72 ho, ita loko mētēkakija

¹⁷ Tokwafe, Jisas kē jine tēglēmēbē 72 ho, fleflesuna loko mētēkakija. Na bu gali mētla, “O, tako ho, sebo jubē weniji fē tētona, na ahwane bu sebobē gali aholokwane mētla na lamētlēbouwa.”

¹⁸ Na Jisas gali tlome, “Sobo melē tugulona, bo kwe, mehwi latelē, Satan heven lifate mago latitigowa, wawaine fene tle.

¹⁹ Aholokwane elo! Bo some afutuku wafi tlēyo. Na sobo sebobē wame ho,

Satanbë afutuku boblo etatelome. Na sobo wame tabo taiju na mlawalé matawa lalowa asë egolome na iniwa wesibi bu some hana tëbo mëgètome.

²⁰ Kwe ahwane, bu sobobë gali kë aholokwane mëgletëyobëme na kë mëtlëboubëme, asa fleflesu elo. Weye. Goto sobobë weniji bubë bogo mëta kë yahi tëgletëyobëme fwa fleflesu egelome.”

Jisas bu fleflesu latle na bubë bolijaya, Gotome gëgali tlelële

²¹ Kë nalëwa, Gotobë Amtëtomba, Jisasbë lowenebë fleflesu tëtatlë. Na Jisas gali tle, “Aya, ju heven lifate magobë na ebë life magobë Tako Ho. Yaha fëyemene? Bo jume fleflesu nanëletë. Oneho bume fwa melowene lamëtla, ‘Sebo iniwa wesibi lowene sle nëletëma,’ kwe ju jubë afutuku bume ëho tëtatëme. Kwe oneho bume fwa melowene lamëtla, ‘Sebo nëbale tokwetokwëha, sebobë lowene afluja lalëletëna, sebo iniwa wesibi lowene hana nëletëma,’ kwe ju jubë afutuku bume waolafa tëtatëme. O aya, ju jubë tolewa esogo elelële na ju melë eleme.”

²² Na Jisas bu ita gali tle, “Bobë aya bu iniwa afutuku na lowene bome watlënë. Iniwa ho bome bubë nëbame lowene sle hana mëletëna. Bolijaya buwa lowene lëletle. Na iniwa oneho, bolijayame lowene hana mletla. Bo bubë nëba na bo ayame lebotane

nëtatëmebë, kë oneho buwa lowene mletla.”

²³ Jisasbë lowene esogo mëglelëtlabë ho, bume fwa tafa tlelëme, na bume swaya tletëme na bume fwa gali tlome, “Sobo lebutako lale wesibi wahwi tlomo, na sobo fleflesu egelome.

²⁴ Bo some gali nolëyo, ëtani, lebutako Gotobë lowene mago gali të mototokweflabë ho na lebutako life mago eso ho bu metole lamëtla, sobo kë hwi toglomobë wesibi, hwi moglomame fene, kwe bu hana hwi motloma, na bu metole lamëtla, sobo kë aholokwane tëgelobë gali, aholokwane mëglame fene, kwe bu aholokwane hana mëtla.”

Samaria lifate mago ho, bume kë wame toglolebë home taitale

²⁵ Gotobë galime okokwe toglobebë ho Jisas belë tisi tle, bume tëbo loweneme su nalogotleme fene. Na bu takune tlole, “Tisa! Bo habelë nëgelëmene, lale tafa unaunalëme fa nanogotlëme?”

²⁶ Na Jisas bume takune tlole, “Gotobë bogo mago gali habë gali lalane? Ju habë hwi laeolëne?”

²⁷ Na Gotobë galime okokwe toglobebë ho gali tafu tëtatlë, “Sobo tako Gotome anisasana tole egletelomemu. Lowenena, afutukuna, ini tolewa egletelomemu. Na jubë ato fene tole etle, ju lime mata metole egletleme.”

28 Na Jisas bume gali tlole, “Ebë lalowa. Ju gali tafu sle latle. Ju melë eglena, na ju lale tafa fa egotleme.”

29 Kwe kë Gotobë galime okokwe toglomebë ho bu metole latletle, Jisas bume melowene nalëgletleme, “Lale lowenena hofe.” Këme nêgeme bu Jisame këme takune tlole, “Gotobë bogo mago gali, bobë fëye yabe home gali elane?”

30 Na kwe Jisas metafu têtatle, “Ëbame, ho li, Jerusalem lifate kile tle na Jeriko lifatewa tēmatule. Bu tematulebëë na wameho alêgeme êho mêtla, na bu alêgelême okli mêtelëkukiya na fa mototla na tēkle mototlabëë êjeha gli lēleme. Na bubë êho titika mêtletla na bubë iniwa wesibi mata glo mêtletla na mana bume alêge mëglëbo mëta lakilewa mêtëkaka na bu mêtëlbouja.

31 Na kë olë nawa, lotu lome kë wege lëglebë ho mata kë alêge elême tēmatule. Kwe bu alêge mëglëbome kë lëgëbebë home hwi telokwakle na alêge mëglëbo elë sigli tētagule na latugujuwa.

32 Na tokwafe, Livaibë afenëbo, lotu lo mëta kë wege lëglekefëbë, bu mata kë alêge elême tēmatule na kë home hwi telokwakle, na lolime hwime tujutle na hwi tlole kwe bu mata sigli tētagule na latugujuwa.

33 Kwe Samaria lifate mago ho li,* bu mata nagi

tēmatule. Na bu kë home hwi telokwakle, na bume tako masiwamu metletle.

34 Na bu loliwa tujutle, na bu wain taba liji tu, welë tuna, bubë juba këna swa totometle na kë juba, êho kaka tabona lalei totometle. Na bume hujutle na bubë donki kleli amlebo matawa gwa towetle. Na bume oneho këme ni mêtëbekefëyabë lowa tlelule, na bume ululu sle latotle.

35 Na li olëna, bu tēle baliti kë ni lo bolijaya home tlële na gali tlole, ‘Ju ebë balitina, ebë home këna satafa elelele. Na jubë baliti, bume tafa eglelëlebëme, sike eglena, kwe tokwafe bo nigisina, bo kofaya baliti jume nêglême.’”

36 Na Jisas kë Gotobë galime okokwe toglomebë home takune tlole, “Ju habë lowene lalene? Wame ho kë tēkle mototlabë hobë yabe yalëmune?”

37 Na bu gali tle, “Ebë ho bume kë masiwa lëgletlebë na kë lëgaitalebë, ebë bubë yabemu.” Na Jisas bume gali tlole, “Ju ejume na kë ho fene laitale ju melë egleme.”

Jisas Marta nabë, Maria nabë lo mëta tafa tle

38 Jisasna bubë lowene esogo mëglelëtlabë hona Jerusalem lifatewa mutujabë na li lifekuwa fwa mutula. Na kë lifeku mago mëse, bubë weniji Marta, Jisame bubë lowa no tlële.

39 Martabë bolijamobë weniji Maria. Maria, bu

* **10:33** Israelbë afenëboni bu Samaria life mago enëneme yonane hana mêtlelogwaya.

Jisasbë elebo lime tafa tletle na bubë gali mana aholokwane tlokwefle.

⁴⁰ Kwe Marta bubë hi wesibi kësle totomebë wegeme tutune tlekëfe na Mariame tëbo lowene fa têtatë. Na bu kême Jisas belë tuju na gali tlole, “O tako ho, bobë keinëba bome wakile etanë iniwa wege bowa no tlë. Ju kême lowene jwa fëyeme elene? Ju bume gali eolë! Bome egaitanë naegleme.”

⁴¹ Kwe Jisas bume gali tolë, “O, Marta, Marta. Ju feilawa wesibime fëyeme tutune elene?”

⁴² Maria bu bona kë tafa nëgelobë na kë gëgali nëgelobë wesibi, ebë lale wesibimufe. Kême nëgeme sebo ebë lale wesibime bume hana lëkle nëgetayame. Ju ebë wesibime fwa lowene egletleme.”

11

Jisas, Gotome gëgali mëglëlëla lowenebëme okokwe tlome

¹ Li olëna, Jisas Gotome gëgali tlelële. Bu Gotome wagëgali tlelële na bubë lowene esogo tlelëtlebë ho li, bume megali tlole, “O tako ho, ju seme Gotome gëgali nëglëlëlabë lowenebëme okokwe enona, ëbame Jon bubë lowene esogo mëglëlëtlabë home fene okokwe tlome.”

² Na Jisas bume megali tlome, “Sobo Gotome gëgali eglëlëlona, kwe megali eglolome.

‘O, Aya, iniwa oneho bu megali samëla,

“Ju lalemu.”

Sebo metole nanëla, ju onehobë eso home tafa egletë nabëme esitëna.

³ Iniwa olë, ju seme hi wesibi kë olë niyiwa saelëkefëna.

⁴ Ju sebobë tëbo lowene aholokwana sati eletëna, fli enëne seme tëbo lowene kë mëgletë nabë lowene aholokwana fene ti nëletëma.

Ju seme su mëgëtanabë wesibi elë asa hwiwa enona.”

⁵ Na Jisas bume ita gali tlome, “So mago ho li bu yabena nëgena, na bu klabë kuna bubë yabebë lowa lujuna na gali loglolena, ‘Ju bome hi wesibi eglëne me.

⁶ Bobë yabe kakë mago walisi na bo nëglëlëbë hi wesibi hanane.’

⁷ Na bubë yabe bume lo mago megali lëgelubaklena, ‘Ju bome asa sosalë etanë. Ino watiji nelë, na bu bobë nëbale labuku mëta wani mebëya. Bo huju hana nëgelëme na jume hi wesibi hana hana nëglëme.’ Na sobo fëye lowene lalone, kë ho bu habelë lëglemene?

⁸ Bo some gali nolëyo, sobo aholokwane elo, kë ho ebë lo bolijayabë yabemu, kwe bu hana huju lële na bume hi wesibi hana lëlële. Kwe bubë yabe itaita takune lëgelulukwakleme nëgeme na hana kile lotle, na bu kême huju lëgleme na iniwa wesibi bubë yabe kë tole lëgletëmebë mana nalëglëlëme.

9 Bo some gali nolëyo, sobo Gotome wesibime takune elokweflome na bu some wesibi lëglëyome. Sobo wesibi hohwi etakefëtelome kwe sobo hwi eglolome. Sobo inome këke elekefëtelome na Goto some ino tika lëgëtatëyome.

10 Iniwa oneho Gotome wesibime takune moglokweflana, kwe bu wesibi glo mëglame. Na iniwa oneho wesibi hohwi mëtakefëtemana kwe bu hwi moglomame. Na iniwa oneho inome këke mëglekefëyana kwe Goto bume ino tika lëgëtatëmeme.

11 So mogo ho li nëbana lëtabe na kë nëba bolijayame mome takune loglolena, kwe bolijaya bume waiye lëglëlemene? Weye. Hanane mu.

12 Na bu bolijayame kame takune loglolena, kwe bolijaya bume mlawalë lëglëlemene? Weye. Hanane mu.

13 Sobo tëbo lowene itaita esogo elelekeflo kwe sobo lale wesibi sobobë nëbaleme itaita elëkefëmo. Këme nëgeme sobo melowene egelomemu, 'Sobobë aya heven life mëta kë tafa lëglebë, bu metole lalële, oneho bume kë takune moglolabë, bubë Amtëtomba, bume lëglëmeme.'

Bu megali lamëtla, "Jisas Belsebulna wege melo"

14 Jisas gali mumu tabo hobë ato mago ahwane hehë tletle. Ahwane wafi kile totle na kë ho mana gëgali tle. Na iniwa oneho hwi motlola na klelego memëtletla.

15-16 Kwe fli metole lamëtla, Jisame su namogotlame, na bume këme takune motlola, "Jisas ju klelegowa wesibi li lebotane etatëna. Sebo jume melowene nanëgletëyome, 'Gotobë afutuku ju mëta lëbetëfe.'" Na fli ho blalo megali mëtla, "Bu, tëbo alibahobë eso ho, Belsebulbë, afutukuna ahwane këna hehë lëlekefëteme." (Belsebulbë li weniji Satan).

17 Kwe Jisas bubë lowene wahwi tlotëme na bume wafle galina gali tlome, "Li lifate mago enëne, bu bwa bwa lowene mëta tafa mëglana na momogli mëgëtayana kwe bu blalo tafa sle hana mëglame. Na weife mago enëne blalo momogli mëgëtayana kwe bu iniwa tëbo miglitayame.

18 Na Satanbë ilawa mago alibaho, bu bwa bwa lowene mëta tafa mëglana na momogli mëgëtayana kwe bu afutuku mëglamene? Weye. Bu tëbo miglitayame. Bo walowene nelë, sobo bome melowene laletëna, 'Bu ahwaneme Belsebulbë afutukuna hehë lëletëme.'

19 Kwe ebë nëgali nëgebë, Belsebul bome lalaitanë na bo ahwane tëbo kë hehë nëgletemëbë, kwe sobobë lowene esogo mëglelëlabë home ya laitamene, ahwane kë hehë mëgletëmabë? Belsebul bu laitamene? Sobobë weife mago enëne bu some melebotane mëtatëyome, sobobë lowene tëbo.

20 Kwe bo ahwane Gotobë

afutukuna hehë nëgletemëna kwe sobo këme lowene elome, Goto bu sobobë eso home watafa lëletëyo.

²¹ Afutuku tabo ho bu wame home boblo wesibi glo lëglëna na bubë lo mëta këna mana sei sle lëglëlena kwe bubë iniwa wesibi mëgëbetle sle mëgleme.

²² Kwe li tako afutuku tabo ho, bu kë tokwëfo afutuku home wameme ligisi tlena na bume wame loglolëna na bume boblo logotlëna kwe bu kë hobë wame home boblo wesibi bume kë afutuku mëglelëlebë wesibi glo lëgletleme. Na bu kë hobë iniwa wesibi ho flime sa lëtagutëmeme.

²³ Oneho bome yabe hana mëglënnana, bu bome wame moglonabë enëne. Na ho bome onehome loloko nëgëtëbëme hana mëgaitanana kwe bu onehome lëlakwanëna sisile lamotoma.”

Ahwane tēbo ita tisi tle

²⁴ Jisas gali tle, “Ahwane tēbo home kile logotlëna, kwe kë ahwane, lagu lifëwa tuju, tafa labume hohwi nalugutame, haha tafu logotlëbëme. Kwe haha tafu life hwi hana loglolëna kwe bu këme gali lële, ‘Bo ëbame kë tafa tēgelëbë lowa ita nuguwime.’

²⁵ Na ita lujü na lo mehwi lolole, bu wasle motlafa.

²⁶ Këme nëgëme, bu lujü na tobali ita tēle yaife tabo ahwane nëno lule. Na bu mëkaklujü na këme tafa mla. Èbame kwe kë ho bu sogë

tëbowa tëtabe kwe tokwafe bu tēbomu lëtabe.”

Fëye enëne fleflesu mëglamene

²⁷ Jisas lebutako onehome gali tē tëtätëme na mëse li, kë onehobë mago bume anisasana gali tlole, “Jume kë fu tēgetabë mëse na maba kë hi tēgletëbë mëse, bu fleflesu matle.”

²⁸ Kwe Jisas gali tle, “Weye. Oneho bu Gotobë gali aholokwane mëglabë na esogo mëglelëlabë bu kwe fleflesu mëglame.”

Fli oneho Jisame gali motlola, “Ju seme klelegowa wesibi li lebotane etatëna”

²⁹ Lebutako oneho bu Jisame loko motokweitlabë, na bume gali tlome, “Oneho kë nalë kë mëtëtabëyabë bu tēbo oneho mu. Bu bome takune motlona, ‘Ju Gotobë afutukuna, klelegowa wesibi li lebotane etatëna, sebo melowene nanëglame, “Ju Gotobë wege fa etatle.”’ Kwe bu klelegowa wesibi li hana hwi moglolame. Bu jowa wesibiwa hwi moglolame. Wesibi Joname kë fata tēgletlëbë wesibiwa hwi moglolame.

³⁰ Ètani, Jona bu mo imo mëta aona olë tafa tle na mana mo imo mago hujü tle na Ninive lifate mago onehome gali mana tē tutätëme. Na Goto, kë klelegowa wesibina, Ninive lifate mago onehome, melebotane latëtätëme, Goto Joname jine tletëme. Na Jona fenene, bo, Gotobë life mago ho, bo tokwafe, onehome

ebë nalë kë mēgētābēyabē,
klelegowa wesibi lebotane
nēgētatemēme, melowene
namēglame, 'Goto bome jine
tlēnē.'

³¹ Goto, iniwa onehobē gali
kē aholokwane loglomebē
olē na onehome kē fufu
logotomebē olēna, nēgemowe
life magobē eso mēse, bu
huju eglame, na ebë nalë kë
mēgētābēyabē onehobē tēbo
loweneme gēgali egletēmeme.
Bu bubē tēbo lowene kēme
gali egletēmeme. Ētani kē eso
mēse bu kakē lifatemu tafa
tuglebē kwe bubē life kile
totle na eso ho Solomon belē
tisi. Na bubē lalē lowene gali
gēgali tlelē na aholo bo
tētāgutle. Kwe ho li somēta kē
tafa lēglebē bubē lowene
takomu kwe Solomonbē
lowene melēha kwe sobo kē
tako lowene hobē gali
aholokwane hana elolo.

³² Goto, iniwa onehobē gali
kē aholokwane loglomebē
olē na onehome kē fufu
logotomebē olēna, Ninive
lifate mago oneho bu huju
mēglame, na ebë nalë kë
mēgētābēyabē onehobē tēbo
lowene gēgali mēgletēmame.
Bu bubē tēbo lowene kēme
gēgali mēgletēmame. Kē
Ninive lifate mago oneho, bu
Jonabē gali aholokwane
motlolame nēgeme na bubē
tēbo lowene aholokwana
kēme ti mētla. Kwe ho li
somēta kē tafa lēglebē, bubē
lowene takomu kwe Jonabē
lowene bu melēha kwe sobo
kē tako lowene hobē gali
aholokwane hana elolo na
esogo hana elelētelo."

Jubē naba bu lamo fenene

³³ Na Jisas ita gali tle,
"Oneho bu lamo fiji mētaya
na ēho hana mēgētayame o
isekuna hana lamu
mēgētayame. Weye. Bu masei
mēta gwa mētayame. Na
oneho lowa mēkaklijana,
bubē elulego hwi
namoglēyame.

³⁴ Jubē naba lamo fenene.
Jubē naba lalowa nēgena kwe
jubē lowene mago lowene
elulego lēgēbetēme na iniwa
ato mēta elulego
lēgēbetēmeme. Kwe jubē
naba tēbo nēgena, kwe jubē
lowene mago lowene kilego
lēgēbetēme.

³⁵ Sobo ululu sle kēme
egelome. Elulego ju mēta kē
lēgelubetēbē asa kilego
malēletē.

³⁶ Jubē iniwa lowene
elulegowa lelubetēna na
kilego hana lelubetēna, kwe
jubē iniwa lowenebē olēha
lelubetēme, lamo elulegoha u
eglatēme."

*Farisi ho na Gotobē galime
okokwe moglomabē ho bu
tēbo lowene esogo mētlelekefla*

³⁷ Jisas gali watē tētātēme,
na Farisi ho Jisame gali
tlole, buna hi namēgelome.
Na Jisas kē hobē lowa
tēkaklutle na tafa tle, hi
namēgelome.

³⁸ Na kē Farisi ho bu
Jisame mehwi tlole, bu
hime tafa tle kwe bu toba tu
afina swa hana totome,
Gotobē wegeho Moses fene
gali tle. Na bu klelego
metletle.

³⁹ Kwe Jisas bume gali tole, “Sobo Farisi ho, sobo kabona blete ëhou ato elë fwa swa etokefëmo jubë ato fene swa etole. Kwe waholo kë nëgelujebë bu memelë tetëbo wesibi sosolo lameluletëyo. Sobo kë wesibi hana sle etomo.

⁴⁰ Sobo yaya enëne. Ho bu matawa atowa nane blëge blëge totle. Weye. Bu matawa atona waholona mata iniwa blëge blëge totome.

⁴¹ Kwe wesibi, blete ëhou na kabo mëta kë mëgelubebë, sobo wesibi jwa enëneme elëmo, bume egaitamo naegelome. Sobo melë egelona kwe sobobë iniwa wesibi, Gotobë naba li mëta lalowamu mëgëbetëyome.

⁴² Sobo Farisi ho, sobo hai! Sobo tëbo eglitome! Sobo memelë inilu welujuwa welujuwa lalei egotokwefomome na welujuwa mëta gwa etlome na jowa leitabo Gotome elëkeflome. Kwe sobo lale lowenebë na Gotome tole eglotelobë aholokwana ti lalekefo. Sobo kë lale lowenebë esogo sle eglelëlona na fli lale lowenebë aholokwana ti jwa egelona kwe sobo lale oneho etabome.

⁴³ Sobo Farisi ho, sobo hai! Sobo tëbo eglitome! Sobo lotu lome tafa egelona, sobo metole lalo, onehobë naba li mëta, eso hobë tafa labume tafa egelome. Na sobo oneho këme kë tafa mëglabë lifeku mëta asë egelona, sobo metole lalo, oneho some

megali namëglëyome, ‘O letitabo ho. Lale kliji.’

⁴⁴ Sobo hai! Sobo tëbo eglitome! Sobo matëmatë fenene këha meëho lalo. Oneho lowene jwa, na meweniji lamla, ebë lale lifewa, na bu matëmatë matawa measë mogolame na bu Gotobë naba lime tëbowa mëgëtabëyame. Na sobo kë matëmatë fenene. Oneho bu sobobë tëbo lowene hwi hana möglëtëyome na meweniji namëglame, sobo lale enëne.”

⁴⁵ Na Gotobë galime okokwe toglomebë ho, bu Jisasbë gali aholokwane tle na bume gali tole, “Tisa, ju kë gali Farisi home gali eglomebë kwe ju seme mata gëglë lalelëna.”

⁴⁶ Na Jisas gali tle, “Sobo Gotobë gali okokwe eglomobë ho. Sobo hai! Sobo tëbo eglitome! Sobo onehome lebutako tafa sle gali okokwe elokwefomo, esogo namëglelëmame, kwe sobo, kë gali esogo mëglelëmabëme, egaitamo hana elo na këbëna bume hobota gwa etatemo.

⁴⁷ Sobo hai! Sobo tëbo eglitome! Sobobë bisemlenino bu Gotobë lowene mago gali të mototokweflabë home wamena tëtëkle mëtëtakefëya. Na sobo kë hobë matëmatë negli etokwefëmetemo.

⁴⁸ Sobo matëmatë negli lakalena, onehome melebotane etatemo, sobobë bisemlenibë lakalame helawawa laletemo. Bu Gotobë lowene mago gali të

mototokweflabë home
wamena tètëkle
lamëtëtakefëya.

⁴⁹ Goto këbë hwi tlole na
bubë lale lowenena megali
tle, 'Bo bobë lowene mago
gali të motokweflabë home
na bobë gali tëme jine
mëglëmabë home jine
nëglëmëme, na bu flime
wame ijiwa moglomame na
flime mogo nalë tètëkle
mëtayame.'

⁵⁰ Ètanimu na mana ekë
lëbe bu Gotobë lowene mago
gali të mototokweflabë home
mogo nalë tètëkle
mëtëtagijayame nëgeme, na
Goto, bu ebë olëna kë
mëtabëyabë onehome këme
tëbo logotomeme.

⁵¹ Bu Gotobë lowene mago
gali të mototokweflabë home
mogo nalë tètëkle
lamëtëtagijaya. Bu ètani Abel
mëta afina oto mutula, na
flime mata mogo nalë tètëkle
lamëtëtagijaya na Sekaraia
belë mana fwa təkaki na
bume mata mogo nalë tēkle
mototla. Sekaraia bu,
Gotome, wesibi kë mëta
ahojume ahojume
melekefëtlabë masei jelë, na
Gotobë lo jelë, kë afloko mëta
tètabe na bume mana mogo
nalë tēkle motlola. Na bo
some gali nolëyo, ètanifu
oneho bu Gotobë lowene
mago gali të mototokweflabë
home mogo nalë tètëkle
mëtëtagijayame nëgeme, na
Goto bu ebë olëna kë
mëtabëyabë onehome, këme
tëbo logotomeme.

⁵² Sobo Gotobë galime
okokwe eglomobë ho. Sobo

hai! Sobo tēbo eglitome!
Sobo, Gotome kë lowene
mëgletlabë lobë inoha tei tiji
elo. Na sobowa kë ino hana
tika etlome na hana
ekaklujome, Gotobë lowene
nafa egëtatelobëme. Hanane.
Na oneho bu kë lowa
mëkaklujame fene, Gotobë
lale lowene fa namogotlame
kwe sobo lëkleha
latokwefomo."

⁵³ Na kwe Jisas kë lo mago
toho təkake. Na tokwafe
Gotobë galime okokwe
moglomabë ho na Farisi ho
bume tēbojiwamu lamëtletla
na memelë tëtakunebëme
takune motlola.

⁵⁴ Bume melëme fene
sosogëna motlola, tēbo galina
tafu lëtatëme nawa na bume
mana enisusu mletlame na
mogo nalë mana tēkle
motlame.

12

*Sobo Farisi hobë sosogëna
lowenebëme ululu sle saelo*

¹ Feilawa onehomu loko
mëtletlëya. Na bu ke mëtłame
nëgeme na fli onehome
jubame fëfe fëfëha
mëtłelogwaya. Na Jisas bubë
lowene esogo mëgletlëtlabë
home afina gali të tëtätëme,
"Sobo Farisi hobë bletë nage
sëse wesibime ululu sle
saelo. Bo kë gali nëgelëbëye,
bubë sosogëna lowenebëme
gali nelë. Bubë sosogëna
lowenebë, sobobë lowene
mëta takowa lëbetëyolime. Bo
këme gali nelë, sobo ululu sle
saelo.

² Iniwa wesibi oneho èho
kë motomabë, kwe Goto
olafa lotometëmeme na
oneho bu hwi molomame.

³ Na iniwa gali sobo hwelutuwa kë gëgali egelobë, kwe tokwafe ho li kë gali lifeku mëta onehobë aholo li mëta të logotleme.”

Sobo Gotome fwa sauli eletelo

⁴ Na Jisas ita gali tlome, “O bobë yabenino, bo some gali nolëyo. Sobo home asa uli eletemo. Weye. Ho some mogo nalë tëke mëglëyome kwe bu some ita hana tëbo mëgëtome.

⁵ Bo some megali sle nëlëyo. Sobo Gotome fwa uli eglételome. Goto bu lalowa, home mogo nalë tëbo logotleme na bubë afutukuna kë home hel lifewa lalowa tuku lëgleme. Ho kwe melë hana mogotlame. Bo some gali sle nëlëyo, sobo Gotome fwa uli eglételomemu.

⁶ Fli tokwëtokwë fole, ho melowene lamla, ebë lalë wesibi nane, ebë tëboha wesibi tekwe nëge. Kwe, Goto bu kë tokwëtokwë foleme aholokwana hana ti lëletëme. Bu tafa lëlelëme na ululu sle lalotome.

⁷ Na habenuju eslehuba tabëi sobobë kë nëgebë Goto walowene sle lëletëme na iniwa wesibi mata walowene sle lëletëme. Këme nëgeme bo some gali nolëyo, iniwa wesibi some kë fata mëgletëyobë, sobo uli asa eletemo. Sobo walowene elo, tokwëtokwë fole bu tokwëfo wesibiha kwe Goto bu kë foleme mana tafa lëlelëme na ululu sle lalotome. Kwe sobowe, sobo tako wesibi na Goto bu some tako tolemu

lalëletëyo na itaita metafala lëglelëkefëyome.”

Sobo megali egelobëme asa able elo, “Sebo Jisasme lowene sle nëgletlabë oneho”

⁸ Na Jisas ita gali tle, “Bo some gali nolëyo, ho bu onehome megali loglomena, ‘Bo Jisasme lowene sle nëgletelëbë ho.’ Kwe bo, Gotobë life mago ho, bo Gotobë enselbë li mëta megali noglomëme, ‘Bu bome lowene sle lëgletenëbë ho.’

⁹ Na ho bu onehobë naba li mëta bome lowene lëgletenëbëme able lëglëna, kwe tokwafe bo Gotobë enselbë li mëta kë home kofaya able nëgletelëme.

¹⁰ Ho bu bome, Gotobë life mago home tëbo gali loglonëna kwe Goto bubë kë tëbo lowene aholokwana ti lëgletleme. Kwe ho bu Gotobë Amtëtombame klëë gali loglolëna, kwe Goto bubë tëbo lowene aholokwana hana ti lëgletlememu.

¹¹ Bu some lotu lowa sobobë tëbo lowene gëgalime mëglelujona. O gavman ho o tatako letitabo ho belë sobobë tëbo lowene gëgalime mëglelujona, kwe sobo këme metutune asa elo, ‘Sebo bubë gali habë tafu nëtatëmamene? Sebo habë gali nëglamene?’ Weye.

¹² Kë olëna, Gotobë Amtëtomba, sobo bume këna tafu egëtatëmobë gali lebotane lëgëtatëyome.”

Baliti musuna hobë waflë gali

¹³ Na ho li, kë feilawa onehona mëtëtabëya na bu Jisasme gali tlole, “Tisa, bobë

aya wagli lële na bo metole nanelë, ju afame gali elole, iniwa wesibi aya kë hune lëglebë, fulelë lëleme na fli bome lëlënëme.”

¹⁴ Kwe Jisas bume gali tole, “Ju bome kë galime fëyeme gali enonëne? Ho bome gali aholokwane moglomabë home hana aniji motlona, na bo kë wesibi some hana sa nëgëtatëyome. Weye. Hanane.”

¹⁵ Na bu onehome megali tlome, “Sobo ululu sle saelo, feilawa wesibi mëmaune eglëmolime. Sobo feilawa wesibina nëgebë kwe kë wesibi kwe some lale tafame hana mëgaitomemu.”

¹⁶ Na Jisas waflë galime gali tlome, “Baliti musuna hobë nuju mëta, feilawa hi wesibi mëbekefëtle.

¹⁷ Na kwe kë ho melowene tle, ‘Bobë hi wesibi loloko lo wake melefe na bo li lo hananefe, bobë fli hi wesibi këme gogwa nanëgelëme. Bo habelë nëgelëmene?’

¹⁸ Na bu gali tle, ‘Ai, ta bo melë nëgelëme. Bobë hëno tokwëtokwë hi wesibi loloko lo yaye notomeme na fli tatakoto wesibi loloko lo gigliji nelëme na bobë hi wesibi na fli wesibi kë mëta loloko nanëgëtëme.

¹⁹ Na bo bowa melowene nelëme, “Bo feilawa wesibina hofe. Bobë lale wesibi feilawa tlibutu niji mëbetenëfe. Ta bo tafawa manelë. Bo tafawa nëlekefëme na fleflesuna hi nëlekefëme.”

²⁰ Kwe Goto bume megali latlole, ‘Ju yaya homu. Ebë

klabëna ju gli egleme. Na iniwa wesibi ju kë loloko egëtabë yalë glo lëgletëmene?’”

²¹ Na Jisas gali tle, “Na wesibi kë home fenene fata tletle, ho li Gotome lowene hana lëgletlena na bubë feilawa lalale wesibi loloko loloko lëgëtana, na kë wesibina fli onehome lëgaitame jwa lëglena kwe këha lakale Gotobë naba lime sle hana lëletle.”

Sobo tutune asa elo. Goto bubë nëbaleme tafa sle lëglelëmeme

²² Na kwe Jisas bubë lowene esogo mëglelëtlabë home gali tlome, “Sobo ebë galibë lowene sle eletelo. Na sobobë tafa lale lëgëbetëyobëme tutune asa elo na megali asa elo, ‘Sebo fëye wesibi hi nëglamene? Sebo ëho hamago glo nëglamene?’

²³ Hi wesibi na ëho bu some lale tafame hana mëgaitome. Jubë lale tafa ebë tako wesibi, kwe hi wesibi ebë tokwëfo wesibi. Na jubë ato ebë tako wesibi, kwe ëho ebë tokwëfo wesibi.

²⁴ Sobo abagou foleme lowene eletemo. Bu hi wesibi hana tobalo mële na bu hi wesibi loloko hana mëta. Na bu hi wesibi loloko lo hanane. Kwe Goto bume hi wesibi lëlëkefëme. Kë fole kwe bu tokwëfo wesibiha kwe sobo oneho tako wesibimu na Goto bu some mata hi wesibi lëglëyome.

²⁵ Na ho bu ebë life mëta kë tafa lëglebë olëme tutune lëglena kwe bubë olë lalowa

kikli lëgetokwaklemene?

Weye. Hanane mu.

²⁶ Sobo ebëha tokwëfo wesibi melë hana egelona kwe sobo fli wesibime blawa fëyeme tutune elone?

²⁷ Sobo lale ti tahweji lowene eletemo. Bu habëtabo foke melene? Bu këkë hana mëgleme na bubë negli wesibi hana susu motomeme. Kwe bo some gali nolëyo, ëtani eso ho Solomon bu lale lale negli wesibi gëgelo totokwefëme. Kwe bubë negli wesibi bu kwe sogë lalowaha, kwe lale ti tahweji bu lalemu mëbe.

²⁸ Sobo lifeku mago agosaba tahwejime lowene eletemo. Lifeku mago agosaba tahweji lifekume ëje kë foke mëglebë, ho uniji wege mëglame na ahoju fiji mëtayame. Kwe Goto bu këha lifeku mago agosaba tahwejime negli sle lalotokwefëme. Këme nëgеме sobo lowene sle egletelome, Goto some mata ëhona negli lëgëtome. Sobo Gotome tokwëfo lowene slewa laletelo.

²⁹ Goto some tafa lëglelëyome. Këme nëgеме sobo hi wesibime metutune asa elo. Sebo fëye wesibi hi nëglamene o sebo fëye tu hi nëglamene?

³⁰ Gotome lowene jwa mëgletlabë oneho bu kë wesibime feilawa tutune melekefëya. Kwe iniwa wesibi sobo kë tutune egletemobë, sobobë blijaya këbëme walowene lëletëyo.

³¹ Sobo wesibime tutune asa elo. Weye. Sobo Gotome

fwa melowene eglekefëtelome, ‘Bu sebobë eso ho lëtabetënafe, na bubë tolewa esogo eglelëtelobëme lowene elome. Na kwe bu hi wesibina ëhona some mata lëglëkefëyome.’”

Sobo heven life mëta wesibi loloko egëtome

³² “Sobo bobë enëne tële. Bo some kë tafa nëglelëyobë, ho sipsip kleli fene lëilëme. Sobo uli asa elo. Sobobë blijaya bu wafi gali tle, bu sobobë eso home tafa lëgletëyome na sobo buna eso hoha onehome tafa elelëmome.

³³ Sobobë iniwa wesibi balitina hihijika elome. Na kë baliti glo elome na wesibi jwa onehome aitamome. Sobo melë egelona, kwe sobo unaunalëme tafa wesibi glo egelome, na sobo heven life mëta lale wesibi loloko egotome. Tokwafe sobo heven life mëta këha wesibi hwi eglomome. Heven life mago wesibi, flawei hana mëgleme. Na ho toklime glo hana mëglame, na lahwë hana sisile mogotomeme na gu hana mëglelëme.

³⁴ Sobobë wesibi fëye mëta mëbetëyowe, sobobë lowene mata kë mëta lugubetëyome.”

Lale wege enëne bu sagli melëlamе na walena satafa mla

³⁵ “Sobo iniwa wesibi sagli elëlome na walena satafa elo. Sobo ëho gëgelo etomome na lamo fifiji etomome na këna tafa elome.

³⁶ Sobo këha metafa egelome, ho bubë eso home,

bubë tako salë mago
ligisibëme fene hwi mletla.
Bubë eso ho bu ino mëta këke
lëglena kwe bu hokweinawa
tika mëtatlame.

³⁷ Na bu ligisina na mehwi
lëglena, bubë wege ho bu ni
hana mëgebëyana, kwe kë
wege ho bu fleflesu matla.
Bo some nëgali gali nanolëyo,
kë eso ho bu wege ëho gëgelo
lotomeme, na bubë wege
home gali lolomeme, 'Masei
mëta tafa elome.' Na buwa hi
wesibi bume lëlememe.

³⁸ Na bu klabë kuna o fole
olëna ligisina na mehwi
lëglena, bubë wege ho bu ni
hana mëgebëyana, kwe kë
wege ho bu fleflesu matla.

³⁹ Sobo ebë wesibi lowene
sle eletemome. Ho bu tokli
ho ligisibë olë lowene
lëgletlena, kwe bu kë tokli
home lëkle logotleme na bu
lowa hana lëkaklume.

⁴⁰ Sobo mata sagli elëlo
na mana walena satafa elo.
Bo këna nigisibë olë sobo
lowene hana eletelo. Sobo
melowene jwa elome, 'Bu
ebë olëna hana ligisime, kwe
bo, Gotobë life mago ho, kë
olëna mana nigisime.'"

*Ebë lale wege hobë na tëbo
wege hobë waflë gali*

⁴¹ Pita Jisame metakune
tlole, "Tako Ho, ebë waflë
gali ju seme fwa gali
enonane o iniwa
onehoname gali elome?"

⁴² Na bu gali tafu tëtatlë,
"Bo iniwa lale wege kë fa
mogotlabë na lale lowenena
kë mëtabëyabë wege home
gali nëlëyo. Eso ho bu këha
lale wege home meaniji

logloleme, bubë fli wege
home tafa nalëglëlememe na
hi wesibi bume nalëglëmememe,
eso ho kë gali toglolebë olë
mëta.

⁴³ Eso ho ligisina na bubë
wege home mehwi loglolenä,
bubë lale wege mana fa
lotokwefëtlefe. Kwe kë wege
ho bu fleflesu malële.

⁴⁴ Bo some nëgali nanëlëyo.
Eso ho bu këha lale wege
home meaniji lëglëyome,
bubë iniwa wesibi tafa
nalëglëletleme.

⁴⁵ Kwe kë wege ho bu
melowene lëglena, 'Bobë eso
ho hokweinawa hana
ligisimefe,' na bu fli wege
onehome tëtëke lëglena, na
bu feilawa hi wesibi na
biaha wesibi hi lëglena,

⁴⁶ na kwe bubë eso ho
ligisibë olë lowene sle jwa
lëletleme na bu lili sloslowa
lëleme na bubë eso ho mana
lisime. Na bu kë wege home
latëbowamu logotleme, na
Gotome lowene sle jwa kë
mëgletlabë enëne belë jine
lëlkakleme.

⁴⁷ Wege ho bu bubë eso
hobë tole lowene lëgletlena
kwe bu sagli hana lëgletlena
na bubë eso hobë tole hana
esogo lëgletlëtlëna kwe bubë
eso ho bume anisasanamu
feilawamu lola
lëgëbetëfaleme.

⁴⁸ Kwe wegeho bubë eso
hobë kë tole lëgletlebë
lowene, lowene sle hana
lëgletlena na bu wege sle jwa
lëleme kwe bubë eso ho
bume tokwëfo tëklewa
loglotleme. Goto onehome
feilawa lowene lëglëmena
kwe tokwafe bume takune

loglomeme, ‘Bo some kë tēglēyobē lowenena, feilawa wege fa totlone?’”

Jisas onehome fufu nalogotomeme këme ligisime

⁴⁹ Jisas ita gali tle, “Bo kë nigisibēye, bo Gotobē wame ahojuha ebē lifekuwa tuku nanēgelēme nisi, iniwa tēbo lowene na tēbo wesibi temu namēgleme. Na bo metole nanelē, Gotobē wame bume ahojuha hokweinawa u nalēgletleme.

⁵⁰ Tokwafe feilawa elili na gli bome lamu lēgētānēme, tu mēta home fene baptais melelēma na bo tako tutune këme nelē. Bo metole nanelē, kë wesibi bome kë fata lēgletenēbē bu hokweinawa tli nalēkaketēnēme.

⁵¹ Sobo bome melowene laletēnane, ‘Bo ebē lifeku mago wame sleme tisine?’ Weye. Hanane mu. Bo kë tigusibē, onehome fu nanogotomēme tisi. Oheho bu bobē gali aholokwane mēglana na fu fu mlame. Fli bobē gali lowene sle mletlabē na fli bobē gali lowene sle hana mletlabē.

⁵² Ebē olēna na tokwafe, tobalimalē ilawa mago ho jowa lo mēta kë tafa mēglabē, bu bobē lowene esogo mēglelēlabēme momata mēlame na fu fu melelogwayame. Na aomalē bu tlemalēme wame moglomame na tlemalē bu aomalēme wame moglomome.

⁵³ Bu bobē lowene esogo mēglelēlabēme momata melelogwayame na fufu

melelogwayame. Na bolijayani bowenenime wame moglomame na boweneni bolijayanime wame moglomame. Na botamenino bokoninome wame moglomame na bokonino botameninome wame moglomame. Na bolujawani bu boweneninobē noninome wame moglomame na boweneninobē nonino bolujawanime wame moglomame.”

Oheho bu wesibi kë fata mēglebē esobēme lowene hana mla

⁵⁴ Na Jisas bu kë feilawa onehome na gali tlome, “Sobo matafa kë tēbo lētatlebē hwi elolome na megali lalekefo, ‘Tu lēgetomefe.’ Na tu leto.

⁵⁵ Na sobo kliji naba mehwi egowelēkaklona, yemeha fata eola kwe megali lalekefo, ‘Eli tako kliji lēgemolemefe.’ Na kliji bu tako lēgemolelēle.

⁵⁶ Sobo sosogēna enēne. Sobo klijina matafana hwi elomo na sobo melowene eletemome, ‘Wesibi tokwafe fata mēglemefe.’ Sobo këha wesibi kwe walowene eletemo kwe ēje kë fata mēglebē wesibibē waiyo sobo hwi sle jwa fēyeme elēmone?”

Onehobē gali aholokwane loglomebē ho belē, kë lēgloulibē hona lowene sle etlome

⁵⁷ Jisas bume ita gali tlome, “Sobo lale lowene kë egelobē loweneme lowene sle jwa fēyeme eletelone?”

58 Ho li, bu jume onehobë gali aholokwane loglomebë ho belë lëgloulina na sobo alëgeme mana asë elome kwe ju kē hobë lowene alëgeme yafe sle etatleme. Ju sle hana etatlena kwe bu jume onehobë gali aholokwane loglomebë ho belë lëgloulime na bu jume plismanë belë lëgloulime na bu jume kalabusu lowa tuku lëleme.

59 Bo jume gali sle nolë, jume kēniji kē aniji moglotëyobë balitina sle hana egotlena, kwe ju kalabusu lo mēta mana tafa egleme.

13

Ho bubë tēbo lowene aholokwana ti hana lëglena kwe bu tēbo liglitame

1 Jisas gali wafi tē tētātēme na fli enēne bu belë mitisiya na megali motlola, “Galili provins mago ho bu Gotome kleli afabo ahøjume mētletla. Na eso ho Pailat bubë wame home boblo mogotomabë enēneme jine tlēme, kē enēneme mogo nalë tētēkle namëgētayame. Bu Gotome kleli afabo mana ahøjume mētlekefētlabëë, na bume mogo nalë tētēkle mētētaya.”

2 Na Jisas bume gali tlome, “Sobo melowene lalone, ‘Kē Galili provins mago enēnebë tēbo lowene bu takomu lēbetēme na kwe fli Galili provins mago enēnebë tēbo lowene bu kwe tokwëfoha lēbetēme na kē tēbo wesibi bume kēme fata lēletēme?’ Sobo ebë loweneme melowene lalone, hee?

3 Weye. Kē melë hanane mu. Bo some gali sle nëlëyo, sobo tēbo lowene aholokwana ti hana egelona, kwe kē enēneme fene tēbo mototoma, kēha wesibi some fata lëgletëyome.

4 Na sobo ita lowene elo, ëtani, Siloam lifeku magobë akolalo bu mogo nalë 18 home tētafu tle. Na sobo melowene lalone? ‘Kē enēnebë tēbo lowene takomu lēbetēme na kwe fli Jerusalem lifate enēnebë tēbo lowene bu kwe tokwëfoha lēbetēme na kē tēbo wesibi bume kēme fata lēletēme.’ Sobo melowene lalone?

5 Weye. Kē melë hanane mu. Bo some gali sle nëlëyo, sobo tēbo lowene aholokwana ti hana egelona, kwe kē enēneme fene tēbo mototoma, kēha wesibi some fata lëgletëyome.”

Ebë ti liji, logowalë jwabë wafle gali

6 Na Jisas wafle gali metë tētātēme. “Ho bu niji olo bubë wain taba liji nuju mēta lë lotle. Na kē niji bu sigli lële. Na kē ho itaita lisi, niji hwi naloglokweleme. Kwe niji logowalë hana lële.

7 Kēme nēgeme bubë nuju tafa lëglelëtlebë home gali lolole, ‘Ju aholo bo eta. Aona tlibutu kē mutujubë bo ebë niji yafe hwi tlokwakikeflë, kwe bu logowalë hana lële. Te ebë niji mana tēka etokwakle. Ebë flëkebë ëflëbo yawe loglotlelime.’

8 Kwe bubë nuju kē tafa lëglelëtlebë home gali lolole, ‘Eso ho. Awi. Ebë tlibutuna kwe malilibe. Bo waiyo

mago flêke yefi nëletelême na ahoju somalêfa u nëletelême.

⁹ Bo melê nogotlêna kwe bo melowene nanelê, Li tlibutuna kwe logowalême. Kê tlibutuna logowalê jwa lëglena na kwe lalowa têka nogotlême.”

Tafawa olêna, Jisas mëseme sle têtamê

¹⁰ Tafawa olêna, Jisas onehome bubê lotu lo mëta gali okokwe tlome.

¹¹ Na ahwane kê têbo têtamêbê mëse kême telutabe. Na kê ahwane bume ¹⁸ tlibutu kêniji têbo têtakefême nêgeme na kê mësebê amlebo nemoha busu kême tlatê na lale tiglibe hana tle.

¹² Na Jisas bume hwi telokwakê na gali telokwakê bu belê egisi tle naegleme. Na bu tisi tlee na gali tolê, “Bo jubê têbo wasle nêtatê.”

¹³ Na toba bubê ato mëta gwa totatê na bu tlibe sle tle, na Gotome fleflesu tletle na bibita totle.

¹⁴ Kwe lotu lo hwi loglokweflebê eso ho bu Jisame kême wame tole, bu tafawa olêna, kê mëseme sle têtamême nêgeme. Kême nêgeme bu onehome gali tlome, “Tobali ita jowa olê ebê wege olê lêbe. Sobo metole lalo, ho sobobê ato sle lêtatêyome kwe sobo kê wege olêna egisijome. Kwe sobo tafawa olêna home ato sleme asa takune elolo. Matêbe.”

¹⁵ Na kwe Jisas bubê gali tafu têtatle, “Sobo sosogêna enêne. Sobobê gëgali na

sobobê lowene bwa bwa mëbetêyo. Sobo megali elo, ‘Tafawa olêna asa wege elo.’ Kwe sobo tafawa olêna, bulmakau kleli lowa kaiselo eyeukefo, na sobobê bulmakau kleli na donki kleli tu hime kaiselo elelukwefêmo.

¹⁶ Sobo tafawa olêna, bulmakau kleli itaita kaiselo aitakefêmo kwe sobo bome fêyeme gali enonane, tafawa olêna kê mëseme asa sle eta? Sobo hwi elo, ebê mëse kê nêgebêye, Abrahambê afenêbo. Na Satan bume kê yage têtetabê ¹⁸ tlibutu kêniji yage tle. Kême nêgeme bo kê têbo, tafawa olêna lalowa sle nêtatême.”

¹⁷ Na bume kê wame motlolabê ho, kê gali aholokwane motlola na tiniji na hwê memêtletla. Kwe iniwa oneho bu iniwa wesibi melê kê totomebême fleflesu mêtletla.

Goto bu tokwafe eso home tafa lëgletêmebê waflê gali

¹⁸ Na Jisas ita gali tlome, “Goto onehobê eso home kê tafa lëgletêmebê, ebê fêyeha wesibine? Bo some ebê wesibime waflê gali nolêyo.

¹⁹ Goto bu onehobê eso home kê tafa lëgletêmebê, bu atowai liji fenene. Atowai liji bu tokwêtokwê mu. Kwe ho bu kê tokwêtokwê atowai liji flêke mëta sike lêle. Na bu hulu mële na tatakotiwa milibe na iniwa fole bubê tikefo mëta, lo gigliji məkaki.”

*

* **13:19** Goto bu onehobê eso home kê tafa lëgletêmebê, bu kê atowai liji fenene. Ebê olêna Goto bu tèlewa onehobê eso home tafa lëletême, kwe tokwafe bu feilawa onehobê eso home tafa lëgletême.

Bletë nage këna sêse mëglebë wesibibë wafle gali

20-21 Na Jisas ita gali tlome, “Goto bu onehobë eso home kë tafa lëgletëmebë ebë fëyeha wesibine? Bo some ebë wesibime wafle gali nolëyo. Goto bu onehobë eso home kë tafa lëgletëmebë bu bletë nage këna sêse mëglebë wesibi fenene. Mëse, bletë nage këna sêse mëglebë wesibi tëlewa glo ele na lebutako bletë nage obo mëta u etëkake na këna afulu ele. Na bu iniwa flële lëbebokwake na kë bletë nage iniwa feilawa sêse mele.”†

Sobo tokwëfo ino elëme ekaklujome

22 Jisas Jerusalem lifate alëge elë tuju. Na bu li life li life onehome okokwe tlagume.

23 Na ho li bume takune tlole, “Tako ho, tokwafe Goto jowa jowa onehome nëno lëglemene o feilawa onehome nëno lëgleme?” Na Jisas gali tlome,

24 “Sobo ino tokwëfo elëme ekaklujome saafutuku elo. Bo some gali nolëyo, feilawa oneho bu heven lifewa mëkaklujame fene, kwe hanane.

25 Tokwafe, lo bolijaya ho, bu huju lëleme na ino tiji lëleme. Na sobo kë ino ëfo li mëta elibome na ino mëta këke eletelome na mewe elome, ‘Tako ho, ino seme tika etatëna.’ Kwe bu some metafu lëtatëyome, ‘Bo some

lowene hana nëletëyo, sobo hamagobë enënëne?’

26 Na sobo bume megali eglolome, ‘Sebo juna hi tlekefëya na ju sebobë lifeku mëta seme okokwe latlona.’

27 Kwe bu some megali loglëyome, ‘Bo some lowene hana nëletëyomu, sobo hamagobëne? Sobo tëbo lowene esogo eglelëlobë enëne. Sobo hai! Sobo bo mago eyeu.’

28 Bu some hehë mëgletëyome na sobo Abraham Aisak Jekopna iniwa Gotobë lowene mago gali të mototokweflabë home mehwi elokwakëmome, bu Goto onehobë eso home kë tafa lëgletëmebë lifate mëta mëtabëya. Kwe sobowa mëglëbo elë egëtabome. Na sobo tako ye eglekefome na enino këkë etokwefomome.

29 Na iniwa life mago oneho, Goto onehobë eso home kë tafa lëgletëmebë lifewa migisiyame. Bu nogowelë mago na notowelë mago na nëgetujuwelë mago na nëgemowelë mago migisiyame. Na bu kë life mëta tafa mlame na hi melekefëyame.

30 Sobo aholokwane elo. Fli enëne bu ebë olëna letitabo home kë tafa mëglabë, bu tokwafe kë olëna atwati ho tafa mëglame. Na fli enëne bu ebë olëna atwati home kë tafa mëglabë bu tokwafe kë olëna letitabo ho tafa mëglame.”

† 13:20-21 Bletë nage këna sêse mëglebë wesibi, bletë nage mëta fene flële lëkake, Gotobë afutuku meflële lëbebokwaketleme na Goto bu tokwafe iniwa onehobë eso home tafa lëletëmememe.

Jisas Jerusalem lifate mago onehome maninibo tletëme

³¹ Na kë nalë, Farisi ho fli mitisitla na Jisasme gali motlola, “Eso ho Herot jume mogo nalë təkeme wahau lëletë. Ju emago li lifewa ejumo.”

³² Na Jisas bume gali tlome, “Sobo kë kulekule home megali ejuwelëlome, ‘Ebë olë na uniji olë bo ahwane, hobë ato mago awi hehë nëletemë na onehobë ato elili awi sle sle notometemëme na aona olëbëna bobë wege mana yawe noglolëme.’

³³ Kwe eli olë uniji olë kë olë bo Jerusalem lifatewa nuguwi nuguwiwa awi nelë. Melëme nëgeme, Gotobë lowene mago gali të lotokweflebë ho, li lifate meta mogo nalë hana tēkle mogotlame. Weye. Bubë ko Jerusalem lifate mëta fwa lugujutleme.

³⁴ O Jerusalem lifate mago enëne. Masiwafe. Sobo Gotobë lowene mago gali të mototokweflabë home mogo nalë tētēkle etakefëyo na Goto kë jine tēglēkefēmebë home anijina mogo nalë metētēkle etakefëyo. Bo some sago nanëgētome fene, tēbo wesibi some tēbo lēgētolime, tamo kekelo bubë nēbale fene sago etome na hwaklona lamu etome. Kwe sobo tole hana elo.

³⁵ Sobo aholokwane elo. Goto some hune lēgleme na ita hana lēgaitome. Bo some megali sle nëlëyo. Sobo bome eli hana hwi egloname. Sobo afina gali egelona, ‘Gotobë

tolëna afutukuna kë ligisibë ho, Goto bume lēgaitalëme.’ Na sobo bome mana ita hwi enoname.”

14

Jisas bu ato sēse sēse tabo hobë ato sle tētatlē

¹ Tafawa olëna Jisas, Farisi hobë eso hobë lowa hime tuju. Bu kë lo mëta tafa tle, na buna kë hi mëtlabë enëne bume mana hwi mētēbelēkakla, eli bu habelë lēglemene? Bu tēbo lowene fa logotlemene?

² Na ato sēse sēse tabo ho Jisas belë tisi tle.

³ Na Jisas kë home hwi tlole na bu Gotobë galime okokwe moglomabë ho na Farisi honame takune tlome, “Sebobë anebo gali habelë lēgēbetëna lalēlene? Sebo tēbo atona home, tafawa olëna, lalowa sle nogotlamene o matēbe?”

⁴ Kwe bu mogweliha tafawa mētlā. Kēme nëgeme bu kë tēbo atona home no tlēle na sle totle na jine tlēle.

⁵ Na bume gali tlome, “Sobobë nēba o bulmakau kleli tafawa olëna yefi fulujuwa mētētigotēyona kwe sobo tafawa egelomene? Weye, sobo glo egotolome.”

⁶ Kwe bu kë gali tafu hana mētētatlā.

Jisas gali tle, “Ju atwati hoha etabe”

⁷ Na Jisas hime kë mitisiyabë enēnebēme hwi tlagume. Fliye eso enēnebē tafa labume tafa motokouja. Kēme nëgeme bu waflē gali

këme të têtatëme. Bu megali latle,

⁸ “Ho bu mëse sei lëglebë olëbëme, fleflesu hi wesibi hime gali lëglena na ju kë hi wesibi hime egujutlena kwe ju eso hobë tafa labume asa tafa eoule. Ju melë eglena na bu kë tafa labu li eso home wafi aniji loglotlena,

⁹ kwe jume kë hi wesibi hime kë gali loglëbë ho bu jume gali loglëme, ‘Ju ebë tafa labu ebë eso home kile eletle.’ Na ju tako tiniyi egleme na ju atwati hobë tafa labume tafa eoule.

¹⁰ Ho bu jume hi wesibi hime gali loglëna na ju kë hi wesibi hime egujuna kwe ju atwati hobë tafa labume tafa eouleme. Ju melë eglena kwe jume hi wesibi hime kë gali loglëbë ho bu jume gali loglëme, ‘Yabe, ju eso hobë tafa labu mëta tafa eoule.’ Bu jume melë lëgëtana kwe juna kë hi egelobë oneho jume melowene mëgletëyome, ‘Bu lale eso hofe.’

¹¹ Ho bu megali lëglena, ‘Bo tako afutukuna eso hofe,’ kwe Goto bume megali logloleme, ‘Hanane ju atwati homu.’ Kwe ho bu megali lëglena, ‘Bo kwe, bo atwati hofe,’ kwe Goto bume megali logloleme, ‘Ju eso ho fe.’”

Jume kofayame mëglëyo jwa enënebëme sle egotomeme

¹² Jisas bume hi wesibi hime kë gali loglolebë home gali tlole, “Ju tako salë hi wesibi sagli eglëlena, kwe ju yabe enëneme na blijahanime na weife mago

enëneme, na weife life mago feilawa balitina kë nëgebë enëneme migisitëyome asa gali elome. Ju melë eglena kwe bu tokwafe jume kofaya hime gali mëglëyome.

¹³ Weye. Këha melë asa ele. Matëbe. Ju tako salë hi wesibi sagli eglëlena, kwe ju wesibi jwa enëneme na yage tabo enëneme na naba titiki tabo enëneme gali elagumeme, kë salë hi wesibi hime migisiya namëglame.

¹⁴ Këha enëne jume kofaya hi mëglelëyobëme hana gali möglëyome. Këme nëgеме ju safleflesu ele. Tokwafe, Goto bu lale enëneme matëmatë life mago huhuju logotomebë olëna, kwe bu wesibi jume kofayame lëglëme.”

Tako salë hi wesibi waflë gali

¹⁵ Na ho li, Jisas buna kë hi mëtlabë, kë gali aholokwane tle na Jisame gali tlole, “Tokwafe, Goto, onehobë eso home kë tafa lëgletëmebë life mëta kë hi mëglabë oneho, bu fleflesu mëglame.”

¹⁶ Kwe Jisas mewafle gali tle, “Ho li tako salë hi wesibi sagli lëglëleme. Na bu feilawa onehome gali tuku tëkoutëme, tokwafe migisitla namëglame.

¹⁷ Na tokwafe kë tako salë hi wesibi olë fata tle. Na bu bubë wege home jine tlële ëbame kë gali toglobebë onehome, megali nalugujelëmeme, ‘Sobo esijomo. Olë ekë fata lëleo. Salë hi wesibi iniwa wasagli lëlële.’

18 Kwe iniwa bu megali mëtla, 'Sebo hana nigisiyamo.' Ho li gali tle, 'Bo balitina nuju wahihijika telë na bo kë nuju hwime nuguwimo. Masiwafe, bo kë salëme hana nigisime.'

19 Na ho li gali tle, 'Bo jowafe we bulmakau kleli balitina waglo telë na bo bubë afutuku hwime nuguwitemëmefe. Masiwafe, bo kë salëme hana nigisime.'

20 Na ho li gali tle, 'Bo mëse tokwafe sei nëlëfe na këme nëgeme kë salëme hana nigisime.'

21 Na kwe kë wege ho, kë enënebë gali bubë eso home gali tujuwelële. Na bu kë gali aholokwane tle na tako enisusu metle na bubë wege home gali tole, 'Ju hokweinawa kë lifatebë tokwëtokwë alëge elë na tatako alëge elë eiju. Na ju wesibi jwa enëneme na tëbo atona enëneme na kiju tëbona enëneme na naba titiki tabo enëneme nëno eouleme na elesume tenëme na bobë lowa elelëkakime tenëme.'

22 Na kwe kë wege ho melë tle, bu fene gali tle. Na bubë eso home gali tole, 'Eso ho, bo melë wanelë ju fene gali ele kwe oneho lo ke hana mla.'

23 Na eso ho bume gali tole, 'Ju ebë lifate tako kile eleme na waluju life elëme asë ebelëfame. Na ju onehome hwi elomena ju bume anisasana sagali elome, bobë lowa migisiya namëglame. Bo metole nanelë, bobë lo ke nalëgleme.

24 Bo jume megali nolë, ëbame bo kë gali toglomëbë oneho, bu bo kë sagli nëglëlëbë hi wesibi hana hi mëglame."

Ho bu afina lowene sle lëleme na Jisame mana esogo lëlelëleme

25 Lebutako oneho bu Jisasna asë mëtla na Jisas swaya tletëme na gali tleme,

26 "Ho bobë lowene esogo home fatame tole lëglena, bu bome tako tolewa salëletënë na bubë bolijaya, bota, no, bolijahani, bomoluni, bolijamoniname tokwëfo tolewa salëletëme na bubë atome tokwëfo tolewa salëletle. Bu melë hana lëglena kwe bu bobë lowene esogo home hana fata lëgleme.

27 Ho bu bobë lowene esogo home fatame tole lëglena, kwe melowene lëglena, 'Bo Jisame esogo nëglëlëläna kwe ho bome tëbo nëgëtaname,' kwe bubë ato uli lëglëlëläna, na fli hobë wame galime uli lëglena na glime uli lëglena kwe këha ho bu bobë lowene esogo home hana fata lëgleme.

28 Ho bu kabana lo glijime tole lëglena, bu kë lo gliji baliti afina melowene sle lëletëmeme, 'Bobë baliti kaba nijine o hanane? Bo ebë balitina lo yawe noglolëmene o hanane?'

29 Bu melë hana lëglena, na bubë baliti yawe loglomena, na bu lo hana yawe loglolena kwe oneho bume sosonatlëtë memogotlamemu.

³⁰ Na bu megali moglolume, ‘Hwi elolo. Ebë ho bu lo yafe gliji lële kwe yawe hana lolole.’

³¹ Li lifate mago eso ho bu li lifatewa wameme lugujume fene kwe bu afina lowene fa sle lotleme, ‘Bobë lifate mago wame home boblo mogotomabë enëne tëlewamufe kwe bubë wame home boblo mogotomabë enëne feilawamufe. Sebo bume boblo nogotomamene o hanane?’

³² Na bu melowene lëglena, ‘Sebo bume hana boblo nogotomamefe,’ kwe bu melë lëgleme, bume wame moglölabë ho kakë mana neme, kwe bu fli home afina kë lifatebë eso ho belë mana jine lelëkakëmeme, aisenë hi namëglame.

³³ Na kë fenene, somago ho li bubë iniwa wesibi aholokwana hana ti lëglena kwe bu bobë lowene esogo home hana tafa lëgleme.”

Iji jwa kë mëglebë këjibë waflë gali

³⁴ Këji lale wesibi mu. Kwe këji iji tëbo mëglena, sebo habelë nogotomamene na ita iji namëgletëname? Hananefe.

³⁵ Këha iji jwa këji bu hi wesibi hana sle motomeme watëbomu mële. Sebo sike manëkaka. Sobo ebë gali aholokwane egelona, lowene sle eletelome.

15

Sipsip kleli kë flawei tëglebë waflë gali

¹ Takis baliti kë glo mëglekefëyabë ho na fli tëbo lowene kë esogo mëglelëlabë enëne bu Jisas belë loliwa mitisitla, bubë gali aholokwane namoglolame.

² Na Farisi hona, Gotobë galime okokwe moglomabë hona wame gali mëtla, “Kë ho bu tëbo lowene kë esogo mëglelëlabë enënena fëyeme yonane lëlelëmene? Na buna fëyeme hi mëlekefëyane?”

³ Jisas bubë gali aholokwane tleme na bu ebë waflë gali këme gali tleme,

⁴ “So mago ho li, we lujuafe we sipsip kleli lëglëmene, na jowa flawei lëgletlana, bo melowene nanelë, bu fli 99 sipsip kleli tako ona mëta hune lëleme na flawei kë lëgletlebë sipsip kleli mana hohwi lëtagutleme. Hohwi lëtagutlebëë na hwinaloko lujëlëleme.

⁵ Bu sipsip hwi lolole na feiji mëta gwa lowetleme na mana bubë lifekuwa fleflesuna lehileme.

⁶ Bu lifekuwa lehileme, na bubë yabe name, weife mago enënename gali lëlagumeme, migisitla namëglame. Na bu misitlame, na bume gali lolomeme, ‘Bobë sipsip kleli li flawei tëglebë bo ita wahwi nololë. Sobo bona weife iniwa fleflesu nëla.”

⁷ Na Jisas megali tle, “Bo some gali nolëyo, tëbo lowene kë esogo lëglelëlebë ho, bubë tëbo lowene aholokwana ti lëglena na Gotobë lale lowenewa esogo lëglelëtlena kwe heven life mëta kë tafa mëglabë ensel, bu tako

fleflesumu mëglame, sipsip kleli kë hwi toglolebë ho fene fleflesu tle. Kwe 99 enëne bu melowene mëglana, 'Sebobë lowene lalowa lëbetënafe, sebo sebobë tëbo loweneme ita hana gëgali nëglamefe,' kwe heven life mëta kë tafa mëglabë ensel, bu tokwëfo fleflesuwa mëgletëmame."

Baliti kë flawei eglabë wafle gali

⁸ Na Jisas ita gali tle, "Mëse libë baliti we kënjiji mëgëbetëna na jowa flawei eglatëna, bu habelë eglemene? Kwe bu esi fiji etole na iseku enijina lo mago obo sle etagule na kë baliti mana hohwi etatë. Bu hohwi etatëbëë na mana hwinaloko meeolë.

⁹ Bubë baliti wahwi eolë na bubë yabe name, weife mago enënename gali elome, migisitëya namëglame. Na bu misitëya. Na bume gali elome, 'Sobo bona iniwa fleflesu nanëglame. Bobë baliti flawei eglabë, bo ita wahwi nolë.'"

¹⁰ Na Jisas gali tle, "Bo some gali nolëyo, tëbo lowene kë esogo lëglelëlebë ho, bubë tëbo lowene aholokwana ti lëglena na Gotobë lale lowenewa esogo sle lëglelëtlena kwe Gotobë ensel bu tako fleflesumu mëgletlame, baliti kë hwi toglobë mëse fene fleflesu tle."

Falake nëba bolijayame kë kile togotlebë wafle gali

¹¹ Na Jisas megali latle, "Ho li iko nëbale tële.

¹² Na nagi fu nëba bolijayame gali tle, 'Aya, bo walowene nelë, ju glime nounou lale, kwe jubë iniwa wesibi seme afana mana fufu egotometëname. Kwe bo metole nanelë, bobë wesibiye, eliwamu eglënëme. Tokwafe kwe matëbe.' Na këme bolijaya bubë iniwa wesibi tlemalë nëbaleme fufu totometëna tlëme.

¹³ Tako tafa hana tle, na nagifu nëba, bubë iniwa wesibi balitina hihijika tle. Na bu kë baliti glo tle na kakë lifatewa këna tuju na këme tafa tule. Bu tafa tugulebëë, na memelë tëbo wesibi fafa totle. Na bubë iniwa baliti kë mëta yawe tlome.

¹⁴ Bu baliti wayawe tlome, na kë life mëta, tako fone mana fata tletëme. Kë fone mëta tafa mëtëglabëë na bu foneme ëjeha gli lëleme.

¹⁵ Këme nëgeme, na bu wegeme hohwi tëtagwi. Na kë life mago ho li bubë luku lëglëmetlebë wege fame jine tlë.

¹⁶ Kë luku bu alima jibo hihi mëtlekëfe, na kë falake kë alima jibo hime tako tole latle, bubë imo këna tëtafuna lëgëtame bu foneme tako glimu latle. Kwe ho bume hi wesibi hana mëtlëla. Hanane mu.

¹⁷ Na tokwafe bu lowene fa totle na gali tle, 'Bobë ayabë wegeho bu kwe feilawa hi wesibi mu mëbetëme, kwe bo foneme kwe gli nelë.

¹⁸ Bo eme hana tafa nëgelëme. Matëbemu. Ita aya belë nuguwime na bume gali nololëme, "Aya, bo Gotome

tëbo lowenena watëbo totlë na jume mata watëbo tëtë.

¹⁹ Bo lale ho nane ju bome mefë kë egëtanëme, bobë nëba. Matëbe. Ju bome melë egëtanëme, jubë wegeho fenene.”

²⁰ Na kwe bu kë mago, fowa tokokebë na bolijaya belë tuju.

Bu kakë mana asë tëkeke, na bolijaya hwi telokwakle. Na tako maninibo metletle. Na fëkawa tokoutlebë na lahwëwa tlële na këme sësle tole na ahino momotlë tletle.

²¹ Na bowene këme gali tole, ‘Aya, bo Gotome tëbo lowenena watëbo totlë na jume mata watëbo tëtë. Bo lale ho nane ju bome mefë kë egëtanëme, “Bobë nëba.” Matëbe.’

²² Kwe bolijaya bubë wege home gali tlome, ‘Sobo hokweinawa lale heletabo ëho ehilo na bume gelo etatelome. Na toba baliti lale, toba mëta ehwatelome, na juba jibo mata ehotelome.

²³ Na sobo bobë lale bulmakau nëba elesulome na tëke elolome. Sebo hi nanëglame na fleflesu nëlame.

²⁴ Bobë nëba leboha tëgletenëme nëgeme kwe bu mana ekë lëtabetenë. Bu waflawei tlita kwe sebo ita ekë hwi nolola.’ Na kwe bu hi mëtla na tako fleflesu memëtla.

²⁵ Na kë nalë, abwa nëba nuju mëta mana nuje. Na bu nuju mago tisi, na lolime tlibe na mana fleflesu kë mëtletlabë sawa lego aholokwane tlome.

²⁶ Na këme li wege home we tole na takune tole, ‘Kë

fëye legone? Fëye mëlane?’

²⁷ Na wege ho këme gali tole, ‘Blijamo wafi lisiyo. Na blijaya lale bulmakau kleli nëba walemitle. Bu boweneme tako fleflesu lalëletle, bu ita ligisi tleme nëgeme na lalowa tutabetle.’

²⁸ Abwa nëba kë gali aholokwane tle na tako enisusu metletle na lowa hana təkaklu. Na bolijaya təkaklitle na lale lale galina yafe gali tole, bubë lowene tli nalëgëbetleme fene.

²⁹ Kwe bu bolijayame kofaya gali tole, ‘Fëyemene? Wege hoha, jubë wege feilawa tlibutu fa tètakefëtë. Na bo jubë gali momata hana tëtatë. Kwe ju bome mëmë kleli nëba tokwëfoha hana yo tlonë bobë yabenime këna fleflesu nanëglelëmëme. Hanane mu.

³⁰ Kwe jubë nëba kë nëgebëye, jubë baliti lisei oneme fwa yawe tlometëme. Kwe ëje bu lisi na ju bume fëyeme fleflesu eletlene na lale bulmakau kleli nëba fëyeme emitlene?’

³¹ Na bolijaya bume gali tole, ‘Hëyai! Ju itaita bonawa nëtabekefo. Na bobë iniwa wesibi kë nëgebëye, ebë jubëwa.

³² Kwe sebo eliye, blijamome fleflesu nëgletlabë olë. Jubë blijamo leboha tëgleme nëgeme kwe bu mana lëtabe. Bu waflawei tlita kwe sebo ita ekë hwi nolola.”

16

Ululu sle logotomebë hobë waflë gali

¹ Jisas bubë lowene esogo mëglelëtlabë home gali tlome, “Ëtani, lebutako balitina ho, bubë wege ho jowa tafa tletle. Kë wege ho, kë lebutako balitina hobë wesibi ululu sle totokwefëmetle. Na fli ho kë lebutako balitina ho belë mitisitla na bubë wesibi ululu sle logotomebë hobë wegeme metëtahë lamëtlëla, ‘Jubë wesibi ululu sle logotomebë ho, jubë wesibi fli blawa sisile lotometë.’

² Këme nëgeme kë lebutako balitina ho bubë wesibi ululu sle logotomebë home gali telokwakle, ligisi nalëgleme. Na bu loliwa tisi tle, na mana bume gali tlole, ‘Bo ebë gali kë aholokwane nëgletëbë, ju fëye tlene? Bobë iniwa wesibi, ju mëta mana mëgëbena, tabei elëme na laba mëta yahî elëme. Ju bobë wesibi ululu sle egotomebë home hana tafa egleme.’

³ Na kwe kë ululu sle logotomebë ho mana melowene tle, ‘Bo habelë nëgelëmene? Bobë wege eso ho, bome ebë ululu sle wegebë mago hehë lëgletenëmefe. Bo life yefi wegebë fa nogotlëme fene, kwe bo këha afutuku hana lëbetenë. Na bo fli onehome balitime na fli wesibime gëgëba noglomëbëme tiniji nanëletemë.’

⁴ Kwe bo wesibi wafi lowene nelë. Bo kë wesibi nëgelëna kwe tokwafe, bobë wege eso ho bu bome hehë lëgletenëna kwe fli ho bome bubë lowa no mëglëname.’

⁵ Këme nëgeme, bubë wege eso hobë mago, wesibi manawa kë glo mëtletlabë home gali telokwakëme, migisi tla namëglame. Jowa ho bu belë afina tisi tle na kë ululu sle logotomebë ho takune tlole, ‘Ju manawa, bobë wege eso hobë mago, habenuju wesibi glo tlenë?’

⁶ Na bu gali tle, ‘Bo we lujuafe we ëflëbo tu manogwa dram glo telë.’ Na kë ululu sle logotomebë ho gali tlole, ‘Jubë manawa wesibi weniji kë gogwa mëtletëyobë laba tuku ekakeme na tiho laba mëta hokweinawa meyahi elëme, 50 dram ëflëbo tu.’

⁷ Tokwafe li ho bu belë tisi tle na bume takune tlole, ‘Ju manawa, bobë wege eso hobë mago, habenuju wesibi glo tlenë?’ Na bu gali tle, ‘Bo we lujuafe we witi liji manogwa iseku glo telë.’ Na kë ululu sle logotomebë ho gali tlole, ‘Jubë manawa wesibi weniji kë gogwa mëtletëyobë laba tuku ekakeme na tiho laba mëta hokweinawa meyahi elëme, 80 witi liji manogwa iseku.’

⁸ Tokwafe, wege eso ho, bubë wesibi ululu sle logotomebë ho këtëglebë wesibi hwi toglometlena kwe bu kë tëbo wege hobëme fleflesu tletle na këme bibita totle. Wesibi kë wege ho melë këtëglebë, bu tako lowenena hobë lowenena nëgeme. Ebë life mago wesibime fwa, tako lowene kë mëgletëmabë oneho, bubë wege wege mëglabëme, tako

lowene slemu lamëletëma.
 Kwe Gotobë lowene mëta kë
 mëtabëyabë oneho bubë
 wege wege mëglabëme
 tokwëfo lowene lamëletëma.

⁹ Bo some gali nolëyo, sobo
 ebë life magobë baliti, wesibi
 jwa enëneme elëmo, sobobë
 yabe tafa namëgletëyome. Na
 tokwafe kë baliti glo mëglabë
 olë yawe lëglëna, Goto na
 bubë ensel some
 unaunalëme tafa mëglabë
 lowa nëno mëglame.

¹⁰ Bo some gali nëlëyo, ho
 tokwëtokwë wesibi ululu sle
 logotokwefëmena kwe
 tokwafe bu tatako wesibi
 mata ululu sle logotomeme.
 Ho li tokwëtokwë wesibi
 laboweli logotomena kwe
 tokwafe tatako wesibi mata
 melaboweli logotomeme.

¹¹ Sobo ebë life mago baliti
 ululu sle jwa egotomona,
 kwe Goto bu some heven life
 mago lale wesibi ululu slebë
 habëna lëglëyomene? Weye.
 Hanane mu.

¹² Na sobo fli enënebë
 wesibi ululu sle jwa
 egotomona kwe sobo sobobë
 wesibi mata ululu sle hana
 egotomome.

¹³ Wege enëne bu tële eso
 home hana wege
 mëgletëmame. Bu melë
 mëglana kwe bu li eso home
 fwa tole sle mletlame na lime
 kwe tëbojiwa moglolame. Bu
 li eso hobë galiwa
 aholokwane mololame kwe
 lime kwe tëbojiwa mletlame.
 Sobo tële lowene hana esogo
 eglelëmome. Sobo Gotome
 lowene egletelobë lowene na
 baliti fa egotobë lowene sobo
 këna hana sago egotomome.”

*Jisas bu fli gali mata të
 tëtatëme*

¹⁴ Farişi ho bu baliti tako
 tole lamëtletëma. Këme
 nëgame bu Jisas kë gali
 tëglebë gali aholokwane
 motlola, na bu Jisame
 sosonatlëtlë memototla.

¹⁵ Kwe Jisas bume gali
 tlome, “Sobo metole lalo,
 oneho some melowene
 namëgletëyome, ‘Bu lale
 lowenewa esogo mëglelëlabë
 hofe.’ Kwe Goto bu sobobë
 tëbo lowene wahwi lolotëyo.
 Iniwa wesibi oneho
 melowene mëgletëmame,
 ‘Lale wesibi mu,’ kwe Goto
 bu kë wesibime melowene
 lalële, ‘Tëbo wesibi mu.’”

¹⁶ Jisas gali tle, “Jon bu fata
 jwa tëglëna, kwe bu Mosesbë
 gali na Gotobë lowene mago
 gali të mototokweflabë hobë
 galiwa të mëtëtakefëtëma na
 bu kë galiwa esogo
 mëtletëtëma. Kwe Jon bu
 wafata tle na ebë olëna, Goto,
 onehobë eso home kë tafa
 lëgletëmebë lale gali të
 mëtagutëma. Na oneho bu
 Goto, onehobë eso home kë
 tafa lëgletëmebë lifate elë
 mëkaklujame këkë lamla.

¹⁷ Matafana, lifena kwe
 tëbo mëgleme, kwe Gotobë
 gali kwe iniwa hana tëbo
 lëgletleme.”

*Jisas one hehë lowenebëme
 gali tle*

¹⁸ Na bume ita gali tlome,
 “Ho, nome hehë lëgletëna na
 li mëseme sei lëglëna, kwe kë
 ho bu lisei lowene mëta
 lëtabe. Na ho, li ho kë hehë
 lëgletëbë mëse sei lëglëna,
 kwe kë ho bu mata lisei
 lowene mëta lëtabe.”

Ebë tako baliti musuna ho na Lasarusnabë gali

¹⁹ Jisas megali tle, “Ëtani tako baliti musuna ho tètabe. Na olëli olëli bu lale lale ëhomu tehokëfe. Na olëli olëli bu feilawa lale lale hi wesibiwa hi tlekëfe.

²⁰⁻²¹ Na wesibi jwa ho bu kë tako baliti musuna hobë lo ino ëfo li mëta ni tëbekëfe. Kë wesibi jwa hobë weniji Lasarus. Bu melëme tole tle, kë tako baliti musuna hobë masei mago kë luklu mëglekëfebë hi wesibi obobo hi nalëgleme fene. Bubë ato juba jubawa. Na amale bubë juba lolë lamototokwefëmetle.

²² Tokwafe kë wesibi jwa ho gli tle. Na ensel bume heven lifewa mitilekole na Abraham belë sei motowelile. Na kë tako baliti musu na ho mata gli tle. Na matëmatë mutujuwetla.

²³ Na bu hel life mëta tototabe na tako elili mëta tètabe. Na bu Abrahamme hwi towelëkakle. Na Lasarus buna mëtëtabo.

²⁴ Na kwe, tako baliti musuna ho we towelëkakle, ‘O semle Abraham, ju bome maninibo eletenë. Ju Lasarusme gali elole, bubë toba ku, tu mëta flu lowetleme na lëhitenëme bobë aleji mëta gwa nalëtatenëme, tli nalëgëbetenëme. Bo ebë ahoju mëta nëgëtabëbë na bo tako elilimu mëta nëtabëfe.’

²⁵ Kwe Abraham gali tle, ‘O hëyai. Ju wesibi lowene sle eletle. Ju atomuna mana tafa tëglena, kwe ju feilawa lale lale wesibi mëta tètabe kwe Lasarus bu feilawa tetëbo

wesibi mëta tètabe. Kwe ebë olëna, bu flelesu mëta lètabe na ju elili mëta etabe.

²⁶ Na li wesibi mëtabo. Sebobë ku mëta, Goto tako luju blëge totle. Këme nëgeme, oneho sebona kë tafa nëglabë, bu kë tako luju sobelë habëna su mëkakitëyomene? Hanane mu. Na oneho juna kë tafa egelobë bu kë luju sebelë habëna su mëkakitamene? Hanane mu.’

²⁷ Na tako baliti musuna ho gali tle, ‘Bu këha nëgebë, kwe, semle, bo jume takune nolë, ju Lasarusme bobë ayabë lowa lalowa jine egelëkakëlemene?’

²⁸ Bobë keinëbalenino toballi. Na Lasarus bume anisasana sagali lolome, bubë tëbo lowene hihijika melame na aholokwana ti melame. Bu kë elili lifate tëbo elëme nagi migisiyalime.’

²⁹ Kwe Abraham gali tle, ‘Mosesbë gali na Gotobë lowene mago gali të mototokweflabë hobë gali mana mëbetëme. Jubë blijamoni kë gali lalowa aholokwane mëglame.’

³⁰ Na tako baliti musuna ho gali tle, ‘O semle, Abraham, bu kwe hanane. Kwe ho bu matëmatë mago huju lëglena na bume luguju tëmëna, kwe bubë tëbo lowene lalowa hihijika melame na aholokwana ti melame.’

³¹ Kwe Abraham bume gali tlole, ‘Bu Mosesbë gali na Gotobë lowene mago gali të mototokweflabë hobë gali, aholokwane jwa

mëglekefëyana, kwe matëmatë mago huju lëglebë hobë gali mëtabo hana aholokwane moglolame. Bubë tēbo lowene hana hihijika mëglame na aholokwana ti hana mëglame.”

17

Tēbo lowene onehobë, lalë lowene sisile lëtatëme

¹ Jisas bubë lowene esogo mëglelëtlabë home gali tlome, “Memelë wesibi onehome fata mëgletëmeme, bume tēbo lowene belë ki namëkakeme. Kwe ho bu li home tēbo lowene belë ki lëkakena kwe masiwafe, Goto kë home tēbo logotlememu.

² Oneho bome tokwafe lowene sle mëgletë nabë, ho li bume tēbo lowene belë ki lëkakena kwe ebë tēbo wesibimu. Kwe Goto kë home tako tēbo logotlememu. Kwe fli ho, kë home afina tako aniji mou mëta kesi mëtatlabë na bume nutuwa tuku mëtëkakabë na bu tu mëta suglu lëglebë kë kwe lalowa. Bu kë onehome tēbo lowene belë kiki hana lëkakeme na Goto bume hana tēbo logotleme. Këme nëgeme sobo ululu sle saelo.”

³ “Sobo bome kë lowene sle egletë nabë oneho, somago ho li tēbo lowene mëta litigona kwe sobo eyeutelome na bubë tēbo lowene sle etatelome. Bu kë tēbo lowene aholokwana ti lëglena kwe sobo bubë tēbo lowene aholokwana ti egletelome.

⁴ Na bu jume jowa olëna tobali ita tëlafe tēbo lëgëtakefëna na jume tobali ita tëlafe lisikefëtëna na jume

megali lolokwefëme, ‘Masiwafe. Bo tēbo ho. Bo jume tēbo nanëtakefë ebë olëna.’ Kwe ju bubë tēbo lowene aholokwana ti eletleme.”

Gotome lowene sle nëgletlabëme Jisas gali tle

⁵ Na Jisas bubë gali tēme kë jine tëglëmebë ho, bume gali motlola, “Ju seme aitana, Gotome kë lowene nëgletlabë lowene takowa nalëgëbetëname.”

⁶ Na Jisas bume gali tlome, “Sobo Gotome kë lowene egletelobë lowene bu tokwëfowa nëgena, aoba liji tokwëfo fenene, kwe sobo tako wesibi lalowa egotlome. Sobo time megali eglolona, ‘Ju fli elëme na nutu mëta ejuwelëbeme,’ kwe kë ti sobobë gali esogo lëglelëtëyome.”

Lalë wege hobëme Jisas gali tle

⁷ “So mago ho li, bubë wege home, nuju wegeme o sipsip kleli lëglëmeme jine lëglëlena na bu wegeme lugujuna na bubë eso ho belë ita ligisina, bubë eso ho bume megali hana logloleme, ‘Ju hokweinawa tafa elëme na hi elëme.’

⁸ Weye. Bubë wege home megali logloleme, ‘Ju bobë hi wesibi ahojume eletenëme na kë hi wesibi mana glo eletenëme. Bo afina hi nelëme na ju mana hi egleme.’

⁹ Na kë wege ho bubë eso hobë gali esogo lëglelëtlena kwe kë eso ho bubë wege

home yaha gali hana loglome. Hanane.

¹⁰ Këme nêgeme sobo mata, sobo iniwa wesibi Goto some fene gali tolêyo waegelona kwe sobo megali saelo, ‘Sebo wege howa. Goto seme kê gali toglonabê wege, kê wegewa wawege tla. Këme nêgeme Goto bu seme yaha gali hana loglome.’”

Welujuwa ato juba jubawa home Jisas sle totome

¹¹ Jisas Jerusalem lifatewa tugujubêê na bu Samaria provins jelême na Galili provins jelême na kê ku kuwa tuju.

¹² Bu li lifatewa fwa tule na ato juba jubawa kê mêtehweyabê welujuwa ho, bume alêge mêta esune mêtlêla. Bu kakêwa mêtelêkwêya,

¹³ na Jisame feilawa we mêtelokwakla, “Jisas, tako ho, ju seme maninibo eletêna.”

¹⁴ Jisas bume hwi telokwakême na gali tlome, “Sobo sobobê ato lotu lome wege lêglebê home lebotane êjuwetêmetelo, bu mehwi naloglêyome sobobê ato juba juba jwa mêbetêyo.” Na kwe, bu mutujabê na bubê ato juba lalowa mêtletême.

¹⁵ Na bu mago ho li, bubê ato mehwi toglome nêgeme lalawa lêbetenêfe na bu alêgeme lu tule na miti nagi tuju. Na bu Gotome feilawamu fleflesu tletle na bibita totle.

¹⁶ Bu Jisame esune tlêle na bubê elebo li mêta latitigo tlewa na bume gali tlole,

“Yaha fêyeme sle etanêne?” Na kê ho bu Samaria provins mago ho. (Samaria provins mago enêne bu Israelbê afenêbonina yonane hana mêtlelogwaya.)

¹⁷ Jisas kê home hwi tlole na gali tlole, “Bo melowene nanelê bo êje welujuwa home sle notomê fene. Na fli tobali ita nilinabêye, hameta mêtabêyane?”

¹⁸ Ebê ho bu Israelbê afenêboni nane kwe buwa fêyeme lu lulene Gotome fleflesu nalêgletleme na bibita lotleme? Kwe Israelbê afenêboni fli bu ita lulu jwa fêyeme mêlane?”

¹⁹ Na Jisas kê home gali tlole, “Ju huju elême na ejume. Ju bome lowene sle egletenême nêgeme, jubê ato lalowa kême lêbetê.”

Goto onehobê eso home tafa lêgletêmebê olê fata lêgleme nounou lalêle

²⁰ Farisi ho bu Jisame takune motlola, “Goto onehobê eso home habenalê tafa lêgletêmemene?” Na Jisas bubê gali tafu têtatême, “Goto onehobê eso home kê tafa lêgletêmebê, sobo nabana hwi eglobê wesibi nane.

²¹ Na bu megali hana mêglame, ‘Hwi elo, ekê lêbe’ o ‘Hwi elo, ekê lube.’ Weyewa. Sobo aholokwane elo. Goto onehobê eso home kê tafa lêgletêmebê, bu sobobê ku mêta walêtabetêyo.”

²² Na Jisas bubê lowene esogo mêglelêtlabê home gali tlome, “Tokwafe bo, Gotobê life mago ho, tako afutukuna kêna ngisibê olê hwime sobo

tako tole egletelome. Kwe sobo kē olē hwi hana eglolome.

²³ Na bu some megali moglëyome, 'Hwi elo. Gotobë life mago ho ita walisi na bu ebelë ekë lutabë' o 'Hwi elo. Bu eme ekë lëtabe.' Kwe sobo bubë gali asa aholokwane elotemo.

²⁴ Sobo wawaine walowene eletelo, wawaine lëglena kwe iniwa oneho mehwi mlagula. Na kē fenene, bo, Gotobë life mago ho, bo nigisina kwe iniwa oneho bome mehwi mëglaguname, wawaine fene hwi mlagula.

²⁵ Kwe oneho ebë olëna kē tafa mëglabë, bu afina bome tako elili gwa mëtatëname na hehë mëletëname.

²⁶ Ètani, Noabë olëna, oneho fene mëtla, kwe bo, Gotobë life mago ho, bo nigisibë olëna, bu kē esona melë mëglame.

²⁷ Ètani Noabë olëna bu melë lamëtla, bu memelë wesibi monei monei mëtlekefëyabëë, na one sesei sesei mëtlabë na mana Noa tako sibu lowa təkaklu. Na tako haliji tu fuflu totome na iniwa oneho këhaliji tu mëta susuglu mëtla.

²⁸ Na Lotbë olëna, oneho bu Noabë olëna fene mëtla bu këha melë lamëtla. Bu memelë wesibi monei monei mëtlekefëyabëë na bu wesibi balitina hihijika mëtlekefëyabë, na bu nuju toba tobalo mëtlekefëyabë, na lo gigliji gigliji mëtlekefëyabë,

²⁹ na mana Lot bu Sodom lifate kilë tle na kē nalëwa anusesi ahojuha to tëtëkeketëme, na Sodom life mago onehome kē ahoju iniwa latemuwa totome.

³⁰ Na kē oneho fene mëtlekefëya, kwe bo, Gotobë life mago ho, bo këna ita nigisibë olë mata, bu melë mëglekefëyame. Bubë wesibiwa lowene mëgletëmame. Na Gotome lowene mëgletlabë lowene hana lowene mëgletlame.

³¹ Kē nalë, ho li lo sebatì mëta lëtabena, kwe bu lowa bubë wesibi glome asa malëkaklu. Weye. Bu kē magowa hokweinawa lalëglëboukakuwa. Na kē fenene, ho nuju mëta tafa lëglena bu lowa asa maluju. Matëbe. Bu kē magowa lalëglëboukakuwa.

³² Sobo Lotbë mëseme kē fata tëgletëbë tëbo wesibi lowene eletelo.*

³³ Ho bu melowene lëglena, 'Bo Jisame esogo nëgletlëna fli ho bu bome tëbo mëgëtaname.' Na bu, bubë ato uli lëgletlëna na bome hana esogo lëgletlëna, kwe këha ho bu tëbo liglitame. Kwe ho bu bome lowene sle lëgletlëna na bubë ato uli jwa lëgletlëna kwe këha ho bu hana tëbo liglitame. Ho bu kē home mogo nalë tēke moglolana, kwe kē ho gli sle nane lële. Weye. Bu unaunalëme lale tafa lëgleme.

³⁴ Bo some gali nolëyo, bo këna nigisibë klabë, tlemalë

* **17:32** Bu melë latle. Bu bubë wesibi kē hune tëglebëme lowene tletëme na miti nagi swaya tekake na Goto bume tëbo tëtamë.

ho hwëna ni mebome, na Goto lime fwa no lëlëleme na lime kwe kile lëleme.

³⁵⁻³⁶ Na tlemalë one nage labume mëtabome na Goto lime fwa no lëleme na lime kwe kile lëleme.”†

³⁷ Na bubë lowene esogo mëglelëtlabë ho, Jisame takune motlola, “Kë tëbo wesibi hameta fata lëglemene?” Na Jisas bume gali tleme, “Sobo fotë bota jiji mëglena hwi eglomona kwe sobo melowene elo, ‘Wesibi mogo këme lebo.’ Na kë fenene, sobo tokwafe wesibi hwi eglomome na melowene elome, ‘Kë tëbo wesibi këme fata lëgleme.’”

18

Ebë onehobë gali aholokwane loglomebë hobë na seiju mësenabë waflë gali

¹ Jisas bubë lowene esogo mëglelëtlabë home, li waflë galime gali tleme, bume meokokwe naloglomeme, bu Gotome itaita gali moglokefla namëglame na tëbojiwa jwa namëglame.

² Bu megali latle, “Li lifate mëta, onehobë gali aholokwane loglomebë ho këme tètabe. Kë ho bu Gotome uli hana tletle na bubë gali aholokwaneme momata latlokweftle na onehome mata tole hana tletëme.

³ Na seiju mëse li bu kë lifate mëta mata tètabe. Na bu kë gali aholokwane loglomebë home itaita

tisikefëtë na gali tlole, ‘Bome wame loglonëbë ho, bome tëbo lëgëtanëme ekëne. Ju bome ebë hobota sleme saaitanë.’

⁴ Èbame kë ho, kë mësebë galime iweniji latlekefëtë, kwe tokwafe bu melowene latle, ‘Bo Gotome momata nanotokweflë na bubë gali aholokwane hana nolokweflë na onehome mata momata nanotokwefëmë.

⁵ Kwe bo këha seiju mëseme uli nanëletë. Bome itaita sosalë latakefënë. Bo melowene nanelë, bo bubë hobota sasle nëtatë. Bo bume nëgaitëme. Bo bume nëgaitë jwa nëgena kwe bu bo belë itaita egisikëfeme na bu bome feilawa sosalë etakefënëlime.”

⁶ Na Jisas megali tle, “Sobo kë gali aholokwane loglomebë tëbo hobë gali lowene sle eletelo. Kë seiju mëse bume itaita yena takune tlokwefle na bume mana taitamë.

⁷ Na sobo melowene lalone? ‘Goto bubë oneho, iniwa olëna klabë yena kë gëgali moglokweflabë hana lëgaitamemene? Na totoko lëglemene?’ Weye. Hanane mu.

⁸ Bo some gali nolëyo. Bume hokweinawamu lëgaitameme. Kwe bo, Gotobë life mago ho, ebë lifewa ita nigrisina, na bo onehome hwi noglokwakimëna, bu bome mana lowene sle mëletëna o hanane?”

† **17:35-36** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Na tlemalë nuju mëta wege melekefome na Goto lime fwa no lëlëleme na lime kwe kile lëleme.”

*Tlemalë ho Gotome gëgali
mëglelëlobë wafle gali*

⁹ Wali enëne bu melowene lamla, “Sebo kwe lale onehomu kwe fliye sebo fenene këha hanane, bu kwe tëbo oneho.” Na Jisas bu këha enëneme wafle galina megali tleme,

¹⁰ “Tlemalë ho bu Gotobë lowa mëtëkaklujo, Gotome nagëgali mëglelëlome. Li bu Farisi ho, na liye bu takis baliti kë glo lëglekëfebë ho.

¹¹ Na kë Farisi ho bu hujuna tlibe na bubë lowene nawa Gotome gëgali tlelële, ‘O Goto bo fli hoha hanane. Weye. Bo kwe lale ho mu. Këme nëgeme bo jume këme gali nolë, “Yaha fëyemene.” Fli ho bu tokli tokli lamelekefëya, na tëbo lowene esogo mëlelëkefla na honaoneme lisei lisei mëglelëmabë. Kwe bo kwe hanane. Na bo takis baliti kë glo lëglekëfebë hoha nane. Weye.

¹² Iniwa wiki, bo tële olë, hi wesibi hi jwa metafa nanëlekefë, jume fwa lowene nanëgletëme. Na bobë baliti na fli wesibi bo kë glo nëglekefëbë, bo melë nanëlekefë, bo welujuwa mëta fulelë fulelë nëlekefë, na jowa fulelë tabo jume nëlekefë.’

¹³ Kwe takis baliti kë glo lëglekëfebë ho kakë tujuwelibe na bu heven lifewa hana hwi tokwake. Na bu tako maninibona yako mëta bu tle na Gotome gali tole, ‘O Goto, bo tëbo ho mu, ju bome maninibo eletënë.’”

¹⁴ Na Jisas gali tle, “Bo some gali nëlëyo, kë takis baliti kë glo lëglekëfebë ho bubë lowa ita lugujuna kwe buwa Gotobë naba lime lale ho lëtabeme. Kwe li ho kë kwe hanane. Iniwa oneho bu megali mëglana, ‘Sebo lale oneho mu,’ kwe Goto bume megali loglomeme, ‘Hanane, sobo tëbo enënemu.’ Kwe iniwa oneho bu megali mëglana, ‘Sebo kwe lale enëne nane, sebo tëbo enënemu,’ kwe Goto bume megali loglomeme, ‘Sobo lale enëne.’”

*Jisas gali tle, “Sobo nëbale lëkle
asa etomo, bo belë matisiyao”*

¹⁵ Oneho bu tatako na maba mago nëbale Jisas belë metlesumëtla. Bu metole lamëtla, Jisas bubë atome toba gogwa nalëgletëmeme na Gotome takune nalololeme, bume lëgaitame nalëgleme. Kwe Jisabë lowene esogo mëglelëtlabë ho bume hwi motloma na wame gali motloma na lëkle mototoma, Jisame sosalë mogotlalime.

¹⁶ Kwe Jisas nëbaleme gali telokwakëme, bu belë migisitla namëglame. Na bubë lowene esogo mëglelëtlabë home gali tleme, “Sobo nëbale lëkle asa etomo. Bo belë matisiyao. Oneho Gotome lowene slemu mëgletlana, ebë nëbale fene lowene slemu mletla kwe Goto bubë eso home tafa lëgletëmeme.

¹⁷ Bo nëgali gali nanolëyo, ebëha nëbale bu Gotome lowene slemu lamletla. Na oneho bu Gotome lowene sle jwa mëgletlabë, ebëha nëbale

fene lowene sle mletla, kwe Goto eso home kë tafa lëglebë lifatewa hana mëkaklujame. Hanane mu.”

Wesibi lebutakona eso ho Jisasna gëgali mëtelo

18 Na wesibi lebutakona eso ho li, Jisame takune tlole, “O Tisa, ju lale ho. Bo jume takune nolë. Bo habelë nëgelëmene, Gotona unaunalëme lale tafa nanëgelome?”

19 Na Jisas bume gali tlole, “Ju bome lale fë fëyeme etanëne? Ebë life mago ho bu lale nane, Goto buwa lalemu.

20 Ju Gotobë gali walowene eletle. Bubë bogo megali lalamë, ‘Honaone na onenaho sobo lisei lowene mëta asa tafa elo. Sobo onehome mogo nalë asa tëtëke elo. Sobo tokli asa elo. Sobo sosogëna galina fli onehome blawa asa soso etatemo. Sobo bita name blijaya name boblo asa etomo. Bubë galiwa esogo elelëtemome.”

21 Na kë ho Jisame gali tlole, “O Tisa. Bo tokwëfome nëgena bo këbë iniwa gali melë esogo tlagimë na bo ebë olëna mana esogo nëlelëmë.”

22 Jisas bubë gali aholokwane tlole na bume gali tlole, “Ju li loweneme mana afolo ele. Ju melë egleme. Jubë iniwa wesibi balitina hihijika eleme. Na kë baliti, wesibi jwa onehome sa etagutëmeme. Ju melë eglena kwe heven lifate mëta lale wesibimu lamëbetë. Na ju bome mana esogo elenënëme.”

23 Kë ho kë gali yafe aholokwane tlole na bu witi tle. Bu lebutako wesibina ho nëgeme.

24 Jisas kë home mehwi tlole, witi lalëlefe na gali tle, “Wesibi lebutakona enëne, Goto bubë eso home kë tafa lëgletëmebëme, ebë kalëlego lalëletëme.

25 Kamel kleli, bu ëho susu nili fulujuwa lëkaklume ebë sogë kalëlego lalële, kwe wesibi lebutakona enëne, Goto onehobë eso home kë tafa lëgletëmebë lifatewa mëkaklujabëme ebë kalëlegomu lalëletëme.”

26 Oneho bu kë gali aholokwane mëtlabë, na klelego memëtla na gali mëtla, “Këha melë nëgena, kwe Gotobë lifateme unaunalëme ya tafa lugulemene?”

27 Na Jisas gali tle, “Oneho wesibi mogotoma jwa kë mëglabë, Goto bu kwe lalowa logotomeme.”

28 Na Pita bume gali tlole, “Aholokwane ele! Sebobë lo na iniwa wesibi wahune tula na sebo jume ekë esogo nëlelëyo.”

29 Na Jisas gali tlole, “Bo nëgalimu nanelë. Oneho Goto, bubë eso home kë tafa lëgletëmebë lowenebëme, lowene mletlana bubë lo o nonino o bolijahani o bolijamoni o botamenino o bolijayani o nëbale hune mëglana,

30 kwe Goto bume lebutako wesibimu lëglëmeme. Bu ebë life mëta mana tafa mëglana, kwe Goto bume lebutako wesibimu lëglëmeme. Ètani kë

hune mëtlabë wesibi bu tëlewaha kwe Gotō bume kë lëglëmebë wesibi bu lebutakomu. Na tokwafe bu Gotona unaunalëme tafa mokokefëyame.”

Jisas bu gali tle, “Bo gli nëgelëme na huju nelëme”

³¹ Jisas bubë we ita tële lowene esogo mëglelëtlabë home mëglëbo elëme fo tlelekakëme na gali tloime, “Sobo aholokwane elo, sebo Jerusalem lifatewa ekë nuja. Ètani, Gotobë lowene mago gali të mototokweflabë ho, bu iniwa wesibi bu tokwafe bome, Gotobë life mago home, mefata mëgletenëbëme, Gotobë bogo mëta wayahi mëtletëna. Na eli kë wesibi bu iniyafemu bome mefata mëgletenëme.

³² Na bu bome, Israelbë afenëboni mëtabëya jwa mëglabë enëneme yo moglomame. Na bu bome soso na tlë mëgëtaname na tëboijiwa mëgletëname na nagutabana kokose mogloname.

³³ Na bome taba afona feilawa tëkle tëkle mëgëtaname na mogo nalë gwa mëtaname. Na bo matëmatë mëta tële olë nebëme, kwe aona olëbëye këna huju nëgelëme.

³⁴ Kwe bubë lowene esogo mëglelëtlabë ho bu kë gali wayo lowene sle hana mëtletla. Kë gali wayo bume ëhomu latletëme.”

Jisas bu naba titiki tabo hobë naba sle totometle

³⁵ Jisas, Jeriko lifate lololi totle na naba titiki tabo ho bu alëge mëglëbo li mëta tafa tle. Kë ho onehome balitime gëgëba latlokwefëme.

³⁶ Na bu lebutako onehobë lëleguli lego aholokwane tlagime, na bu loli mago onehome takune tloime, “Kë fëye mëlane?”

³⁷ Na bume gali metafu mëtëtatla, “Nasaret life mago Jisas sigli lële.”

³⁸ Na kwe kë naba titiki tabo ho, bu feilawa we telokwakle, “Jisas, Devitbë afenëbo, ju bome maninibo eleten!”

³⁹ Na motoutayabë enëne, bume wame gali motlola, “Ju kuju ebe.” Bu ita anيسانamu we telokwakle, “Devitbë afenëbo, ju bome maninibo eleten!”

⁴⁰ Na Jisas këme tlikaku na gali telëkakeme, “Sobo kë home elesutëna.” Na bu loliwa tisi tle na Jisas bume takune tlole,

⁴¹ “Bo jume habelë nëgëtëmene?” Na kë ho bume gali tlole, “O tako ho, bo hwi nanëgelëme fene.”

⁴² Na Jisas gali tlole, “Ju hwi egleme. Ju bome lowene sle egletenëme nëgëme, jubë naba këme tika meletë.”

⁴³ Na hokweinawa bubë naba latikawa mëtletle na bu hwi tëkake. Na bu Jisasmë fleflesuna nagi tlële. Na Gotome mana fleflesu tokoutle na bibita tëtagule. Na iniwa oneho buna kë mutujabë kë wesibi hwi motlola na bu mata Gotome fleflesu mëtletla na bibita mototla.

19

Jisas Sakiusbë lowa tuju

¹ Na kwe Jisas Jeriko lifate elë fwa tule na lifate kukuwa kë lugujubë alëge, esogo tlagule.

² Na ho li bu kë lifate mëta tafa tle bubë weniji Sakius. Bu takis baliti glo mëglekefëyabë eso ho. Na bu feilawa balitina tafa tle.

³ Bu Jisasme hwi naloglome fene, habëtabo hone? Kwe bu hwi hana tlole. Bu afolo ho nêgeme na lebutako oneho lilifuha memëtletla.

⁴ Këme nêgeme bu afina fëka tokou na ti elë tokwale, kë magowa, Jisasme hwi naloglome. Bu melowene latle, “Jisas eli ebë alëge elë ligisime.”

⁵ Na kwe Jisas kë ti li elë fwa tule na hwi tokwake na Sakiusme hwi telokwakle na gali tlole, “Sakius, ju hokweinawa kle ele. Eli sebo jubë lowa nêgëyeu nanêgelome.”

⁶ Këme nêgeme hokweinawa laklewa têtëkakettle na bu Jisasme bubë lowa fleflesuna tlelule.

⁷ Na iniwa ho kë hwi motlolabë wame galina gëgali mëtla, “Bu têbo lowene esogo lëglelebë hobë lo elë fëyeme lujune?”

⁸ Bu lo mëta tafa mëtelo na Sakius hujuna tlibe na Jisasme gali tlole, “O tako ho. Eli bo bobë iniwa wesibi fu tèle nogotomëme. Na jowa fulelë tabo, wesibi jwa enëneme sa nêgëtatëmëme. Na bo ho lime sogëna toglolëbë na bubë wesibi

tokli tégletelëbë kwe bo bume kofayame niliafe nêglëlë nêgelëme.”

⁹ Na Jisas bume gali tlole, “Ëje, Goto bu ebë lo mago enëneme walaitame na bubë têbo lowene mago wanëno lële. Kë ho bu mata Abrahamë afenëbo lëtabe.

¹⁰ Bo, Gotobë life mago ho, bo têbo loweneme kë tafa mëglabë onehome hohwi nêtatëmë na bume nêgaitamëme na têbo lowene mago nêno nanêgelëme. Bo këme tisi temë.”

Welujuwa wege hobë waflë gali

¹¹ Oneho bu Jisasbë gali mana aholokwane mëtlagulabëë na bu waflë gali olisina loke metotle na waflë gali metë têtatëmë. Bu Jerusalem lifate elë lololi tle na oneho bu meweniji mëtla, Goto onehobë eso home kë tafa lëgletëmëbë olë, eliwa fata lëglemewa. Këme nêgeme Jisas këbë waflë galibëme gali tlome, bubë kë yaya lowene sle nalëgëtatëmëme.

¹² Bu megali tle, “Letitabo ho, kakë lifatewa lugujume, bume tako eso home aniji namugujelëlame. Na tokwafe bu ita lisime na bubë lifate mago onehobë eso home tafa nalëkakitëmëme.

¹³ Bu lugujume kofene na bubë welujuwa wege home gali telokwakëme bu betelë migisitla namëglame. Na bu mitisitla na bume tëlafe we (20) baliti, tëlafe we (20) baliti këniwi tlëwagume. Na bume gali tlome, ‘Sobo ebë baliti glo elome, na bobë nagi ebë

balitina sawege elo. Sobo wege egelobëë na fli baliti kë wegena saboblo etomo. Sobo mana wege elekefobëë na bo mana fata nëkakime.’

14 Kwe kë hobë weife lifate mago oneho bume wame lamotlola. Këme nëgeme, bu wafi tuju, na bu gali mëtehula home nagi jine mëtelëkakëma, kë lifatebë eso home megali namugujuwelëmame, ‘Sebo kë home sebobë eso home tafame tole hana nëletlamu.’

15 Kwe bume eso home aniji mutujuwelëla na bu ita tisi. Bu tisi na gali tle, ‘Ëbame baliti këtëglëmëbë wege home gali elokwakëmo, bo belë migisiya namëglame. Bo lowene nanëgelëme, bu kofaya baliti kë balitina habenuju boblo mëtëtayane?’

16 Na kwe bubë wege ho li afina tisi tle na gali tlole, ‘O eso ho, ju kë tëglënëbë tëlafe we (20) balitina bo wege fa totlë na bo jubë nagi 200 kofaya baliti këna blëge tëtë.’

17 Na eso ho gali tlole, ‘Ju bobë lale wege ho mu. Ju bobë nagi lale wege fa totle. Ju kë tokwëfo wesibi ululu sle togotleme nëgeme na bo jume meaniji këme nolë, ju jowafe we lifatebë onehobë eso home tafa egletëmeme.’

18 Na li wege ho bu mata tisi tle na gali tlole, ‘O eso ho, ju kë tëglënëbë tëlafe we (20) balitina bo jubë nagi wege këna fa totlë na bo we lujuafe we (100) kofaya baliti blëge tëtë.’

19 Na eso ho bume gali tlole, ‘Bo jume meaniji nanolë, ju tobali lifatebë eso home tafa egletëmeme.’

20 Na li wege ho bu mata tisi tle na gali tlole, ‘O eso ho. Jubë tëlafe we (20) baliti mana ekë mëbe. Bo këbë baliti afeteni sosa ëhona lei totomë na gogwa telë.

21 Bo jume uli tëgletëme nëgeme. Bo melowene latletë, “Ju këha lakalena ho nëgeme ju ho libë wesibi lamomanëbawa etatle. Wesibi ho li gogwa lëglebë kwe ju lafawa etokwakle. Na hi wesibi li ho tobalo lëglebë kwe ju lamëmëwa eletle.”

22 Na kwe kë eso ho bu kë wege home gali tlole, ‘Ju tëbo wege homu. Bo jubë galime fwa jume tëbo nëgëtëme. Ju bome melowene laletenëne, “Bo wesibi momanëba nogotomëbë lakalena ho. Wesibi li ho gogwa lëglebë kwe bo lafawa netokwaklë. Na wesibi li ho tobalo lëglebë kwe bo lamëmëwa nëletelë.” Ju melowene laletenëne? He?’

23 Ju kë lowenebëme walowene egletenëbë, kwe ju bobë baliti, baliti loloko lo mëta gogwa tugule jwa fëyemene? Na bo kënisibë bo fli kofaya balitina glo nanëkakime fene.’

24 Na bu lolime kë mitlijabë home gali tlole, ‘Sobo bu mago tëlafe we (20) baliti glo elome na 200 balitina kë tafa lëglebë home elëlome.’

25 Na bume gali motlola, ‘Eso ho. Ju hwi ele. Bu 200 baliti lamëbetlefe. Ju seme

fëyeme gali elonane sebo fli baliti mata nëglëlabëme.'

²⁶ Na bu gali tlome, 'Bo some gali nolëyo, iniwa oneho, Goto kë lëglëmebë wesibi, ululu sle motomana, kwe Goto bume fli wesibi mata lëglëmeme. Kwe iniwa oneho, Goto kë lëglëmebë wesibi, ululu sle jwa motomana kwe Goto kë wesibi bu mago ita hijika logotomeme.

²⁷ Na bome bubë eso home fatame tëboijiwa kë mëtletë nabë wameho, sobo eli bume bo belë elesumome na bobë naba li mëta mogo nalë tëtëkle etome.'"

²⁸ Jisas kë wafle gali wayawe tole na bu Jerusalem lifatewa mana tokwale. Na bubë lowene esogo mëglëlëtlabë ho nagi esogo mëtlagula.

Jisas bu eso hoha, Jerusalem lifatewa tëkaklu

²⁹ Jisas bu Betfage lifekuwa na Betani lifekuwa loliwa fwa tule. Kë lifeku bu Oliv tiwa fatini li mëta mëtëbe.

³⁰ Na Jisas bubë lowene esogo mëglëlëtlabë ho tlemalëme gali tlome, "Sobo ebë kë lugubebë lifeku elë eyeumo. Sobo eyeume, na kë lifekuwa tuhu egulona, kwe sobo afeku donki kleli, hwi eglolome, ti mëta watakuliji mototla. Ètani ho li kë donki kleli matawa hana tafa tle. Sobo taba tohwa etlome na ebelë elesulome.

³¹ Na ho li some metakune loglëyona, 'Sobo ebë donki kleli fëyeme tohwa etlone?' Kwe sobo bume metafu

saetatelo, 'Sebobë tako ho bu këna luguju nalëgleme.'"

³² Na Jisas bu kë tlemalë home jine tlëme, na bu mëtëyeu. Na bu iniwa wesibi hwi motlomo, Jisas fene gali tlome.

³³ Na bu kë donki kleli këna këkesi mototlabë taba mago taba, mana tohwa mototkweflobëë na mana kë donki kleli bolijaya ho mana takune telëbakëme, "Sobo ebë donki kleli fëyeme tohwa etlone?"

³⁴ Na bu gali tafu mëtëtatelo, "Sebobë tako ho këna lugujume."

³⁵ Na kwe bu kë donki kleli Jisame sei mëtletëkakitelo. Na bubë heletabo ëho donki klelibë amlebo mëta kahëba motoletelo. Na bu Jisame mëtaitalo, kë donki kleli matawa tafa nalogolebëme.

³⁶ Na bu këna tuju. Na oneho bubë heletabo ëho totohwa motokouja na alëge mëta gogwa motokouja. Bu Jisame fleflesu mëtletla, eso hoha fata tëgleme nëgeme.

³⁷ Na bu Oliv tiwa fatini kë tëmaitabë nounou totle, na Jerusalem lifatewa fwa tuguleme nounou latotle. Na bubë feilawa lowene esogo mëglëlëtlabë enëne fli, bu fleflesu lamëtletla. Na bu, klelegowa wesibi, Jisas kë blëge blëge totomebë, ita lowene mëtletëma na bu Gotome anisasana fleflesu këme mëtletla na bibita mototla.

³⁸ "Yaha fëyeme jine tlëlene? Sebo Goto kë jine tëglëlebë eso home fleflesu nëgletlame. Bu Gotobë afutukuna lisi

tëna. Goto kë eso home lëgaitaleme na ululu sle logotleme. Goto bu heven life mëta kë tafa logolebë bu lale na tako mu. Goto sebobë, ebë life mago onehobë lowene lëgëbetëme sle malëletëme.”

³⁹ Na Farisi ho, bu kë feilawa onehobë ku mëta mëtëtabëya na bu onehobë galime tole hana mëtletëma na bu këme gali motlola, “O Tisa, jubë lowene esogo mëglelëlabë home lëkle etome kuu namëgebëyame.”

⁴⁰ Kwe Jisas bume gali tafu tëtätëme, “Bo some gali nolëyo, ebë oneho bu kuu mëgebëyana kwe aniji buwa momolë mëgleme na Gotobë weniji bibita mëtatileme.”

Jisas Jerusalem lifate mago onehome ye tletëme

⁴¹ Jisas Jerusalem lifate lololi totle na bu kë lifate hwi telokwakle na mana bubë onehome naba tu tletëme.

⁴² Na gali tle, “Oë Jerusalem lifate mago enëne. Bo metole nanelë, iniwa wesibi sobobë lowene kë sle mogotometëyobë, lowene sle egletemome, lalowa tafa naegelome. Kwe kë wesibi ëho lameletëyo na sobo hwi hana elomo.

⁴³ Tokwafe tëbo olë somëta fata lëgleme. Na kë olëna sobobë wame enëne bu some lukume fu sle mëgletëyome na sobobë life mago lëglesini sabuwa mogotlame na wameme mokwatëyome.

⁴⁴ Na kë wame enëne bu some na sobobë lifatena iniwa tëbo mëgëtole. Na li

aniji bu li aniji matawa hana egëbamëme. Bu life silijiwa lëgëbeme. Goto some lëgaitome fene tisi tëyo kwe sobo kë olëbëme lowene sle hana tëgletelome nëgëme na kë tëbo olë some këme lisitëyome.”

Jisas Gotobë lo mago wesibi balitina hihijika onehome hehë tletëme

⁴⁵ Jisas tako lotu lowa tækaklu. Na bu seuneni fole na sipsip kleli na bulmakau kleli balitina kë hihijika mëtlekefëyabë onehome kë mago hehë tletëme.

⁴⁶ Na bu gali tle, “Gotobë bogo megali lala, ‘Bobë lo, oneho bome këme gëgali mëglelëkefë nabë lo.’ Kwe sobo ebë lo tëbo latlo na bu tokli enënebë loha lilibetëme.”

⁴⁷ Na iniwa olë, bu tako lotu lo mëta onehome okokwe latlokwefëme. Na lotu lome wege mëglabë eso enëne na Gotobë galime okokwe moglomabë ho na onehobë letitabo enëne, Jisame mogo nalë tëke moglolabë gali fame oto mëtla.

⁴⁸ Kwe bu onehome uli mëtletëmame nëgëme. Kë iniwa oneho Jisasbë gali aholokwaneme tako tole mëtletlame nëgëme na Jisame mogo nalëme tëkle jwa këme mototla.

20

Bu Jisame takune motlola, “Iniwa wesibi ju melë kë egotomebë, ya aniji tolëne”

¹ Na kë nalëwa, Jisas onehome tako lotu lo

mëglëbo mëta okokwe tlome na bu Gotobë lale gali të têtatëme. Na lotu lome wege mëglabë eso enëne na Gotobë galime okokwe moglomabë ho na onehobë letitabo enëne bu belë mitisitla,

² na takune motlola, “Ju seme gali enona, iniwa wesibi ju melë kë egotomebë, jume ya aniji tolëne? Kë afutuku ya tlënë?”

³ Na Jisas bume gali tlome, “Bo mata, some li wesibime takune nëlëyome. Sobo bome gali enona,

⁴ Jonme ya aniji tlovene, onehome tu mëta kë baptais totomebëye? Goto bu aniji tlovene o ho buwa aniji motlola?”

⁵ Bu Jisasbë gali aholokwane motlola na blalo gëgali mëtla, “Sebo megali noglolana, ‘Goto bu aniji tole,’ kwe bu seme megali logloname, ‘Kë nëgali gali nëgebë, sobo bume lowene sle egletelo jwa fëyemene?’

⁶ Kwe sebo megali noglolana, ‘Ho, buwa aniji motlola,’ kwe iniwa oneho bu seme anijina tëtëkle mëgëtayame. Iniwa oneho Jonme melowene sle mëgletlame nëgeme, ‘Bu Gotobë lowene mago gali të totokweflebë homu.’”

⁷ Na kwe bu Jisasme gali tafu mëtëtatla, “Sebo, Jonme kë aniji toglolebëme, lowene hana nëla.”

⁸ Na Jisas bume gali tlome, “Bo mata, iniwa wesibi bo melë kë nogotomëbë bome kë aniji toglonëbëme some hana gali sle noglëyome.”

Ebë wain taba liji nuju kë hwi motlolarbë tëbo enënebë wafle gali

⁹ Jisas, onehome wafle gali latlome, “Ho bu wain taba, nuju mëta tobalo tle. Na tokwafe bu fli home gali tlome, ‘Sobo bobë wain taba nuju hwi elotëna na tokwafe wali wain taba liji lalowa glo elo, baliti këna glo naegelome.’ Na kë nuju bolijaya bu kakë lifatewa tuju.

¹⁰ Feilawa olë tafa tule na kë wain taba liji mana nigliji mëtle. Këme nëgeme nuju bolijaya ho, bubë wege ho lime, bubë nuju kë hwi moglotlabë ho belë jine telëkakle, bubë wain taba liji, kë nuju mago glo nalëgleme. Na bu tuju. Kwe nuju kë hwi moglotlabë ho, bu kë wege home hwi motlola na tëkle mototla na kë mago hehë mëtëkaketla. Na bu toba alujawa tehou.

¹¹ Na ita nuju bolijaya, li wege home jine telëkakëtëme. Kwe kë enëne, bume hwi motlola na bume mata tëkle mototla na unalëme sosalë sosalë sle memototla na kë mago hehë mëtëkaketla. Na bu toba alujawa tehou.

¹² Na ita li home jine telëkakëtëme. Kwe këbëme mata unalëme sosalë sosalë sle memototla na kë mago hehë mëtëkaketla.

¹³ Na nuju bolijaya bu kë wesibi hwi tlome na këme lowene tle, ‘Bo habelë nëgelëmene? Bo melowene nanelë. “Bobë jowa iko nëba jine nëgelëkakëtëmëme. Bo bume tako tole nanëletelë.”

Bu bubë gali aholokwane moglolume na bume hana tëbo mogotlame.” Na bu kë nëbame jine telëkakëtëme.

¹⁴ Na nuju kë hwi motlotlabë ho bu kë nëbame hwi mëtlagila na blalo gëgali mëtla, ‘Ebë ho kë ligisibë ebë kë nujubë bolijayabë bowene. Tokwafe bolijaya gli lëglena, kwe bu kë nuju bolijayame lëtabeme. Te, mana mogo nalë tëkle manotla na tokwafe bolijaya gli lëglena kwe kë nuju sebo nanëglame.’

¹⁵ Këme nëgeme bu tisi tëme na bume nuju mëglëbo elëme hehë motokoutla na mogo nalë mana tëkle motlola.

Sobo habë lowene lalone, kë nuju bolijaya bubë nuju kë hwi moglotlabë home habelë lototomemene?

¹⁶ Sobo aholokwane elo, bu ligisi nëgena, na bu kë home mogo nalë tëbo lototomeme. Na ita kë wain taba liji nuju fli home yo lolomeme.” Oneho kë gali aholokwane mëtla na gali mëtla, “Melë asa malële.”

¹⁷ Jisas bume hwi tëbelëkakëme na takune tle, “Ebë gali, Gotobë bogo mëta kë tëgëbebë, bubë wayobë habelëne? Kë gali melëgëbelalële,

‘Lo gliji ho, bu lo, anijina gliji mëtla.

Na kwe bu li anijime meweniji lamëtla, “Tëbowa.”

Këme nëgeme, mëglëbo elë fo mëtetokwakëya.

Kwe kë aniji mëglëbo elë kë fo mëtetokwakëyabë bu lale anijimu ebanë. Lo bulego kë aniji mëta lotle.

Kë aniji jwa nëgena, kwe lo fli lëgleme.’

¹⁸ Iniwa oneho bu kë aniji matawa mitigwëyana kwe bu mogo nalë tëbo miglitayame. Na kë aniji, home matawa etigwatlena kwe bume lëlafowa egotleme.”

¹⁹ Gotobë galime okokwe moglomabë ho na lotu lome wege mëglabë eso enëne melowene lamëtla, “Jisas seme fwa wafle gali lolonafe. Bu melowene lalëletëna, ‘Sebo kë tëbo enëne. Sebo nuju kë hwi noglotlabë tëbo enëne.’” Këme nëgeme, bu Jisame ëjeha fa motlame. Kwe bu onehome uli mëtletëmame nëgeme, oneho Jisame tako tole lamëtletla. Na bu Jisame fa jwa këme mototla.

Bu Jisame, takis baliti Sisarme mëglëlabë lowenebëme, takune motlola

²⁰ Gotobë galime okokwe moglomabë ho na lotu lome wege mëglabë eso enëne bu Jisame olëli olëli mana hwiwa mëtëbelëkakla. Na bu ho flime jine mëtlëma, Jisame mogweliha hwi namëbelokwaklame. Kë enëne mesosogëna lamotlola, “Sebo jubë gali aholokwaneme tako tole nanëla.” Bu metole lamëtla, Jisame sogëname takune manolola na bu Rom life mago eso ho, Sisarme, tëbo gali naloglome. Kë

têbo galime fwa bume këna so namëgëtatlame fene.

²¹ Na kë mogweliha hwi ho, Jisame këme takune motlola, “Tisa, sebo lowene nanëla, ju nëgali gali homufe. Ju nëgali galimu iniwa onehome të têtatëme. Ju lebutako balitina home na baliti jwa home, lili gali hana gali tlome. Weye. Ju iniwa home, jowa galime fwa gali tlome. Ju iniwa onehome, Gotobë gali, iniyafeme fwa okokwe tlome.

²² Na ju habë lowene lalene? Sebo takis baliti Rom life mago eso ho, Sisarme, lalowa nëglëlamene o hanane? Këha lowene lalowa nëglamene o hanane?”

²³ Kwe Jisas bubë sosogëna lowene walowene tletëme na bume këme gali tlome,

²⁴ “Sobo jowa baliti bome ehitëna, hwi nanoglëme.” Na bu baliti mëtëhitla. Na Jisas këbëme hwi tlome na takune tlome, “Ebë amtëtomba yalëbë lëbetlene, na yalëbë weniji lëbetlene?” Na këme megali motlola, “Ebë Sisarbëyo.”

²⁵ Na Jisas bume gali tlome, “Te! Sisarbë wesibiye, kwe Sisarme eglëlome. Gotobë wesibiye kwe Gotome eglëlome.”

²⁶ Bu onehobë naba li mëta bume sogëna galime yafe takune motlola, bu Rom life mago eso home, tëbo gali naloglome fene. Kwe bu tëbo gali hana gali tle. Bu kë tafu têtatëmebë gali yafe aholokwane motlola na klelego memëtla na tutune

memëtla na këme kuju mëtebëya.

Sadyusi ho, bu Jisame, ho gli mago hujubëme takune motlola

²⁷ Na Sadyusi ho fli, Jisas belë mitisiya. Sadyusi hobë lowene metëbetëmelatle, “Oneho lebo mëgebëyana, hana huhuju mëglame.”

²⁸ Na bu Jisame takune motlola, “Tisa, ëbame, Moses bu ebë gali meyahi latletëna, ‘Ho nëba jwa lebo lëgëbena, na bubë mëse mana tafa eglena, kwe ita bolijamo sasei lëlë, nëbaneni namëgelome. Na kë nëbale, lebo kë lëgëbebë hobë wenijina namëtäbëyame. Na bu kë hobë nëbaleha tafa namëglame, na lebo kë lëgëbebë hobë weniji lëgëbagutle nalëgleme.’

²⁹ Ètani, ho li tobali ita jowa kënji bolijamonime tlebime. Bolijaha mëse bu afina sei tlë na kwe kë bolijaha nëba jwa gli tle.

³⁰ Këme nëgeme, ita këme këbë, kë mëseme sei tlë, kwe bu mata nëba jwa gli tle.

³¹ Na ita këme këbë bu mata, melatle, kë fenene. Bu iniwa bolijamoni melamëtla, kë mëseme fwa sei mëtlekefëya na bu iniwa nëba jwa gigli mëtla.

³² Na tokwafe kë mëse, bu mata, gli tle.

³³ Na sebo jume metakune nanëlëyo. Tokwafe gigli kë mëglabë oneho huhuju mëglana, kë mëse fëye hobë mëse tafa eglëtlamene? Ju wafi lowene ele, kë mëseme

tobali ita tële ho këniji kë sei mëtleya.”

³⁴ Na Jisas bume gali tlome, “Oneho, ebë olëna kë tafa mëglabë bu one sesei melekefëya.

³⁵ Kwe tokwafe Goto bu fli lebo onehome megali loglomeme, ‘Sobo huhuju egelome na bona tafa nëlame.’ Kë huju mëglabë enëne bu hana sesei mëglame.

³⁶ Bu heven life mago enselha mëtabëyame nëgеме, na bu ita gigli hana mëglame. Goto bume matëmatë mago wahujuju logotomeme nëgеме, bubë nëbaleha këme tafa mletlame.

³⁷ Na bo some lebo enëne huhuju mëglabë gali li të nëtatëyo. Ètani Moses bu mata seme melebotane latëtatëna. Oneho gigli mëglabë, bu matëmatë mago huhuju mëglame. Ètani Moses bu, ahoju ti abo mëta kë u tëglebë galime meanebo gali latletle. Na bu Gotome melë galina yahi tletle, ‘Tako Ho, bu semleninobë, Abraham, Aisak, Jekopnabë Goto mana ekë tafa lële.’

³⁸ Kë gali bu seme melebotane lalëtatëna, Goto bu lebo enënebë Goto nane. Weye. Bu mana kë tafa mëglabë enënebë Goto. Gotobë naba lime, iniwa oneho, giglibë na mana kë tafa mëglabë, iniwa bu mana hwi mëtaya.”

³⁹ Na Gotobë galime okokwe moglomabë ho fli, bu Jisasbë gali yafe aholokwane mëtla na bume gali motlola, “Tisa, ju bume

kë tafu ètatëmebë gali lalemu.”

⁴⁰ Na Sadyusi ho bu Jiasme li loweneme takune moglolame fene, kwe bu uli memëtletlamu.

Jisas, Goto kë aniji toglolebë hobë galime, onehome takune tlome

⁴¹ Na Jisas onehome takune tlome, “Bu megali fëyeme mëlekefëyane, ‘Goto kë aniji toglolebë ho, onehome nëno lëglebë ho, kë ho bu Devitbë afenëbo.’ Sobo habelë lowene laletelone, bu kë galime fëyeme gali mëlekefëyane?

⁴² Ètani Devit buwa Buk Song mëta meyahi latle, ‘Goto, bu bobë eso home megali lalolole,

“Ju bobë tobamu toba elë tafa egletenëme, na ju bona onehome eso home tafa nëletemome.

⁴³ Sebo onehome mana tafa nëlelëmome, na bo jume kë wame mëglëyobë home boblo nogotomëme na bu jubë gali boblo jwa mëtome.”

⁴⁴ Sobo hwi elo. Devit kwe kë home mefë latotle, ‘Bobë eso ho.’ Na bu Devitbë bowene tafa habelë lëglemene?”

Gotobë galime okokwe moglomabë ho bu tëbo lowene esogo mëtlelëkefla

⁴⁵ Iniwa oneho bubë gali mana aholokwane mëtlagulabëë, na mana bubë lowene esogo mëglelëtlabë home gali tlome,

⁴⁶ “Sobo Gotobë galime okokwe moglomabë home

ululu sle saeletemo. Bubë lowene mëta asa etabetemo. Bu metole lamla, oneho bume hwi molomame na melowene mëletëmame, 'Bu lale enënefe.' Këme nëgeme, bu heletabo ëho gëgelo motokwefëma na asë mla. Na bu këna bume fwa fleflesu mla na bibita motoma. Na bu oneho këme kë loloko mëglabë lifeku mëta asë mëglana, bu metole lamla, oneho bume sësle galina gali namoglomame. Bu lotu lome tafa mëglana, bu metole lamla, onehobë naba li mëta, eso hobë tafa labume tafa mlame. Na hi wesibi salë olëna, bu metole lamla, onehobë naba li mëta, eso hobë tafa labume tafa mlame, oneho bume melowene namëgletëmame, 'Letitabo enënefe.' Na bu këna bume fwa fleflesu mla na bibita motoma.

⁴⁷ Na bu seiju oneme sosogëna moloma, bubë iniwa wesibi manawa mëglëma namëglame. Na bu memelë lamla, onehobë naba li mëta, Gotome megëgali gëgali mëglelëlabëë, bubë tëbo lowene këna ëho motoma, oneho bu melowene namëgletëmame, 'Letitabo enënefe.' Unina, Goto onehobë tëbo lowene aholokwane loglometëmebë olëna, bu kë Gotobë galime okokwe moglomabë home tëbomu logotomeme."

21

*Wesibi jwa mëse, baliti
Gotome tlële*

¹ Jisas tako lotu lo mëta tafa tle, na bu lebutako

balitina onehome hwi tlome, bu Gotome kë sike melekefëtlabë bokis mëta baliti sisike mëtletla.

² Na bu mana mehwi tolë, wesibi jwa seiju mëse, baliti tokwëtokwë tële kë bokis mëta sike tule.

³ Na Jisas gali tle, "Bo some nëgali nanolëyo. Fli oneho kwe bu kë bokis mëta, tokwëfo balitiha sisike mla, kwe Goto kë wesibi jwa seiju mëseme melowene lalëletë, 'Bu feilawa balitimu sike ele.'

⁴ Fli oneho bubë feilawa baliti mëbetëme kwe tëlewa sike mla na fli mana mëbetëme. Kwe kë wesibi jwa seiju mëse bu baliti tokwëfo mu, kwe bubë hi wesibi glo baliti iniwa sike ele."

*Jisas bu melëme gali tle,
"Gotobë tako lotu lo yaye
mogotlame"*

⁵ Jisasbë lowene esogo mëglelëtlabë ho, bu Gotobë tako lotu lo hwi motlola na gali mëtla, "Ebë lo bu lale klisomu. Bu ebë lo lale lale anijinamu gliji mëtla. Na lale lale wesibina, Gotome kë mëglëlabë, ebë lo neglina lamëtlëla."

⁶ Na Jisas gali tlome, "Bo ebë wesibi sobo kë hwi eglomobëme gali nolëyo. Tokwafe bu ebë lo iniwa yaye mogotlame. Fli aniji matawa hana mëgëbëme. Iniwa sisike mëkakame."

*Jisas gali tle, "Tokwafe tëbo
olë fata lëgleme"*

⁷ Na kwe bu Jisasmë takune motlola, "Tisa, bu ebë lo fëye olëna yaye mogotlamene? Sebo fëye

wesibi afina hwi noglolamene na këme lowene nëletlame, kë olë nounou ekë lële.”

⁸ Na Jisas gali tlome, “Sobo ululu sle saelo. Ho some sosogëna moglëyolime. Unina feilawa ho migisiyame na sogëname megali mlame, ‘Bo onehome tëbo lowene mago nëno nëgelëbë ho.’ Na bu gali mëglame, ‘Yawe olë nounou ekë lële.’ Sobo bubë gali asa aholokwane elomo na bume asa esogo elelëmo.

⁹ Na sobo fli lifate enëne tako momogli mëtayabë gali aholokwane egelona, sobo uli asa elo. Kë wesibi bu afina melë mëgleme, kwe yawe olë nounou hana lëkeke.”

¹⁰ Na bu gali tlome, “Li life li life mago ho, bu li life hona momogli mëgëtayame.

¹¹ Na tako nano ekoujamëme. Na li life li life oneho tako foneme gigli mëkoujame na tako ato elili mëkoujame. Na sobo tokwafe fli tëbo wesibi matafa mago hwi eglomome na sobo kë wesibime tako uli egelomemu.

¹² Kë tëbo wesibi bu fata jwa mëleme na bu some fafa mlame na tëbo mëtome. Bu bubë lotu lo elëme mëlelëkakujome na bubë letitabo enëne belë sei mugujuwelëyome. Na sobobë gali aholokwane molëyome. Na bu some kalabusu lowa sike mlame. Na bu gavman enëne belë na eso enëne belë sei mugujuwelëyome, sobo bome lowene sle egletëname nëgeme.

¹³ Na sobo kë nalë, Gotobë lale gali bume lalowa të egëtatemome.

¹⁴ Kwe sobo tutune asa elo na melowene asa elo, ‘Sebo habë gali noglomamene?’ Weye.

¹⁵ Bo some kë olëna lale lowene nëglëyome. Na sobo kë lale lowenena gali të egëtatemome. Na some kë wame moglëyobë ho kë gali aholokwane mëglëyona, na sobobë gali hana momata mëgëtatëyome na megali hana mëglame, ‘Bu yaya gali lamla.’ Weyewa. Hanane mu.

¹⁶ Na tokwafe, blijayanino, bitamenino, bolijahanino, ilawa magobë, yabeninona, bu mata some kë wame moglëyobë ho belë sei mugujuwelëyome. Na somago wali mogo nalë tëtëkle mëtayame.

¹⁷ Na iniwa oneho some këme gëglë mëglelëyome, sobo bome lowene sle egletëname nëgeme.

¹⁸ Kwe Goto bu some tafa lëglelëyome na some hana kile lëgëtome. Na ho sobobë heven lifate magobë lale tafa hana tëbo mëgëtatëyome.

¹⁹ Sobo kë tëbo olëna bome kë lowene sle egletëname lowene asa elëkëlo. Sobo melë egelona kwe sobo tokwafe unaanalëme lale tafa egelome.”

Jisas gali tle, “Jerusalem lifate tëbo lëgleme”

²⁰ Na Jisas ita gali tle, “Sobo tokwafe mehwi egelona, wame home boblo mogotomabë enëne,

Jerusalem lifate lukume fu mēgletlana na ini sabuwa mogotlana, kwe sobo kēme lowene elome, kē lifate tēbo lēglebē olē ekē fata lēlefe.

21 Na kē olēna, Judia provins mēta kē tafa mēglabē oneho, bu fatiniwa matlēbouja. Na Jerusalem lifate mēta kē tafa mēgelulabē oneho, bu kē lifate kile mlame na jebelēme mēlēboujame. Na Jerusalem lifate li mēta kē tafa mēglabē oneho, bu lifatewa ita asa matēkakluja.

22 Kē nalē, Jerusalem lifate enēneme, memelē tēbo lowene kē mēglabē enēneme Goto tēbo logotomeme. Na iniwa gali, bu Gotobē bogo mēta kē yahi mētēglabē, bu iniyafemu mefata mēgleme.

23 Kē olēna, one nēbale imo nabē na one nēbale kolēbo nabē, bo bume tako maninibo nanēletemēmu. Masiwafe, bu habēna mēglēnēboujamene? Tēbo olē, kē onehome fata lēgletēmeme. Na Goto bu kē onehome wame loglomeme na tēbo logotomeme.

24 Na wame home boblo mogotomabē enēne bu flime mogo nalē tēbo motomame. Na iniwa tatako lifate ebē life mēta kē mēgēbagubē lifate elē flime mēlelumame na kalabusu lowa sike mokoujame. Na li lifate mago wame enēne, na Gotome lowene jwa kē mēgletlabē enēne, bu Jerusalem lifate hijika motomame na yelukwafe tuku mlame. Bu Jerusalem

lifate mana bubē yelukwafe mēta mana lēgebetēmebē, na mana Goto bume gali lolomeme, ‘Sobo emago eyeu.’ Na bu kē lifate kile motlame na mujame.”

Tokwafe Gotobē life mago ho ligisime

25 Jisas ita gali tle, “Kē nalēwa, tetēbo klelegowa wesibi, kliji, yeme, sēgetobana mēta fata mēgleme. Na iniwa lifate mago oneho, bu nutubē tako liglinitigo lego aholokwane mēglana, kwe bu tako tutune mēglame na tako ulimu mēglame.

26 Na feilawa oneho, iniwa tēbo wesibi kē lifateme kē fata mēglebēme tako tutune mēglame. Na bu tako uli mēglame na nabasahoba mlame na mogowa mitigwēyame. Iniwa matafa mago wesibi lili mēgleme nēgeme na bu kēme uli mēglame.

27 Na kē nalē, iniwa oneho bu bome, Gotobē life mago home, mehwi mogloname, bo oloba nagi nigisime. Na bo tako lolokwēnena, na tako kliji elulego fenene kēhana nigisime.

28 Sobo kē tēbo wesibi hwi eglomona, kwe sobo kēme uli asa elo, walena satafa elo. Goto some nēno lēglebē olē nounou lēgleme nēgeme.”

Jisas binibwe ti tahweji waflē gali latle

29 Jisas waflē gali tlome, “Sobo binibwe time na li time walowene eletemo.

³⁰ Bubë laba luklu mëglena na tahweji foke mëglena sobo kēbēme lowene eletelo, ‘Ebë wanagli tei fe.’

³¹ Kē fenene. Sobo kē tetēbo wesibi, hwi eglomona, sobo melowene naegelome, ‘Goto iniwa onehobē eso home natafa lēgletēmēbē olē nounou lalēletle.’

³² Bo some nēgali gali nanēlēyo, fli oneho bu ebē olēna kē tafa mëglabē, bu mana mētabēyame na kē iniwa tetēbo wesibi, mana fata mēleme.

³³ Lifena matafana tēbo mëgleme, kwe bobē gali unaunalēme melē lēbagukēfeme.”

Sobo sagli sle elēlome na walena etabome

³⁴ Jisas ita gali tlome, “Sobo ululu sle saelo. Sobo bia na fli biaha wesibi itaita asa hihi elo na kēna yaya elome. Na sobo sobobē ato lēgaitalebē wesibime feilawa tutune asa elo. Sobo kēha lowene mēta tafa eglekefona kwe bo kē nigisibē olē bu some hokweinawa tafu lotokwakijome,

³⁵ kole bu klelime fene tafu etole. Kē olē li life li life mago onehome iniwa, lafatawa lokoutēmeme.

³⁶ Sobo olēli olēli walena satafa elekefo. Na sobo Gotome olēli olēli takune elokweflome, bu some lēgaito nalēgleme na bubē afutuku some lēlēyome. Na tokwafe kē tēbo wesibi somēta, fata mëglena kwe sobo kē afutukuna lalowa boblo egotomome na bu some hana tēbo mēgētome. Na sobo tokwafe, bome, Gotobē life

mago hobē naba lime, tiniiji jwa naeglibetēname.”

³⁷ Na iniwa olē, Jisas tako lotu lo mēta onehome okokwe latlokwefēme. Kwe klabēye, bu Oliv tiwa fatini mēta ni tubekēfe.

³⁸ Na iniwa oneho, bu olobalē mu, tako lotu lowa mutujukēfēya, bubē gali aholokwane namoglolame.

22

Judas bu lotu lome wege mëglabē eso enēneme gali sle tētātēme, “Bo Jisasme some yo noglēyome”

¹ Israelbē ilawa magobē tako lotu olē fata lēgletēmeme nounou tletēme. Israelbē afenēbo, bu kē lotu olēna, sēse wesibi jwa bletē nage hi mētlekefēya. Na bu kē lotu olē, Goto ētani bosemnime kēna tēgaitamebē olē na Isip lifate kēna kile mētēglabē olē, lowene mētlekefētla.

² Na lotu lome wege mëglabē eso enēne na Gotobē galime okokwe moglomabē ho bu onehome uli mētletēmame nēgeme na bu blalo gali kēme fa mototla, Jisasme hwelutuwa mogo nalē tēkle namogotlame.

³ Judas Iskariot na fli we ita jowa (11) hona, bu Jisasbē lowene esogo mëgletlābē ho. Na Satan bu Judasbē lowenewa tēkaklu tle.

⁴ Na bu lotu lome wege mëglabē eso enēneme na lotu lo magobē plismanēme kēme tuju tēme, Jisasme yo naloglomebē galime gēgali nalēglelēmeme.

⁵ Na kë enëne bubë gali aholokwane motlolabëë na tako fleflesu memëtletlamu na bu buna gali sle mototla, bume baliti tokwafe namëglëlabëme.

⁶ Na Judas bubë galime helawa tletëme. Na bu këme melowene tle, “Bo Jisame habelë yo noglomëmene?” Bu melowene tle, “Lebutako oneho Jisasna mëtabëya jwa mlame na bo Jisame mana yo nolomëme.”

Jisasbë lowene esogo mëtleletelobë ho hi wesibi loko mëtëto

⁷ Sëse tabo wesibi jwa bletë nage kë hi mëtlekefëyabë olë wafata tletëme. Kë olëna Israelbë afenëbo, bu sipsip kleli nëbale tëtëkle mëtëtakefëya na hihi mëtla. Hihi mëtlekefëyabë, na Goto, bubë bosemnenime këna taitamebë olë lowene mëtlekefëtla.

⁸ Këme nëgëme Jisas Pitaname, Jonname gali tlome, “Sobo eyeumo na tako lotu olëbë hi wesibi loko eoutome. Sebo hi nanëglame.”

⁹ Na tlemalë bume gali motlolo, “Sebo kë hi wesibi hameta loko nëgëtomene?”

¹⁰ Na bume gali tlome, “Sobo Jerusalem lifatewa eyeume. Na ho li, sospenëna tu lëgehilena some alëgëme esune lëglëyome. Na sobo bume nagi elëkaklome. Na bu lowa lëkakluna, sobo mata kë lowa ekaklujome.

¹¹ Na kë lo bolijaya home megali egelujuwelëlome, “Sebobë tisa bu megali lalële, “Hi lo hametane? Bona, bobë

lowene esogo mëgleletë nabë hona, kë hi lo mëta, sipsip kleli hi nanëglëlemëme, Goto bu sebobë semleninome këna taitamebë olë, lowene nanëgletlame.”

¹² Na kwe bu some matawa kë ke logolebë lo ke lebotane lëgëtatëyome. Kë lo bu tafa labuna, na maseina. Sobo kë hi lo mëta sebobë hi wesibi loko etome.”

¹³ Na bu tlemalëme mana jine telëkakëme. Na bu tako lifatewa mëtëyeu. Na bu iniwa wesibi hwi motlomo, Jisas fene gali tlome. Na bu hi wesibi sagli motlolo.

Jisas bu bletë nage na wain taba liji tu bubë lowene esogo mëgleletlabë home tlëme

¹⁴ Hi olë fata tle, na Jisas matawa kë ke logolebë lo ke masei mëta tafa tle. Na bubë gali tème kë jine tëglëmebë ho, buna iniwa tafa mëtla.

¹⁵ Na bume gali tlome, “Bo ebë hi wesibi sobona hi nëglame, tako tole nanelë, Goto, sebobë semleninome këna tëgaitamebë olë lowene nanëgletlame. Bo sobona ebë hi wesibi afina hi nëlame, na tokwafe bo elili mana fa nogotlëme.

¹⁶ Bo some gali nolëyo, bo sobona ebë tako lotu olëbë hi wesibi ita hana hi nëglame. Kwe tokwafe, Goto iniwa onehobë eso home tafa lëgletëmebë olë fata lëglëna, ebë tako lotu olë hi nëglabë wayo mana olafa lëgleme. Na bo ebë tako lotu olëbë hi wesibi ita mana hi nëgelëme.”

¹⁷ Na bu wain taba liji tuna kabo fa tëtamë na Gotome gali tlole, “Ebë wain taba liji

tu, yaha fëyeme enënëane?" Na bu gali tloime, "Sobo ebë tu fa etlome na sobo lalo hi ekoujome."

¹⁸ Bo some gali nolëyo, bo wain taba liji tu eliwa sobona tei hi nëla. Kwe tokwafe Goto bu onehobë eso home tafa lëgletëmebë olë fata lëglena kwe bo wain taba liji tu mana ita hi nëgelëme.

¹⁹ Na bu bletë nage fa totle, na Gotome gali tlole, "Yaha fëyeme enënëane?" Na fufu totle na bubë lowene esogo mëglelëtlabë home sa tëtätëme. Na gali tloime, "Ebë bobë atome lëlekuju ne. Bobë ato kë nëglëyobë some lëgaitome. Sebo ebë bletë nage fene hi nëla, sobo itaita melë sa elekefo, bome lowene eglekefëtë nabëme."

²⁰ Bu bletë nage wahi mëtla, na bu wain taba liji tu kabo fa tëta na bletë nage fene tlëme ita metlëme tle. Na bu gali tloime, "Ebë bobë winome lëlekuju lële. Bobë wino kë lugujubë, some lëgaitome. Ètani Goto bu Mosesme megali sle latlole, Israelbë afenëbome lëgaitameme. Kwe bobë wino kë lugujubë këme lëlekuju lëgleme, Goto bu bubë onehome tiho gali sle tëtätëme, bume lëgaitame nalëglebëme.

²¹ Sobo aholokwane elo, bome wame ho belë yo loglonëbë ho bu sebona ebë masei mëta weife tafa nëla.

²² Kwe bo, Gotobë life mago ho, bo gli nëgelëme, Goto ètani fene gali tle. Kwe

kë ho bome kë yo loglomebë, masiwafe, bu tëbo ligitame."

²³ Na bubë lowene esogo mëglelëtlabë ho kë gali yafe aholokwane motlola, na blalo tëtakune mëtletlogwaya, "Melë yalë logotlemene?"

Semago, logouta home, ya tafa lëlene

²⁴ Na kwe bubë lowene esogo mëglelëtlabë ho bu blalo momata mëtletlogwaya, "Semago, logouta home, ya tafa lëlene?"

²⁵ Na Jisas bume gali tloime, "Israelbë afenëboni mëtabëya jwa mëglabë enënëbë eso ho, bu memelë lamla, onehome baba tei motoma. Na bu metole lamla, oneho bume megali molomame, 'Sebobë lalë lakalena letitabo ho.'

²⁶ Kwe, kë eso ho fene mëtabëya, sobo këha lowene asa fa etatemo. Weye. Matëbe. Ho li somago logouta home tafa lëglebëme tole lëglena kwe bu melë salëletëyo, atwati hoha lëtäbeme. Na sobobë eso ho bu melë salëletëyo, some wegeme lëgaito hoha tafa lëletëyome.

²⁷ Sobo walowene elo. Mogoutayame kë tafa mëglabë ho, bu memelë lamla, bu masei mëta wege jwa tafawa tei lële na bubë wege ho hi wesibi tobanawa mehweitëma na masei mëta gogwa mëkakitëma na bu mana hiwa lële. Bo kwe, këha hana nëletëyo sobobë ku mëta. Bo some wegeme nëgaito hoha nëtabetëyo.

²⁸ Tëbo wesibi bome kë susu mëtëtanëbë, kwe sobo

bona tafa tla na hana kile têtana.

²⁹ Bobë aya bu bome meaniji latlonë, onehobë eso home tafa nêgletemëme. Na kë fenene bo some këme aniji nolëyo, onehobë eso home bona tafa nanêgletëmame.

³⁰ Na bo tokwafe onehobë eso home tafa nêgletemëna, sobo bona bobë masei mëta tafa nêglame na hi wesibi hi nêlame. Na sobo eso hobë tafa labu mëta tafa egelome, na sobo Israelbë we ita tële iko nêbalebë bosesmenibë eso home tafa egletemome na bubë lowene mana hwi ebelëkakëtemome.”

Jisas megali latle, “Pita, ju bome kë lowene egletenëbë lowene able eglelëleme”

³¹ Na Jisas Pitame gali tlole, “Saimon, aholokwane ele. Satan bu Gotome watakune tlole, sobobë lowene feilawa susu nalogotometëyome. Bu mehwi naloglëyome, sobo bome kë lowene egletenabë lowene mëta mana tafa egelomene o aholokwana ti egelome.

³² Kwe bo Gotome, jume lëgaitame, wagali nololë, ju bome kë lowene egletenëbë lowene iniwa aholokwana ti jwa naegleme. Kwe tokwafe ju bome kë lowene egletenëbë lowene ita lowene egletlana, kwe juna kë tafa egelobë afanime, egaitameme, bu bome kë lowene mëgletë nabë lowene aholokwana ti jwa namëglame.”

³³ Na Pita bume gali tlole, “O tako ho. Bu jume

kalabusu lowa mëglelujona, kwe bo juna kalabusu lo mëta weife lalowa tafa nêgelulome na sebo weife lalowa gigli nêgelome. Bo kë wesibime uli hana nêletelë.”

³⁴ Na Jisas bume gali tlole, “Pita, bo jume gali nolë, eli klabë, kekelo gali jwa lëglana, ju bome kë lowene egletenëbë loweneme aowafe able eglomeme.”

Jisas megali tlole, “Sobo baliti, musu, wame kosina meegehoyome”

³⁵ Na Jisas bubë lowene esogo mëglelëtlabë home gali tlole, “Ëbame bo some Gotobë gali tëme jine tëglëyona sobo baliti, musu, juba jibona hana tehojo. Na sobo kë tëgëyobë nalë, sobo wesibi jwa tafa tulone?” Na bume gali motlola, “Weye.”

³⁶ Na bume gali tlole, “Kwe eli, sobo baliti musuna, musumuna meegehoyogelome. Na ju wame kosi jwa nêgena kwe jubë heletabo gelowa ëho, li home balitina hihijikame elëleme na wame kosi kë balitina fa etleme.

³⁷ Ètani bu, Gotobë bogo mëta wayahi tle, ‘Oneho bume mehwi lamotlola, tëbo ho fenene.’ Na bo some gali nolëyo, tokwafe oneho bome këha melë mëgëtaname. Ètani bu Gotobë bogo mëta meyahi mëtla, wesibi bome fata mëgletenëme, na kë wesibi bu iniyafe fata mëgleme ekëne.”

³⁸ Na bume gali motlola, “Tako Ho, hwi ele. Sebo wame kosi tële ekëne

mëbetëna.” Na bu gali tlome,
“Ta tei.”

*Jisas Oliv tiwa fatini mëta
Gotome gëgali tlelële*

³⁹ Na Jisas lifate kile tle na
bu Oliv tiwa fatiniwa
tokwale, bu itaita fene
tokwakefle. Na bubë lowene
esogo mëglelëtlabë ho bume
nagi mëtlëla.

⁴⁰ Bu kë belë fwa mutula,
na bume gali tlome, “Sobo
Gotome gëgali eglelëlome,
some lëgaito nalëgleme na
some su mëgëto wesibi
somëta fata jwa
namëgletëyome.”

⁴¹ Na bume hune totome.
Na ho aniji tuku lëkakeme, kë
aniji egujuwetigwabë fenene
Jisas këniiji mefë latëkake. Na
bu sëkefo miti tafa tle na
Gotome mana gëgali tlelële,

⁴² “O aya. Ju metole eglena
kwe ju ebë tëbo wesibi bome
kë fata mëgletenëbë, bo mago
sike ekaketenëme. Kwe ju
bobë tole asa esogo elelëtenë.
Matëbemu. Jubë tolewa
saesogo elelële.”

⁴³ Na heven life mago ensel
bume tisi tle na bume taitale.

⁴⁴ Na Jisas bu tako
maninibo latle na Gotome
anisanamu gëgali tlelële.
Na bubë afeteni tu, wino
fene mesësëbo tletle na life
mëta toto tletle.

⁴⁵ Bu Gotome wagëgali
tlelële, na huju tle, na bubë
lowene esogo mëglelëtlabë ho
betelë ita tujju. Na bume nina
hwi tlome, bu tako hobota
mëtletlame nëgeme këme ni
mëtebëya.

⁴⁶ Na bume gali tlome,
“Sobo fëyeme ni ebone? Sobo

huhuju elome na Gotome
gëgali elelëlome, some lëgaito
nalëgleme na su mëgëto
wesibi somëta fata jwa
namëgletëyome.”

*Judas Jisasme wame home yo
tlome*

⁴⁷ Jisas mana gëgali tle na
feilawa ho mana mitisitla na
Judas kë enëneme toutatëme.
Judas, ebë Jisasbë lowene
esogo mëglelëtlabë ho li.
Jisasbë lowene esogo
mëglelëtlabë ho këniiji, we ita
tële. Na bu Jisasme loliwa tisi
tle, bume sësle nalogotleme.

⁴⁸ Kwe Jisas bume takune
tlole, “Judas, ju bome,
Gotobë life mago home,
fëyeme sësle etanëne na këna
wame home yo elomeme.”

⁴⁹ Na bubë lowene esogo
mëglelëtlabë ho, buna kë tafa
mëtlabë, bu këme hwi mëtla,
bu Jisasme fa mogotlame
nounou ekënefe. Na Jisasme
këme takune motlola, “Tako
ho, sebo bume wame kosina
lalowa tëtëke nëglamene?”

⁵⁰ Na bu mago ho li, wame
kosi ki tokoke, na lotu lome
wege lëglebë letitabo hobë,
wege hobë tobamu elë mago
aholo sika metëtatlë.

⁵¹ Kwe Jisas kë wesibi hwi
tlole na gali tlome, “Matëbe.
Eme fwa tou elo!” Na bubë
toba kë hobë aholome gwa
tëtatlë na laslewa tëkakettle.

⁵² Jisasme fame kë
mitisitlabë enëne bu melë,
lotu lome wege mëglabë eso
enëne na lotu lo magobë
plismanë, na letitabo enëne.
Na Jisas bume gali tlome,
“Sobo kosina atobeilana

bome fame esijone? Sobo melowene laletēnane, 'Bo tokli ho,' eēē?"

⁵³ Itaita, bo sobona tako lotu lo mēta kē tafa tēglekefēyabē na kē nalē sobo bome mana hana fa tētana. Kwe sobo bome kēna fa egētanabē olē ekēnefe. Satan bu tako afutukuna ekē lētabe.

Pita bu Jisame kē lowene lēgletlebē loweneme able tle

⁵⁴ Jisas wagali tlome, na bume mana fa mototla na lotu lome wege lēglebē letitabo hobē lowa mētletlula. Na Pita bume nagi hwiwa hwiwa tlagume.

⁵⁵ Na bu lotu lome wege lēglebē letitabo hobē lo li mago lēglesī elē tēkaklu. Na fli enēne bu kē mēta ahoju hoho mētletlula. Na Pita buna kē ahoju mēta sa mētla.

⁵⁶ Na wege mēse bu Pitame hwi tole, ahojume sa tle. Na kē wege mēse bume tēselēle, na gali tle, "Kē ho bu melē Jisasna kē tafa mētlabē ho."

⁵⁷ Kwe Pita bu able tle, "Mēse mētabone. Bo kē home lowene hana nēletelēmu. Hanane mu."

⁵⁸ Na bu sogē tafawa tle na ho li tēselēle na megali tole, "Ju mata, bubē lowene esogo tēglelētēlobē ho li." Kwe Pita bu able metle, "Hanane mu. Bo bubē lowene esogo tēglelētēlobē ho nane."

⁵⁹ Bu tako tafaha tle na ho li anisasana gali tle, "Nēgalimu. Hwi elo. Bu mata Galili provins mago holife. Kē ho buna kē tafa mētlekefēyabē ho."

⁶⁰ Kwe Pita able tle, "Ju kē gali eglebē gali bo lowene hana nēletelēmu. Hanane mu." Bu mana gēgali tle, na kekelo mana huju tle.

⁶¹ Na Jisas swaya tletle na Pitame hwi telokwakle. Na Pita, Jisas kē gali toglolebē gali ita lowene tletle. Kē gali melē, "Eli klabē, kekelo gali jwa lēglena, ju bome kē lowene egletenēbē loweneme aowafe able eglomeme."

⁶² Na Pita bu able kē tēglebēme lowene tle na lo li mago lēglesī mago tēkakli, na tako ye kle totle.

Bu Jisame ssonatlētlē memototla na tēkle mototla

⁶³ Jisas lotu lome wege lēglebē letitabo hobē lo mēta tafa tle na bume kē fa mototlabē ho bume ssonatlētlē memototla na bume tēkle mototla.

⁶⁴ Na bubē naba ēhona lamu mototometla na bume mana tēkle mototla na takune motlola, "Ju iniwa wesibi lowene egletēmēna kwe ju seme gali sle enoname, jume ya tēke lolēne?"

⁶⁵ Na bume feilawa tiniji galina gali motlola.

Jisame onehobē gali aholokwane moglomabē letitabo hobē naba li elēme mētletlula

⁶⁶ Oloba olē, onehobē gali aholokwane moglomabē letitabo ho, Gotobē galime okokwe moglomabē ho na lotu lome wege mēglabē eso enēne bu loko mētletlēya. Na bu Jisame, kē loko

mëtletlëyabë enëne belë
mëtletlutëma. Na kë enëne
Jisasmë takune motlola,

⁶⁷ “Ju seme gali enona,
Goto kë aniji toglëbë ho,
onehome nëno naeglebëme.
Ju kë ho ekëne?” Na bu gali
metafu tëtätëme, “Bo some
megali noglëyona, ‘Bo kë ho
ekëne,’ kwe sobo bobë gali
lowene sle hana egletelome.

⁶⁸ Na bo some fli galime
takune noglëyona, kwe sobo
bobë gali hana tafu
egëtätëname.

⁶⁹ Kwe elina, unina, bo,
Gotobë life mago ho, bo tako
kalëlegona Gotobë tobamu
toba elë tafa nëgelëme.”

⁷⁰ Na iniwa bume takune
motlola, “Ju melowene
lalene, ‘Bo Gotobë nëba,
hee?’ Na bume tafu tëtätëme,
“Sobo nëgali gali gali elo. Bo
ta kë ho ekëne.”

⁷¹ Na bu gali mëtla, “Sebo
fli enëneme hana gali
noglomame, seme kë hobë
tëbo loweneme gëgali
namëglenëname. Sebo ëje
bubë tëbo gali, bubë ëfalëbo
mago waaholokwane
nolotlame nëgëme.”

23

*Bu Jisasmë eso ho Pailatbë
naba li elëme mëtletlula*

¹ Na kwe, kë onehobë gali
aholokwane moglomabë
letitabo ho, bu Jisasmë eso
ho Pailat belë mëtletlula.

² Na bu Jisas kë tafa lëglebë
galime Pailatme megali
motlola, “Ebë ho bu sebobë
life mago onehobë wame
lowene tufiji latotometëme.

Bu megali latlome, ‘Sobo
takis baliti, Rom life magobë
eso ho, Sisarme, asa elëlo.’ Na
bu megali latle, ‘Bo Goto kë
aniji toglënbë ho, onehome
nëno nëgelëbë ho, bo kë eso
ho.”

³ Na Pailat Jisasmë takune
tlole, “Ju Israelbë afenëbobë
tako eso hone?” Na Jisas tafu
tëtätle, “Nëgalife. Ju fene gali
ele.”

⁴ Na Pailat lotu lome wege
mëglabë eso enëneme na
oneho name gali tlole, “Bo
ebë hobë, li fëye wesibiha,
hwi hana nolotelë na bo
manawa hana tëbo
nogotlëme.”

⁵ Kwe bu bubë gali
anisasana tafu mëtëtatla, “Bu
Judia provinsbë, li life li life
asë tëbelëfa na onehome
okokwe latlagukefëme. Na
bu iniwa onehobë wame
lowene tufiji latëtagutëme. Bu
Galili provins mëta okli tle
na bu li life li life asë tëbelëfa
na ebelë mana ekë lisi.”

*Bu Jisasmë eso ho Herotbë
naba li elëme mëtletlula*

⁶ Pailat kë gali aholokwane
tlole na takune tlole, “Ebë
ho, bu Galili provins mago
hone?”

⁷ Pailat melowene tle,
“Jisas Galili provins mago
hofe. Bo bume Galili provins
mago onehobë eso ho Herot
belë jine nëgelëkaklëme.” Na
bu Jisasmë eso ho Herot belë
këme jine telëkakle. Herot bu
ëbame bubë provins kile tle
na kë nalë Jerusalem
lifateme esokwaneme tafa
tle.

8 Bu Jisame Herot belë mëtletlula. Herot bu Jisas wesibi kē togotomebē gali waaholokwane tletle na bu anebo Jisame hwi loglome fene kwe bu hwi hana tlole. Kēme nēgeme bu Jisame hwi tlole na tako fleflesu kēme tle. Bu metole latle, Jisas bubē naba lime klelegowa wesibi blēge blēge nalogotometleme.

9 Kēme nēgeme Herot bu Jisame feilawa wesibime kēme tētakune tlole. Kwe Jisas bubē iniwa gali hana tafu totometle.

10 Na lotu lome wege mēglabē eso enēne na Gotobē galime okokwe moglomabē ho eso ho Herotme loliwa mutuju tla na bu Jisame blawa kē so mētētatabē galime feilawa gali motlola.

11 Na kwe Herotna bubē wame home boblo mogotomabē enēnena Jisame sisile lamototla na klēē galina gali motlola. Na eso ho fene mohweya, bu kēha lala ēho bume mētehwaṭla na bume Pailat belē ita jine mētelēkakla.

12 Ētani Herotna Pailatna gēglē lamētlekefo. Kē olēna kwe yonanewa lamētelo.

Pailat bu gali tle, “Jisasbē ato ti mēta nilina bu eletelo.”

13 Na Pailat bu lotu lome wege mēglabē eso enēneme na Israelbē afenēbobē eso enēneme na onehome gali telokwakeme na bu belē loko

namokweijame na bu mēta loko mētēkakija.

14 Na bume gali tlome, “Sobo ebē home bo belē elesulo, na sobo megali lalona, ‘Ebē ho bu sebobē life mago onehobē wame lowene tufiji latotometēme.’ Na bo sobobē li mēta bume kē galime watakune slemu nololē. Kwe sobo aholokwane elo. Bo ebē hobē, li fēye wesibiha, hwi hana nolotelē. Bo melowene nanelē, ‘Sobo bume fene so etatelobē wesibi, bu melē hana totle.

15 Na Herot bu mata, bubē li fēye wesibiha, hwi hana lolotle, na bu ebē ho sebelē ita kēme jine lelēbakle.’ Aholokwane elo, ebē ho bu li fēye wesibiha hana totle na bo megali hana nēgelēme, ‘Bume lalowa, mogo nalē tēke elolo.’ Hanane mu.

16-17 Kēme nēgeme, bo bobē wame home boblo mogotomabē enēneme afina gali nolomēme, bume taba afona lēlafa motlame na bo mana jine nelēkaklēmē.”*

18 Kwe oneho iniwa anisasana gali mētla, “Ju kē home mogo nalē tēke elole na ju Barabasma kalabusu lo mago jine elēbakētēname.”

19 Barabas, ētani, fli onehobē wame lowene tufiji tētātēme, na bu gavman enēneme tako wame lamotloma, Jerusalem lifate mēta. Na bu kē nalē, ho lime mogo nalē tēke tlole. Na gavman enēne bume

* 23:16-17 Fli lowene ho bu melowene lamētla, li gali mana lēbe kē gali mēta. Kē gali melē lēgēbelalēle. Li li tlibutuna, bubē tako lotu olēna, eso ho Pailat bu jowa jowa kalabusu lo mago home bu belēme jine latlēkefēmetēme.

kalabusu lowa këme tuku mêtla.

²⁰ Kwe Pailat metole latle, Jisame jine lëgelëkakleme. Këme nêgeme ita gali tlome, Jisame jine nalëgelëkakleme.

²¹ Kwe bubë gali aholokwane hana motlola na anisasana gali mêtla, “Bubë ato ti mëta nilina bu eletelo! Bubë ato ti mëta nilina bu eletelo!”

²² Na bume ita gali tlome, “Sobo kë gali fëyeme gali elone? Bu fëye tēbo wesibi totlene? Bo ebë hobë, li fëye wesibiha, hwi hana nolotelë na bo megali hana nêgelëme, ‘Bume lalowa, mogo nalë tēke elolo.’ Hanane mu. Këme nêgeme, bo bobë wame home boblo mogotomabë enëneme afina gali nolomëme, bume tēklewa namogotlame na bo mana jine nelëkaklëme.”

²³ Kwe bu Pailatme itaita anisanamu gali motlola, “Bubë ato ti mëta nilina bu eletelo!” Na Pailat bubë wame gali yafe aholokwane tlokweifëme na bu kwasa metletëme na melowene tle, “Matëbe. Bu melë matotla.”

²⁴ Këme nêgeme bu bubë lowenewa esogo tlelëtëme na gali tle, “Jisas gli malële.”

²⁵ Na Pailat, Barabasmë, kalabusu lo mago tuhu totle na jine telëkakëtëme, bu fene gali molola. Barabas, ëtani, fli onehobë wame lowene tufiji têtatëme na bu gavman enëneme tako wame lamotloma. Na kë nalë bu ho lime mogo nalë tēke tlole. Na gavman enëne bume kalabusu lowa këme tuku mêtla. Na oneho fene tole mêtla, bu Jisame bubë

wame home boblo mogotomabë enënebë toba elë gwa tetokwaketëme.

Bu Jisame ti mëta nilina bu mêtla

²⁶ Na wame home boblo mogotomabë enëne Jisame lifeku mago mêtletlula, na bu Sairini lifate mago Saimonme alëgeme esune mêtletlëla. Saimon bu waluju mago Jerusalem lifatewa tuju fene kwe bume fa mototla na bu Jisame këme bu mëglabë ti, bubë feiji mëta gwa mototatla na gali motlola, “Se! Mana ehule na Jisame nagi elëkakleme.” Na bu ti fejina nagi esogo tlagule.

²⁷ Na lebutako oneho bume nagi esogo mëtlagula. Na lebutako one bu yena esogo mëtlagula.

²⁸ Kwe Jisas bume swaya tletëme na gali tlome, “Sobo, Jerusalem lifate mago one, sobo bome asa ye eletëna. Matëbe. Sobo some fwa ye elome na sobobë nêbaleme fwa ye eletemome.

²⁹ Tokwafe, li tēbo olë fata lëgleme. Kë tēbo olë fata lëglëna, kwe bu megali mëglame, ‘One nêbaleme yoneti mëglabë bu fleflesu mëglame.’

³⁰ Kë nalë, oneho megali mëglame, ‘Sebo metole nanëla, ebë fatini kwe seme têtafu matla na lamu matëtana, hokweinawa gigli nanëglame na wame ho seme tēbo jwa namëgëtaname.’

³¹ Bo li fëye wesibiha hana telë kwe bu bome manawa

tëbo mëtana. Bu bome melë mëtanana kwe bu Jerusalem lifate mago enëneme, memelë tëbo lowene mëta kë tafa mëglabë, tako tëbomu mogotomame.”

³² Na wame home boblo mogotomabë enëne, bu tlemalë memelë tëbo lowenebë home mata mëtleteluma. Bume, Jisasname mogo nalë tètëke namëglame.

³³ Na bu li lifekuwa fwa mutula. Kë lifeku weniji melë, “Eso Elebo.” Na kë fatini lufu mëta wame home boblo mogotomabë enëne Jisame ti mëta bu mëtla na bu Jisame kë ti magowa lë mototla. Na bu kë tlemalë memelë tëbo lowenenabë home bubë li mëta mata ola mëtla. Li tobamu toba elë tlibetle na li yemane toba elë tlibetle.

³⁴ Na Jisas ti magowa gali tètëkeke, “Aya, ju ebë enënebë tëbo lowene, bome mogo nalë kë tëke moglonabë lowene, aholokwana ti eletëme. Bome melë kë mëgëtanabë wesibi, lowene sle jwa mëgletlame nëgeme.” Na wame home boblo mogotomabë enëne bubë ato mago ëho blalo melëna sa mëtëtaya. Bu satu salë mëtla na ho mana aniji motloma jowa jowa wesibi glo namëglabëme.

³⁵ Oneho bu mana hwiwa motlokweifëma, na kwe Israelbë afenëbobë eso enëne, Jisame mana sasonatlëtlë memototla na gali motlola, “Bu fli home taitame. Na bu ebë ho nëgebë kwe Goto bume kë aniji toglolebë, onehome lëgaitameme na

nëno lëglebëme, kwe bubë ato lëgaitaleme fene.”

³⁶ Na wame home boblo mogotomabë enëne, bu mata, bume sasonatlëtlë memototla. Na bu loliwa mutuju tla na bume kaya tabo wain taba liji tu mëglëla namëglame fene.

³⁷ Na gali motlola, “Ju Israelbë afenëbobë esoho nëgebë kwe jubë ato mana aitale.”

³⁸ Na bu gali ti ka tabo mëta yahi mëtla na Jisabë eso lufu elë fla mototatla. Bu kë mëta meyahi lamëtletla, “Israelbë afenëbobë tako eso ho.”

³⁹ Jisasname iniwa kë bu mëtëglabë tëbo lowenenabë ho li, Jisame tiniji galina megali tlole, “Ju melowene lalene, Goto jume kë aniji toglobë hone, hee? Hanane mu. Kwe melëbë kwe jubë ato aitalëme na seme mata aitanome. Kwe hanane.”

⁴⁰ Kwe li tëbo lowene ho, libë gali aholokwane tlole na bume wame gali metlole, “Tokwafe Goto jume kë tëbo lëgëtabë wesibime ju uli jwa fëyeme elene? Ju hwi ele, bu seme iniwa tëtëkle mëtana.

⁴¹ Kwe bu seme kë tëtëkle mëgëtanabë kë kwe lalowa, bu sebobë memelë tetëbo lowenebë niji tëtëkle mëtana. Kwe ebë ho kë nëgebë, bu li fëye wesibiha hana totle bume blawamu tëkle motla.”

⁴² Na bu Jisame gali tlole, “Jisas, ju unina eso home tafa eglena kwe ju bome aholokwana asa ti ele.”

⁴³ Na Jisas bume gali tlole, “Bo jume nëgalime gali nolë,

eli ju bona heven lifeme
weife tafa nêgelome.”

Jisas gli tle

⁴⁴⁻⁴⁵ Kliji ku mêta tlibe na
kliji ki tetêfatle na
tlukufiniwa têbe. Na kêha
têgemowagulebêê na taboklê
klijina ita fetiha têbe. Na kê
tako êho, bu tako lotu lo ino
mêta kêkesi têgelulebê,
lakawa têmâlita kufe lokwati.

⁴⁶ Na Jisas anisanamu
afêflei tle, “Aya, bo bobê
amtêtomba jubê toba elê ekê
gwa netêfaklê.” Bu megali
wafi tlole na tuku têkakê.

⁴⁷ Na wame home boblo
mogotomabê enênebê eso ho,
bu kême hwi tle na Gotome
fleflesu tletle na bibita totle
na gali tle, “Nêgalimufe. Ebê
ho bu lale ho fe. Bu li fêye
wesibiha hana têbo totle.”

⁴⁸ Na oneho kê hwime kê
mitisiyabê, Jisas kê gli têglebê
yafe hwi motlola na bu tako
maninibo memêtla na bubê
lo elê ye motokouja.

⁴⁹ Na Jisasbê yabe enêne na
Galili provins mago Jisasna
kê mitisiyabê one, bu kakêha
mêtelibukêya na iniwa wesibi
hwi mêtelêkakêma.

Bu Jisas mogome aniji fuluju matêmatê mêta gwa mototla

⁵⁰⁻⁵¹ Arimatea lifeku mago
ho bu kê mêta têtabe. Bubê
weniji Josep. Arimatea bu
Judia provinsbê li lifeku. Bu
lale homu. Bu, Goto iniwa
onehobê eso home kê tafa
lêgletêmebê olêbême, hwi
lêglekêfebê. Bu onehobê gali
aholokwane moglomabê
letitabo ho li. Kwe bu
onehobê gali aholokwane
moglomabê letitabo ho flibê

lowenebême, Jisame mogo
nalê kê têkle mototlabê
lowenebême, helawa hana
tletême.

⁵² Na Josep eso ho Pailatme
tuju tle na takune tlole, “Bo
Jisas mogome ti mago lalowa
tohwa nogotlêmene?” Na
Pailat gali tlole, “Lalowa
tohwa etle.”

⁵³ Na kwe Josep Jisas
mogome ti mago tohwa
têtetêbakle na bu lale tatiwa
êho heletabona lei totle na
tehule na tiho aniji fuluju
matêmatê mêta gwa
tjujuwetle. Kê aniji fuluju, ho
tabana go mêtletêya.

⁵⁴ Bu Fraide taboklê mu,
Jisas mogome gwa totle, na
bubê tafawa mêglabê olê
nounou watletême.

⁵⁵ Galili provins mago
Jisasna kê mitisiyabê one bu
Josepme esogo mêtlagula na
bu kê aniji fuluju matêmatê
hwi motlêya na bu mata Jisas
mogome kême kê gwa
têgelujuwetlebê tala hwi
motlola.

⁵⁶ Bu wahwi motlola na
mana bubê lowa mutuja. Na
lêkaluwa welê tu na fli
lêkaluwa wesibi sle
mototoma, Jisas mogome
kêna tefo namogotlame. Na
tafawa mêglabê olê bu
tafawa mêtla, Moses bu êtani
fene gali tle.

24

Jisas bu matêmatê mago hujju tle

¹ Sande, olobalêwa mu, one
bu matêmatêwa mutuja. Na
lêkaluwa welê tu na fli
lêkaluwa wesibi mata
mêtehouja.

² Bu matëmatëwa fwa mutula na mehwi mëtla. Matëmatë ëfo kë tiji mëtlabë aniji waobobwelë mëtagujayafe.

³ Na bu kë aniji fuluju matëmatë elë mëtëkakluja. Kwe bu Jisas mogome hwi hana mëtelujelëla.

⁴ Na melowene mëtla, “Jisas mogo hameta lëbene?” Bu lowene mëtlabëë, na tlemalë ho, bubë lime lamitlikakijowa. Bubë ëho kliji fene u mëtletëme.

⁵ Na kwe one bu tako ulimu memëtla na laibibuwa mëtla. Kë ho bume gali motlomo, “Sobo tuja ato home, gigli enënebë tala mëta, fëyeme hohwi etatelone?”

⁶ Bu eme hana lëtabe. Bu wahuju lële. Bu some Galili provins mëta kë gali toglyëobë gali ita lowene egletelome. Kë gali melë,

⁷ “Bu bome, Gotobë life mago ho, Gotome lowene jwa mëgletlabë enëneme yo moglomame, bome ti mëta bu namëglame. Na bo matëmatë mëta tële olë nebëme kwe aona olëbëna huju nëgelëme.”

⁸ Bu tlemalë hobë gali aholokwane mëtla na bu ëbame, Jisas kë gali tëglebë gali ita lowene mëtletla.

⁹ Na bu matëmatë mago mëtëkaklija na ita mutuja. Na bu kë hwi motlomabë wesibi gali, Jisasbë lowene esogo mëglelëtlabë we ita jowa home, na fli onehome, të mututatëma.

¹⁰ Makdala life mago Maria, na Joana na li Maria,

Jems bota, na buna kë tafa mëtlabë fli one, bu kë galime, bubë gali tëme kë jine tëglëmebë home yafe gali motloma.

¹¹ Kwe bubë gali tëme kë jine tëglëmebë ho bu melowene mëtla, “Bu sogëname gali molonafe.” Na bubë gali aholokwane hana motloma.

¹² Kwe Pita hujowa tëglebë na matëmatëwa fëka tokou. Na bu blou tle na hwi telukwake na bume këna kë lei mototlabë ëhowa hwi tlotle. Na kwe bu ita lowa tugujuna lowene fafa tëtagule.

Tlemalë ho bu Jisame, Emeus lifebë alëge mëta, hwi motlolo

¹³ Kë olë nawa, tlemalë ho, Jisame kë esogo mëtlelëlobë, Emeus lifeku elë mëtëyeu. Emeus lifeku bu Jerusalem lifate kakëha lëbe.

¹⁴ Tlemalë bu mëtëyeubëë na bu iniwa kë fata mëtëglebë wesibime gëgali motokoujo.

¹⁵ Bu gëgali motokoujobëë na mana Jisas lafatawa tletëme na buna iniwa mutuja.

¹⁶ Kë tlemalë bume hwi motlolo kwe bume mëtëselëlo sle hana mëtelo. Goto bubë mëtëselëlo sle lowenebë obwelë latëtatëme na mëtëselëlo sle jwa këme motlolo.

¹⁷ Na Jisas kë tlemalë home takune tlome, “Sobo kë egisijobë, fëye wesibime gëgali ekweijone?” Bu megali watle, na tlemalë mana mitlibo na wabelë mëtletelo.

18 Na bu mago ho li, bubë weniji Kliopas, gali tlole, “Lebutako li life li life mago oneho, Jerusalem lifatewa esokwafe nime fwa mitisiya. Kwe ju Jerusalem lifatewa tokwafe ekë esine. Na juwa kë lifate mëta kë fata mëtëglebë wesibi lowene jwa këme eletëmene?”

19 Na Jisas bume takune tlome, “Fëye wesibi Jerusalem lifate mëta fata mëtlene?”

Na tlemalë metafu mëtëtatelo, “Sebo, Nasaret lifate mago Jisasme kë fata tëgletlebë wesibime gëgali nokweijo. Bu Gotobë lowene mago gali të totokweflebë homu na bu Gotobë afutukuna klelegowa wesibi blëge blëge totokwefëme. Bu kalëlego gali të totokwefle ho. Gotona, iniwa oneho mata, melowene lamëtletla, ‘Bu lale homu.’

20 Kwe sebobë lotu lome wege mëglabë eso enëne na sebobë fli eso enëne, bume gavmanme yo motloma, na bu gali fa mëtëtatla, bume mogo nalë tëke namoglolame na bume ti mëta bu mëtla.

21 Sebo ëbame melowene latletla, ‘Jisas kë nëgebë kwe Goto kë aniji toglolebë ho, seme Israelbë afenëbobë wame hobë mago nëno nalëgleme.’

Na li gali mata lalëbe. Bu mogo nalë kë tëkle mototlabë, aona olë wamujutle.

22-23 Na ëje olobalëwamu semago one fli matëmätëwa muja na bu Jisas mogome, hana hwi molola. Na bu

misiya na seme megali lamolona, ‘Sebo, enselme fwa hwi noloma na bu megali lamla, “Jisas tuja ato mana lëtabe.” One seme kë galime gali molona na sebo klelego menëletëma.

24 Na semago ho fli, bu mata matëmätëwa muja, na one fene gali mla, bu mata Jisas mogome hwi hana mujuwelëla.”

25 Na kwe Jisas tlemalëme gali tlome, “Sobo yaya fëyeme eletelone na Gotobë lowene mago gali të mototlabë hobë iniwa gali lowene sleme tole jwa fëyeme eletelone?”

26 Gotobë lowene mago gali të mototlabë ho, bu ëtani Gotobë bogo mëta meyahi lamëtla, ‘Goto kë aniji toglolebë ho, onehome nëno lëglebë ho, bu elili afina fa lotleme na mana Goto bume iniwa afutuku lëlelëme na bu Gotona onehobë eso home weife tafa meletemome.’ Sobo kë gali lowene sle jwa fëyeme eletelone?”

27 Na iniwa wesibi bume, Gotobë bogo mëta kë yahi mëtletlabë, bu kë wayo galime okokwe tlome. Bu ëtanifu ho, Mosesbë gali wayome afina okokwe tlome na Gotobë lowene mago gali të mototlabë hobë gali wayome mata okokwe tlome.

28 Bu mutujabëë, na tlemalë këme ni mëgebobë lifeku loliwa fwa mutula. Kwe Jisas, luguju lugujuwa nalëgleme fene.

29 Na kwe tlemalë bume lëkle mototlo, na gali motlolo,

“Eguju egujuwa asa ele. Kliji walētetigo na ki lēgebeme ekēne. Ju sebona eme ni nebēya.” Kēme nēgeme bume lowa mētletulo. Na buna lowa mētēkakluja. Na tafa mētletula.

³⁰ Na buna hi mēglabē masei mēta tafa mētla. Na bu bletē nage fa totle na Gotome yaha gali tlole, “Ebē bletē nage yaha fēyeme enēnane.” Na bletē nage fufu totle na kē tlemalēme tlēme.

³¹ Bu melē tēglena, na bubē lowene titika tētātēme na mana bume mētēsēlō sle mētelo. Na bubē naba li mago laēhowa tēkaketēme.

³² Na buwa gēgali mētelo, “Sebo buna ēje alēgeme gēgali nokweijana, na bu Gotobē bogo mago wayo gali seme tē lētatenona kwe sebobē lowene klelego memeleteno na sebo tako fleflesu menelo.”

³³ Bu megali mētelo na fowa motokokobē na ita Jerusalem lifatewa lafēkawa mētēkoujo. Na bu Jisasbē we ita jowa lowene esogo mēglelētlabē ho na buna kē loko mētletlēyabē onehome hwi mutujuwelēmo.

³⁴ Na kē enēne bu tlemalēme gali motloma, “Nēgalimufe. Jisas matēmatē mago, wahuju lēlefe na Pita wahwi lololefe.”

³⁵ Na tlemalē bume alēgeme kē fata lēgletēmebē wesibime gēgali mētletlōmo. Na bu gali mētelo, “Bu bletē nage fufu lētatenona sebo

bume mana nēsēlō sle nelō.”

Jisas bubē lowene esogo mēglelētlabē home olafa tletēme

³⁶ Kē tlemalē ho mana gēgali mētelo na mana Jisas bume ku mēta lafatawa tletēme. Na bu megali tlole, “Sobobē lowene lēgēbetēyo sle malēletēyo.”*

³⁷ Kwe bu meweniji lamētla, “Alibahofe,” na bu kēme tako uli memētla.

³⁸ Na Jisas bume gali tlole, “Sobo klelego fēyeme elone? Sobo tutunena fēyeme tafa elone?”

³⁹ Sobo bobē toba yayahuju na juba yayahuju hwi elokwakimetēna. Ebē bo tekwe nēge. Sobo bobē ato lu etokwakilo lowene naegelome bo afabona, elebona nētābē. Sobo lowene lalo, alibaho bu afabo jwa na elebo jwa mētābēya bu kwe fleluwa.”

⁴⁰ Bu megali tle na bubē toba yayahuju na juba yayahuju bume lebotane totometēme.†

⁴¹ Na bu klelego memētletla na tako fleflesu memētla kwe bu lowene sle hana mētla na melowene mētla, “Ebē Jisas nawa, alibaho nawa.” Na Jisas takune tlole, “Sobo hi wesibi fli mana mēbetēyone?”

⁴² Na bume muniji mo lēne fa mētētātla na mētletlō.

⁴³ Na bu hilika totome na bubē naba li mēta hi tletēme.

* **24:36** Fli lowene ho bu melowene lamētla, “Kē gali, bu tēle sēgetoba kume kē mēgēbebē, Luk bu nane yahi tle, kwe ho li bubē nagi yahi tle.” † **24:40** Fli lowene ho bu melowene lamētla, “Kē gali, bu tēle sēgetoba kume kē mēgēbebē, Luk nane yahi tle, kwe ho li bubē nagi yahi tle.”

44 Na bume gali tlome,
 “Ëtani bo sobona mana tafa
 tēglana bo some megali
 latlēyo, ‘Iniwa wesibi, ëtani
 Moses na Gotobē lowene
 mago gali tē mototlabē ho,
 bome kē yahi mētletēnabē na
 Buk Song mēta kē yahi
 mētletēnabē bu kē iniwa
 wesibi fata mēglememu.’”

45 Na bubē lowene ha
 totometēme, Gotobē bogobē
 wayo gali iniwa lowene sle
 namēgletlame.

46 Na bume gali tlome,
 “Gotobē bogo megali lalamē,
 ‘Goto kē aniji tlolebē ho,
 onehome nēno nalēglebē ho,
 bu elili fa lotleme na gli
 lēleme na bu matēmatē mēta
 tēle olē lēbeme na aona
 olēbēna kwe huju lēgleme.

47 Na bu bubē wenijina
 iniwa life mago onehome
 gali tē mēgētagutēmame, bubē
 tēbo lowene aholokwana ti
 namēglame na Gotobē lale
 lowenewa esogo
 namēglelētłame. Bu melē
 mēglana, kwe Goto bubē tēbo
 lowene iniwa aholokwana ti
 nalēgletēmeme. Bu kē gali
 Jerusalem lifate mēta afina
 tē mēgētatēmame.’

48 Iniwa wesibi sobo kē
 hwi toglobē iniwa lifate
 mēta satē etagutemo.

49 Sobo aholokwane elo.
 Ëtani aya Goto bu megali sle
 tle, bubē Amtētomba some
 lēglēyome na bo bume
 sobelēme jine
 nēgelēbakētēyome. Kwe sobo
 ebē lifate mēta fwa mana
 hwi elome na Gotobē

Amtētomba somēta mana
 letujutēyome na bubē
 afutuku fa etatelome.”

Goto Jisame tilekole

50 Na kwe Jisas bume
 Betani lifate li elē tlelume.
 Na bubē toba elili
 tetokwakēme na Gotome
 takune tlole, kē onehome
 lēgaitame nalēgleme na ululu
 sle lotomeme.

51 Bu Gotome mana gēgali
 tēglagulebēē, na Goto bume
 mana heven lifewa
 alabujuwa tilekole.

52 Na bu sēkefo miti tafa
 mētla na Jisame mana lotu
 mētletla.‡ Na bu Jerusalem
 lifatewa tako fleflesuna
 mutuja.

53 Na bu itaita tako lotu
 lowa mutujukēfēya na
 Gotome fleflesu mētlekefētla
 na bibita mototokwefla.

‡ 24:52 Fli lowene ho bu melowene lamētla, “Kē gali, bu tēle sēgetoba kume kē mēgēbebē, Luk nane yahi tle, kwe ho li bubē nagi yahi tle.”

Aposel

Jisasbë ëfalëbo mago gali kë mëgehilabë hobë wege melë tëgebetëme latle

*Jisas gali sle tlome, Gotobë
Amtëtomba jine nalëglëtëmeme*

¹⁻³ O yabe Tiofilus. Jisas ebë life mëta tafa tëglëna bu onehome feilawa wesibi totometëme na okokwe tlome. Na Goto bume heven lifewa mana no tlële. Na iniwa wesibi, Jisas onehome kë totometëmebë na kë okokwe toglomebë bo ëbame wayahi tletë.

Jisas elili fa totle na gli tle na matëmatë mago huju tle. Na ebë life mëta niliafewe olë tètabe. Na kë niliafewe olëna, bu kë aniji toglomebë Aposel home itaita tuhu tlelëkefëme na bume feilawa wesibi lebotane totometëme. Bume melowene namëgletlame, “Bu tuja ato lëtabefe.” Goto bubë onehome, eso home, kë tafa lëgletëmebë galime okokwe tlome. Gotobë Amtëtomba, Jisasmë lale lowene tlële. Na bubë Aposel home, loko tëtamë na iniwa wege bu melë namogotomabëme okokwe tlome. Na Goto bume heven lifewa mana no tlële.

⁴ Bubë Aposelna mana mëtëtabëyana, Jisas bume anisasana megali tlome, “Sobo Jerusalem lifate mago hokweinawa asa eyeu. Sobo Aya kë gali sle toglëyobë

Amtëtomba fame sahwi eletelo. Ëbame bo kë wesibime kë gali toglëyobë.

⁵ Ètani, Jon onehome tu mëta baptais totome, kwe tokwafe, tokwëfo olëna kwe aya Goto bubë Amtëtombana some baptais logotome.”

⁶ Na li olëna, Aposel ho bu Jisasna loko mëtletëya na bu këme takune motlola, “O tako ho, ju ebë olëna, sebobë, Israelbë afenëbonibë eso home tafa egletënamene, ètani sebobë semle Devit eso home fene tafa tletëna? Na ju sebobë wame home, Rom life mago home, hehë naegletëmeme.”

⁷ Na Jisas bume gali metafu tëtatëme, “Bobë aya buwa olë wafi aniji tole, wesibi melë nalogotomebëme. Ebë olë lowene egletelobëme sobobë wesibi nane.

⁸ Kwe tokwafe, Gotobë Amtëtomba ligisi tëyome, na somëta lëtabeme na bu some afutuku nalëglëyome. Na sobo kë afutukuna, bobë gali të naegëtagutëmome. Sobo Jerusalem lifate mëta, na Judia provinsbë li life li life mëta, na Samaria provins mëta, na iniwa lifate mëta të etagutëmome.”

Jisas heven lifewa tokwale

⁹ Jisas kë gali watë tëtatëme. Bume mana hwi motlolabëë. Na Goto bubë naba lime tilekole. Na oloba lamo totle na bume hwi hana motlola.

¹⁰ Bu mana hwi motokwakekefëya na tlemalë ho lamitlikakijowa. Bubë ëho tatiwamu.

11 Na kë tlemalë gali motlomo, “Galili provins mago oneho, sobo mana fëyeme elibekefone na matafa elë fëyeme hwi ekwakekefone? Kë Jisame kwe, Goto heven lifewa wafi lilekole. Kwe tokwafe ita bu lëgetujuleme, ëje sobo matafa elë lokwalebëme fene hwi eluluglo.”

Bu ho lime aniji motlola, Judas fene wege tle, bu këha wege fa nalogotleme

12 Na Aposel ho kë fatini kile mëtla na Jerusalem lifatewa mëtëmatula. Kë fatinibë weniji ebë “Oliv tiwa fatini.” Bu kakë nane elijamë, loli mëta mu.

13 Bu lifekuwa fwa mototola na ëbame kë mëta tafa mëtlekefëyabë lowa ita mutuja. Na matawa kë ke togolebë lo ke elë motokwala. Bu kë lo mëta kë tafa mëtlekefëya enënebë weniji melë, Pita, Jon, Jems, Andru, Filip, Tomas, Bartolomyu, Matyu, Alfiusbë nëba Jems, Saimon Saimon bu Selot ho*, na li Jemsbë bowene Judas.

14 Kë enëne bu iniwa loko mëtlelekefëya, na Gotome itaita gëgali mëtlelekefla. Jisas bota Maria, na fli one, na Jisas bolijamoni mata mitisiya, buna iniwa Gotome gëgali namëglelekeflame.

15 Tokwafe, li olëna, bu loko mëtlelëya, Gotome gëgali namëglelëame. Jisame lowene sle mëtletlabë oneho kënjiji loko mëtlelëya 120. Na

Pita ku mëta tlibetëme na gali tlome,

16 “O bobë afanino na oneglëni, bo some Judasbë galime gali nolëyo. Ètani Gotobë Amtëtomba, eso ho Devitbë lowene huju tëtatile na gali tle. Na kë galibë Gotobë bogo mëta lëbetle. Kë galibë, Jisame wamehome kë yo toglomebë home, Judasme, gali nene. Na ebë olëna kë wesibi wafi fata tle, Devit fene gali tle.

17 Sebo walowene nëla, ëbame Jisas, seme, Judasname iniwa aniji tloni, bubë wege fa nanëtatleme.”

18 Judas, Jisame wame home kë yo toglomebë balitina, life afloko këna fa totle. Na bu kë life mëta titigo na imo labulewa tlatle na bu aliji tei tabo tëbe.

19 Jerusalem lifate mago oneho kë gali aholokwane mëtla, na bubë galina kë lifeku mefë mototla, “Akeldama.” “Akeldama” weniji ebë kë gali fenene, “Kola life.”

20 Pita megali tle, “Devit, Buk Song mëta, Judasme gali meyahi latletle, ‘Kë hobë lo mëta ho li hana tafa lëgleme. Kë lo bwa malilibë.’ Na Devit li gali Buk Song mëta meyahi latle, ‘Ho li bubë wege afloko safa lëtatile.’

21-22 Këme nëgeme, sebo ho lime aniji noglolame, Judasbë afloko mëta wege fa nalogotleme. Na bu sebona Tako Ho Jisas matëmatë mago kë huju tëglebë gali

* **1:13** Selot enëne bu metole lamla, Rom provins mago ho bu seme eso home asa tafa malëletëna.

weife të nanogotlame. Sebo ebëha home tole nëletla, Jon Jisame kë baptais totlebë hwi toglolebë. Na bu sebona Jisame mana kë esogo tëglagilabë bubë gli belë fe təkaki. Na bu iniwa wesibi Jisas melë kë tētagilebë bu wahwi tlagime. Na bu Jisame hwi tlole, Goto kë no tëglēlebe heven lifewa. Sebo këha home tole nëletla.”

²³ Pita megali tle na bu tlemalë home aniji motloma. Li howe Josep, bume mefë lamototla, Barsabas. Na bubë li weniji, Jastus. Na li howe, Matias.

²⁴ Na bu Gotome megali motlola, “Tako Ho, ju iniwa onehobë lowene wahwi elagumetëna. Këme nēgeme sebo jume këme takune nēlēyo. Ju seme lebotane naegētātēname. Kë tlemalë mago, ju fēye home aniji tlole,

²⁵ Aposel hobë wege fa nalogotleme. Judas kë wege wakile tle, na bu wagli tle, na Goto kë le tëglētēmebë tēbo lifewa tuju.”

²⁶ Na bu wenijina goglë sike mētla na Matiasbë weniji fata tletle. Na bume aniji motlola, we ita jowa Aposel kë nēgebëna tafa namēglame.

2

Gotobë Amtëtomba letujule

¹ Bubë tako lotu olë fotokoke tēme. Kë lotu olëbë weniji Pentikos. Bu kë olë, nuju mago kë fafa mototokweflabë wesibime, Gotome fleflesu mētletla. Na

Jisame lowene sle mētletlabë oneho iniwa jowa lo mēta fwa loko mētletlēya.

² Na mana, labasagli flelu lego fenene, heven lifate mago latigisitēmewa. Na kë tako lego bu kë mēta loko mētletlēyabë lo iniwa lakewa tlotēme.

³ Na bu anusesi ahojuha wesibi hwi motloma. Na kë anusesi ahojuha wesibi, iniwa mēta tlēwagutēme. Na bubë eso mēta ahoju naflēboha metlēwagutēme?

⁴ Na Gotobë Amtëtomba kë iniwa enēneme tisi tēme. Na bu mēta tētābetēme. Na bume afutuku tlēme. Na kë afutukuna lili anigawa gēgalina, gēgali mētla.

⁵ Kë olëna, Israelbë afenëboni feilawa, Jerusalem lifate mēta mētētābēya. Bu Gotome kë lotu melekefētlabë oneho. Kë oneho li life li life mago mitisiya. Na bubë galina bwa bwa gēgali mētla.

⁶ Oneho kë legobë lego aholokwane mētla, hwime loko motokweiya. Bu Jisame kë lowene sle mēgletlabë enēnebë gali aholokwane motloma na klelego memētletēmamu. Bubë lili galina gēgali mētletēmame nēgeme.

⁷ Bu klelego memētletēma na gali mētla, “Ebë oneho bu sebobë lili galina kë gēgali mēglabë, bu Galili provins mago tekwe nēge.

⁸ Sebo lowene hana nēletēmafe, bu sebobë lili galina habëna gēgali mēglamene?

⁹ Sebo kē nēgebē, li life li life mago oneho loko nēlelēya. Sebo fliye Partia na Midia na Elam lifate mago enēne. Na sebo fliye Mesopotemia na Judia na Kapadosia na Pontus na Esia provins mago enēne.

¹⁰ Na sebo fliye Frigia na Pamfilia provins mago enēne. Na sebo fliye Isip life mago enēne, na Libia provins li mago lifate Sairini mago enēne, na sebo fliye Rom life mago enēne,

¹¹ na fliye Israelbē afenēbonimu na fliye bu Israelbē afenēboni nane kwe bu Israelbē afenēbonibē lotu tokwafe esogo mētlelēla. Na sebo fliye Krit life mago na Arebia provins mago enēne. Sebo iniwa, li li galina nētabēyabē enēne, kwe kē oneho, Gotobē tako afutukuna wesibi melē kē logotlebē, sebobē lili galina ekē tē motla.”

¹² Na bu iniwa klelego memētla na tutune mētla. Na blalo gēgali mētlelogwaya, “Ebē wesibi, ēje mefata kē lēglebē ebē fēye wesibine, sebo lowene hana nēletlafa?”

¹³ Kwe fliye ssonatlētlē memototoma na bume tiniji gēgalina gali motloma, “Tiho wain taba liji tu feilawa hi mēglame nēgeme, bu kēme yaya mla.”

Pita gali tē totle

¹⁴ Pita na fli we ita jowa Aposelna mitlija. Na bu onehome anisasana gali tlome, “Bobē ilawa mago enēne na sobo fli enēne,

Jerusalem lifateme kē tafa egløbē, sobo aholo bo etatēna. Bo some kē wesibi wayobēme gali nēglēyome, sobo lowene naegletelome.

¹⁵ Sobo seme melowene laletēnane, ‘Wain taba liji tu hi mēglame nēgeme kēme yaya mla?’ Weyewa. Hanane mu. Sobo hwi elo, ebē olobalē klijina, na ho bu olobalē klijina wain taba liji tu hana hi mēlekefēya.

¹⁶ Ebē wesibi ēje kē fata lēglebē, Gotobē lowene mago gali tē totokweflebē ho, Joel, ētani wagali tletle. Bu megali latle,

¹⁷ ‘Goto megali latle, “Yawe olē nounou lēglena, bobē Amtētomba iniwa enēneme nēglēwagumēme. Sobobē nēbale bobē lowene mago gali tē mogotlame. Sobobē falake na filemi ho, bu Gotobē toba mago nimitelē hwi mēglame.

¹⁸ Kē olēna, bobē Amtētomba, bobē wege onehome nēglēmēme. Na bu bobē lowene mago gali tē mogotlame.

¹⁹ Bo klelegowa wesibi matafa mēta fata nogotomēme na life mēta, mata, fata nogotomēme, bobē afutuku naolafa nogotlēmē. Na bu wino, ahoju, tako ahēyana hwi moglomame.

²⁰ Na kliji ki letofatleme na klabēwa lēbeme, na yeme u mata obwelē tlamēme na winowa fata tlamēme. Kē wesibi yawe lēkakeme na mana Goto bubē tako afutuku olafa lotleme.

21 Na kë nalë, iniwa oneho, Goto bume lëgaitameme, kë takune moglolabë, kwe Goto bume lëgaitameme na nëno lëleme. Na bu tafa sle mlame.” Ebë gali kë nëgebë, Gotobë lowene mago gali të totokweflebë ho bu gali tle.”

22 Na Pita ita gali tle, “Sobo Israelbë afenëboni, sobo aholo bo etatëna. Bo some Nasaret life mago Jisame gali nolëyo. Goto bu kë home aniji tlole. Na tako afutuku tlële. Na bu kë afutukuna, memelë tako afutukuna wesibi na memelë klelegowa wesibi blëge blëge totome, sobobë naba li mëta. Goto melë kë tëglebë, sobo melowene naegelome, ‘Goto ebë home jine tlëlefe.’

23 Goto bu ëtani walowene sle tle. Na bu ebë home some watlëyo, sobo wame home yo naeglomome, bume ti mëta, mogo nalë bu namëglame.

24 Kwe Goto bume matëmatë mago wahuju totle. Bu kë gli tëglebë elili mago wafi no tlële. Gli bume hana fa logotleme.

25 Ètani eso ho Devit bu kë home wagali tletle, ‘Bo Tako Home wahwi nololë, bobë lime unaunalëmemu lëtabe. Bobë lime lëtabeme nëgeme bo li wesibimeha uli jwa këme nëletelë.

26 Këme nëgeme bobë lowene lalowa këme lëbetenë, fleflesu na këme gëgali nelë.

Lale wesibi, Goto bome melë kë lotometenëbë, bo kë hwi nëletemë.

27 Ju bome lebo enënebë life mëta kile hana egëtanëme. Jubë lowenewa esogo sle lëglelëlebë lale wege home, matëmatë mëta kibo lëglëbëme, hwiwa hana eglolome.

28 Ju bome lale tafa lowenebë walebotane tëtatenë, na ju bona unaunalëme tafa nëgelome na ju bome tako fleflesu enënëmu.’

Ebë gali Devit bu të totle.”

29 Na Pita megali tle, “Bobë afanino na oneglënino, bo sebobë ëtanifu eso ho Devitme gali sle nëglëyome. Bu wagli tle na bume matëmatë mëta gwa mototla na bubë matëmatë semëta mana mëbe.

30 Kwe Devit bu Gotobë lowene mago gali të totokweflebë ho. Na Goto bume anisasana megali sle latlole, ‘Nëgalimu, ju eso home fene tafa ele, tokwafe, jubë weife mago hobë nëba bu metafa lëgleme.’

31 Devit bu Goto tokwafe logotomebë wesibime lowenemu sle latletëme. Na bu, Goto kë aniji toglolebë home, onehome nëno lëglebë home, melowene sle tletle, ‘Bu matëmatë mago huju lëgleme.’ Këme nëgeme bu megali tle, ‘Goto bume gigli enënebë life mëta hana hwiwa loglome na bubë ato matëmatë mëta kibo hana lëgletleme.’

32 Na kwe kë ho bu ebë Jisas. Na Goto bume matëmatë mago wafi huju

totle. Na sebo bume hwi tlola na sebo kē wesibime kēme gēgali nēletla.

³³ Goto bume fleflesu tletle na mana no tlēle, Gotobē tobamu toba elē tafa nalēgleme, eso home weife tafa namēgelome. Na bolijaya Amtētomba bume tlēle, bu ētani fene gali tle. Na Jisas ēje seme kē Amtētomba ekē lēnēna. Kēme nēgeme ēje kē wesibi sobo kē hwi eglobē na kē aholokwane eglobē, ebē kē wesibi Jisas seme kē lēnēna.

³⁴ Kē galibēme, Devit bu bume nane gali tle. Weye, li home gali tletle. Sobo walowene elo. Devit bu heven lifewa hana tokwale Jisas fene tokwale. Hanane. Kwe Devit bu megaliwa latle,

“Tako Ho bobē Tako Home megali latlole,

“Ju bobē tobamu toba elē tafa eleme, na eso home weife tafa nēletemome.

³⁵ Sebo onehome mana tafa nēlekefētemobēē na jume kē wame mēglēyobē onehome, bo mana boblo nogotomēme na bu jubē gali boblo jwa mēgētātēyome.”

³⁶ Na kwe, sobo Israelbē afenēboni, sobo melowene sle egelome, ‘Ebē ho Jisas kē nēgebē, sobo time kē bu tēgelobē, Goto bume Tako Ho lēgētābēme wafi aniji tlole. Bubē enēneme nēno nalēglebēme wafi aniji tlole.”

Lebutako onehome baptais mototoma

³⁷ Oneho Pitabē gali yafe aholokwane mētletla na bubē gali bubē lowene sisilemu metētātēme. Na bu Pitaname Aposel fliname kēme takune motloma, “O afanino, eli sebo habelē nēglamene?”

³⁸ Na kēme Pita gali tlome, “Sobo jowa jowa kē nēgebē, tēbo lowenebē aholokwana ti elome na Gotome fwa lowene sle etelome na sobo Jisas Klaisbē wenijina baptais elome. Sobo melē egelona, kwe Goto bu sobobē tēbo lowenebē aholokwana ti lēgletēyome na bubē Amtētomba lēlēyome.

³⁹ Étani Goto wafi gali sle tle, bubē Amtētomba some lēglēyobēme na sobobē afenēboni mata na kakē kē tafa mētlabē onehome mata lēglēmēme. Sebobē Tako Ho, Goto, iniwa onehome, bu belē migisiyabēme, kē we loglomebē, bubē Amtētomba lēglēmeme.”

⁴⁰ Na Pita bu fli feilawa gali tē tētātēme na kēme bume anisasana gali tlome, “Sobo tetēbo wesibime ululu sle sa elo na Goto some lēgaito nalēgleme satakune elokweflo, sobona, tēbo lowene kē esogo mēglelēlabē enēnena, iniwa tēbo eglitolime.”

⁴¹ Na feilawa oneho Pitabē gali lowene sle mētletla na Aposel ho bume mana baptais mototoma. Na kē olēna, Aposel ho, 3,000 onehome baptais mototoma. Na buna, Jisame ētani kē lowene sle mētletlabē onehona, iniwa sago mētla.

Jisame lowene sle mētletlabē

oneho bu jowa lowenenawa mētētabēya

42 Iniwa olē, Jisame tokwafe lowene sle mētletlabē oneho, Aposel ho kē tē mototokweflabē gali aholokwane mētlekefēya na kē galiwa esogo sle mētletlā. Na bu Jisame lowene sle mētletlabē oneho flina loko mētlekefēya. Na bu blalo yonane lowenena hi mētlekefēya na Jisas bu gli tēglebē olēna kē hi tēglelēmēbē hi wesibi mata hi mētlekefēya. Na Gotome gēgali mētletlēkefla.

43 Na Aposel ho bu Gotobē afutukuna, klelegowa wesibi blēge blēge mototokefēma. Na iniwa oneho hwi motloma na klelego memētletēma na tako tutune memētla.

44 Na iniwa oneho, Jisame kē lowene mētletlabē, bu jowa lowene nawa tafa mētlamu. Na bu melowene lamētla, “Jowa jowa enēnebē wesibi kē nēgebēye, ebē sebo Jisame kē lowene sle nēgletlabē iniwa enēnebē wesibi.”

45 Na li li olēna bubē flēke na fli wesibina balitina hihijika mētla. Na bu kē balitina hi wesibi jwa enēneme mētaitama.

46 Na iniwa olē bu Gotobē tako lotu lo mēta loko mētletlēkefēya. Na bu li lo li lo mēta mana loko motokoukefēya. Na hi wesibi mana hi mētlekefēya. Bu yonane lowenena tafa mētla na fleflesu lowenena hi motokoukefēya.

47 Na iniwa olē bu Gotome

fleflesu lamētlekefētla na bibita mototokwefla. Na iniwa oneho bume fleflesu lamētlekefētema. Olē li olē li, Tako Ho bume lowene jwa mēgletlabē onehobē lowene sle tētakefētēme. Na bume lowene sle mētletla. Jisas bu melē tle na bume lowene sle mētletlabē oneho feilawamu fata mētletla.

3

Kiju mogotabo ho sle tle

1 Li olēna, Pitana, Jonna, taboklē klijina oneho Gotome gēgali mētlagulabē olēna, Gotobē tako lotu lowa mētēyeu.

2 Na tlemalē, fli enēneme hwi motlomo, kiju mogotabo home mētlesula. Bu botabē imo mago kiju mogotabo fata tle. Iniwa olē bu kē belē mētlesukefla na Gotobē tako lotu lobē lēglesī ino ēfo li mēta gwa mototokwefla. Bu kē inobē weniji mēfē lamototla, “Lale Ino.” Na kē kiju mogotabo ho, tako lotu lowa kē mitisikefēyabē onehome, balitime, gēgēba tlokwefēme.

3 Na kē ho tlemalēme hwi tlome, Gotobē tako lotu lowa mēkaklujo namēgelome kofene, na bu balitime mana gēba tlome.

4 Pitana Jonna bume anisasana hwi motlolo na Pita gali tlole, “Ju seme hwi elēfakēna.”

5 Na kē ho bume anisasana wēya tlēlēmē na melowene latle, “Baliti mēglēnomefe.”

6 Kwe Pita gali tlole, “Masiwafe, bo baliti hananefe. Kwe bo jume kē nēglēbē wesibi nane. Bo

Nasaret life mago Jisas
Klaishbë afutukuna jume gali
nolë, ju huju elëme na asë
elëme.”

⁷ Na Pita tobamu tobame
fa totle na hujume taitale. Na
bubë kiju laslewa metletle.

⁸ Na bu hokweinawa huju
totokwakle na asë tëbelëfa.
Na buna, tlemalë hona,
iniwa Gotobë tako lotu lowa
mëtëkakluja. Na bu asë
tëbelëfa. Na okokli okokli
tëbelëfa. Na Gotome mana
bibita tëtagule.

⁹ Na iniwa oneho lotu lo
mëta kë tafa mëtlabë, bume
mehwi motlola, bu asë
tëbelëfa na Gotome bibita
tëtagule.

¹⁰ Na bume lowene sle
mëtletla na melowene
lamëtla, “Ebë ho kë nëgebë
kwe bu Gotobë tako lotu lo
lëgleso mago ino ëfo li mëta kë
tafa lëglekëfebë ho, balitime
kë gëgëba lëglekëfebë ho.”
Bume hwi motlola, kiju
lalowa mëbetle na klelego
memëtla.

*Pita bu tako lotu lome gali të
totle*

¹¹ Iniwa oneho kë home kë
fata tëgletlebë wesibi gali
aholokwane mëtla na klelego
memotokouja. Na bu fëka
motokweija, kë home hwi
namoglolame. Na bume
mehwi motlola, Pitaname
Jonname tobame fafa tle. Na
bu lotu lo sebatu mëta mana
mitlija. Bu kë sebatibë weniji
mefë lamotla, “Solomonbë
sebatu.”

¹² Pita onehome hwi tlome
na gali tlome, “Sobo Israelbë
afenëboni, sobo ebë wesibi kë
fata lëglebëme fëyeme klelego
ekoujone? Na sobo seme

anisasana fëyeme wëya
elëlnane? Sobo melowene
lalone, ‘Sebo Gotobë naba
lime asë sle nanelo na kë
home mana sle notlo?’ Weye.
Hanane mu. Sebo kë home
sebobë afutukuna hana sle
notlo. Weye. Hanane mu.

¹³ Sebobë semleninobë
Goto, Abraham, Aisak,
Jekopnabë Goto seme
meolafa latëtätëna, bubë
wege ho, Jisas, bu tako
afutukuna ho, na bu Jisame
tako fleflesumu latletle. Kwe
sobo bume wame ho betelë
tletulo, mogo nalë tëkle
namogotlame. Eso ho Pailat
bume jine lëgelëkakleme tole
latle fene, kwe sobo bume
jine lëgelëkaklebëme tole hana
tletelo na bume hehë tletelo.

¹⁴ Jisas bu Gotobë iniwa
gali esogo sle tëgletlebë ho,
na bu lalemu na li fëye
wesibiha hana totle. Kwe
sobo bume tole hana tletelo
na hehë tletelo. Na sobo eso
ho Pailatme gali tlolo, ho
mogo nalë kë tëke toglolebë
home kalabusu lo mago jine
nalëglëleme, Jisame asa jine
elëtëna.

¹⁵ Jisas bu seme lalë
tafame sle lëgëtana ho. Kwe
sobobë galime fwa nëgeme
bume mogo nalë këme tëkle
mototla. Kwe Goto bume
matëmatë mago huju totle.
Na sebo tlemalë kë wesibi
sebobë nabana hwi tloleme
nëgeme, kë loweneme fwa
këme gali nelo.

¹⁶ Sebo melowene sle
nëgelome nëgeme, ‘Jisas ebë
home lalowa sle logotleme,
na bubë afutuku ebë home
këme sle lotle.’ Jisas sobobë
lowene buwa huju lëtateno

na këbë lowenena ebë home sle notlo. Na sobo ebë home wahwi elolo, étani buwe kiju mogo tabo tétabe kwe ëje lalowa ekë asë lëbelëfa.

17 O, bobë afani, bo walowene nelë, sobona, sobobë eso hona, sobo melowene hana tletelo, 'Goto Jisame wafi aniji tlolefe, onehome nëno nalëgleme.' Sobo kë wesibime lowene hana telo, na Jisame këme tëbo totlo. Sobo meweniji latelo, Jisas bu atwati howa.

18 Gotobë lowene mago gali étani kë të mototokweflabë home, Goto megali latlome, onehome nënome, kë gali tégletlebë ho, bu tako elili fa logotleme na gli lëleme. Iniwa galime bu kë gali toglobebë, bu fatamu latotome.

19 Këme nëgeme sobo tëbo lowene, aholokwana ti elome na Gotome fwa lowene sle eletelome. Sobo melë egelona kwe Goto bu sobobë tëbo lowenebë aholokwana ti lëgletëyome.

20 Na Tako Ho some tiho lowenena tafa egelobë lowene lëglëyome. Na unina, bu Jisame ita jine lëgelëfakleme. Bu kë home wafi aniji tlole seme nëno lëglebëme.

21 Kwe bu heven lifate mëta tafa lëglebë, na Goto iniwa wesibi étani kë blëge totomebë, ita sle logotomebë olë mana folokoke tleme. Étani mu, Goto kë galime, gali sle tlome. Na bu bubë lowene mago gali të mototokweflabë home aniji

tlome, kë gali onehome të namëgëtakefëtëmame.

22 Étani Moses megali latle, 'Sobobë Tako Ho, Goto, bu sobobë semle lime aniji loglome, bubë gali të nalëgëtatëyome. Na bo Gotobë lowene mago gali të notokweflëbë ho fene tafa nelë, bu mata mefata nalëgleme. Sobo bubë gali aholokwane elolome na kë gali esogo eelëlome.

23 Na iniwa oneho, kë hobë gali aholokwane jwa mëglana na esogo jwa mëglelëlana kwe Goto bume tëbo logotomeme. Na bu Gotobë onehobë ku mëta hana tafa mëgelulame.'

24 Gotobë lowene mago gali të mototokweflabë ho iniwa, bu ebë olëna kë fata lëglebë wesibime, gëgali motokweija. Samuel bu kë wesibime afina wagali tle na tokwafe Gotobë lowene mago gali të mogotlabë enëne fli, Samuelbë nagi kë fata mëtlabë, bu mata kë wesibime gëgali mëtla.

25 Goto bu étani megali sle tle, bu ho lime jine lëglëleme, onehome nëno nalëgleme. Na Gotobë lowene mago gali të mototokweflabë ho bu kë galime onehome gali motlokwefëma. Na Goto bu kë home sobelë jine tlëtëyo, bu fene gali mëtla. Goto sobobë bisemleninome megali sle latlome, bume lale tafa nalëglelëmeme. Na kë gali sle gali bu soboname iniwame gali tle. Goto bu Abrahamme megali sle latlole, 'Bo tokwafe iniwa lifate mago enëneme lale tafa

nëglëmëme. Na kë lale tafa lëglëme ho, jubë bisemleni mëta fata lëgleme.’

²⁶ Këme nëgëme, Goto bubë wege home aniji tlole na sobelëme afina jine tlëtëyo, some ululu sle nalogotome na some jowa jowa onehome, tëbo lowenebë aholokwana ti egelobëme laitome.”

4

Bu Pitana Jonname kalabusu lowa sike mëtla

¹ Pitana Jonna onehome mana gëgali mëtlelëmobëë, na lotu lo mëta wege mëglabë ho fli, na Gotobë tako lotu lobë plismanëbë eso ho, na Sadyusi enëne* fli, mana mitisiya.

² Bu melowene lamëtla, “Tlëmalë bu onehome megali të mëtatemo, ‘Goto Jisame gli mago wahuju totle.’ Na këme sebo melowene nanëla, ‘Goto iniwa gigli enëneme huhuju logotomeme.’” Këme nëgëme bu tlemalëme tako wame lamotloma.

³ Na bu tlemalëme fafa mëtla na Israelbë afenëbonibë lotu eso enëne belë mëglelumame fene. Kwe taboklëmu nëgëme na bume kalabusu lo elë fwa këme sike mëtla. Li olëna namëglelumame.

⁴ Kwe lebutako oneho bu Pitabë gali aholokwane mëtla na bu Jisame lowene sle mëtletla. Na Jisame lowene sle mëtletlabë onehobë tabei kënjiji mefata

latla 5,000 elë ëjeha fwa neme.

Bu Pitana Jonname, Israelbë afenëbonibë lotu eso enënebë naba li elë mëtlesuma, bubë gëgali aholokwane namëgletëmame

⁵ Jowa olë mëtla na Israelbë afenëbonibë letitabo enënena, lotu eso enënena, Gotobë galime okokwe moglomabë hona, bu Jerusalem lifate mëta loko mëtlelëya.

⁶ Na Gotobë tako lotu lo mëta wege lëglebë tako eso ho Anas, buna iniwa loko mëtlelëya. Na Anasbë ilawa mago ho, Kaiafasna, Jonna, Aleksanderna bubë fli ilawa mago ho mata buna loko mëtlelëya.

⁷ Na bu Pitaname Jonname mëtlesuma na bubë naba lime ola mëtëkakija. Na bu tlemalëme metakune motloma, “Some ya gali tloyone, na some kë afutuku ya tlëyone na sobo kë home sle totlo?”

⁸ Na Gotobë Amtëtomba Pitame afutuku tlële, na bu megali latlome, “O Israelbë afenëbonibë letitabo enëne na sebobë eso enëne.

⁹ Bale, sobo seme kiju mogo tabo home kë tégaitalobëme takune naeglonamene? Na sobo melowene sle naegletelomene, ‘Ebë ho habelë sle lamototlone?’

¹⁰ Kwe melë nëgebë, kwe sobo iniwa melowene egletelome, na sobo Israelbë afenëboni iniwa sobo mata

* **4:1** Sadyusi enëne bu melowene mëta tafa mëtla, “Lebo enëne bu hana huhuju mëglame.”

melowene egletelome,
 ‘Nasaret life mago Jisas
 Klaishbë afutuku ebë kiju
 mogotabo home sle totle na
 sobobë naba li mëta ekë
 lilibetëyo.’ Kwe sobobë so
 galime fwa bume mogo nalë
 ti mëta këme bu mëtla. Kwe
 Goto bume matëmatë mago
 huju totle.

11 Gotobë bogo, bu ebë
 wesibime mewafle gali
 lalatle, ‘Lo gliji ho, bu lo,
 anijina gliji mëtla. Kwe bu li
 anijime meweniji lamëtla,
 “Tëbowa.” Këme nëgeme,
 mëglëbo elë gwa
 mëtetokwakëya. Kwe kë aniji
 kë gwa mëtetokwakëyabë bu
 lale anijimu ebamë. Lo
 bulego kë aniji mëta lotle.’
 Sobo aholokwane elo. Sobo
 kë lo gliji enënena Jisas bu kë
 aniji fenene.

12 Jisas buwamu seme
 nëno lëgleme. Goto, Iniwa life
 mago onehome, limeha
 meaniji hana tole, seme
 nëno lëglebëme. Goto Jisame
 fwa aniji tole.”

13 Na iniwa Israelbë
 afenëbonibë lotu eso enëne
 melowene lamëtla, “Pitana,
 Jonna, skulme hana mëtëyeu.
 Tlemalë bu atwati ho.” Kwe
 bume yafe hwi motloma,
 tlemalë bubë naba lime
 gëgalime uli hana mëtelo. Na
 bu këme klelego
 memëtletëma na melowene
 mëtla, ëbame tlemalë bu
 Jisasna asë mëtla.

14 Na bu kiju mogotabo kë
 sle tëglebë home hwi motlola,
 Pitana Jonna weife mitlija,
 këme nëgeme Pitanabë
 Jonnabë gali habëna tafu

mëgetatëmamene?

15 Na kwe Israelbë
 afenëbonibë lotu eso enëne,
 Pitaname, Jonname bu mago
 jine mëtelëkakëma.
 Tlemalëme wajine
 mëtelëkakëma na bu blalo
 mana gëgali mëtla,

16 “Sebo kë tlemalë home
 habelë nogotomamene?
 Tlemalë bu klelegowa wesibi
 blëge mototlo. Na iniwa
 oneho, Jerusalem lifate
 mago, bu këbë wesibi wafi
 lowene sle mletla. Sebo
 megali hana nëglame, ‘Ebë
 sogëna wesibi.’ Sebo able
 hana nëglame.

17 Kwe kë kiju mogo tabo
 ho, kë sle lëglebë gali, iniwa
 oneho betelë fifiji
 mëglagulalime. Këme nëgeme
 sebo bume anisasana lëkle
 nogotomame, bu fli
 onehome, Jisasbë galime gali
 jwa namoglomame.”

18 Na kwe bu tlemalëme ita
 mëtlelëkakima na anisasana
 gali motloma, “Jisas kë
 totomebë wesibime, itaita
 asa gëgali elekefo na sobo fli
 onehome Jisasbë wesibime
 asa okokwe elokwefomo.
 Matëbemu.”

19 Kwe Pitana Jonna bubë
 gali metafu mëtëtatemo,
 “Sobo habë lowene lalone,
 Gotobë naba lime fëye
 lowene lalë lëlene? Sebo
 Gotobë tole esogo nëglelëleme
 o sobobë tole esogo
 nëglelëleme. Sobo kë wesibi
 mana lowene sle eletemo.

20 Kwe sebo ëfalëbo kujuna
 hana tafa nëgelome. Sebo
 Jisame kë hwi togolobë
 wesibi, na Jisasbë ëfalëbo
 mago kë aholokwane

toglolobë gali, onehome të nëgetatëmome.”

²¹ Na kwe Israelbë afenëbonibë lotu eso enëne bu kë tlemalëme ita anisasana gali motloma. Bu bume tëbo mogotomabë lowene yafe sle mototla, kwe iniwa oneho, Goto kë kiju mogo tabo home kë sle togotlebëme, lowene mëtla na Gotome fleflesu mëtkefëtla. Këme nëgeme, Israelbë afenëbonibë lotu eso enëne bu onehome uli memëtletëma na bu kë tlemalëme hana tëbo mototoma na bume jine mëtëlëkakëma.

²² Na kë kiju tëbona home, tlemalë Jisasbë afutukuna kë sle mototlobë, bu niliafewe tlibutu wasigli totome na botabë imo mago kiju mogo tabo fata tle.

Bu Gotome gëgali mëtletlëla Jisasbë gali të mogotlabëme afutuku nalëglëmeme

²³ Israelbë afenëbonibë lotu eso enëne, Pitaname Jonname wafi jine mëtëlëkakëma. Na kwe tlemalë Jisasmë lowene sle mëtletlabë oneho fli betelë ita mëtëyeu. Na lotu lo mëta wege mëglabë eso hobë gali na fli Israelbë afenëbonibë letitabo enënebë gali bume gali të mëtëtatemo.

²⁴ Bubë gali aholokwane motloma, na kwe iniwa bu jowa lowenenawa Gotome gëgali mëtletlëla, “Tako Ho, ju matafa blëge totle, na life blëge totle na nutu blëge totle, na iniwa wesibi kë mëta kë mëgëbebë mata blëge totome.

²⁵ Ètanimu jubë Amtëtomba, sebobë semle, Devitme gali tlële. Bu jubë wegeho tafa tletë. Na bu megali latle, ‘Gotome lowene jwa mëtletlabë enëne, bu fëyeme enisusu mëlane? Li life li life mago oneho, bu Gotome wameme, gali yafe sle mototla, kwe hanane.

²⁶ Iniwa lifate mago eso ho bu wameme sagli metlëla, na bu loko mëtletlëya, Tako ho na, seme nëno lëgleme kë aniji toglolebë honame, momogli namëgletomame.’

²⁷ Ebë gali Devit kë yahi tëglebë, bu iniyafememu yahi tle. Herotna, Pontius Pailatna, Israelbë afenëboni mëtabëya jwa mëglabë enënena, Israelbë afenëbonina, bu kë lifate, Jerusalem mëta loko mëtletlëya, Jisasmë tëbo namogotlabëme. Jisas, jubë lale wege ho. Na ju bume wafi aniji tole, jubë onehome nëno lëleme.

²⁸ Bu kë wesibi melë kë mëtlabë, kwe jubë gali na jubë tolewa esogo mëtletlëla. Jubë afutuku nawa, ju ètani wafi gali sle tle, këbë wesibi fata lëglebëme.

²⁹ Kwe Tako Ho, ëje sebo jume gali nolëyo, bu seme kë wame moglonabë gali, lowene egletleme. Na ju seme, jubë wege enëneme, afutuku elëlëname na sebo

jubë gali tëme uli jwa nanëglame.

³⁰ Goto, jubë afutuku onehome olafa etatëmeme na onehobë ato elili sle etometëmeme na klelegowa wesibi mata blëge etometëmeme. Ju kë wesibi jubë wege ho Jisasbë afutukuna melë saetometëme.”

³¹ Bu Gotome wafi gëgali mëtletlëla, na kë mëta, kë loko mëtletlëyabë lo, asëwa tletëme. Na Gotobë Amtëtomba bume afutuku tlëme na bu Gotobë gali feilawa të mototla na bu kë gali të mogotlabëme uli hana mëtla.

Jisasmë lowene sle mëtletlabë oneho, wesibi blalo sa mëtëtaya

³² Jisasmë lowene sle mëtletlabë oneho bu jowa lowene nawa tafa mëtla. Ho li bu megali hana tle, “Ebë wesibi kë nëgebëye, ebë bobëwa.” Weye. Iniwa wesibi kë nëgebë ebë iniwa onehome lëgaitamebë.

³³ Na Aposel ho bu tako afutukuna, Tako Ho Jisas matëmatë mago kë huju tëglebë gali, onehome të mëtetakefëtëma. Na Goto bume lëgaitameme tako fleflesumu latletëme. Na bume ululu sle totome na bu tafa sle mëtla.

³⁴ Na bubë ku mago, li hoha, wesibime hana afolo tle. Hanane mu. Iniwa oneho bu flëke o lona kë mëtëtabëyabë, bu kë wesibi balitina hihijika mëtla. Na bu kë baliti glo mëtla na Aposel ho betelë mëtehweija.

³⁵ Na bubë toba mëta gogwa mëtla. Na Aposel ho kë baliti, wesibime kë afolo mëtlabë enëneme sa mëtëtagutëma.

³⁶ Na ho li buna tafa mëtla bubë weniji Josep. Na Aposel ho bume li weniji fë mototla, Barnabas. Barnabas weniji kë nëgebë kë gali fene lëbe, “Onehobë tutune lowene sle lëgëtatëmebë ho.” Barnabas kë nëgebë bu Livaibë afenëbo na bu Saiprus afayo mago ho.

³⁷ Bu bubë flëke afloko li, balitina hihijika tle. Na bu kë baliti tehwei na Aposelbë toba mëta gogwa tle.

5

Ananiasna Safairana Gotome sogëna motlolo

¹ Na ho li buna tafa mëtla. Bubë weniji Ananias. Na bubë nobë weniji Safaira. Ananias bubë flëke afloko balitina hihijika tle.

² Na kë glo tëglebë baliti fli ëho totome. Na no mata kë wesibi lowene latletle. Na Ananias bu kë baliti lëne glo tle na Aposel home tujuwelëme na sogëna tlome, “Bobë flëke baliti kënijiwa glo telëyo.”

³ Na Pita bume megali tole, “Ananias, Ju Satanbë tole fëyeme esogo tlelëtlene? Ju bome megali kë eglonëbë, ‘Ebë baliti bobë flëke mago këniji glo telë,’ kwe ju Gotobë Amtëtombame sogëna lalole.

⁴ Ju kë flëke afloko jubë tole nawa balitina hihijika tle. Na baliti ju kë glo tëglebë ebë mata jubë wesibi. Na ju kë

balitina fëye wesibi egleme tole eglebë ebë jubë tolewa. Ju këha tëbo lowene fëyeme tlene? Na mesogëna ele, 'Baliti këniyiwa ekëne.' Ju melowene asa ele, 'Ju onehome sogëna elome.' Weyewa. Ju Gotomemu sogëna elole."

⁵ Ananaias kë gali aholokwane tle na bu mogowa latitigowa. Na oneho bu Ananaiasme kë fata tégletlebë wesibime yafe aholokwane motokouja na bu tako uli memëtla.

⁶ Na falake nëbale bu mitisiya. Na bu mogo ëhona lalei mototla na matëmatë mutuje tla.

⁷ Tokwëfo tafawa tëtëkake, na Ananaiasbë no bu mata tëkakli. Bubë home kë fata tégletlebë wesibime lowene hana tle.

⁸ Na Pita, bohe kë téghe weibë baliti bume lebotane totometë na megali tolë, "Ju bome gali enonë, sobo bihena, flëke baliti kë glo tégelobë ebëwa glo telone?" Na Safaira bume gali tafu tëtatile, "Na kwe fëyemene? Ta këniyiwa fe."

⁹ Na Pita bume megali tolë, "Sobo bihena gali fëyeme sle totlone? Gotobë Amtëtombame su naegotlomene? Ju aholokwane ele. Biheme kë gwa mogujetlabë falake nëbale, ino ëfo mëta ekë melujuwelukwëya. Na ju mogome mata mëgehøjome."

¹⁰ Na bu mata Pitabë elebo lime mogowa latitigowa. Na falake nëbale metëkaklija na bume mogowa hwi motlëya.

Na fa mëtëtaya na mëtehuja. Na bohebë mëglëbo lime matëmatë mëtëtaya.

¹¹ Na Jisame lowene sle mëtletlabë oneho iniwa na fli oneho mata bu kë gali yafe aholokwane mëtla na ulimu memëtla.

Aposel ho klelegowa wesibi blëge blëge mototoma

¹² Aposel ho bu feilawa klelegowa wesibi onehobë naba lime blëge blëge mototoma. Na Jisame lowene sle mëtletlabë oneho bu tako lotu lowa itaita mutujukefëya na lotu lo sebatì mëta loko mëtlagukefëya. Bu kë sebatibë weniji mefë lamototla, "Solomonbë sebatì."

¹³ Na Jisame lowene jwa kë mëgletlabë oneho, Jisame lowene sle mëtletlabë onehome flelesu lamëtkefëtëma na bume megali lamëtkefëtëma, "Bu lale lale oneho mu mëtabëya." Kwe buna lokome uli lamëtletëma.

¹⁴ Na feilawa onehomu bu Jisame lowene sle mëtletla na Jisame lowene sle mëtletlabë oneho flina iniwa sago mëta.

¹⁵ Iniwa oneho bu klelegowa wesibi Aposel ho kë blëge blëge mogotomabë wafi lowene mëtletëma. Na bu tëbo atona onehome këme mëtlesumetëma. Na Pita kë betelë asë lëglebë alëge mëglëbome ni labuku kahëba motokouja. Bu metole lamëtla, Pita bu loliwa lisime na toba gwa lëtagutëmeme, bubë ato sle mëletëmeme. O melë hana lëglena, kwe bubë

amtëtombawa lamu
lotomeme na bu sle mlame.

¹⁶ Na feilawa oneho
Jerusalem lifate lime kë tafa
mokoujabë bu mata, ato
tëbona enëneme na ahwane
kë tëbo mogotomebë
enënename, Aposel ho betelë
mëtlesumetëma. Na bu kë
onehome, Jisasbë afutuku
sle tëtagume.

*Ensel bu Aposel home
kalabusu lo mago nëno tle*

¹⁷ Gotobë tako lotu lo mëta
wege lëglebë tako eso ho, bu
Sadyusi enënena ilawa
yonane mëglabë ho. Na bu
iniwa, Aposel enëne kë
mëtëglabë wesibi yafe hwi
motloma na bume moumou
mëtleläma, feilawa enëne
Aposel enënebë loweneme
tako fleflesu mëtletëmame
nëgeme.

¹⁸ Këme nëgeme Aposel
home fafa mëtla na kalabusu
lowa sike mëtla.

¹⁹ Kwe klabë Gotobë ensel
kalabusu lo ino tika totle na
Aposel home tlelëkakime na
megali tlome,

²⁰ “Sobo eyeume na
Gotobë tako lotu lowa
ekaklujome na onehome gali
të eoutatemome. Na Gotobë
unaunalë lale tafa
lëglelämëbë gali, onehome të
eoutatemome.”

²¹ Aposel ho bu kë gali
aholokwane mëtla na kwe
lobalëmu Gotobë tako lotu
lowa mëtëkakluja. Na bu
onehome Jisasbë galime
okokwe motloma.

Na lotu lo mëta wege
lëglebë letitabo hona bubë
yabenina, Israelbë
afenëbonibë lotu eso enëneme
na fli Israelbë afenëbonibë

eso enëneme mata gali
mëtelokwakëma migisiya
namëglame. Na bu mitisiya
na iniwa loko mëtletëya. Na
bu lotu lobë plismanë,
kalabusu lowa jine
mëtelulukakëma, Aposel home
nëno namëglame na
bubelëme mëglesuma
namëglame.

²² Na plismanë kalabusu
lowa mutuja kwe bu Aposel
home hwi hana motloma. Na
bu Israelbë afenëbonibë lotu
eso enëne belë ita mutuja na
lotu eso enëneme megali
motloma,

²³ “Sebo kalabusu lowa
tuja na kalabusu ino hwi
tlola, tiji sle wamëtla. Na
kalabusu ino ëfo mëta kë
miglibekefëyabë ho bu mana
mitlija. Na kwe sebo ino tika
totlana, sebo ho limeha kë
mëta hwi hana telujuwelëla.”

²⁴ Gotobë tako lotu lobë
plismanëbë eso ho na lotu lo
mëta wege mëglabë eso ho kë
gali aholokwane mëtla na
tako tutune memëtla na gali
mëtla, “Bu ebëha wesibi melë
kë lëglebë, fëye wesibi fata
lëglemene?”

²⁵ Na ho li tisi na gali
tlome, “Aholokwane elo!
Sobo kalabusu lowa kë
tëglelumobë ho, bu Gotobë
tako lotu lo mëta milibo na
Jisasbë galime onehome
okokwe molomo.”

²⁶ Këme nëgeme, lotu lobë
plismanëbë eso ho na fli
plismanë mutuja na Aposel
home nëno mutula na
mëtlesuma. Kwe bu Aposel
home tëbo hana mototoma.
Bu onehome uli mëtletëmame
nëgeme, bume anijina mogo

nalë tètëkle mägëtayalime.

Aposel ho eso enënebë naba lime, Jisasbë gali tëme uli hana mëtla

²⁷ Na plismanë, Aposel home mëtlesuma. Na bu Israelbë afenëbonibë lotu eso enënebë naba lime mitlibo. Na Gotobë tako lotu lo mëta wege lëglebë tako eso ho bume megali tlome,

²⁸ “Sebo some Jisasbë galime onehome tëme waheheë tletëyo. Kwe sobo sebobë gali boblomu latotlo na sobo kë hobë galime, Jerusalem lifate mago enëneme iniwa wafi okokwe elagumo. Na sobo seme gali blawa meso naegëtatëname fene, ‘Jisas kë gli tëglebë gli eso, somëta lëbetëyo.’”

²⁹ Kwe Pitana Aposel flina bubë gali metafu mototla, “Sebo Gotobë galiwa esogo nëglelëtlame. Sebo hobë gali hana esogo nëglelëtëmame.

³⁰ Sobo Jisame mogo nalë ti mëta bu telo. Kwe sebobë semlenibë Goto, bume huju totle.

³¹ Goto bume tako fleflesu metletle na bume tilekole na bubë tobamu toba elëme tafa lëgletlebëme gali tlole, buna iniwa, onehome eso home tafa namëgletemome. Na bu seme nëno lëglebë ho ekë tafa lële. Na bu seme Israelbë afenëbonime tëbo lowenebë aholokwana ti mëglabëme na lale lowenewa esogo mëglelëlabëme laitaname. Na Goto sebobë tëbo lowene aholokwana ti lëletëname.

³² Jisame kë fata mëtëgletlebë wesibi sebo wahwi tloma. Na sebo

onehome kë gali të nëtakëfëtëma. Na Gotobë Amtëtomba mata onehome lowene tlëme, ebë gali kë nëgebëye nëgalimu. Oneho, Gotobë lowene kë esogo mëglelëlabë, Goto bubë Amtëtomba bume tlëme.”

Gamaliel, Israelbë afenëbonibë lotu eso enëneme gali tlome

³³ Israelbë afenëbonibë lotu eso enëne, bu kë gali yafe aholokwane mëtla na bu feilawamu enisusu mëtla na Aposel home mogo nalë tètëkle namägëtayame fene.

³⁴ Kwe letitayo ho li bubë ku mëta tëtabe, bubë weniji Gamaliel. Kë ho bu Farisi ho, na bu Mosesbë tafa sle galime, okokwe loglokwefëmebë ho. Iniwa oneho bume tako fleflesu lamelekefëtla. Na kwe bu huju tle na gali tlome, “Sobo Aposel home toho elelëkakëmo, haha sogë tafuwa namogujetlame.”

³⁵ Bu Aposel home toho mëtletlëkakëma. Na Gamaliel bu Israelbë afenëbonibë lotu eso enëneme gali tlome, “O Israelbë afenëboni, sobo kë enëneme wesibi li egëtatemome tole egelona kwe sobo lowene sle afina elome.

³⁶ Sobo walowene elo, ëtani nane, ho li tëtabe, bubë weniji Teudas. Bu bume melowene latle, ‘Bo tako ho, eso home lalowa tafa nëgelëmefe.’ Na onehome gali tlome, bume esogo namëglelëtlame. Na 400 ho kënjiji, bume esogo mëtletlëla, gavman enëneme boblo namogotomame fene. Kwe

wame home boblo mogotomabë enëne bume mogo nalë tëke motlola na iniwa ho bume kë esogo mëtëglelëlabë lamëtëlboujawa, na gavmanme wame moglolibë lowene aholokwana ti mëtla.

³⁷ Na tokwafe, gavman, onehome tabei tokouna, Galili provins mago Judas bu tisi na fli onehobë wame lowene tufiji têtatëme. Na fli oneho bume esogo mëtletlëla na Gavmanme heheëme wame mla. Kwe wame home boblo mogotomabë enëne bume mogo nalë tëkle mototla. Na iniwa ho bume kë esogo mëtëglelëlabë lamëtëlboujawa. Na gavmanme wame moglolibë lowene aholokwana ti mëtla.

³⁸ Këme nêgëme, eli bo some gali nolëyo, sobo kë Aposel home asa tëbo etomo. Sobo bume hwiwa elomo, tafa matla. Kwe ebë wege bu kë fa mogotlabë, hobë afutuku magowa nêgena, kwe tëbo lëgletëmeme.

³⁹ Kwe ebë wege bu kë fa mogotlabë, Gotobë afutuku mago nêgena, kwe sobo lëkle hana egotomome. Sobo melë egelona kwe Gotome wame lalolo.”

Na kwe Israelbë afenëbonibë lotu eso enëne bu Gamalielbë lowenewa esogo mëtletlëla.

⁴⁰ Na kwe bu ita Aposel home gali motloma, mëkakluja namëglame. Na bu mëtëkakluja. Na bu lotu lobë plismanëme gali motloma, taba afona lëlafa namogotomame. Na bume

lëlafa mototoma. Na Israelbë afenëbonibë lotu eso enëne, bume anisasa galina lëkle mototoma, “Sobo Jisasbë gali onehome itaita asa të eoutatemo. Matëbe.” Na bume mana jine mëtletëkakëma.

⁴¹ Aposel ho, bu Israelbë afenëbonibë lotu enëneme hune mëtla. Na fleflesu motokouja. Bu Gotome melowene mëtletlame nêgëme, “Bu seme fleflesu lalëletëna. Sebo Jisame lowene sle nêgletlabë ho nêgëme na oneho seme këme wame molona.”

⁴² Na iniwa olë bu Gotobë tako lotu lowa mutujukefëya na Jisasbë galime onehome okokwe motlokwefëma. Na onehobë lowa mata mutujukwefëtëma na Jisasbë galibëme onehome okokwe mëtlagukwefëma. Na bu megali sle lamëtla, “Goto Jisame jine tlële, bubë onehome nëno lëglebëme.”

6

Bu tobali ita tële home aniji motloma, Aposel home mëgaitama namëglame

¹ Na kwe, kë olëna, Jisame lowene sle mëgletlabë oneho, bu lebutakomu mëtëtabëya. Na kë mago, Grik gali lowene mëglabë oneho bu Hibru gali lowene mëglabë onehome wame motloma na megali lamotloma, “Iniwa olë sobo hi wesibime kë afolo mëglabë onehome laitakefëmo, kwe sebobë seiju oneme hana aitakefëmo.”

² Këme nêgëme, we ita tële Aposel, Jisame lowene sle

mëtletlabë onehome gali mëtëlekakëma, bu belëme migisitëma namëglame. Na bu mitisiya na bume megali motloma, “Sebo hi wesibi sa wege kë fa nogotlabë seme Gotobë gali tëme lëkleha lalëtana. Kë lalë nane. Sebobë wegemuwe, Gotobë galiwa të nogotokweflabë.

³ Këme nëgеме, afanino na mësenëbanino, sobo somago, tobali ita tële lalë home hwi sle saelomo, kë hi wesibi sa wegebëme mogoutatla namëglame. Lalë lowenena mëtabëyabë home hwi sle elomome. Na Gotobë Amtëtombabë afutukuna kë tafa mëglabë home mata hwi sle elomome. Na sebo Aposel ho bume kë hi wesibi sa wegebëme aniji nanoglomame.

⁴ Kwe sebo kwe, Gotome gëgali nëglelëkeflame na Gotobë gali onehome okokwe nolokwefëmame.”

⁵ Iniwa oneho bu kë galime fleflesumu lamëtla. Na bu Stivenme aniji motlola. Stiven bu Gotome feilawamu lowene sle tletle. Na Gotobë Amtëtombabë afutuku bu mëta feilawa tëtabetle. Na bu Filip na Prokorus na Nikanor na Timon na Parmenas na Nikolasname aniji motloma. Nikolas bu Antiok life mago ho na bu Israelbë afenëbo nane. Kwe bu Israelbë afenëbonibë lotu tokwafe esogo tlelële.

⁶ Bu kë tobali ita tële ho, Aposel enënebë naba lime mitlija. Na Aposel ho

Gotome gëgali mëtletlëla, kë home lëgaitame nalëgleme. Na bubë toba kë hobë eso mëta gogwa motoletëma, bume kë wege fame aniji motloma.

⁷ Na Gotobë gali li life li life fifiji mëtletlëla. Na Jerusalem lifate mëta, Jisame lowene sle mëgletlabë oneho bu feilawamu fata mëtla. Na lotu lo mëta wege mëglabë ho feilawa mata, Jisame lowene sle mëtletla.

Israelbë afenëboni bu Stivenme bubë lotu eso enëne belëme mëtletlula, bume gali so namëgëtatlame

⁸ Goto Stivenme tako lëgaitale lalële na tako afutukumu tlële. Këme nëgеме Stiven bu feilawa klelegowa wesibi onehobë naba lime këme blëge blëge lotokwefëme.

⁹ Kwe fli ho bu Stivenbë gali tole hana mëtletla na bume momata mëtletlëla. Kë oneho bu Israelbë afenëbonibë li lotu lo mago. Bu kë lotu lo mefë lamototla, “Frimanbë lotu lo.”* Kë ho fli bu Sairini lifate na Aleksandria lifate mago na fliye bu Silisia na Esia provins mago.

¹⁰ Kë ho Stivenbë gali boblo mëgëtatlame fene kwe Gotobë Amtëtomba Stivenme lalë lowene tlële na bubë gali boblo hana mëtëtatla.

¹¹ Këme nëgеме bu fli onehome uwabeli baliti mëtletëma, na megali motloma, “Sobo Stivenme megali saso etatelo, ‘Sebo

* **6:9** Friman gali melë galibëme gali mla, “Ho, li hobë wege afina manawa kë fa lëgëtakefëtletbë na tokwafe bubë eso ho, bume jine lelëkakleme, wege jwa manawa tafa nalëgleme.”

Stivenme waaholokwane tlola, Mosesname, Gotoname tēbo gali latlome.”

¹² Na kē galina, onehobē, na Israelbē afenēbonibē eso enēnebē, na Gotobē galime okokwe moglomabē hobē wame lowene tufiji mētētātēma. Na bu Stivenme fame mutuja na Israelbē afenēbonibē lotu eso enēne belē mētlesula.

¹³ Na fli home mata mētlesuma, Stivenme gali so namēgētatlame. Kē enēne megali lamētla, “Kē ho Gotobē tako lotu lome sisile lalotokwefle. Na Goto Mosesme kē gali toglolebē tafa sle galime mata itaita sisile lalotokwefle.

¹⁴ Sebo bume meaholokwane latlola, ‘Nasaret life mago Jisas bu Gotobē tako lotu lo yayei lotleme, na Mosesbē anebo gali ētani afuninome kē tēglēmēbē hihijika lēleme.”

¹⁵ Na Israelbē afenēbonibē lotu eso enēne iniwa, Stivenme feilawa wēya mētletlēla, na bubē wenyane, enselbē wenyane fenene mehwi motlotla.

7

Stiven Israelbē afenēbonibē lotu eso enēneme gali tē tētātēme

¹ Na Gotobē tako lotu lo mēta wege lēglebē tako eso ho, Stivenme metakune tlole, “Ju lowene lalene? Ebē gali, ho jume kē so mēgētātēyobē, nēgaline o sogēna lamla.”

² Na Stiven Israelbē afenēbonibē lotu eso enēneme megali latlome, “O afani na ayani, sobo aholokwane elo.

Ētani, sebobē tako afutukuna Goto, sebobē semle, Abrahamme fata tletle. Kē olēna, Abraham bu Mesopotemia provins mēta mana tafa tle. Bu Haran lifatewa tuguju jwa tle.

³ Na Goto bume megali tlole, ‘Jubē home hune elēme. Na jubē life mata kile elēme. Na jume lebotane gali kē nētātēbē life elēme ejume.’

⁴ Na Abraham bubē life, Kaldia, kile tle. Na bu Haran lifate mēta tafa tule. Abraham bolijaya wafi gli tle na Goto, sebo ēje kē tafa nēglabē life elēme jine telēbakle.

⁵ Kwe Goto bume kē lifebē flēke afloko tokwēfo hana tlēle. Weye. Hanane. Kwe Goto bume megali slewa latlole, ‘Kwe tokwafe, bo jume ebē life nēglēme. Na kwe kē life melēgēbeme, jubē na jubē bisemleninobē.’

⁶ Goto bu Abrahamme li galime megali latlole, ‘Jubē bisemlenino bu li life mēta tokwafe nibowai mugulame. Na bu kē life enēnebē wege manawa fa mētakefētēmame. Na kē bisemlenime tēbo mogotomabē tlibutu kēniji 400.

⁷ Kwe tokwafe bo kē onehome tēbo nogotomēme. Na tokwafe bisemleni kē life kile mlame na misiyame. Na ebē life kē nēgebē mēta bome lotu mēlekefētēname.’

⁸ Na Goto gali tle, Abraham bubē ato jibo tlē lotleme, na bubē tokwafe fata mēglabē iko nēbalebē ato jibo mata, satētlē mogotometēmame. Kē yayahuju melēme lēlekuju

lëletëmeme, bu Gotobë onehomu mëtabëya mëglamemu. Bu kë yayahuju hwi moglomana, Goto bu Abrahamme kë gali sle toglolebë galime, ita lowene mletlame. Na tokwafe, Abraham nëbana tle. Bubë weniji Aisak. Kë nëba tobali ita aona olë kënjiji tètabe na bu kë nëbabë ato jibo mana tlë tètatile. Na Aisak bu nëbana tle. Bubë weniji Jekop. Na bume mata kë fene melë latotle. Na Jekop bubë we ita tële nëbaleme mata melë latotome. Kë we ita tële nëbale kë nëgebë bu sebobë semlenino.

⁹ Jekopbë nëbale, bubë bolijahani Josepme, tako moumou lamëtletlëla. Na tëbo lowene memëtletla. Na bu Josepme, li life mago enëne mëta balitime hihijika mëtla, li hobë wege manawa fa nalëtatleme. Na kë enëne bume Isip lifatewa mëtletlula. Kwe Goto buna mëtëtabo.

¹⁰ Goto bume taitale, na iniwa tëbo wesibi bume kë fata mëtletlebë, Goto bu sle totometle. Bu eso ho Ferobë naba lime tiglibena, Goto bume taitale na lale lowene tlële. Këme nëgeme eso ho Fero bume tako tole latletle na bume Isip lifate mago onehome tafa lëglelëmebë eso home aniji tlole. Na bubë lo mago iniwa wesibi hwi loglometlebëme mata anijii tlole.

¹¹ Tokwafe tako fone Isip lifate mëta na Kenan lifate mëta fata tle. Na iniwa oneho bu tëbo tafa memëtla. Na sebobë semlenino bu hi wesibime afolo mëtla.

¹² Kwe Jekop ebë gali aholokwane tle, hi wesibi Isip life mëta kë mëbe. Na bubë nëbaleme Isip lifewa otome afina jine tlëme, hi wesibi glo namugulame. Na bu mutuja hi wesibi glome. Na hi wesibi glo mutula. Na ita mitisiya.

¹³ Na kë hi wesibi wafi yawe motloma na kwe bu ita mutuja na Josep bubë bolijahanime gali tlome, 'Bo Josep, sobobë keinëba.' Na tokwafe, Isip life mago eso ho Fero, Josepbë ilawa mago enëneme lowene tletëme.

¹⁴ Na kwe Josep, bubë bolijahaninome gali tlome, 'Sobo eyeume. Na sebobë aya, Jekopme gali ejuwelolome. Buna, sebobë ilawa mago onehona, iniwa esijo naegelome, Isip lifateme tafa naegelome.' Na kë enënebë tabëi bu kënjiji, 75 oneho.

¹⁵ Na kwe Jekop, bubë nëbalena, Isip lifewa mitimiya na këme tafa mëtemola. Na tokwafe buna bubë nëbalena, kë mëta fwa gigli mëtemola.

¹⁶ Na bu mogo, kë mago Sekem lifewa mëtehwojuja. Na këme matëmatë mëta gogwa mëtetula. Ètani Abraham bu kë matëmatë life, Hamorbë bowenenino mago, balitina fa totle."

¹⁷ Na Stiven ita gali tle, "Ètani Goto Abrahamme megali sle tlole, bubë afenëbonime lëgaitametleme na wame enënebë toba mago nëno lëleme. Na kë olë fata lëgleme lololi lalële. Na

Israelbë afenëboni bu Isip life mēta lebutakomu fata mēta.

¹⁸ Na kē nalēwa, tiho eso ho Isip life mēta fata tle. Kwe kē eso ho, Josep ētani kē fa togotlebē wege, lowene hana tletle.

¹⁹ Na kē eso ho bu sebobē semleninome sogēna latlome na tēbo totome. Na bume gali tlome, ‘Sobo iko nēbale fufu egelona kwe walujume sahune elekefo, gigli namēglame.’

²⁰ Na kē olēna, bota Mosesme mana fu totle. Na bu lale nēba klisomu fata mototlo. Botana bolijayana hwelutuwa lo mēta aona yeme mētlēlo.

²¹ Tokwafe bume waluju mēta gwa mutujetla. Na eso hobē boko hwi tujuwelēle na fa totle. Na bubē nēbaha fata tletē.

²² Na Isip life enēnebē iniwa lale lowene, bume okokwe motlola. Na bu gali anisasana anebo gali lēglebē ho tētabe. Na tatako kalēlego wege fa togotlebē afutukuna ho tētabe.

²³ Moses bu nili yafewe tlibutu kēniji wafi tle na bubē enēneme hwime lowene tle. Kē enēne bu Israelbë afenëboni.

²⁴ Na bu fe tēkake, na Isip life mago home hwi tlole, Israelbë afenëbo mago ho lime, tēkle totle. Na bu fewa tēkakebē na bubē ilawa mago home taitale. Na Isip life mago home mogo nalē tēke tlole.

²⁵ Moses bu melowene latle, ‘Bubē enēne bume melowene namēgletlame,

“Goto bume wafi aniji tlole, bume lēgaitame nalēglebēme na Isip life mago nēno nalēglebēme.” Kwe bu kēbēme lowene hana mētletla.

²⁶ Jowafe niwa tēbe na ita Moses tuju. Na bu tlemalē Israelbë afenëboni blalo momogli mētēto kē labu mēta hwi tlome. Na bu belē tujutēme, bubē wame lēkle nalēgētātēmeme na gali tlome, ‘Hai! Sobo ilawa magofe. Sobo sobolalo memomogli fēyeme etone?’

²⁷ Kwe wame kē togotlebē ho, Mosesbë gali fleflesu hana tletle. Kēme nēgeme Mosesme so telēkakle, na gali metafu tētatle, ‘Sebobē eso home na sebobē tafa hwi eglotēnabē home jume ya aniji tolēne?’

²⁸ Ju bome gli nalē tēke naeglonēmene, yame Isip life mago home mogo nalē fene tēke tlole? Ju bome melē naegētanēmenē.’

²⁹ Moses kē gali yafe aholokwane tle na bu Midian lifatewa ulime tlēboukaku. Bu kē mēta tako tafa tule. Na mēse sei tlē. Na iko nēbale tēle fata totome.

³⁰ Moses bu kē lifate mēta niliafewe tlibutu kēniji tafa tule. Na tokwafe, li olēna, Moses ho jwa tabo mēta, Sainai fatini wayo li mēta, tafa tle. Na ahojuna ti tokwēfo hwi telokwakle. Na ensel kē ahoju mēta, Mosesme mana fata tletle.

³¹ Moses klelego metletle. Na bu melēme tole tle, lolime hwi sle naloglolome na kēme nēgeme bu loliwa tuju tle. Na

Tako Ho bume megali latlole,
³² 'Bo bisemlenibë,
 Abraham, Aisak, Jekopnabë
 Goto.' Na Moses lili tle na ita
 kë ahoju hwi loglolebëme uli
 metletle.

³³ Na Tako Ho gali tlole,
 'Jubë juba jibo hohwaga ele.
 Ebë life ju kë mëta kë
 eglibebë, ebë bobë life
 nêgeme. Bo kë mëta tafa
 nêgelëbë life.

³⁴ Bo Isip life mago oneho,
 bobë onehome kë tēbo
 mogotomabëme, wahwi
 nolomë. Bo bubë elili afëflei
 lego waaholokwane
 nolotemë. Ëje bo këme
 netujulë, bume nêgaitamë
 nanêgelëme, Isip life onehobë
 toba mago nēno nanêgelëme.
 Këme nêgeme bo jume gali
 nolë, ju huju ele. Bo jume
 Isip lifatewa ita jine
 nêgelëkakëme.'

³⁵ Ètani, Israelbë afenëboni
 bu Mosesme boblo lamototla
 na megali lamotlola, 'Sebobë
 eso home na sebobë tafa hwi
 eglotë nabë home, jume ya
 aniji tolëne?' Kwe kë Moses
 fwa Goto jine tlële, Israelbë
 afenëbonibë eso home tafa
 nalëgletëmeme. Na bume Isip
 life mago nēno nalëgleme.
 Goto bume kë ti tokwëfo
 wayo mëta enselha fata
 tletle. Na bume kë wegeme
 mana aniji tlole.

³⁶ Na Moses bume Isip life
 mago tlelume. Na bu
 memelë klelegowa wesibi
 blëge blëge totome. Bu kë
 klelegowa wesibi Isip life
 mëta na Winowa Nutu* mëta

mata blëge blëge totome. Na
 bu ho jwa yenëbawa life mëta,
 niliafewe tlibutu kë asë
 tēglelëmebë olëna mata blëge
 blëge totome.

³⁷ Na kë Moses buwa,
 Israelbë afenëbonime megali
 latlome, 'Goto, sobobë ilawa
 mago ho lime aniji
 logloleme, bubë gali tē
 nalëgëtatëyome. Na bo,
 Gotobë lowene mago gali tē
 notokweflëbë ho fene tafa
 nelë, bu mata mefata
 nalëgleme.'

³⁸ Sebobë semlenino ho
 jwa tabo elëme mutuja. Na
 këme loko mutulelëya na
 Moses buna tafa tlelëme. Na
 bu Sainai fatiniwa tokwale
 na Gotobë ensel bume gali
 mana tlële. Na bu Gotobë gali
 fa totle. Kë lalë galibë seme
 ëhwati tafabëme lëgaitana
 nalëgleme. Na Moses kë gali
 seme tlëna.

³⁹ Kwe sebobë semlenino
 Mosesbë gali boblo
 lamëtëtatla. Na bu Isip
 lifatewa, ita muguja
 namëglabëme, tako tole
 memëta.

⁴⁰ Moses bu Sainai fatini
 mëta mana tafa tole, na
 Israelbë afenëboni Eronme
 megali motlola, 'Moses seme
 Isip life mago kë tēglesunabë,
 bume fëye wesibi fata loletle
 nawa. Bu ita hana
 lëgetujuleme nawa. Këme
 nêgeme, ju seme fëso li blëge
 blëge etatëna, na bu Gotoha
 fata nalëgletëname. Na bu
 seme lëgaitana nalëgleme na
 logoutatëna nalëgleme na
 alëge lebotane

* 7:36 Winowa Nutu bubë weniji.

nalëtagutëname.’

⁴¹ Na kë nalë bu bulmakau kleli nëba fëso blëge blëge totle. Na bu kë bulmakau kleli nëba fësoma, wesibi ahøjume mëtletla na bu kë sinikibome fleflesu nalëgletëmeme. Na bu tako hi wesibi blëge mototla. Na bu kë blëge mototlabë wesibime mana fleflesu mëtletla.

⁴² Këme nëgema, Goto bume yeolë latletëme. Na bu kliji name, yeme name, sëgetoba name lotu namëgletëmame. Na kë wesibi melë latle, ëtani Gotobë lowene mago gali të mototkweflabë hobë bogo mëta gali fene tëbe. Kë gali melë, ‘Sobo Israelbë afenëboni, sobo ho jwa tabo mëta niliafewe tlibutu kënjiji tafa tëgelobë, sobo bulmakau kleli na sipsip kleli tëtëkle tëtakëfëyo na ahøjume ahøjume tlekefo. Kwe sobo këha wesibi bome nane totometëna. Weyewa.

⁴³ Na sobo kë asë eglelëlobë selë lotu lo, bobë lotu lo nane. Weye. Bu sogëna goto Molokbë lotu lo. Na sobo, sogëna goto Refanbë sëgetoba weniyaneha wesibi, asë elelëlo. Sobobë tobana kë blëge blëge egotomobë wesibime fwa lotu eletemo. Këme nëgema bo sobobë life mago këme hehë nëkaketëyome. Na some Babilon lifate elëme jine nelëkakëyome na sobo Babilon lifate sigli etokwaklome na tafa ekekome.’

⁴⁴ Sebobë semlenino bu ho jwa tabo mëta tafa mëtlana, bu Gotobë selë lo asë

lamëtletëkefëtla. Kë selë lo bu melëme lëlekuju tle, Goto bubë ku mëta tëtabe tëme. Bu kë selë lo kë gliji mëtëglabë, bu iniwa wesibi Goto Mosesme fene gali tlole, bu këha melë lamototla. Na Goto, Mosesme fene lebotane tëtatile, bu këha melë lamototla.

⁴⁵ Tokwafe, kë semleninobë nëbale, bu kë selë lo ita fa mototla, na buna Josuana mitisiya, kë life mago enënebë life wame nagi hilika mototoma. Na Goto bu kë life mago enëneme hehë tletëme. Na bu kë selë lo kë life mëta lë mototla. Na kë selë lo kë lifeme tlibekëfëbë, na eso ho Devit mana fata tle.

⁴⁶ Na Goto Devitme fleflesu latletle. Na Devit Gotome takune tlole, ‘Bo jubë tako lotu lo lalowa gliji nëgelëmene, bobë semle Jekobë afenëboni, këme lotu namëglekefëtëyome?’ Kwe Goto kë lotu lo glijime ehe hana tlole.

⁴⁷ Kwe tokwafe Devitbë nëba Solomon kë lotu lo gliji tle.

⁴⁸ Kwe tako afutukuna Goto, bu ho tobana gliji mëglabë lo mëta hana tafa lëglekëfeme. Gotobë lowene mago gali të totokweflebë ho fene gali tle. Bu megali latle,

⁴⁹ ‘Tako Ho megali lalële, Heven life ebë bobë tafa labu. Na ebë life kë nëgebëye, bo juba këme gogwa nolë. Na bo kë iniwa wesibibë eso ho tafa nëletemë. Këme nëgema sobo fëye lo gliji epletënamene, bo këme tafa nanëgelëme? Weye. Sobo

bome lo habëna gliji
egletënamene?

⁵⁰ Iniwa wesibi heven life mago na ebë life mago bowa blëge blëge totomë.”

⁵¹ Na Stiven, Israelbë afenëbonibë lotu eso enëneme, gali tlome, “Sobo aholo titiji tabo enënemu. Sobobë lowene bu tëbo lowenewa lëbetëyo, Gotome lowene jwa mëgletlabë enënebë loweneha lëbetëyo. Na sobo Gotobë gali aholokwane hana elolo na esogo hana elelëlotelo. Sobo Gotobë Amtëtomba galibë itaita boblo latlo, sobobë bisemlenino fene boblo mëtëtatla.

⁵² Sobobë semlenino bu Gotobë lowene mago gali të mototokweflabë home iniwame, wame lamotlokweifëma. Ètani, Gotobë lowene mago gali të mototokweflabë ho fli, bu megali lamëtla, ‘Gotobë lale lowenewa kë esogo lëglelëkefetlebë home, jine lëglëleme.’ Na sobobë semlenino bu kë gali metletëmabë enëneme mogo nalë tëtëkle mëtëtaya. Na Gotobë lale lowenewa kë esogo lëglelëtalebë ho wafi tisi. Na Goto bume fleflesu latletle. Kwe sobo bume wame home yo tlomo na bume mogo nalë tëkle mototla.

⁵³ Goto bubë enselme jine tlëme na bubë gali sebobë semleninome mëtlëma. Na sobo kë gali waaholokwane tletemo kwe sobo esogo hana tlelëtemo.”

Bu Stivenme mogo nalë

anijina tëkle mototla

⁵⁴ Israelbë afenëbonibë lotu eso enëne, Stivenbë gali yafe aholokwane motlola. Na enisusumu memëtletla. Na enino këkë memototometla.

⁵⁵ Kwe Gotobë Amtëtomba Stivenme afutuku tlële na bu heven elë hwi tokwake. Na Gotobë tako elulego hwi telokwakëtle. Na Jisame hwi telokwakle, Gotobë tobamu toba elëme tlibetle.

⁵⁶ Na Stiven gali tle, “Aholokwane elo! Bo heven ino tikatabo wafi hwi nololë. Na bo Gotobë life mago home hwi nololë, Gotobë tobamu toba elëme lilibetle.”

⁵⁷ Bu kë gali yafe aholokwane mëtla, na Stivenme tako wame memotlola. Na bu feilawa juwafe mëtla na bubë tobana aholo titiji mototoma. Na iniwa huhuju mëtëkaka na Stivenme hohwë mëtlëla.

⁵⁸ Na bume Jerusalem lifate mëglëbo elëme tobana anisasana ki motokouja. Na aniji atome mana sisike mëtletla, bume mogo nalë tëkle namogotlame. Na bume gali kë so mëtëtatlabë ho, bubë matawa mago heletanëno ëho totohwa mototoma na falake hobë elebo lime gogwa mëtla. Kë falake hobë weniji Sol.

⁵⁹ Bu anijina mana tëkle mototla na Stiven Jisame mana megali telokwakle, “O Tako Ho Jisas, ju bobë amtëtomba eli sa no elëtenë.”

⁶⁰ Na bu sëkefo miti tafa tle na feilawa we tlole, “Jisas, bome kë wame moglonabë onehome kofaya asa wame elome, aholokwana sati ele.”

Bu kë galime wafi gali tlole na mana tuku tēkake.

8

^{1a} Na Sol, bu Stivenme kë tēkle mototlabē lowenebēme, helawawa latletēme.

Sol, bu Jisame lowene sle mētletlabē onehome tēbo totome

^{1b} Stivenme kë tēkle mototlabē olēna, Jisame lowene sle mētletlabē onehome, Jerusalem lifate mēta kë tafa mētlabē, kë oneho mēta afina oto mētla tēbo namētagumane. Kēme nēgeme, Jisame lowene sle mētletlabē oneho iniwa Jerusalem lifate kile mētla na Judia provins na Samaria provins li mago life elēme mētlēnēbouja. Kwe Aposel ho buwa, Jerusalem lifate mēta mētētabēya.

² Gotobē lale lowene esogo mēglelētlabē ho fli, Stiven mogome fa mototla na matēmatē mēta gwa mutujetla na bume tako ye lamētletlamu.

³ Kwe Sol bu Jisame lowene sle mētletlabē onehome tēbo totokwefēme. Bu melatotokwefēme. Bu li lo li lowa fe tokoukefētēme na onehome kë lo mago nēno tokoukēfe na kalabusu lowa tlēlukefēme.

Bu Jisabē lale gali Samaria provins mēta tē mototla

⁴ Jisame lowene sle mētletlabē oneho, bwa bwa lifate elē kë mētlēnēboujabē, bu Jisabē lale gali iniwa lifate mēta tē mētētagutla.

⁵ Filip Samaria provinsbē li lifatewa tuju. Na bu kë life

mago onehome ebē gali tē tētātēme, “Jisas bu Goto kë aniji toglolebē ho na nēno lēglebē ho.”

⁶ Feilawa oneho Filipbē gali aholokwane mētla na bu kë blēge totlebē klelegowa wesibi hwi motlotla. Na kēme nēgeme, bubē gali aholo bo sle mētētagutla.

⁷ Na bu Filipme mehwi motlola, bu ahwane lebutako onehobē ato mago hehē tletēme. Na kë ahwane aflei tēbowa ēē memētlēle. Na kë onehome lahunewa mototome. Na feilawa oneho, elebo mogo tanēnobē na elebo tēbonabē bu lalowa mētētabēya.

⁸ Kēme nēgeme, ebē life mago oneho bu tako fleflesu kēme mētla.

⁹ Ho li, kë lifate mēta tafa tle, bubē weniji Saimon. Bu itaita humē tlekēfe na memelē olo tlēsēme. Na lebutako oneho, Samaria provins mago, wesibi bu melē kë tēglebēme, klelego memētletla. Kē ho bu megali latlekēfe, “Bo tako letitabo ho tafa nelē.”

¹⁰ Na letitabo ho fli na manawa oneho, kë hobē gali aholokwaneme, tako tole lamētla. Na bu megali lamētla, “Kē ho kë nēgebē, Gotobē tako afutukuna ho!”

¹¹ Bu kë tēglekēfebē wesibime, feilawa oneho klelego lamētlekefētla. Na kēme nēgeme bubē lowene kēme esogo mētēlēkefētla.

¹² Kwe Filip, Goto onehobē eso home kë tafa lēgletēmebē lale gali, tē tētātēme. Na Jisas Klaishē lale gali mata tē

tětatēme. Na oneho bu kē gali lowene sle mētletla. Na Filip bume baptais totome.

¹³ Na Saimon bu mata kē gali lowene sle tletle. Na Filip bume mata baptais totle. Na bu Filipna asē mētelo na iniwa klelegowa wesibi Filip kē totokwefēmēbē hwi tlome na klelego metletēme.

¹⁴ Aposel ho, Jerusalem lifate mēta kē tafa mētlabē, bu meaholokwane mētla, Samaria provins mago oneho bu Gotobē gali lowene sle lamletla. Kēme nēgēme bu Pita name, Jon name kēme jine mētlēma.

¹⁵ Bu Samaria provinswa fwa mutulo, na bu Gotome gali motlolo, bu kē onehome, bubē Amtētomba lēglēme nalēgleme.

¹⁶ Filip bume ēbame Tako Ho, Jisasbē weniji nawa baptais totome kwe Gotobē Amtētomba bu belē tigiisi tēme hana tle.

¹⁷ Kēme nēgēme, bu Gotome afina gali motlolo na mana toba gogwa motoletēmo na Gotobē Amtētomba bu belē tisi tēme.

¹⁸ Saimon bume mehwi tlome, bu toba gogwa mētletēmo na Gotobē Amtētomba bu belē tisi tēme. Kēme nēgēme baliti glo tle na Jonna Pitana belē tisi tēme na gali tlome,

¹⁹ “Sobo kē afutukubē bome enēna. Na bo mata ho lime toba gwa nēgētātēlēna, Gotobē Amtētomba bu belē ligisi tle nalēgleme.”

²⁰ Kwe Pita bume gali tlole, “Gotobē Amtētomba, Goto manawa kē lēglēnabē, ju

balitina hana fa egotleme. Hanane mu. Ju kēha tēbo lowene fēyeme lowene elene? Juna, jubē balitina tēbo life mēta tēbo eglitame.

²¹ Jubē lowene Gotobē naba lime lalowa hana lēbetē. Kēme nēgēme, ju sebona Gotobē wegeme hana wege nēglame.

²² Ju kē tēbo lowenebē aholokwana ti ele, na Tako Hobē gali eholeme, jubē aholabu lowenebē sle nalēgētātēme na aholokwana ti lēletēme. Bu jume maninibo lēgletēme nawa na jubē tēbo lowene aholokwana ti lēletēme nawa o hanane.

²³ Bo jume walowene nēletē, mēmaune lowene ju mēta takomu lēbetē. Na ju tetēbo lowene mēta fwa tei tafa elekēfe.”

²⁴ Kwe Saimon, Pitaname Jonname metafu latētātēme, “Sobo Tako Home gali elolo, bome maninibo nalēgletenēme. Na kē tēbo wesibi, sobo bome kē gali eglonabē, bo belē migisitenē jwa namēgletenēme.”

²⁵ Na kwe Pitana Jonna, Jisasbē lale gali tē mētētātēmo na Jisas bume melē kē totomebē wesibime gali motlomo. Na tokwafe Pitana Jonna Jerusalem lifatewa mētēyeu. Bu mētēyeubē, na Jisasbē lale gali, Samaria provinsbē fli life elēme, tē mētētāgutemo.

Filip Jisasbē lale gali, Itiopia lifate mago home tē tētātē

²⁶ Gotobē ensel bu Filipme megali tlole, “Ju sagli elēleme

na nēgemowelēme eimeme. Na Jerusalem lifate mago Gasa lifate elē kē lugujubē alēge elēme ejume.” Kē alēge bu ho jwa tabo mēta lēbe.

27 Na Filip fe tēkake na kē alēge elēme time. Bu alēge elēme wafwa temole, na Itiopia lifate mago home, kē alēge mēta hwi tlole. Bu Itiopia lifatebē gavmanbē letitabo ho. Na bu Itiopiabē eso mēse, Kandasibē baliti tafa tlelēkefēmetēbē ho. Bu Jerusalem lifatewa Gotome lotume tugujubē kē mago tisi,

28 na bubē lifatewa luguju nalēgleme. Bu hos kleli kē kiki mēglebē kalē loha wesibi, wesibi mēta tafa tole. Na bu Gotobē lowene mago gali tē totokweflebē ho, Aisaiabē bogo, hwi tlagwi.

29 Na kwe Gotobē Amtētomba Filipme gali tlole, “Ju kē kalē loha wesibi, wesibi li elēme ejume. Na ju kalē loha wesibi, wesibina, mēglēbo lēlē eyeu elome.”

30 Na kwe Filip loli elē fēka tokou. Na mana aholokwane tlole, kē ho bu Gotobē lowene mago gali tē totokweflebē ho Aisaiabē bogo hwi tlagwi. Na Filip kēme takune tlole, “Ju kē gali wayobē lowene laetlene?”

31 Na bu tafu tētatile, “Ho li bubē wayo galibēme bome okokwe jwa loglonēna, bo habēna lowene sle nēgletelēmene? Ju kalē loha

wesibi, wesibi elē lalowa etokwalemene na bona weife tafa nelome.” Na Filip bu kalē loha wesibi, wesibi elē fe tokwake.

32 Gali bu kē hwi toglolebē, megali lalēle, “Bu kē home sei mutujuwelētēma, sipsip kleli mogo nalē tēkleme fene sei mutujuwelētēma. Na kē ho bu ēfalēbo ji hana totle, sipsip kleli nēbalebē hobo fene le mēlēmetēma na bu afēflei mēgle jwa.

33 Bume tiniji galina gali motlola. Na bume onehobē gali aholokwane moglomabē ho belēme mētletlētēma. Kwe bume blawa so mētētatlā na blawa tēkle mototla. Bume mogo nalē tēkle mototla na bu hana tafa lēle. Kēme nēgame bu nēbale tafa jwa kēme mletla.”

34 Kē ho kē gali hwi tlole na Filipme mana takune tlole, “Bo jume takune nolē, Gotobē lowene mago gali tē totokweflebē ho, bu yalēme gali tletlene? Bu bume gali tlene o bu li home gali tletlene.”

35 Na kwe Filip kē home gali okokwe tlole. Bu Aisaia kē yahi tēglebē wayo gali afina okokwe sle tlole na bu Jisasbē lalē galime mata okokwe tlole.

36-37 Tlemalē bu kē alēge elēme mētēyeubēē na tu helefo elē fwa mutulo. Na kē ho gali tlole, “Ju hwi ele, tu ekē lemule. Ju bome lalowa baptais egētānēmene?”*

* **8:36-37** Fli lowene ho bu melowene lamēta, li gali mana lēbe kē gali mēta. Kē gali melē lēgēbelalēle, “Na Filip gali tlole, ‘Ju Jisame lowene sle egletlena kwe bo jume lalowa baptais nēgētēme.’ Na bu kēme tafu tētatile, ‘Bo wafi lowene sle nēletelēfe, Jisas Klais bu Gotobē nēba.”

38 Na kwe, kë letitabo ho, bu hos kleli kë asë lëglelēlēbē home gali tlole, “Ju hos kleli lëkle etle.” Na bu Filipna kë tu elë kle mētētēkako na Filip bume baptais tetofakle.

39 Na bu tu kile mētelo na helefowa fe motokoko. Na Gotobē Amtētomba Filipme kë mago latëglelulewa. Na kë letitabo ho bume ita hana hwi tlole, kwe kë ho bubē lifatewa fleflesuna tuju.

40 Na Filip bu Asdot lifatewa hokweinawa lafwawa tule. Na Jisasbē lalē gali li life li life meta te tētagutēme na mana Sisaria lifewa fwa tule.

9

Sol lowene hihijika tle

1 Kë nalē, Sol bu mana anisasana gali tlekēfe, “Bo, Jisame lowene sle mētletlabē onehome, mogo nalē tēbo nogotomēme.” Na bu Gotobē tako lotu lo mēta wege lëglebē tako eso ho elēme tujutle,

2 na bume takune tlole, “Ju Israelbē afenēbonibē lotu lo hwi moglokeflabē home, Damaskus life mēta kë tafa mëglabē, pasē lalowa yahi ekaketēmeme?” Na kwe Gotobē tako lotu lo mēta wege lëglebē tako eso ho pasē yahi tletēme na Solbē tobame tlēle. Kë pasē megali lala, “Sol, Jisame lowene sle mētletlabē onehome hwi loglomena, kwe lalowa fafa malēle na kalabusu lowa sike malēle na Jerusalem lifatewa sei lëlēkakimeme.”

3 Na këme, Sol Jerusalem lifate kile tle na Damaskus lifate elēme tuju. Bu

Damaskus lifatewa tuhu lëgleme kofene, na heven life mago elulego mana hokweinawa lafatawa tletle na bume ini lamuwa totle. Kë elulego takomu.

4 Na Sol lifeme latitigowa. Na bu li hobē we lego aholokwane tlole na bu këme gali tlole, “Sol, ju bome fëyeme tēbo etakefēnēne?”

5 Na Sol takune tlole, “Tako ho, ju yalēne?” Na bu tafu tētatile, “Bo Jisas, ju bome tēbo latakēfēnē.

6 Te! Huju ele. Na Damaskus lifate elē ejume na këme eoutabeme. Na ho li jume gali loglēme na ju kë iniwa gali saesogo sle elelēmettle.”

7 Solna kë mutujabē ho klelego memētletla, na gëgali hana mētla, efasuna tafa mētla. Bu gali lego aholokwane motlola, kwe kë home hwi hana motlola.

8 Na këme, Sol huju tle na bubē naba yafe tika totome kwe bu wesibi hwi hana tlome, bubē naba kilego mētletleme nëgeme. Këme nëgeme bume tobame fa mototla na Damaskus lifatewa nasi mētētagula.

9 Bu naba kilego tabo tēgētābēbē aona olē latle. Na kë aona olēbē bu hi jwa tafa tle.

10 Na Jisame lowene sle lëgletlebē ho li, Damaskus lifate mēta tafa tle. Bubē weniji Ananias. Na bu nimitelē hwi tle, na Tako Ho Jisas bubē weniji fē tētatile, “Ananias.” Na Ananias tafu tētatile, “Tako Ho, bo mana ekē.”

¹¹ Na këme, Tako Ho, megali tole, “Ju huju eleme, na alëge mefë lamotla, Ininiwa alëge, ju kë belëme ejume. Na ju Judasbë lowa ejume na ho li Tarsus lifate mago kë mëta tafa lële na ju takune eletleme, ‘Tarsus life mago ho hameta lëtabene bo hwi nanoglolëme.’ Kë hobë weniji Sol. Bu Gotome mana kë gëgali lëlelëkefle.

¹² Kë ho bu nimitelë mehwi tle. Li ho, bubë weniji Ananaias, bu tækaklutle na bubë toba gogwa toletle, bu naba tika namëgletleme.”

¹³ Na Ananaias bubë gali metafu tëtatile, “Tako Ho! Lebutako oneho, kë hobë lakaleme wagali motlona. Bu Jerusalem lifate mëta, jubë onehome memelë tëbo wesibina tëbo lamotokwefëma.

¹⁴ Na ëje bu Damaskus lifatewa tisi, jume kë lotu mëgletëyobë onehome kalabusu nalotomeme. Na lotu lo mëta wege mëglabë eso ho bu wesibi kë ho melë nalëglebëme halawa lamëtletla.”

¹⁵ Kwe, Tako Ho, bume gali tole, “Ju Sol belë eiju. Kë ho bu bobë wege home fata lëgleme. Bo bume wafi aniji tlole, Israelbë afenëboni mëtabëya jwa mëglabë enëneme, na bubë eso enëneme na Israelbë afenëbonime, bobë gali të nalëgëtatëmeme, na bu bome lowene sle mëletëname.

¹⁶ Na bo bume meolafa nëtatelëme, ‘Bu bobë galiwa të logotlona, memelë tetëbo wesibi bume fata

mëgletleme.”

¹⁷ Na Ananaias, Sol kë tafa lëglebë lowa tuju. Na lowa tækaklu. Na Solme toba gogwa toletle na megali latlole, “Afa Sol, Tako Ho Jisas bu jume alëge mëta olafa tletë. Na buwa bome jine lelëfakënë, jubë naba tika namëgletëme na Gotobë Amtëtomba ju belë naligisitëme.”

¹⁸ Ananaias kë gali wafi yawe tole, na hokweinawa, mo lënëboha wesibi, Solbë naba mago mititigo tle na bu ita hwi tekake. Na bu huju tle na Ananaias bume baptais totle.

^{19a} Na tokwafe Sol hi wesibi hi tle na afutuku bume ita tisi tle.

*Sol Jisasbë lale gali
Damaskus lifate mëta të totle*

^{19b} Sol Damaskus lifate mëta, Jisasme lowene sle mëtletlabë onehona fli olëwa tafa mëta.

²⁰ Na kwe, bu Israelbë afenëbonibë lotu lowa mana latujuwa, na gali metë latëtatëme, “Jisas bu Gotobë nëba.”

²¹ Iniwa ho, Solbë gali kë aholokwane motlolabë, klelegomu memëtla. Na bu megali lamëtla, “Kë ho kë nëgebë, Jisasme kë lotu mëtlekefëtlabë onehome, tëbo totokwefëmebë ho. Bu Jerusalem lifate mëta melatotokwefëme. Na ëje ebelë kë ligisibë mata, kalabusu lowa nalëglelumeme, na bume lotu lo mëta wege mëglabë eso ho belë lëglelume nalëgleme, Jerusalem lifatewa.”

²² Kwe Goto Solme afutuku tlële na bu kë afutukuna Israelbë afenëbonime, Damaskus life mëta kë tafa mëtlabë, kalëlego gali të têtatëme. Sol megali slemu latlome, “Goto Jisame kë aniji toglolebë, bubë onehome nëno nalëglebëme.” Israelbë afenëboni, Solbë gali yafe aholokwane motlola. Bubë gali habëna tafu mëgëtatlamene? Bu gali olafa slemu tęgëtatëmeme nëgeme.

Israelbë afenëboni bu Solme wame motlola

²³ Lebutako olë wamutuju na Israelbë afenëboni loko mëtlelëya na gali sle mototla, Solme mogo nalë tëkle namogotlame.

²⁴ Kwe Sol bume kë fa mëtëtatlabë gali waaholokwane tletëme. Na Israelbë afenëboni, olëli olëli na klabë, Damaskus lifatebë lëglesibë ino ëfo li mëta, sei mëtlëkefëta, Solme mogo nalë tëke namoglolame.

²⁵ Kwe klabë kuna, Solbë yabeni, bume kë lifate mago tako lëglesibë mëglëbo li elë mitilekola. Na Solme tatijiha wesibi mëta tuku mëtla na bu kë mëta tafa tokoke na tabana kesi mototla, na kë manogwa lëglesibë mëglëbo elëme alabujuwa tuku mëtëmalitaya. Na bu mana tuju.

Sol Jerusalem lifate mëta tafa tle

²⁶ Tokwafe, Sol Jerusalem lifatewa tuju, Jisame kë lowene mëgletlabë enënena loko namëglame. Kwe bu iniwa uli lamëtletla na

melowene lamëtletla, “Bu Jisame lowene lëgletlebë ho nane.”

²⁷ Kwe Barnabas Solme lataitale, na Aposel ho belë sei tlële. Na bume gali tlome, “Sol Tako Ho Jisame alëge mëta wafi hwi tole. Na Tako Ho Jisas bume wagëgali tlelële. Na Sol mata, Damaskus lifatebë onehome, Jisabë gali të têtatëmebëme, uli hana tle.”

²⁸ Barnabasbë gali aholokwane motlola na Aposel enëne lowene mëtla, “Nëgalife.” Këme nëgeme, Sol bu Aposelna, Jisame kë lowene mëgletlabë onehona iniwa tafa mëtla. Na buna iniwa Jerusalem lifate mëta asë mëtla. Na bu Jisabë gali onehome të têtatëmebëme uli hana tle.

²⁹ Na bu Israelbë afenëboni flina, Grik gali kë lowene mëtlabë, Jisabë galime gëgali tlelëme na bume momata lamëtletlëla. Kwe bume melowene mëtletla, “Sebo habelë nogotlamene, bume mogo nalë tëke nanogotlamefe?”

³⁰ Jisame kë lowene mëgletlabë oneho kë wame gali aholokwane mëtla, na bu Solme Sisaria life elëme mëtlelula na Tarsus life elëme jine mëtelëkakla.

³¹ Na kwe kë nalëwa, Jisame kë lowene sle mëgletlabë oneho, Judia provins na Galili provins na Samaria provins mëta lalowa tafa mëtla. Ho bume hana tëbo totome. Na Gotobë Amtëtomba bume afutuku tlëme. Na iniwa bu itaita Jisabë tolewa esogo

mëtletlekefëtle. Na lebutako oneho bu Jisame lowene sle mëtletla.

Pita Ainiasma sle totle

³² Pita li life li life elëme asë tëbelëfa. Na bu Lita lifewa tuju na kë life mëta, Gotobë onehona tafa mutula.

³³ Na bu kë life mago ho li hwi tlole. Bubë weniji Ainiwa. Bubë iniwa elebo mogowa. Bu tégëbe tégëbewa latle. Na bu tobali ita aona tlibutu kënji melë latle.

³⁴ Na Pita bume megali latlole, “Ainiwa, Jisame Klais jume elë sle lëgetame. Ju huju ele na jubë ni labuku mana hohlo etleme.” Na bu hokweinawa huju tle.

³⁵ Na iniwa oneho, Lita na Saron lifate mëta kë tafa mëtlabë, Ainiwa kë sle tëglebëme hwi mëtla na Jisame lowene sle mëtletla.

Pita Tabitame gli mago huju têtamë

³⁶ Jisame lowene sle egletlebë mëse li, Jopa lifate mëta tafa tle. Bubë weniji Tabita. Bu Grik galina bubë weniji mefë lamëtëtaya, Dorkas. Iniwa olë bu iniwa onehome taitakefëme. Na bu wesibi jwa onehome, hi wesibi na fli wesibina mata tlëkefëme.

³⁷ Na kë olëna, bu atowelili tle na gli tle. Na bu mogo tuna swa mëtëtaya. Na matawa kë ke togolebë lo ke mëta gwa mototaya.

³⁸ Jopa life bu Lita life li mëta lëbe. Na Jisame lowene sle mëtletlabë oneho gali meaholokwane mëtletla, Pita Lita life mëta tafa lële. Këme nêgeme bu tlemalë home,

Pita belë këme jine mëtlemä. Bu Pita belëme fwa mutulo na bume megali motlolo, “Ju sebobë lifewa hokweinawa saesi. Ju ahuta asa ele.”

³⁹ Na Pita kë tlemalë hona mutuja. Na bu kë lo elëme fata tle. Na matawa kë ke togolebë lo kewa sei motowelëlo. Na seiju one iniwa, Pita belëme mitisitla na ye mëtletkefëya. Na Tabita, tuja ato mana têtabena, kë susu totomebë ëho, Pitame lebotane mototometla.

⁴⁰ Na Pita bu iniwa onehome kë mago hehë təkaketëme. Na sēkefo miti tafa tētəkake. Na mana Gotome gëgali tlelëkakle. Na kë gëgali yawe tlole, na bu kë mëse mogobë li elëme swaya tokoke na gali tolë, “Tabita, ju huju ele.” Na kë mëse naba hobo tika totome na Pitame hwi tlole na huju tle na tafa təkake.

⁴¹ Na Pita bume tobame fa têtamë na huju tetokwakë na bu hujuna tlibe. Na Pita, seiju oneme na Jisame lowene sle mëtletlabë onehome, gali telokwakëme, migisitla namëglame. Na bu bubelë mitisitla. Na bume lebotane têtatëme, Tabita tuja ato mana ekëne.

⁴² Na kë gali, Jopa life mëta asë tëbelëfatle. Na lebutako oneho Jisame lowene sle mëtletla.

⁴³ Na Pita Jopa life mëta lebutako olë tafa tle. Bu ho lina tafa mëtelo. Bubë weniji Saimon. Kë ho kë nêgebë, bulmakau kleli jibo slesle totokwefëmebë ho, kibo mëgle lime.

10

Ensel Korniliusme fata tletle na bume gali tlole

¹ Ho li, Sisaria lifate mēta tafa tle. Bubē weniji Kornilius. Kē ho bu Rom life gavmanbē, wame home boblo mogotomabē enēnebē eso ho. Na bu we lujuafe we wame home boblo mogotomabē enēneme tafa tlelēme. Kē enēne, bu Itali lifate mago enēne.

² Kornilius bu Gotobē tolewa esogo tlelēkefētle. Na buna, bubē nona, nēbalena, na bubē lo mēta kē tafa tēglelēmebē enēnena, Gotome lotu melekefētla. Bu Israelbē afenēboni, wesibi jwa kē tafa mētlabēme, taitakefēme na baliti tlēkefēme. Na bu Gotome itaita gēgali tlelēkefle.

³ Olē li, taboklē kljijina, bu Gotobē enselme nimitelēha wesibina hwi tlole, bubē lowa tēkakilitle. Na bume megali latlole, “Kornilius!”

⁴ Kornilius enselme hwi tlokweflebē na uli metletle na gali tlole, “Tako ho, fēyemene?”

Na ensel kēme gali tlole, “Ju Gotome kē gēgali eglelēkeflebē, bu kē gali waaholokwane lolokwefē. Na ju wesibi jwa enēneme, wesibi kē eglelēkefēmebēme, Goto wahwi lolotē na bu jume tako fleflesumu lalēletē.

⁵ Eli ju ho flime Jopa lifewa sajine elēme, ho lime hohwi namugutatlame. Bubē weniji Saimon na bubē li weniji Pita. Na bume, gali mujelēlame, ju belē ligisitē nalēgleme.

⁶ Na kē ho, bubē wenisa Saimonbē lo mēta lētabe. Kē ho bu bulmakau kleli jibo sle sle lotokwefēmebē ho, kibo mēglelime. Bubē lo nutu helefo li mēta lilibetle.”

⁷ Ensel Korniliusme wafi gali tlole na kile totle. Na Kornilius bubē tlemalē wege home na jowa wame boblo logotlebē home gali telokwakēme, bu belē migisitla namēglame. Kē wame boblo logotlebē ho mata Gotobē tolewa esogo tlelēkefētle. Na bu Korniliusme feilawamu taitakefle.

⁸ Aomalē mitisitla na Kornilius iniwa wesibi bume nimitelē mēta kē fata mētletlebēme gali tlome. Na kē aomalē home Jopa life elēme jine telēkakēme, Saimon Pitame hohwi namugutatlame.

Pita nimitelēha wesibi hwi tle

⁹ Kornilius kē jine tēglēmēbē ho mutuja na alēge mēta jowa klabēwa ni mētebēya na ita kē mago huju mētla na mutuja. Mutujabē na klji ku mēta tlibe bu Jopa lifate lololi mototla. Na kē olēna, Pita matawa kē ke togolebē lo ke elē tokwale, Gotome gēgali nalēglelēleme.

¹⁰ Pita bu fone latle na hi wesibi hime tole tle. Bu hi wesibi mana sle mototokwefēma na bu nimitelēha wesibi hwi tle.

¹¹ Na matafa inoha latikawa tēkakettle na tako lablab ēhoha wesibi kē mago tuku tēmalitatle. Nilina taba kē ēho mēta jejelē wako elēme kēkesi mētletle na mana tuku tēmalitatle.

12 Kë ëho mëta, memelë kleli na memelë taiju na memelë tato na memelë fole kë mëta motowelibe. (Israelbë afenëboni bu këha wesibi hana hihi mëlekefëya. Bu melowene lamëtla, “Bu kë wesibi hi mëglana kwe bu Gotobë naba lime tëbo miglitayame.”)

13 Na Pita gali lego aholokwane tle na megali tole, “Pita ju huju eleme na kë hi wesibi tètëkle etame na hi eleme.”

14 Kwe Pita gali tle, “Weye. Tako Ho, bo hanane mu hi nëgelëme. Sebo, Israelbë afenëboni, këha wesibi hihi hana nëlekefëya. Sebo melowene nanëla, ‘Ebë wesibi hi nëglana kwe sebo Gotobë naba lime tëbo nanilitaya.’ Bo ëtani kë nëgebë na ëje mana ekë bo këha wesibi hihi hana nelë.”

15 Na kë ëfalëbo lego Pitame ita gali tole, “Wesibi Goto megali kë lëglebë, ‘Ebë lale hi wesibi,’ ju megali asa ele, ‘Ebë tëbo hi wesibi.’ Weye.”

16 Na kë gali lego kë galime aowafe gali tole na mana kë ëho matafa elëme lakiwa tokwake.

17 Na Pita kë nimitelë mana lowene tlekefëtlebë na Kornilius kë jine tëglëmebë ho mana fata mëtëkakija. Bu fli home afina metakune motloma, “Saimonbë lo hametane?” Bu mitisiya, na Saimon këme tafa tëglebë lo ino ëfome mitejuwelikwëya.

18 Na gali motloma, “Saimon Pita ebë lo mëta mana tafa lëlene o hanane?”

19 Pita bu kë nimitelë gali mana lowene tlekefëtlebë na Gotobë Amtëtomba bume mana gali tole, “Aholokwane ele! Jume aomalë ho jume kë hohwi mëtagitëyo.

20 Ju huju elëme na kë home esune eglëmebëme kle etëkakeme na buna eyeume. Ju buna egëyeume tutune asa ele. Bo jine nelëbakëmetë.”

21 Na kwe Pita kë ho belë kle tètëkake na gëgali tlelëme, “Sobo kë hohwi etatelobë ho, ta bo ekë. Sobo fëyeme esijone?”

22 Na bu megali mëtla, “Wame home boblo mogotomebë enënebë eso ho, Kornilius, bu jine telëbakëna. Bu lale lakalena homu na bu Gotome lotu lëlekefëtlebë ho. Na Israelbë afenëboni iniwa melowene lamletla, ‘Bu lale lakalena homu.’ Na Gotobë ensel bume wagali tole, ‘Ju ho flime, Jopa lifewa jine elëkakëme, Saimon Pitame ju belë mëglesula namëglame. Na ju bubë gali aholokwane naeglotleme.”

23 Na Pita kë aomalë home lowa nëno tle na këme weife ni tlebëme. Na olobalë bu nani kë mago iniwa mutuja. Na Jisame lowene sle mëtletlabë oneho fli, Jopa life mëta kë tafa mëglabë mata bume esogo mëtletlëma.

Pita Korniliusbë lowa tuju

24 Bu mutujabëë na alëge mëta ni mëtebëya. Na li olëna Sisaria lifatewa fwa mutula. Korniliusbë ilawa mago enënename, na bubë yabeniname, bu wafi gali

tlagume. Na bu wafi loko mêtëkakija na Pitame mana hwi mêtletla.

²⁵ Pita Korniliusbë lowa fata tule na lowa tëkaklu. Na Kornilius, Pitabë li elë tisi tle na sëkefo miti tafa tletle na Pitame lotu tletle.

²⁶ Na këme Pita huju tetëbakle na gali tlole, “Ju huju ele. Bo melë, howa, ju fenene. Ju melë asa ele.”

²⁷ Na Pita buna gëgali mêtelobë na oneho buna iniwa kë mitisiyabë lowa mêtëkakluja. Na Pita këme hwi telujuwelëme, lebutako oneho loko mêtelujuwelëya.

²⁸ Na Pita bume gali tlome, “Sobo walowene elo. Sebo Israelbë afenëboni kwe memelë nanëla, Israelbë afenëboni mêtäbëya jwa mëglabë enënena hana loko nëglëlëyame na sebo buna hana tafa nëglame. Kwe Goto bome melebotane latëtatenë, bo melowene asa manelë, ‘Fli enëne bu Gotobë naba li mëta tëbowa mêtäbëya.’ Weye.

²⁹ Këme nëgëme, sobo kë gali tégelokwakë nabë gali hana boblo nëtatëyo, bo hokweinawa këme tisi. Na bo some takune nëlëyo. Bome sobelë nigisibëme, fëyeme gali telokwakë nane?”

³⁰ Na Kornilius bu këme gali tle, “Aona olë wamutuju, wesibi bome mana fata tletenë. Kë wesibi melë latle. Taboklë kljina, ebë fenene, bobë lo mëta tafa telë na Gotome gëgali tlelëlë. Bo Gotome gëgali tégelëlëbëë na mana ho li bobë lime latlikakiwa. Bubë ëho klji fene u tletle.

³¹ Na bu gali tle, ‘Kornilius. Ju Gotome kë gëgali eglëlëkeflebë, bu waaholokwane lolë. Na ju wesibi jwa enëneme, wesibi kë eglëkefëmebëme, Goto wahwi lolë.

³² Na ju ho flime Jopa lifewa sajine elëkakëme, na Saimon Pitame nagali mugujelëlame, ju belë naligisi tème. Kë ho, bowenisa Saimonbë lo mëta tafa lële. Kë Saimon bulmakau kleli jibo sle sle lotokwefëmebë ho, kibo mëglëlime. Bubë lo nutu helefo li mëta lilibetle.’

³³ Këme nëgëme, bo fli home ju belë hokweinawa këme jine telëkakëmë. Na ebë lakale, ju yaha esitënamu. Na ëje sebo iniwa Gotobë naba lime ekë nëtabëya nëtabëya. Na Tako Ho jume kë tégëlëbë gali, sebo aholokwane nanëgletlame.”

Pita Korniliusbë lo mëta gali tle tle

³⁴ Na kwe Pita megali latle, “Nëgalimufe. Bo walowene nelë. Habëtabo onehobë, Goto iniwa metole lälëletëme. Bu Israelbë afenëbonime fwa nane tole lëletëme.

³⁵ Iniwa oneho, Gotome lotu mëlekefëtlana na lale lowenewa esogo mëlelëtlana, kwe Goto këha onehome tole lälëletëme na lalaitame.

³⁶ Goto seme Israelbë afenëbonime kë lëglë nabë gali, sobo wafi lowene eletelo. Na kë lale gali melë lëgëbetle lälële, ‘Jisas Klais bu iniwa onehobë eso home tafa lëletëmeme. Jisas seme kaiselo laitakefëna, sebo Gotona yonane nanëglabëme.’

³⁷ Sobo walowene elo. Ētani, Jon bu gali tē tētātēme, baptais namēglame. Na bu lebutako onehome baptais totome. Jon bu onehome wabaptais totome na mana kē olēna Jisas Israel life mēta lebutako wesibi totometēme. Kē wesibi bu Galili provins mēta afina oto tle. Sobo kē wesibime wafi lowene eletelo.

³⁸ Sobo ebē walowene elo. Goto bu Nasaret life mago Jisame aniji tlole na bubē Amtētomba na tako afutuku bume tlēle. Na Jisas bu kē afutukuna li life li life asē tēbelēfa na onehome taitame. Goto buna tafa mētēgelome nēgeme, na iniwa oneho Satan kē yage totomebē, bu iniwa wasle tētagume.

³⁹ Na iniwa wesibi, Jerusalem lifate mēta na Israelbē afenēbonibē li life li life mēta, Jisas melē kē totomebē, sebo wafi hwi tlola. Na wesibi melē kē totomebē, kē gali kēme tē nētatlā. Na bume mogo nalē ti mēta bu mētla.

⁴⁰ Kwe tēle olē mutuju na aona olēbēna Goto bume gli mago mana huju totle. Na bume olafa tētagutēme, oneho hwi namoglolabēme.

⁴¹ Kwe Israelbē afenēboni iniwa, bume nane hwi motlola. Weye. Goto ēbame sebo Aposel home waaniji tlome, bume ita hwi nanoglolame na bubē gali tē nanēgēatlame. Na bu matēmatē mago huju tēglena, sebo buna hi tla.

⁴² Na bu seme anisasana gali tlonā, bubē lalē gali

iniwa onehome tē nanēgētātēmame. Na sebo onehome metē sle nanēgētātēmame, ‘Goto Jisame waaniji tlole, gigli mētlabē onehobē lowene na mana tafa mēglabē onehobē lowene abiabi hwi lolotēmeme na mana lēselokwame.’

⁴³ Ētani, iniwa Gotobē lowene mago gali tē mototokweflabē ho, Jisame megali lamētletla, ‘Iniwa oneho ebē home kē lowene sle mēgletlabē, Goto bubē tēbo lowenebē aholokwana ti lēgletēmeme.’”

Gotobē Amtētomba Israelbē afenēboni mētābēya jwa mēglabē enēne belē tisi tēme

⁴⁴ Pita gali mana tē togotlebēē, na Gotobē Amtētomba, Gotobē gali kē aholokwane mēglabē onehome mana tisi tēme.

⁴⁵⁻⁴⁶ Kēme nēgeme bu lili anigawa galina gēgali mētla na Gotome bibita mototla. Kēme nēgeme, Jisame lowene sle mētletlabē oneho, Pitana kē mitisiyabē, hwi motloma na klelego memētletēma na megali mētla, “Hwi elo, Israelbē afenēboni mētābēya jwa mēglabē oneho, Goto bubē Amtētomba bume walēlēme.” Na Pita bume megali latletēme,

⁴⁷ “Gotobē Amtētomba kē enēneme wafi lisitēme bu ēbame seme fene tisitēna. Ho seme ebē onehome tu mēta baptaisme hana lēkle mēgētaname. Bo melowene nanelē, ‘Sebo bume lalowa baptais notomame.’”

48 Na Pita kē onehome megali latlome, “Sobo Jisasbē wenijina baptais elomo.” Na Pita bume baptais totome. Na bu Pitame takune motlola, buna habenuju olē tafa namēglame.

11

Pita bume kē fata tēgletlebē wesibime gali tlome

1 Aposel ho na, Jisame lowene sle mētletlabē oneho flina, Judia provins mēta kē tafa mētlabē, bu megali aholokwane mētla, Israelbē afenēboni mētābēya jwa mēglabē enēne, Jisasbē gali lowene sle lamēlētla.

2 Pita Jerusalem lifatewa tugujuna, na Jisame lowene sle mētletlabē oneho fli bume wame gali memotlola. Kē enēne bu melowene lamētla, “Bu ato jibo tētlē mogotomabē lakale esogo sle mēglēlēlabēme feilawa afutuku mētla.”

3 Bu megali motlola, “Ju ato jibo tētlē jwa motomabē hobē lowa fēye esome tēkaklune na buna fēyeme hi telulone?”

4 Na kwe, iniwa wesibi bume kē fata mētletlebē, Pita kēme gēgali tle. Bu megali tle,

5 “Bo Jopa life mēta tafa telē na bo Gotome gēgali tēglēlēkeflēbēē na bo nimitelēha wesibi mana hwi telē. Bo tako lablab ēhoha wesibi hwi tlolē, matafa mago tuku tēmalita. Nilina taba kē ēho mēta jejelē wako elēme kēkesi mētle na mana tuku tēmalita.

6 Bo kē wesibi lowene sle nanēgletemēme na bo kē ēho elēme mana hwi sle telokwaklē. Na bo mehwi tloēmē, memelē tobaluku kleli na memelē waluju mago kleli, na memelē tato na memelē taiju na memelē fole. Israelbē afenēboni bu kēha wesibi hana hihi mēlekefēya.

7 Na ēfalēbo lego bome megali tlonē, ‘Pita ju huju ele na wesibi tētēkle etamē na hi elēme.’

8 Kwe bo megali telē, ‘Tako Ho, bo hanane mu hi nēgelēme. Sebo, Israelbē afenēboni, kēha wesibi hihi hana nēlamu. Sebo melowene nanēla, “Kē wesibi hi nēglana kwe Gotobē naba lime tēbo nanilitaya.” Kēme nēgēme kēha wesibi hi hana telē, bo ētani kē nēgebē na ēje mana ekēne.’

9 Kwe kē ēfalēbo lego heven life mago ita megali tle, ‘Wesibi Goto megali kē lēglebē, “Ebē lale hi wesibi,” ju megali asa ele, “Ebē tēbo hi wesibi.” Weye.’

10 Goto kē galime aowafe gali tle na kē ēho matafa elēme ita mana ki tokwake.

11 Kē olē nawa, aomalē ho, sebo kēme tafa tēglabē lowa mitisiya. Sisaria lifate mago ho li, bo belēme jine telēbakēme.

12 Na Gotobē Amtētomba bome megali tlonē, ‘Ju kē enēnena egēyeubēme, tutune asa ele. Buna lalowa eyeu.’ Na ebē tobali ita jowa afanino kē mēgljabē, bu mata iniwa Sisaria lifatewa bona tuja. Na seme kē gali

tëgelëbakënëbë hobë lowa
tëkakluja.

¹³ Na bu seme megali
latlona, 'Ensel bobë lowa
tëkaklë na këme tlibe na
megali tlonë, "Ju ho flime
Jopa lifewa sajine elëkakëme,
ho lime hohwi
namugutatlame. Bubë
weniji Saimon Pita. Na bume
gali mujelëame, ju belë
naligisitëme.

¹⁴ Na kë ho jume na jubë lo
mëta kë tafa mëglabë
enëneme gali të
nalëgëtatëmeme. Sobo kë gali
aholokwane elëleme na Goto
some nëno lëleme."

¹⁵ Bu nimitelë gali kë të
togotlebë wayawe tlole, na
bo mana gali tëme ototelë. Bo
gali tokwafe kofene të
tëtagulë, na mana Gotobë
Amtëtomba bume tisi tëme,
seme ëbame otome fene tigi
të nabë.

¹⁶ Na, Jisas ëbame seme kë
gali toglonabë gali bo ita
lowene tletelë. Bu megali
latlona, 'Jon onehome tu
mëta baptais totome, kwe
tokwafe Goto bubë
Amtëtombana baptais
lëgëtome.'

¹⁷ Ëbame sebo Tako Ho Jisas
Klaimë lowene sle tletla na
Goto bubë Amtëtomba seme
tlëna. Na kë fenene Goto kë
enëneme bubë Amtëtomba
tlëme. Bo melowene nanelë,
'Kë wesibi ebë Gotobë
wesibi. Na bo Gotome hana
boblo nogotlëme na bubë
tole hana lëkle nëgëtatelëme.
Goto bume kë totometëmebë
wesibime lëkle hana
nogotomëme."

¹⁸ Na kwe, bu Pitabë gali

yafe aholokwane mëtla. Na
bume kë wame motlolibë
lowene latliwa tëbetëme. Na
bu Gotome bibita mototla na
megali lamëtla, "Israelbë
afenëboni mëtabëya jwa
mëglabë enëneme, Goto ino
tika tëtatëme, bubë tëbo
lowene aholokwana ti
mëglabëme na unaunalëme
lale tafa mëglabëme."

*Antiok lifate mago oneho,
Jisame lowene sle mëtletla*

¹⁹ Ëbame, Stivenme mogo
nalë kë tëkle mototlabë olëna,
Israelbë afenëboni fli bu
Jisame kë lowene sle
mëtlelabë oneho flime mana
tëbo mototoma. Këme
nëgëme, bu mago lebutako, li
life li lifewa mitliwaya. Bu
Fonisia provinswa, na
Saiprus afayowa na Antiok
lifatewa memitliwaya
lamëtla. Na bu Jisasbë lale
gali mana të mëtëtagutëma.
Kwe Israelbë afenëboni
mëtabëya jwa mëglabë
enëneme gali hana të
mëttëtatëma. Weye. Bu
Israelbë afenëbonime fwa të
mëttëtagutëma.

²⁰ Kwe bu mago ho fli,
Saiprus afayo mago na
Sairini lifate mago, Antiok
lifatewa mutuja na Tako Ho
Jisasbë lale gali Israelbë
afenëboni mëtabëya jwa
mëglabë enëneme të
mëttëtatëma.

²¹ Na Tako Hobë afutuku
bu mëta tëbetëme na bu kë
afutukuna Jisasbë lale gali të
mëttëtatëma. Këme nëgëme
lebutako oneho Jisame
lowene sle mëtlela na bubë
tëbo lowenebë aholokwana

ti motokouja. Na Jisasbë lowenewa esogo mêtletlëta.

22 Na Jisasmë lowene sle mêtletlabë oneho, Jerusalem lifate mëta kë tafa mëglabë, kë gali aholokwane mëtla na bu Barnabasmë Antiok lifatewa jine mêtletëkakla.

23 Barnabas Antiok lifatewa tuhu tule na mehwi tlome. Goto kë onehome ululu sle totome na lataitame. Na bu këme tako fleflesu latletëme. Na bume lale galime meokokwe tlome, “Sobo Tako Ho Jisasmë unaunalëme lowene sle eglekefëtelome na bubë lowenewa esogo elelëkefëtelome.”

24 Na Barnabas bu lale homu nëgëme. Na Gotobë Amtëtombabë afutuku bu mëta feilawa tëtabetle. Na bu Gotome feilawamu lowene sle tletle. Na këme nëgëme feilawa oneho bu Jisasmë lowene sle mêtletla.

25 Na kwe, Barnabas bu Tarsus lifatewa tuju, Solme hohwi nalugutatleme.

26 Bu hohwi tëttagutlebëë na Solme mana hwi tujuwelële. Na no tlële na Antiok lifatewa elebo nagi tlesule. Na tlemalë, Jisasmë lowene sle mêtletlabë onehona, kë lifate mëta kë tafa mêtletlabë, jowa tlibutuna loko mêtletlëkefëya na Gotobë gali okokwe motlokefëmo. Na Antiok life mëta, bu Jisasmë lowene sle mêtletlabë onehome, afina mëtë lamototoma, “Kristen.”

27 Kë nalëwa, Gotobë lowene mago gali të mototokweflabë ho fli,

Jerusalem lifate mago, Antiok lifewa mitisiya.

28 Na Gotobë lowene mago gali të totokweflebë ho li, bubë weniji Agabus, bu Kristen onehobë naba li mëta hujuna tlibe na Gotobë Amtëtombabë afutukuna megali tlome, “Tako fone, iniwa life mëta fata lokoume.” Na tokwafe, Sisar Klodius eso home tafa téglena, kë fone mana fata tokou.

29 Kristen oneho, Agabusbë gali aholokwane motlola. Na bu gali sle mototla. Kristen oneho flime, Judia provins mëta kë tafa mëglabë, balitina mëgaitama namëglame. Na jowa jowa ho, bubë baliti musu niji loko mêtëtaya.

30 Na bu Barnabas na Solname jine mêtletëkakëma. Na bu kë baliti, Kristen onehobë letitabo home mëtehoutemo na mutujuwelëmo.

12

Eso ho Herot, Jemsme mogo nalë tëke tlole na Pitame kalabusu lowa tuku tle

1 Na kë nalëwa, eso ho Herot bubë wame home boblo mogotomabë enëneme gali tlome, Kristen oneho flime tëbo namëtagumame.

2 Na bu li home gali tlole, na bu Jonbë bolijamome, Jemsme kosina mogo nalë tëke tlole.

3 Herot bu mehwi latlome, Israelbë afenëboni kë wesibime fleflesu lamëtla. Këme nëgëme, bu Israelbë afenëbonibë tako lotu olëna,

bubë wame home boblo mogotomabë enëneme gali tlome, Pitame kalabusu lowa tuku namëglame. Israelbë afenëboni, kë tako lotu olëna, sëse wesibi jwa bletë nage hi mëtlekefëya.

⁴ Bubë wame home boblo mogotomabë enënene Pitame fa mototla na kalabusu lowa tuku mëtla. Na Herot bu, wame home boblo mogotomabë enëne we tobali ita jowa këniiji aniji tlome, Pitame hwi namoglokweflame, bu lëglëboukakulime. Nilimalë afina hwi motlokwefla. Na fli mana hwi mëtla. Na tokwafe fli nilimalë ita hihijika mëtla. Na otobë mutuja. Na bu olëna klabëna mehijikawa lamëtlekefëya. Herot bu melowene latle, Israelbë afenëbonibë tako lotu olë yawe lëleme na Pitame kalabusu lo mago mana lëlesuleme, na onehobë naba lime bubë tëbo loweneme takune lololeme.

⁵ Këme nëgeme Pita kalabusu lo mëta tafa tle. Na wame home boblo mogotomabë enëne bume hwi motlokwefla. Kwe Kristen oneho, Gotome anisasana takune motlokwefla, Pitame lëgaitale nalëgleme.

Ensel Pitame taitale, kalabusu lo kile nalogotleme

⁶ Na kwe Herot bu olë waaniji tlole, onehobë naba li mëta Pitabë tëbo loweneme takune naloglome. Na kë klabëwa, Pita bu wame home boblo mogotomabë enëne tlemalëbë ku mëta nitëbetëme. Na bume senë

taba toba mëta këkesi mëtletla na li senë tobamu toba elë kë tafa tëglebë wame home boblo logotomebë hobë toba mëta kesit tuletla na li senë tabo yemane toba elë kë tafa tëglebë wame home boblo logotomebë hobë toba mëta kesit tuletla. Na wame home boblo mogotomabë enëne fli, kalabusu ino ëfome mana sei mëtlëkefëtla.

⁷ Na kwe Gotobë ensel lafatawa tle. Na kë kalabusu lo, elulego telube. Na ensel Pitame mëglëbo mëta luluju totle na gali tlole, “Ju hokweinawa huju ele.” Na senë taba, bubë toba mago, lalukluwa mëtëtëkakettle.

⁸ Na ensel gali tlole, “Pita jubë ëhona, juba jibona gëgelo etome.” Na Pita melë tle. Na ensel gali tlole, “Jubë heletabo ëho mata gelo etleme na bome nagi enënëme.”

⁹ Na Pita kë tlë tabo lo tokwëfo kile tle na enselme nagi tlële. Kwe Pita melowene hana tle, “Bume kë fata lëgletlebë wesibi ebë nëgali wesibi o hanane.” Bu melowene tle, “Bo nimitelë hwi nelëwa.”

¹⁰ Tlemalë weife nagi mëtëyeu na kalabusu lo kë hwi moglokweflabë home lasigliwa mototomo. Na ita mëtëyeu. Na kalabusu lo kë hwi moglokweflabë ho flime sigli motujetomo, kwe bume hwi hana motloma. Na tlemalë bu kalabusu lobë ainëna ino elë fwa mutulo, kë kalabusu kile namogotlome, na lifate elë mëyeume. Na kë ino blawa latikawa tëkakettle. Na bu kalabusu

lo kile mêtelo na li alêge esogo mêtelololo. Na kwe ensel Pitame alêge mêta lakilewa têkake.

¹¹ Na Pita bu kê wesibime lowene tle na gali tle, “Bo walowene nelê, ebê nimitelê nane. Weye. Goto bubê ensel bo belê jine lëlêtenê, bome lêgaitané nalêgleme. Kême nêgeme Herotna, Israelbê afenêbonina, bome têbo mēgētānabē lowene kê nēgebē, hana tēbo mēgētāname.”

¹² Na bu Jon-Makbê bota, Mariabê lowa tuju. Lebutako oneho kê lo mēta loko mêtelulelêya na Gotome gēgali mêtlelêkefla.

¹³ Pita kê lo ino mēta kêke telukwaketême. Na li wege mēse, bubê weniji Roda, tisi, ino tika naegetatleme fene.

¹⁴ Bu Pitabê mou lego aholokwane tlole. Na bu tako fleflesu tēgletleme nêgeme, ino tika jwa kême têtatle. Na bu fêka tokou na fli onehome gali tlome, “Pita walisife, ino efome ekê lelêjuwelêbokwe!”

¹⁵ Kwe bume gali motlêya, “Ju yaya mēse.” Kwe bu anisasana gali tlome, “Weye. Nêgalimu. Bu ino efome ekê lelêjuwelêbokwe.” Na bu gali motlêya, “Sebo melowene nanêla, ‘Ebê bume kê hwi loglokwe flebê enselhane.’”

¹⁶ Kwe Pita ino mēta itaita kêke telukokekêfe. Na kême bu ino tika mêtêtatla. Na bume hwi motlola na klelegomu memêtletla.

¹⁷ Na Pita bume tobanawa lêkle totome, gali kaju namêgebêyame. Na Tako Ho,

bume kalabusu lo mago kê no lēglēlebē gali, tē têtatême. Na bu megali latlome, “Sobo kê wesibime, Jems name, Jisame lowene sle mēgletlabē oneho fliname gali elomo.” Na Pita bume hune totome na li lifatewa tuju.

¹⁸ Olobalêwa, kalabusu lo mago wame home boblo mogotomabê enêne, Pitame yafe hwi mêtletla kwe bu tafa hana tle. Na bu klelego memêtla. Na blalo têtakune mêtlelogwaya, “Pita habelê lujune?”

¹⁹ Eso ho Herot, bu kê gali aholokwane tle, “Pita hana tafa lēlefe.” Na bu ho flime jine tlême, Pitame hohwi namêtatlame. Kwe bu Pitame hwi hana motlola. Kême nêgeme, Herot, Pitame kê hwi moglokwe flabê home yafe takune tlome kwe hanane. Na bu li home gali tlole, Pitame kê hwi moglokwe flabê home mogo nalê têtêkle nalêgētame. Na tokwafe, Herot Judia provins kile totle na Sisaria lifatewa tuju na kême tafa tule.

Eso ho Herot wagli tle

²⁰ Eso ho Herot bu Tair lifate mago onehome na Saidon lifate mago onehome tako wame latlome. Kême nêgeme bu iniwa loko mêtlelêya na Herotme hwime mitisiya. Kwe bu Blastusme afina takune motlola, bume lēgaitame nalêgleme. Na bu kêbême helawa tletême. Blastus bu eso ho Herotbê lo hwi toglokwe fletlebê ho. Buna iniwa, Herot belê

mutuja, aisenë hi
 namëlelêlame na bume kë
 wame toglobebë wame
 lowene lëglëkële nalëgleme.
 Kë enëne, bubë hi wesibi, eso
 ho Herot këme tafa lëglebë
 lifate mago glo mëtkefëya.
 Na bu melowene lamëtla,
 “Herotbë wame tli jwa
 lëgebetlena kwe bu hi wesibi
 bu mago ita glo hana
 mëglame.”

²¹ Herot bu kë enënena
 gëgali mëglabë olë waaniji
 tole. Na kë olëna bu eso ho
 këna negli mogotlabë ëho
 gëgelo tle na eso hobë tafa
 labu mëta tafa tle na kë
 enëneme mana gëgali tlelëme.

²² Na iniwa oneho
 Herotme feilawa we motlola,
 “Ebë ho nane. Ebë goto li,
 ekë gali lolona.” Na bume
 lotu mëtletla.

²³ Herot bume kë gali
 motlolabë galime
 aholokwane tleme, kwe bu
 lëkle hana totome. Na
 Gotome fleflesu lëgletlebëme
 tole hana tle. Këme nëgeme,
 Gotobë ensel li bume
 hokweinawa tako atowelili
 tlële. Na bisikëfa bubë alejina
 imona hi mëteluletla na bu gli
 tle.

²⁴ Na Gotobë gali li life li
 life fifiji mëtlagula. Na
 lebutako onehomu Jisame
 lowene sle motokoutla.

²⁵ Jerusalem lifate mëta
 loko kë mëtëtayabë baliti
 mëtlëmobë wege yawe
 motlolo. Na Barnabasna
 Solna Jerusalem lifate mana
 kile mototlo na bu
 Jon-Makme, Antiok lifatewa
 weife mëtlëlulo.

13

*Bu Barnabasname Solname
 aniji motloma, Jisabë lale
 gali të namëtagutemome*

¹ Kristen oneho fli Antiok
 lifate mëta tafa mla. Na bu
 mago fli, bu Gotobë lowene
 mago gali të mototokwefla.
 Na fliye, bu Kristen oneho
 flime Gotobë lale galime
 okokwe motloma. Kë
 enënebë weniji melë:
 Barnabas na Simeon, bume
 mefë lamototla, “Kokolebo
 ho,” na Lusius bu Sairini life
 mago ho, na Sol, na Manain
 bu eso hobë Herotbë yonane
 ho.

² Li olëna, kë oneho, Tako
 Home lotu mëtletla. Na bu hi
 wesibi hi jwa mëtla, Gotome
 lowene sle namëgletlame. Na
 Gotobë Amtëtomba gali
 tleme, “Sobo Barnabasname,
 Solname aniji elomo, bo
 bume kë aniji toglotëmebë
 wege fa namogotlome.”

³ Këme nëgeme, bu ita hi
 wesibi hi jwa mëtla na
 Gotome mana gëgali
 mëtlëlëla, kë tlemalëme
 lëgaitame nalëgleme. Na bubë
 toba bubë eso mëta gogwa
 motoletëma, bume kë wege
 fame aniji motloma. Na
 tlemalëme jine mëtelëkakëma.

*Barnabasna Solna Jisabë
 lale gali Saiprus afayo
 magobë onehome të
 mëtëtatemo*

⁴ Gotobë Amtëtomba
 tlemalëme jine tlëme. Na bu
 Selusia lifatewa mëtëyeu. Na
 këme sibu lo mëta fëfë mëtelo.
 Na sibu lo bume Saiprus
 afayowa tlelume. Na bu sibu

lo mago fëfe mêtëkako na Salamis lifatewa mêtëyeu.

⁵ Bu Salamis lifatewa fwa mutulo na Israelbë afenëbonibë lotu lo elë asë mêtëbelëfo. Na Gotobë gali të mêtëtatemo. Na Jon-Mak buna iniwa mutuja, tlemalëme nalëgaitameme.

⁶ Tlemalë Saiprus afayobë li life li life mêtëkoujo na Pafos lifatewa fwa mêtelo. Na bu Israelbë afenëbo lime mana esune mêtëlëlo. Bubë weniji Barjisas. (Bubë weniji Grik galina mefë lamototla, Elimas.) Bu itaita humëi tlekëfe na memelë olo tlësëme. Kë ho bu itaita mesosogëna latlokwefëme, “Bo Gotobë lowene mago gali të nogotlëbë ho.”

⁷ Kë ho bu eso ho Sergius Paulusbë yonane ho. Sergius Paulus bu Saiprus afayo magobë eso ho. Na bu lale lowenenabë ho. Bu Barnabasname Solname gali telokwakeme bu belë migisitelo namëgelome, bu Gotobë gali aholokwane nalëgleme. Na tlemalë bu belë mitisitelo na bume Gotobë gali të mêtëtatelo.

⁸ Kwe humëi ho Elimas, kë tlemalëbë wege blo nalëgëtatëmeme afutuku tle. Bu metole latle, eso ho Sergius bu Jisame lowene sle jwa na lëgletleme.

⁹ Gotobë Amtëtomba Solme afutuku tlële. Solbë li weniji ebë Pol. Na bu kë afutukuna, Elimasme anisasana hwi tlole na megali latlole,

¹⁰ “Ju Satanbë nëba. Ju iniwa lale loweneme wame eglomebë ho. Tetëbo lowene

na kule kule lowene, ju mëta nohwa lelutabetë. Ju Gotobë iniyafe gali, jubë sosogëna galina hihijika elekëfe. Ju kë tëbo lowenebë fëye olëna kile eglemene?

¹¹ Ju aholokwane ele. Goto jume tëke loglëme ekëne na jubë naba titiki mëgletëme. Na ju klijbë elulego hwi hana eglotleme. Na ju tako naba titiki tabo metafawa ekoukëfeme.” Pol bu megali wafi tle na hokweinawa olobaha wesibi tetujutle na Elimasbë naba lamu totometle. Na naba kilego mêtletle. Na bu home hohwi tëtamë, bume toba fana mëglelula namëglame.

¹² Eso ho Sergius kë wesibi hwi tlole na bu Jisame lowene sle tletle. Bu tlemalë kë okokwe motlolobë gali klelego tëgletleme nëgeme.

Sol bu Jisasbë gali Pisidia provins mago lifate li, Antiok mëta të totle

¹³ Polna, buna kë asë mêtëglabë hona, Pafos lifate kile mototla. Na bu sibu lona Perga lifatewa mutuja, Pamfilia provins mëta. Kwe Jon-Mak bume hune totome na Jerusalem lifatewa ita tuju.

¹⁴ Bu Perga lifate kile mêtelo na mêtëyeu na Antiok lifatewa tuhu mutulo, Pisidia provins mëta. Na bubë lotu olëna bu Israelbë afenëbonibë lotu lowa mêtëkaklujo na tafa mêtelulo.

¹⁵ Na lotu lo hwi moglokweflabë eso ho, Mosesbë yahi hwi motloma na Gotobë lowene mago gali

të mototokweflabë hobë yahi mata hwi motloma. Na mana bu ho lime Polname, Barnabasname gali naloglomeme jine metlëla, megali naloglomeme, “O afani, sobo onehome lëgaitamebë gali li egeholona kwe sobo lalowa gëgali egelome.”

¹⁶ Na Pol hujtu tle, na bume tobana lëkle totome, gëgali kuhu namëglame na gali tlome, “Sobo Israelbë afenëboni na sobo fli oneho, Gotome kë lotu eglëkefëtelobë, sobo iniwa aholokwane elo.

¹⁷ Israelbë afenëbonibë Goto, bu sebobë smleninome meaniji latlome, bubë oneho tafa namëgletlame. Bu bubë life kile mototla na fli enënebë lifate, Isip lifate mëta, tafa mëtla. Na këme Goto bume taitame. Na bu lebutako onehomu fata mëtla. Na Goto tokwafe, bubë afutukuna bume Isip lifate mago nëno tle na ho jwa tabo elë tlelume.

¹⁸ Na bu kë ho jwa life mëta niliafewe tlibutu kënjiji asasë mëtla. Na bu kë niliafewe tlibutuna Gotome tetëbo lamototokwefla. Kwe Goto bume lataitakefëme.

¹⁹ Tokwafe bu tako flëke elë fwa mutula. Kë flëke weniji Kenan. Tobali ita tële li li afenëbo mago enëne kë flëke mëta tafa mëtla. Kwe Goto, Israelbë afenëbonime afutuku tlëme na bu kë afutukuna, kë tobali ita tële li li afenëbo mago enëneme unalëme tëbo mototoma. Na Goto kë enënebë flëke Israelbë afenëbonime yo

tlome, kë flëke bubë flëke fata nalëgletëmeme.

²⁰ Kë flëke fa mototlabëme 450 tlibutu lamëtla. Na tokwafe, Goto bu oneho flime aniji tlome, Israelbë afenëbonibë asë hwi namoglotëmeme. Bu melë motokweija na Gotobë lowene mago gali të totokweflebë ho Samuel bume mana tafa tlelëme.

²¹ Samuel bume tafa tëglelëmebëë, na bu Samuelme takune motlola, li home aniji naloglotëmeme eso home fata nalëgletëmeme. Na kwe Goto, bu Solme aniji tlole, bubë eso home tafa nalëgletëmeme. Na bu eso home niliafewe tlibutu kënjiji tafa lëgleme. Sol bu Kisbë bowene. Bu Benjaminbë afenëbo mago.

²² Kwe Goto Solme eso home tafame hehë tletle na Devitme aniji tlole, bubë eso home tafa nalëgletëmeme. Bu Devitme megali tletle, ‘Bo Jesibë nëbame, Devitme, wahwi nololë na bo bume tako tole nanëletelë. Bu bobë iniwa tole esogo lëglelëmetënëme.’

²³ Ètani Goto megali sle latle, Devitbë afenëbonibë mago, tako letitabo home lëgëtabetëme nalëgleme, Israelbë afenëbonime tëbo lowene mago nëno nalëgleme. Na kë ho bu wa fata tle na bubë weniji Jisas.

²⁴ Jisas, bubë wege fa jwa togotlena na Jon, Israelbë afenëbonime gali metë latëtätëme, ‘Sobo tëbo lowenebë aholokwana ti elome na Gotome fwa

lowene sle eletelome na mana baptais elome.’

²⁵ Jon bubë wege yawe logloleme nounou tle na bu megali latle, ‘Sobo bome melowene laletë nane, “Goto kë aniji toglolebë ho, onehome nëno lëglebë ho.” Weye. Bo sobo kë hwi eglotelobë ho nane. Kwe kë ho kë ligisibë, bubë afutuku takomu kwe bobë afutuku tokwëfo. Bo lale ho nane kë ligisi home kë nëgaitalëme, manawa wege ho fene laitale. Weye. Bo bubë jiteho hana titika nëgletelëme. Bu letitabo homu nëgeme na bo atwati homu. Bu lale homu kwe bo atwati homu.’

²⁶ O afani, Abrahambë afenëboni, na fli enëne Gotome kë lotu eglekefëtelobë, sobo aholokwane elo. Goto onehome kë nëno tëglebë gali, seme wajine tlëtëna.

²⁷ Jerusalem lifate mëta kë tafa mëtlabë oneho na bubë eso enëne melowene hana mëtletla, ‘Goto, Jisasme aniji tlole, seme tëbo lowene mago nëno lëleme.’ Bu Gotobë lowene mago gali të mototokweflabë ho kë yahi mëtlabë gali, iniwa lotu olëna hwi motlokwefla, kwe bu kë gali lowene sle hana mëtletla. Këme nëgeme megali lamëtla, ‘Jisas kwe gli malële.’ Ebëha lowene kë mëtlabë, kwe bu Gotobë lowene mago gali të mototokweflabë ho ëtani fene yahi mëtla.

²⁸ Bu Jisasbë fëye tëbo wesibiha hwi hana motlotla na bume mogo nalë tëkle mototlamu. Weye. Kwe bu

eso ho Pailatme anisasana gali motlola, ‘Gli malële.’

²⁹ Gotobë lowene mago gali të mototokweflabë ho, bume ëtani meyahi lamëtletla. ‘Oneho bume memelë tetëbo lowene gwa mëtëtatla.’ Na bu kë iniwa tetëbo lowene Jisasme fwa gogwa motoletla. Na mana bume ti mago tohwa mototla, na matëmatë mëta gwa mutujetla.

³⁰ Kwe Goto bume matëmatë mago huju totle.

³¹ Na Jisasna ëtani kë asë mëtlekefëyabë enëne, Galili provins mëta na Jerusalem lifate mëta, bume lebutako olë hwi motlokwefla. Na kë oneho, Jisasme kë hwi motlokweflabë, Israelbë afenëbonime, kë lale gali të mëtëtakefëtëma.

³² Na sebo some mata kë lale gali metë nanëtatëyo. Goto sebobë semleninome megali sle latlome, ho lime jine lëgletëname, seme tëbo lowene mago nëno nalëgleme.

³³ Na Goto, Jisasme matëmatë mago kë huju togotlebë, bu sebobë semleninome fene gali sle tlome. Na kë gali sle gali namba tële Buk Song mëta mefata watletëna. Ètani Devit, Buk Song mëta meyahi latletle,

‘Ju bobë nëbamu
na ëje bo onehome
walebotane nëtatëmë,
bo jubë ayamu.’

³⁴ Goto, Jisasme matëmatë mago huju totle, na bu ita hana gli lëgleme na matëmatë mëta kibo hana lëgleme. Goto

ētani kē wesibime megali latle, ‘Bo sobobē bisemleme, Devitme, fene gali sle tlolē, bo some nēgaitome na lale wesibi nēglēyome. Na kē gali iniyafememu gali telē bu mefata mēgleme, bo ētani fene gali telē.’

³⁵ Na li gali, Gotobē bogo mēta melēgēbe lalēle, kē bu megali latla, ‘Ju jubē wege fame kē aniji toglolebē ho, matēmatē mēta kibo lēglebēme, hwiwa hana eglolome.’

³⁶ Kē gali bu Devitme hana gali tle. Sebo walowene nēla, Devit ebē life mēta tafa tēglena, bu Gotobē tolewa esogo tlelēle. Na bu tokwafe gli tle. Na bume matēmatē mēta gwa mototla, bubē bolijafujunime fene gogwa mēta. Na bubē ato ini flawa tletle.

³⁷ Kwe Goto matēmatē mago kē huju togotlebē ho, bubē ato kibo hana tletle.

³⁸ Kēme nēgame sebo some, sebobē afanime, lale gali metē kēme nētātēyo. Sobo melowene sle naegelome, ‘Jisas kēme tisi, sobobē tetēbo lowene sle nalotometēyome.’

³⁹ Goto Mosesme kē tēglēlebē tafa sle gali tafa sle gali, sobobē tēbo lowene hana sle lēgētātēyome, na some mefē hana lēgētome, ‘Lale oneho.’ Kwe iniwa oneho, Jisame kē lowene sle mētletlabē, Goto bubē iniwa tēbo lowene aholokwana ti lēgletēmeme na mefē logotomeme, ‘Lale oneho.’

⁴⁰⁻⁴¹ Ētani, Gotobē lowene mago gali tē mototokweflabē

ho, megali lamēta, ‘Sobo bome tetēbo gali kē eglonabē enēne, sobo hwi elo. Na klelego eglome na tēbo eglitome. Bo li wesibi sobobē ku mēta fata nēgetatēyome. Bo melē kē nogotlēbē wesibime, ho li some gali lēglēyona, kwe bubē gali aholokwane hana eglolome.’ Sobo ululu sle saelo. Kē tēbo wesibi some fata lēgletēyolime.”

⁴² Pol bu gali wafi tē tētātēme. Na kwe buna, Barnabasna, totoho namēkakome kofene, kwe oneho bume megali lamotloma, “Li lotu olē fata lēglena, sobo ita sa esijo na seme gali ita tē etatēname.”

⁴³ Na oneho lotu lo mago totoho mētēkaka. Na Israelbē afenēboni lebutako na fli enēne, Israelbē afenēbonibē lotu tokwafe kē esogo mētletlēlabē, bu Polname Barnabasname esogo mētletlēma. Na tlemalē bume lale galime megali lamotlokwefēmo, “Sobo Gotobē tolewa esogo elelēlo na bubē maninibo mēta tafa elome.”

⁴⁴ Na li lotu olēna, iniwa oneho, kē lifate mago, Polna Barnabasna Gotobē gali tē mogotlobē aholokwaneme loko motokweija.

⁴⁵ Kwe Israelbē afenēboni fli, bu Polname Barnabasname mehwi lamotloma. Lebutako oneho bubē gali aholokwaneme tako tole lamēta. Na bu tlemalēme tako mōumou memētletlēma. Na bu Polbē gali aholokwane mēglabēme tako kokasa memētletla. Na

bume tiniji galina gali motlola.

⁴⁶ Këme nëgeme, Polna Barnabasna bume anisasana megali motlomo, “Goto bu seme wagali tlonā, bubē gali some, Israelbē afenēbonime, afina tē nētātēyobēme. Kwe sobo kē gali aholokwane egelobēme kokasa laletelo. Na sobobē kē lowenena, seme melebotane latatēna, sobo Gotobē unaunalēme lale tafa fa hana egotlome.” Këme nëgeme sebo some hune nelome na Israelbē afenēboni mētābēya jwa mēglabē enēne belē nēyeume, Gotobē lale gali tē nanutatemome.

⁴⁷ Sebo bu betelēme këme negēyeume, Tako Ho seme gali toglonome nëgeme. Bu megali latlono, “Bo jume waaniji nolē. Na elulego, wesibi fene olafa lēle, Israelbē afenēboni, mētābēya jwa mēglabē enēneme, bome meolafa etagutēmeme. Na ju iniwa life mago onehome aitawagumeme, bome lowene namēgletēname. Na bo bume nēno nēkowime.”

⁴⁸ Israelbē afenēboni mētābēya jwa mēglabē enēne, kē gali aholokwane motloma na tako fleflesu memētla na gali mētla, “Tako Hobē gali kē nēgebē, lale galimu.” Na iniwa oneho, Gotona unaunalēme tafa mēglabēme, kē aniji toglobebē, kē oneho, bume lowene sle mētletla.

⁴⁹ Na Tako Ho Jisasbē gali, kē provins mēta li life li life fifiji mētlagula.

⁵⁰ Kwe Israelbē afenēboni, bu kē lifate magobē letitabo

one, Gotome kē lotu melekefētlabē tēbo lowene tufiji mētētātēma, na kē lifate magobē eso enēnebē tēbo lowene mata tufiji mētētātēma, Polname Barnabasname tēbo namogotomame fene. Na buna, kē lifate mago oneho flina, bu Polna, Barnabasname tēbo lowene fa mētētātēma na bubē distrik mago hehē mētēkaketēma.

⁵¹ Na tlemalē, bubē juba mago flēke, kē lifate mago onehobē naba lime bu mētelo. Melēme lēlekuju mētelo, bu kē lowene kē fa mogotlabē tēbo miglitayame. Na bu Antiok lifate kile mototlo na Aikoniam lifatewa mētēyeu.

⁵² Kwe Kristen oneho, Antiok lifate mēta kē tafa mēglabē, tako fleflesu memētla na Gotobē Amtētomba bu mēta tētābetēme.

14

Barnabasna Polna, Aikoniam lifate mēta gali tē mototlo

¹ Polna Barnabasna, bu Antiok lifate mēta fene mētelo, bu Aikoniam lifate mēta kēha wesibi melamototlo. Bu Israelbē afenēbonibē lotu lowa mētēkaklujo na Jisasbē lale gali tē mētētātēmo. Bu lale galimu tē sle mētētātēmo. Na Israelbē afenēboni lebutako na Israelbē afenēboni mētābēya jwa mēglabē enēne, Jisame lowene sle mētletla.

² Kwe Israelbē afenēboni fli, kē gali lowene sle hana mētletla. Na bu Israelbē afenēboni mētābēya jwa

mëglabë enënebë tëbo lowene tufiji mëtëtatëma, Kristen onehona me tëbo lowene namëgletëmame.

³ Tlemalë Aikoniam lifate mëta tako tafa lamëtelo. Na bu Tako Hobë lale gali tëme uli hana mëtelo. Na Jisas bume tako afutuku tlëme. Na bu kë afutukuna memelë klelegowa wesibi blëge blëge mototomo. Na Tako Ho, bu kë klelegowa wesibina, onehome melebotane latëtatëme, kë gali bu kë të mëtëtatëmobë ebë nëgali galimu.

⁴ Kwe kë lifate mago oneho telë lowene mëta tafa mëtla. Fliye bu Israelbë afenëbonina yonane mëtla, na fliye tlemalë Aposelna yonane mëtla.

⁵ Tokwafe, Israelbë afenëboni mëtabëya jwa mëglabë enëne fli na Israelbë afenëboni fli na bubë letitabo enënenana, iniwa lowene sago mototla. Polname Barnabasname tëbo namogotomame fene na bume aniji sisike namëgletëmame fene, mogo nalë tëtëkle namëgëtayame fene.

Barnabasna Polna, Likonia provins mëta gali të mototlo

⁶ Barnabasna Polna, bume kë tëtëkle mëgëtayabë gali aholokwane mëtelo. Na bu Listra lifatewa lamëtëlëboulakujowa. Na bu kë lifate mëta na Derbe lifate mëta asë mëtelo. Këbë lifate bu Likonia provins mëta mëbë. Na bu kë lifate mëglëbo mago life mëta asë mëtelo.

⁷ Na tlemalë bu Jisasbë lale gali kë provins mëta të mëtëtagutemo.

⁸ Na Listra lifate mëta, kiju tëbona ho li këme tëtabe. Bota bume kiju tëbona mëtabo fu totle. Na kë ho bu mana ekë tafa lële. Bu asë hana tle. Bu metafawa latlekëfe.

⁹ Kë ho Pol kë të togotlebë gali aholokwane sle tokoutle. Na Pol bume wëya tlelële na bume melë lowene latletle, kë ho bu Jisame walowene sle lëgletleme nëgeme, na bubë kiju tëbo, Goto lalowa këme sle lëgëtatleme.

¹⁰ Këme nëgeme, Pol bume anisasana wëya tlelële na anisasa gali tëtelokwakle, “Ju huju ekokeme na hujuna elibeme.” Na kë ho bu hokweinawa huju tokoke na këme asasë tëbelëfa.

¹¹ Lebutako oneho bu Pol kë togotlebë wesibi hwi motlola na bubë Likonia galina momolë mëtla, “Sebobë goto, hoha fata mëlefe na bu sebelë ekë metujulo.”

¹² Na bu Barnabasme mēfë lamototla, “Bu sebobë tako goto Sus.” Na bu Polme mēfë lamototla, “Bu sebobë goto, Hermes.” Bu mēfë këme mototla Pol bu gëgali takowa ho nëgeme.

¹³ Bubë goto Susbë lotu lo, bu kë lifate tiniju elë tlibetle. Na kë lotu lo mëta wege lëglebë ho, iko bulmakau kleli fli, lifate mago lëglesu ino ëfo elëme tlesume. Na bu lale ti tahweji taba meta susu tujetëme na tehwei. Buna, kë lifate mago onehona, kë bulmakau kleli tëtëkle

mëgëtayame kofene,
Barnabasna, Polname lotu
namëgletëmame fene.

¹⁴ Kwe Barnabasna, Polna,
bume kë fata tëgletëmebë
wesibibë gali aholokwane
mëtelo, na klelego
memëtletemo. Na bubë ëho
kaka mototomo. Bu
melëbëme lëlekuju mëtelo,
bume kë mototometëmabë
wesibime tole hana mëtelo.
Na bu kë onehobë ku mëta
mitlibo na bume feilawa
këkale galina gali motlomo,

¹⁵ “Sobo kë wesibi fëyeme
etlone? Sobo melë asa elo.
Sebo sobo fenene këha howa
nëtabo. Sebo sobelë këme
tisijo, lale ëhwati gali të
nanëgëtatëyome. Kë ëhwati
gali melë. Sobo blawa kë lotu
egletemobë tëbo wesibi
aholokwana ti elome na sobo
lowene hihijika elome na
tako kalëlegona Gotomume
lotu eletelome. Kë Goto bu
matafana, lifena, nutuna,
iniwa wesibi kë mëgebebe, bu
blëge blëge totome. Sobo kë
lotu egletemobë wesibi some
hana mëgaitome.

¹⁶ Ètani kë nëgebë na ëje
mana ekë, oneho bubë
tolewa esogo mëtlagila na bu
memelë wesibime lotu
mëtëkweitëma na Goto bume
hiwiwa latlagime.

¹⁷ Kwe Goto bu ëho nane
tle. Weye. Iniwa olë Goto
onehome lale wesibi olafa
tëtagimetëme, bu melowene
namëglame, ‘Bu tafa
lalëlaginafe.’ Bu some tu
tlëwagijo. Na bu lale hi wesibi
mata fata tëtagimo. Na bu
some feilawa hi wesibi
tlëwagijo, na sobobë lowene

sle tëtagimekefëtëyo, sobo
fleflesuna këme tafa elo.”

¹⁸ Oneho bubë gali
aholokwane mëtla, kwe
bulmakau kleli tëtëkle
mëgëtayabëme awi lowene
mëtëlekefëya, tlemalëme lotu
namëgletëmame. Kwe tlemalë
bume anisasana lëkle lëkle
mototokwefëmo. Na bu melë
hana mëtla.

¹⁹ Kwe tokwafe, Antiok
lifate mago na Aikoniam
lifate mago Israelbë
afenëboni, Listra lifatewa
mitisiya. Na bu kë lifate
mago onehobë tëbo lowene
tufiji mëtëtatëma. Na bu
Polme wame motlola. Këme
nëgëme bu Polme aniji ato elë
sisike mëtletla, na bu
mogowa latitigowa. Mogo
nalë tëkle namoglotlame
fene. Na oneho bu meweniji
lamëtla, wagli lëlewa. Na
bubë ato ki motokouja na
lifate mëglëbo elë kile
mutula.

²⁰ Kwe, Kristen oneho
Polbë ato li elë mutujutla na
hwagënë mototla. Na Pol bu
huju tle na lifatewa ita tuju.
Jowa olëwa tëtabe na bu
Barnabasna Derbe lifatewa
mëtëyeu.

*Barnabasna Polna bu Kristen
onehome Gotobë lale galina
mëtaitemo*

²¹ Tlemalë Derbe lifateme,
Jisasbë lale gali të
mëtëtatemo. Na lebutako
onehome mëtaitemo, Jisasme
lowene sle namëgletlame. Na
bu Derbe lifate kile mëtelo na
Listra lifatewa ita mëtëyeu.
Na Aikoniam lifatewa ita
mëtëyeu na Pisidia provinsbë

li mago lifate Antiokwa fwa mutulo.

²² Na iniwa life mēta, bu Kristen onehome lale gali tē mētētagutemo, bume lēgaitame nalēgleme. Tlemalē bume anisasana gali motlomo, “Sobo Jisame kē lowene eglotelobē lowene asa elēkēlo. Mana lowene sle saelekefētelo. Sobo aholokwane elo, Jisabē lowene esogo nēglelētlabē lowene ebē kalēlegomu lalēletle. Sebo feilawa hobota mēta afina tafa nēlame na mana Goto bu sebobē eso home unaunalēme tafa nalēgletēname.”

²³ Na tlemalē bu Kristen onehobē letitabo home iniwa life mago aniji mētlagumo, Kristen onehome tafa namēglelēmame. Bu afina hi wesibi yo mētelo, Gotome lowene sle namēgletelome. Na Gotome gēgali mētletlōlo, na bu Kristen onehobē letitabo home, Gotobē toba elē mana gogwa mētelo.

Barnabasna Solna Siria provins mago lifate Antiokwa ita mētēyeu

²⁴ Tokwafe Barnabasna Solna bu Pisidia provins ku kuwa bule mētētagulo na Pamfilia provinswa fwa mutulo.

²⁵ Bu Gotobē gali Perga lifate mēta tē mututatemo, na tokwafe bu Atalia lifatewa mitimo.

²⁶ Na Atalia lifate mēta, sibu lo mēta fe mētelo. Na sibu lona Siria provins mago Antiok lifatewa metēyo. Ētani kē lifate mago, Kristen

oneho, tlemalēme aniji motloma, Gotobē lale gali tē namēgētatemome. Na bu mata Gotobē toba elēme gogwa mētla, bume lēgaitame nalēgleme na ululu sle nalogotomeme. Na bume kē aniji motoglomabē wege yawe motlolo. Na bu Antiok lifatewa ita mitisijo.

²⁷ Tlemalē bu Antiok lifatewa tuhu mētelo. Na Kristen onehome gali mētelokwakēmo, bu belē migisiya namēglame. Na bu mitisiya na tlemalē gali motlomo, “Sebo kē tēgēyeubē, Goto seme taitano. Na sebo onehobē ato sle tētatemō, na sebo onehome taitamo, Jisame lowene sle namēgletlame. Na Goto, Israelbē afenēboni mētābēya jwa mēglabē enēneme mata, taitame, Jisame lowene sle namēgletlabēme.”

²⁸ Na tlemalē, Antiok lifate mēta, Kristen onehona, lebutako olē tafa mētla.

15

Kristen oneho, Jerusalem lifate mēta loko mētletlōya

¹ Na kēme, fli ho, Judia provins mago, Antiok lifatewa mētetujula. Na bu Kristen onehome meokokwe lamotloma, “Sobo, Goto Mosesme ato jibo tētlē gali kē tēglēlebē esogo jwa eglēlōlona, na bu sobobē ato jibo tētlē jwa mogotometēyona kwe Goto some hana nēno lēgleme.”

² Polna Barnabasna kē hobē gali aholokwane

motlomo na bubë galime fleflesu hana mêtletëmo. Na buna kë wesibime momata mêtletlogwaya. Këme nëgeme, Kristen oneho, Polna, Barnabasna, fli honame aniji motloma, Jerusalem lifatewa namugujame. Na kë gali, Aposelna, Kristen onehobë letitabo hona sle namugujetlame.

³ Kristen oneho bume Jerusalem lifatewa jine mêtletëma. Na bu Fonisia provins na Samaria provins kukuwa mutuja. Na bu kë provins mago Kristen onehome, megali motloma, “Israelbë afenëboni mëtabëya jwa mëglabë enëne mata Jisame lowene sle mêtletla.” Bu kë gali aholokwane mêtla na bu tako fleflesu memêtla.

⁴ Bu Jerusalem lifatewa fwa mutula. Na Kristen onehona, bubë lotu letitabo enëne, Aposelna gali motloma, “Sobo sebelë egisijome nëgeme, sebo some tako fleflesu këme nëletëyo.” Na Polna Banabasna megali motlomo, “Sebo li life li lifewa kë tégëyeubë, Goto seme feilawa taitano na sebo memelë wesibi melë këme totomo.” Na tlemalë bu kë iniwa wesibime gëgali mêtletlëmo.

⁵ Kwe Farisi ho fli, Jisame lowene sle mëgletlabë, bu huju mêtla na bu megali lamêtla, “Israelbë afenëboni mëtabëya jwa mëglabë enëne, Jisame kë lowene sle mêtletlabë, Goto Mosesme kë tégëlëlebë tafa sle gali saesogo sle mëlelëla na sobo bubë ato jibo satëtlë etometemo.”

⁶ Na kwe, Aposelna, letitabo hona loko mêtletëya, kë gali sle namogotlame.

⁷ Bu kë galime, feilawa gëgali mêtla na mana Pita huju tle na gali tlome, “O afani, sobo walowene elo, ëtani Goto bome somago wafi aniji tlonë, Jisasbë lale gali, Israelbë afenëboni mëtabëya jwa mëglabë enëne tē nanëgëtatemëme, bu aholokwane namlame na bume lowene sle namëgletlame.

⁸ Goto iniwa onehobë lowene wafi lowene lëletëme. Na bubë Amtëtomba kë Israelbë afenëboni mëtabëya jwa mëglabë enëne watlëme, seme fene tlëna. Na bu këha lowene kë tégëlebë, seme melëme lebotane tëtätëna, bu kë Israelbë afenëboni mëtabëya jwa mëglabë enëne mata fleflesu latletëme.

⁹ Goto seme fene tëtana, bu kë Israelbë afenëboni mëtabëya jwa mëglabë enëne këha melë wafi totome. Bu Jisame lowene sle mêtletlame nëgeme, na Goto bubë tēbo lowene aholokwana këme ti tletëme, sebobë tēbo lowene aholokwana fene ti tletëna. Na bu Gotobë naba lime lalowa këme tafa mla.

¹⁰ Sobo kë onehome, Goto Mosesme kë tégëlëlebë tafa sle gali esogo mëglelëmabëme asa gali elomo. Bu kë gali habëna esogo mëglelëmamene? Sobo këha hobota bume asa elëmo. Sobo hwi elo, sebobë semlenino kë tafa sle anebo gali hana esogo sle mëtlagima. Na sebo mata kë

tafa sle anebo gali hana esogo sle nëlagila. Na sebobë afuninona, sebona iniwa kë tafa sle anebo gali esogosle nëglagilabëme tako hobota mëta tafa nëla. Sobo kë onehome melë egotomona kwe sobo Gotome su etlo. Sobo Gotome fëyeme su etlone?

¹¹ Kwe sebo melowene nëglame, ‘Tako Ho Jisasbë maninibo mëta fwa, Goto seme nëno tle. Na kë enëneme mata Jisasbë maninibo mëta fwa nëno tle.’”

¹² Pita megali tle, na loko kë mëtletëyabë ho, gëgali lakujuwa metëbaguja, li gali hana ki mëtla. Na bu Polna Barnabasnabë galiwa aholo bo mëtëtagutëma. Na bu megali motlomo, “Goto seme afutuku tlëno na sebo kë afutukuna memelë klelegowa wesibi, Israelbë afenëboni mëtabëya jwa mëglabë enënebë kume blëge blëge totomo.” Na bu kë wesibi galibë të mëtëtatemo.

¹³ Tlemalë gali wafi yawe motlolo na Jems mana gëgali tle, “O afani, bobë gali aholokwane elotëna.

¹⁴ Saimon Pita bu seme megali sle tlon, Goto, Israelbë afenëboni mëtabëya jwa mëglabë enëne belë alako kë tigisitëmebë, bubë maninibo melebotane nalëgëtatëmeme. Na bu mago fli, aniji naloglomeme bubëmu tafa, namëgletlame.

¹⁵ Na Gotobë lowene mago gali të mototokweflabë ho, kë galime wafi gali mëtla.

Ëtani bu kë gali meyahi lamëtla,

¹⁶ ‘Tako Ho megali tle, “Devit onehome eso home kë tafa tēgletēmebē wege, lo fene fli tletle. Kwe unina tokwafe bo nigisime kë wege nahuju nogotlëme, ho fli lëglebë lo fene huju lotle. Na Devitbë afenëboni onehobë eso home tafa mëgletëmebë wege ita fa motlame.

¹⁷ Na këme Israelbë afenëboni mëtabëya jwa mëglabë enëne bome hohwi mëgëtakefëtëname. Kë enëne bu Israelbë afenëbo nane, kwe bo kë enëneme waaniji tlomë, bu mata bobëmu namëgëtabëtëname.”

¹⁸ Ebë Tako Hobë gali. Bu ëtanimu kë wesibime megali wafi tle, kë wesibi fata mëgleme.’

¹⁹ Këme nëgeme, bobë lowene melë lëgëbetenë lalële. Sebo Israelbë afenëboni mëtabëya jwa mëglabë enëneme, Jiasme tokwafe kë lowene sle mëtletlabë enëneme gali asa manoloma, ‘Sobo, Goto Mosesme kë tēglëlebë tafa sle gali iniwa saesogo elelëlo.’ Weye. Sebo kë hobota galina bume asa gali manoloma. Bu Gotome tokwafe lowene sle mletla.

²⁰ Kwe sebo bume pasë lalowa yahi nëletëma na bume nelëkakëmame. Na bume megali nelëkakëmame, ‘Sobo fësosome kë gogwa mëglabë hi wesibi asa hi elo. Na sobo lisei lowene asa elo. Na bu ko iniwa luguju tleslejwabë kleli asa hi elo. Na komu mata asa hi elo.’

²¹ Bu kë lowene esogo jwa mëglelëšana kwe Israelbë

afenëboni bu tiniji mëglame. Israelbë afenëboni bu iniwa tafa sle gali, Moses kë yahi tëglebë, lowene sle lamletla. Na ëtani anebomu na ebë olë mata, Goto Mosesme kë tëglëlebë tafa sle gali iniwa life mëta të mëtëtagukefëtla. Na iniwa tafawa mëglabë olëna, Israelbë afenëbonibë lotu lo mëta, bubë gali hwi mëtlagikefëtla.”

Bu Israelbë afenëboni mëtabëya jwa mëglabë enëneme, Jisasme tokwafe kë lowene sle mëtletlabë enëneme, pasë yahi mëtletëma

²² Aposel ho na lotu letitabo enëne na Kristen oneho fli, kë mëta kë loko mëtletëyabë, bu blalo gali sle mototla, bu mago tlemalë letitabo home aniji namoglomame, Polna Barnabasna Antiok lifatewa iniwa buna muguja namëglame. Na bu Judasna Sailasname aniji motloma. Judasbë li weniji ebë Barsabas.

²³ Na bu pasë li yahi mëtla. Na kë pasë bubë tobame mëtletëma, mëgehujaya namëglame. Bu meyahi lamëtla:

“O Silisia provins mago, na Siria provins mago na Antiok lifate mago oneho, sebo Aposelna letitabo hona some ebë pasë ekë yahi nëkeketëyo. Sobo sebobë afanino. Sobo, Israelbë afenëboni nane, kwe sebo iniwa Jisasme lowene sle nëletla. Lale kljimu.

²⁴ Sebo gali waaholokwane tla. Semago ho fli, sobelë mitisiya na bu tutune

lowenena, sobobë lowene wasisile mototometëyo. Bu some memelë galina gëgali mëtletëyo. Na sobo kë gali klelego metletemo na tutune lowene mëta tëtabo. Kwe sebo kë iniwa gali some hana gali telëbakëyo.

²⁵ Sebo somëta kë fata mëtëglebë wesibibë gali, waaholokwane tletëyo. Këme nëgame sebo loko tletëya na sebo jowa lowene mëta fwa tëtabëya. Na sebo gali sle totla, tlemalë home aniji nanoglomame na sobelë jine nanëgelëfakëmame. Na bu sebobë lale yabeni, Polna, Barnabasna bubë nagi migisijome.

²⁶ Polna Barnabasna sebobë Tako Ho Jisas Klaibë wege fa motokweflo. Na oneho bume wame lamolokwefëma na bume mogo nalë tëbo mogotomame fene. Kwe bu këbëme uli hana mëtelo. Bu Jisasbë wege mana fa motokweflo.

²⁷ Këme nëgame sebo Judasna Sailasname sobelë këme jine nëlëma. Sebo some pasë mëta kë yahi nëgletëyobë gali të namëgëtatëyome.

²⁸ Sebo Gotobë Amtëtombana jowa lowene wasle totla. Sebo melowene nanëla, ‘Sebo some megali hana gali noglëyome, sobo Israelbë afenëbonibë iniwa lowene saesogo elelëtemo.’ Weye. Sebo some kë hobota galina hana gali noglëyome. Sobo ebë lowenewa saesogo elelëlo.

29 Sobo fësime kë gogwa mëglabë hi wesibi asa hi elo. Na bu ko iniwa luguju tlejwabë kleli asa hi elo. Na sobo kleli afabo tuja salë toba asa hi elo na kolei mata asa hi elo. Na sobo lisei lisei asa elo. Sobo ebë wesibime ululu sle egelona na kë kwe lalowa. Sebobë gali eme tei tou lëletëna. Sobolalo ululu sle saelo.”

30 Na kwe Kristen oneho kë nilimalë home Antiok lifatewa jine mëtlëma. Bu Antiok lifate mëta fwa mëtla. Na bu Kristen onehome loko mëtelëkakëma na kë pasë bume mëtlëma.

31 Bu kë pasë hwi motlëyabë na kë pasë galime tako fleflesu memëtla.

32 Judas na Sailas, bu Gotobë lowene mago gali të mëtëtagutemobë ho. Na bu Antiok lifate Kristen onehome lebutako lala gali të mëtëtatemo. Bu kë lala galina, onehome lamëtaimo, Jisasbë lowene esogo sle namëglëlëame.

33-34 Tlemalë bu Antiok lifate mëta sogë tafaha mëtelo. Na tokwafe Kristen oneho bume kaiyo motloma. Na bume kë jine mëtelëbakëmäbë oneho belë, jine mëtelëkakëma.*

35 Na Polna Barnabasna Antiok lifate mëta mana tafa mëtelo. Na buna fli enëna, Gotobë lala gali lebutako onehome okokwe motlokweifëma na bu Jisasbë gali të mëtëtakefëtëma.

Polna Barnabasna yonane

* 15:33-34 Fli lowene ho bu melowene lamëtla, li gali mana lëbe kë gali mëta. Kë gali melë lëgëbelälële, “Kwe Sailas bubë lowene hihijika tle na bu Antiok lifate mëta lu tle.”

hana mëtelo

36 Tokwafe, Pol Barnabasme megali tole, “Sebo, otome Jisasbë gali kë të tëtagutemobë oneho belë ita nëgëyeume. Sebo melowene nanëgletemome, ‘Bu Jiasme kë lowene mëtletlabë lowene anisasana mana lowene melekefëtlane o hanane?’”

37 kwe Barnabasbë tole metëgëbetle latle, Jon-Makna iniwa mugujame.

38 Kwe Pol gali tle, “Kë ho kwe ëtani Pamfilia provins mëta seme wahune tëtano. Bu sebona kë wegeme tugujame tole hana tle. Këme nëgëme sebo bume hana nëglelulome.”

39 Tlemalë bu kë wesibime yonane hana mëtelo. Na blalo momata mëtelo. Na bwa bwa mëtëyeu mëtelo. Barnabas Makme no tlële na bu sibu lowa fe mëtelo na Saiprus afayowa mëtëyeu.

40 Kwe Pol Sailasme aniji tole, buna mëgëyeu namëgelome. Na Kristen oneho, Gotome takune motlola, tlemalëme ululu sle nalëgëtagumeme na bume lëgaitame nalëgleme. Na tlemalë mana mëtëyeu.

41 Na këme tlemalë Siria na Silisia provinswa mëtëyeu. Na bu li life li life mago Kristen onehome, lala gali të mëtëtagutemo. Bu kë lala galina, bume lamëtaimo, Jisasbë lowene esogo sle namëglëlëame.

16

Timoti Polna mètèyeu

1 Polna Sailasna Derbe lifatewa fwa mutulo, na tokwafe Listra lifatewa mètèyeu. Kè lifate mèta, Kristen ho li tètabe. Bubë weniji Timoti. Timoti bota bu Israelbë afenëbonibë mago mëse na bu mata Kristen mëse. Kwe bolijaya bu Israelbë afenëboni nane, bu Grik life mago ho.

2 Na Kristen oneho, Listra na Aikoniam lifate mago, Timotime melowene lamëtletla, “Bu lale homu.”

3 Pol bu metole latle, Timotime weife lëglëluleme. Kwe bu walowene tle, Israelbë afenëboni, li life li life mèta kè tafa mokoujabë melowene wamëtletla, “Timoti bolijaya bu Israelbë afenëbo mago nane, bu Grik life mago ho. Na Timoti tokwëfome nëgena kwe bolijaya bubë ato jibo tlë hana tètatile.” Këme nëgeme, Pol Timotibë ato jibo këme tlë tètatile, Israelbë afenëboni bume flelesu namëgletlame.

4 Pol, Sailas, Timotina bu Listra lifate kile mëtla na li life li life elëme mutuja. Na bu kleli kolei hi jwa gali, na fli gali, Aposelna lotu letitabo enëna eti Jerusalem lifate mèta kè sle mototlabë, Kristen onehome okokwe mëtlaguma. Na bume megali motloma, “Sobo ebë gali saesogo sle elelëkefëlo.”

5 Bu kè gali aholokwane mëtla na këme nëgeme iniwa Kristen bu Jisame kè lowene sle mëtletlabë lowene feilawa kalëlego tletëme. Na Jisame lowene sle mëgletlabë oneho bu feilawa fata mëtla.

Pol Masedonia provins mago home, nimitelëha wesibina hwi tlole

6 Tokwafe Polna, buna kè mutujabë ho, Esia provinswa Gotobë gali tëme mugujame tole mëtla. Kwe Gotobë Amtëtomba bume lëkle totome. Na bu kè belë muguja jwa namëglame. Këme nëgeme bu Frigia provins na Galesia provins ku kuwa mutuja.

7 Na bu Misia provins li elë fwa mutula. Na bu Bitinia provinswa muguja namëglame fene kwe Gotobë Amtëtomba bume ita lëkle totome kè belë muguja jwa namëglame.

8 Këme nëgeme bu Misia provins kukuwa mutuja na Troas lifatewa fata mutula.

9 Na kè klabëna, Pol, Masedonia provins mago ho lime, nimitelëha wesibina hwi tlole. Kè ho tlibe na anisasana gali tlole, “Ju nutu su elëme na Masedonia provins elë esime na seme aitaname.”

10 Pol bu nimitelëha wesibi wahwi tle. Na sebo hokweinawa wesibi sle totoma, Masedonia provinswa nuguja nanëglame. Sebo* walowene

* **16:10** Feilawa lowene ho, melowene lamëtletëna, “Pol ebë life mago Lukme notlële na buna iniwa mutuja. Na Luk bu kè gali yahi tle na ebë gali melëgebe këme lële, ‘Sebo.’”

tla, Goto seme walebotane lëtatëna, Jisasbë lale gali Masedonia provins mago onehome të nanugutatëmame.

Lidia bu Jisasmë lowene sle tletle

¹¹ Këme nëgeme sebo Troas lifate mëta sibu lowa fëfe tla. Na Samotres afayo mago lifatewa su tækaka. Sebo këme jowafewa nitebëya. Na li olëna sibu lo seme Neapolis lifatewa sei tujuwelëna, Masedonia provins mëta. Sebo kë sibu lo mago kë lifate mëta fëfe tla.

¹² Sebo Neapolis lifate kile tla. Na Filipai lifatewa life nagi tuja. Rom lifate mago enëne bu ëtani kë life bu le mëtlëkakila na këme mana tafa mëtla. Na ebë Masedonia provinsbë lale na tako lifatemu. Na sebo kë lifate mëta, habenuju afe olë tafa tla.

¹³ Na Israelbë afenëbonibë lotu olëna, sebo kë lifatebë lëglesï ino elë totoho tækaka. Na sebo lolime kë tégëbebë tu helefo elë tuja. Sebo meweniji latla, Israelbë afenëboni fli bu Gotome gëgali mëglelëkeflabëme këme loko mëlelëkefëyawa. Na sebo kë tu helefo mëta, one flime hwi tloma, bu këme loko mëtlelëya. Na sebo tuja, na buna tafa tula na gëgali tla.

¹⁴ Na mëse li këme tafa tle bubë weniji Lidia. Bu Taiataira lifate mago mëse. Na bu lale winowa ëho balitina hihijika tlekëfe na feilawa baliti këna glo tlekëfe. Bu Israelbë afenëboni magobë mëse nane kwe bu

Gotome lowene sle latletle. Bu Polbë gali aholokwane tlole. Na Tako Ho bubë lowene sle tëtätë na bu Polbë gali lowene sle tletle.

¹⁵ Na sebo buname, na bubë ilawa lo mago enënename baptais totoma. Bume wabaptais totoma na bu seme gali tlonä, "Sobo bome melowene sle egletënanä, 'Bu Jisasmë walowene sle eletlefe,' kwe sobo lalewa egisijome na bobë lo mëta bona tafa nëlame." Na bu seme itaita gali wafi tlonä. Na sebo buna nugujabëme halawa tletëya na bubë lowa nagi telëkakëya.

Bu Pol na Sailasname kalabusu lowa sike mëtla

¹⁶ Olë lina, sebo Israelbë afenëbonibë, Gotome kë gëgali mëtlelëkeflabë life elë tuja. Na sebo manawa kë wege eglekëfebë layo mëseme esune tlëya. Ahwane kë mëse mëta tëtabetë. Na kë ahwane kë mëseme, wesibi tokwafe fata mëglebë gali tëme taitakefë. Na bume kë tafa mëtëglelëyabë eso ho, lebutako baliti kë mësebë gali të wegena glo mëtlekefëya. Oneho bume baliti mëtlëkefëma na kë mëse bume tokwafe kë fata mëgle wesibi gali të tëtakefëtëme.

¹⁷ Na kwe kë mëse Polna seme nagi esogo tlagina na itaita mewe tokwei, "Kë enëne kë nëgebë, tako afutukuna Gotobë wege enëne. Goto seme kë lëgaitobë na kë nëno lëglebë lowenebëme të mëtakefëtëyo."

¹⁸ Kë mëse bu lebutako olë memelëwa latlekëfe. Na Pol

bu we toglokweŕēmēbēme kokwasamu latletē. Na bu swaya tēkaketē na kē ahwaneme gali telēkakle, “Bo jume Jisasbē wenijina gali nolē, ju kē mēseme kile etamē.” Na hokweinawa kē ahwane bume lakilewa tētāmē. Na kēme nēgēme, bu wesibi tokwafe fata mēglebē gali ita hana tē totle.

¹⁹ Bume kē tafa mētēglelēyabē eso ho, yafe hwi motlēya na melowene lamētla, “Sebo baliti hana glo nēglamefe, fēyeme tēbo nenenē?” Na bu Polname Sailasname kēme fafa mētla na kēme kē loko mēlelēkefēyabē life elēme, bubē eso enēne belē ki motokouja.

²⁰ Na bu tlemalē, onehobē gali aholokwane moglomabē ho belēme mētletluma na bume gali motloma, “Kē tlemalē ho, bu Israelbē afenēbonibē ho. Na bu ebē life mago onehobē tēbo lowene tufiji mētētatemo.

²¹ Kē tlemalē ho, bu onehome memelē lowenebēme okokwe motlomo, kē lowene esogo namēglelēmame. Sebo kwe Rom provins mago enēne. Sebobē lowene kēha nane. Weye. Na sebo bu kē gēgali mēgelobē lowene hana esogo nēglelētēmame.”

²² Na kē mēta kē loko mētletlēyabē oneho, kē tlemalē home mata tēbo gali motloma. Na kwe, onehobē gali aholokwane moglomabē ho, tlemalē hobē gelowa ēho titika mētletēma na wame home boblo mogotomabē

enēneme gali motloma, “Sobo bume atobeilana lēlafa etomo.”

²³ Kēme nēgēme, bume unalēme atobeilana lēlafa lēlafa sle memototoma. Na onehobē gali aholokwane moglomabē ho bume kalabusu lowa mētletluma. Na kalabusu lo mago home hwi loglokweŕēmēbē home anisasana gali motlola, “Ju kē tlemalē home hwi sle sa elome, mēglēboukakujolime.”

²⁴ Kalabusu lo mago home hwi toglomebē ho, kē gali aholokwane tleme. Na bu tlemalē home, kalabusu lo ku mēta kē lēgelubebē tlētābo elēme tlelēkakume. Na bubē kiju ti tēle afloko elē sike telukwaketēme, mēglēboujolime.

²⁵ Klabē kunamu, Polna Sailasna bu Gotome gēgali mētletlēkeflobē na sawa mata fēfē mētētakefēyo. Na fli enēne, kē kalabusu lo mēta kē tafa mētlabē, bu Polna Sailasname mana aholokwane motlokweŕēma.

²⁶ Na hokweinawa nano tako latlamēwa. Na bu kē kalabusu lo anisasana so tēbelēkakle bu ējeha fli etleme. Na kē kalabusu lo ino iniwa latitikawa mētēkou. Na senē taba iniwa kalabusu enēnebē mago lalokluwa mētletēme.

²⁷ Na kalabusu lo mago home hwi toglomebē ho, huju tle na kēme mehwi tle, iniwa kalabusu lo ino watitika mokoufe na melowene tle, “Kalabusu kē mēglabē ho iniwa wamelēboujafe. Bobē eso ho bome gali loglonēmefe.” Kēme nēgēme bubē kosi ki tokoke

na bubë ato, këna mogo nalë tlu nalogotleme fene.

²⁸ Kwe Pol bume anisasana këkale telokwakle, “Jubë ato asa tëbo etle, sebo iniwa mana ekë nêtabëya.”

²⁹ Na kalabusu lo mago, home hwi toglomebë ho, ho lime we telokwakle, “Esi hokweinawa ehwei.” Na bu esi tehwei tle na bume tlële. Na bu kalabusu lowa hokweinawa tēkaklu. Na bu Polna Sailasna belë fēka tokou. Bu ulina lilina sago metle na bubë li mëta, sēkefo miti tafa tle.

³⁰ Na kwe bu tlemalëme kalabusu lo mago toho tlelëkakëme. Na bume takune tlome, “O letitabo, bo habelë nēgelēmene na Goto bome tëbo lowene mago no nalëglënëme?”

³¹ Na tlemalë këme gali motlolo, “Ju, Tako Ho Jisame fwa salowene sle eletle na Goto, juna, jubë mësenā, nēbalena, na jubë lo mëta kë tafa eglelëmebë enēnenāme tëbo lowene mago nēno nalëgleme.”

³² Na këme tlemalë, kë honame bubë lo mëta kë tafa tēglelëmebë enēnenāme, Jisāsbe gali tē mētētātemo.

³³ Na këme klabë kuna mu, kalabusu lo mago home hwi toglomebë ho, tlemalëme nēno tle. Na bume atobeilana kë lēlafa mototomabë lunuju swa totometëme. Na tlemalë, kë ho na bubë lo mëta kë tafa lēglelëmebë enēnenāme baptais mototomo.

³⁴ Na kalabusu lo mago home hwi toglomebë ho, tlemalëme bubë lowa

tlelume na bume hi wesibi tlëme. Na buña bubë lo mëta kë tafa tēglelëmebë enēnenā fleflesumu memëtla, bu Gotome lowene sle mētletlame nēgeme.

³⁵ Olobalë, onehobë gali aholokwane moglomabë ho, plismanë kalabusu lowa jine mëtlëma. Na bu kalabusu lo mago home hwi toglomebë home gali motlola, “Onehobë gali aholokwane moglomabë ho megali lamla, ‘Ju kë tlemalëme kalabusu lo mago jine elëkakëme.’”

³⁶ Këme nēgeme, kalabusu lo mago home hwi toglomebë ho, bu Polme gali tole, “Onehobë gali aholokwane mëglabë ho bu megali lalëkeke, ‘Polna Sailasname kalabusu lo mago sajine elëkakëmo.’ Këme nēgeme sobo lalowa eyeu. Sobo tutune lowenena asa eyeu.”

³⁷ Kwe Pol plismanëme megali tlome, “Onehobë gali aholokwane moglomabë ho, sebobë gali aholokwane sle jwa fëyeme mëtlane? Bu sebobë li fëye wesibiha hwi hana motlotëna. Kwe bu seme hobë naba li mëta blawa lēlafa mētētana na kalabusu lowa blawa sike mëtla. Kë enēne melowene hana mëtlane, ‘Sebo Rom provins mago enēnefe?’ Na ëje bu seme hwelutuwa nēgëyeubëme fëyeme gali molonane? Matëbefe, hanane mu. Kë onehobë gali aholokwane moglomabë letitabo ho, buwa samisiya, na seme kalabusu lo mago nēno mlame.”

³⁸ Na kwe plismanë ita mutuja, na bu Polbë gali, onehobë gali aholokwane moglomabë home gali motloma. Bu megali motloma, “Polna Sailasna bu Rom provins mago ho.” Onehobë gali aholokwane moglomabë ho, kë gali aholokwane mëtla na bu tako uli memëtla.

³⁹ Këme nêgeme, bu kalabusu lowa mutuja na Polname Sailasname gali motloma, “Masiwafe, sebo têbo enëne, sebo some têbo latëto. Sebo melowene hana tletëyo, ‘Sobo Rom provins mago ho. Masiwafe.’” Na bu tlemalëme kalabusu lo mago nêno mëtla na bume gali motloma, “Sobo ebë lifate lalowa kile egotlomene?”

⁴⁰ Na kwe tlemalë kalabusu lo kile mototlo na Lidiabë lowa mëtëyeu. Na bu Kristen oneho flina loko mëtleleya. Na bume lale gali tē mëtëtatemo, bume lëgaitame nalëgleme. Na tokwafe bu Filipai lifate kile mëtelo na mëtëyeu.

17

Tesalonaika lifate enëne bu Polname Sailasname têtëkle mëgëtayame fene

¹ Pol bubë yabena, Amfipolis lifatewa mutuja. Bu kë lifate kile mëtla na Apolonia lifatewa mutuja. Na bu kë lifate mata kile mëtla na Tesalonaika lifatewa tuhu mutula. Israelbë afenëbonibë lotu lo kë lifate mëta tlibetëme.

² Pol iniwa lifate mëta fene tokou, bu kë lifate mëta mata

melatle. Bu Israelbë afenëbonibë lotu lowa tēkaklu na bu kë life mago onehona loko mëtleleya. Na Gotobë bogo mago galime, buna gëgali hihijika mëtlekefëya. Bu aona wiki bubë lotu olëna melatlelëkefëme.

³ Na bume megali sle latlome, “Jisas bu kë ho kë nêgebë, Goto bume ëtani anebomu kë aniji toglolebë ho, onehome têbo lowene mago nêno nalëgleme.” Na bume gali tlome, “Aholokwane elo, ëtani Gotobë bogo mëta, gali metëgëbetle latle, ‘Goto kë jine lëglelebë home, têbo mogotlame na bu gli lëgleme. Kwe bu matëmatë mago huju lëgleme.’ Na kwe kë gali, bu Jisame fwamu gali tletle. Sobo walowene elo, Jisas bu wagli tle na huju tle, Goto ëtani fene gali tle.”

⁴ Na Israelbë afenëboni fli, buna kë tafa mëtlabë, Pol kë tē togotlebë gali, aholokwane motlola na bu Jisame lowene sle mëtletla. Na bu Polna Sailasname yonane sle mëtlelëma na nagi mëtlëma. Na lebutako Grik life mago enëne Gotome kë lotu melekefëtlabë, na lebutako letitabo one mata Jisame lowene sle mëtletla.

⁵ Kwe Israelbë afenëboni fli, bu Polna Sailasna, ilawa kë yonane mëtlabëme, hwi motloma. Na bume moumou mëtlelëma. Këme nêgeme, bu ho loko mëglelëyabë lifeme, blawa kë asasë mëglabë têbo enëneme, loko mëtëtagujaya. Bu lebutako têbo enëneme waloko mëtëyaya na bubë

tëbo lowene tufiji mëtëtatëma, Polna Sailasname wame namoglomame. Na bu asë mëtëbelëfaiya na anisasa flikale mëtla. Na fli, Jesonbë lo ino tëë mëtëlutukwakla na mëtëkakluja. Na bu Polna Sailasname hohwi mëtëlutatëma, bume kë life mago onehobë toba elë gogwa namëglame.

⁶ Bu tlemalëme yafe hohwi mëtëtatëma kwe hwi hane motloma. Këme nêgeme bu Jesonname, Kristen oneho fliname, fafa mëtla na kë lifate mago eso ho belëme mëtletluma. Na bu anisasana meflikale mëtla, “Ebë enëna, Polna, Sailasna bu iniwa li life li life motokouja na onehobë tëbo lowene tufiji mëtëtagutëma. Na ëje ebelë mana kë fe mëkakija.

⁷ Na Jeson kë hobëme bubë lowa nëno tle na këme tafa tlelëme. Kë enëne bu sebobë tako eso ho, Sisarbë gali boblo lamëtëtakefëtla. Na bu itaita megali lamelekefëya, “Tako eso ho li lëtabe, bubë weniji Jisas. Sobo bume fwa esogo elelëlome.”

⁸ Kë life mago oneho na bubë eso enëne, kë gali aholokwane mëtla na wame mëtla na flikale mëtëkouja.

⁹ Na kwe, kë lifate mago eso ho, bu Jesonna, buna kë tafa tëglelëmebë onehome, balitime gali tlome, bubë tëbo lowene këna sle namogotlame. Na bume jine mëtëlekakëma.

Polna Sailasna bu Beria lifate elë mëtëyeu

¹⁰ Klabë wafi ki tëbe na Kristen oneho Polna Sailasname Beria lifatewa mana jine mëtëlekakëma. Bu Beriawa fwa mutulo na bu Israelbë afenëbonibë lotu lowa mëtëkaklujo.

¹¹ Israelbë afenëboni Beria lifate mago, bu Tesalonaika lifate mago Israelbë afenëboniha nane. Beria mago enëne Polna Sailasname gali aholokwane mëglabëme tole lamëtletëma. Kwe Tesalonaika mago enëne buwe, bubë gali aholokwane mëtletëma tole hana mëtletëma. Na iniwa olë, Beria mago oneho, Gotobë bogo mago gali itaita hwi motlokwefëma, melowene sle namëgletlame, “Polna kë të mëtëtatëmobë gali bu nêgali lamelo o hanane.”

¹² Na Israelbë afenëboni lebutako, Jisame lowene sle mëtletla. Na Grik life mago ho lebutako na Grik life mago letitabo one lebutako, bu mata Jisame lowene sle mëtletla.

¹³ Kwe Israelbë afenëboni Tesalonaika lifate mëta kë tafa mëtlabë, kë gali waaholokwane mëtla, Pol, Beria lifate mëta, Gotobë gali kë të lëtakefëtëme. Këme nêgeme bu Beria lifatewa mutuja na onehome tetëbo galina gali mëttaguma na këna onehobë tëbo lowene tufiji mëtëtatëma, Polme wame namoglolame.

¹⁴ Na kwe, hokweinawa, Kristen oneho, bu Polme nutu yenëbawa jine mëtëtelëkakla. Kwe Sailasna Timotina, Beria lifate mëta mana tafa mëtelo.

15 Na Polme kē sei mutujuwelēlabē ho buna Atens lifatewa tuhu mutula. Na bu Polme Atens lifate mēta kile mutula na bu Beria lifatewa ita mutuja. Na Pol, Sailasname Timotiname gali telokwakēme, bu bo belē hokweinawa samisijo.

Pol Atens lifate mēta Gotobē gali tē tētātēme

16 Pol bu Atens lifate mēta, Sailasna Timotiname mana hwi tlekēfetēmēbēē na bu Atens lifate wako wako mana asē tēbelēfa. Na bu mehwi tle, eouwe bubē lebutako fēso mana mētabetēmefe. Na bubē lowene tēbowamu tēbetle.

17 Kēme nēgēme bu Israelbē afenēbonibē lotu lowa tēkaklu. Na bu Israelbē afenēbonina na Israelbē afenēboni mētabēya jwa mēglabē enēnena, Gotome kē lotu mēglekefētlabēme, gēgali hihijika mētlekefēya. Na iniwa olēna bu ho kē mēta loko mēglelēkefēyabē life elēme tujukēfetēme. Na kē mēta kē tafa mētlabē onehome gēgali tlelēkefēme.

18 Na lowene letitabo mēgletlabē ho fli, kē mēta tafa mētla. Bume mēfē lamototoma, Epikurian enēne na Stoik enēne. Na bu Polme momata mētlelēla. Pol bume, Jisasbē galime gēgali tlokwefēme na bume matēmātē mago huju mēglabē galime mata gēgali tlelēkefēme. Kēme nēgēme kē enēne megali mētla, “Kē lowene jwa ho bu itaita blawa fēyeme gēgali lēlekēfene? Bu fēye wesibime gali lēlene?” Na fli megali

mētla, “Sebo bubē gali lowene hana nēletla, bu seme melēme gali lolona nawa, ‘Sobo fli enēnebē gotome salotu eletemo.’”

19 Na kwe bu Polme, bubē lifate mago eso enēne belē mētlelula, bubē gali aholokwane namoglolame. Kē enēne bu Areopagus fatini mēta loko mētlelēkefēya. Na kē enēne Polme gali motlola, “Ju kē tiho gali, ju onehome kē okokwe eglokwefēmēbēme, seme ita gali enona. Sebo kē wesibi lowene sle nanēgletlame.

20 Sebo jubē gali aholokwane tla, na sebo melowene nanēletēyo, ‘Ebē li gali meha gali ele. Na sebo ētani kēha gali aholokwane hana tla. Kēme nēgēme sebo metole nanēla, ju kē okokwe toglonabē gali wayobē lowene sle nanēgletlame.’”

21 Atens life mago enēnena, Atens lifate mēta kē nibowai mēglabē enēnena bu fli wesibi mēglabē lowene hana fafa mototla. Wēye. Bu tiho galime fwa aneanebo gali mētlekefēya na tiho gali aholokwane mēglabē mēfwa tako tole lamētlekefēya. Na iniwa tiho anebo gali, bu kē aholokwane mēglekefēyabē, bu itaita iniwa olē gēgali mētlekefēya.

22 Na kwe Pol bu kē eso enēnebē kume tlibe na bume megali tlome, “Sobo Atens lifate mago enēne, bo some melowene nanēletēyo, ‘Sobo lebutako fēso wesibime lotume tako tolemu laletemo.’”

23 Bo kë galime këme gali nelë. Ëbame bo sobobë lifateme asë tëbelëfë na bo sobobë li li fësobë masei, sobo këme kë lotu eglekefëtemobë, mana hwi tlagumetëyo. Na bo fësobë masei li hwi tolë. Sobo kë masei mëta meyahilatelö, 'Lowene nëgletla jwabë goto.' Na kwe kë goto sobo lowene jwa kë egletelobë na sobo manawa kë lotu egletelobë, bo some kë gotobë anebo gali të nëtatëyo.

24 Bubë anebo gali melë lëgëbetle lalële. Buwa, ebë life blëge totle na iniwa wesibi kë mëgëbebë mata blëge blëge totome. Na ebë life mago wesibi, matafa mago wesibi ebë bubëwa mëbetle na bu iniwa wesibibë eso ho. Këme nêgeme, ho gliji mëglabë lotu lo mëta hana tafa lëgleme.

25 Bu li wesibimeha hana afolo lëletle, sebo bume kë nêgaitalame. Hanane mu. Sebo hëhë kë nêglabë amtëtomba, Goto buwa lëlëna. Na iniwa wesibi mata buwa lëlëkefëna.

26 Ëtani anebo mu, bu jowa home blëge blëge totle. Na iniwa memelë ato jibona oneho, kë ho magowa fata mëtla. Na bu kë onehome iniwa life ëlëme jine tëbelëkakëme. Na iniwa afloko mëta tafa mëtkouja. Na bu bwa bwa tafa mëglabë olë mata aniji tlotëme.

27 Goto bu melë këme tle. Oneho bu belëme migisitla namëglame. Na bume lowene sle mletlame. Këme nêgeme Goto onehome këme blëge blëge totome. Na bume iniwa

wesibi tlëme, bume hohwi namëgëtatlame na bume mana hwi na loko mololame. Kwe bu seme iniwa jowa jowa home kakë hana tafa lëletëna.

28 'Sebo hëhë kë nêglabë, na asë kë nêglabë kalëlego, buwa lëlëkefëna.' Kë wesibi sobobë lowene letitabo enëne fli fene yahi mëtla, 'Sebo mata bubë nêbalemu nëtabetla.'

29 Sebo Gotobë nêbale tafa nëla. Këme nêgeme sebo Gotome melowene asa manëletla, 'Bu fëso.' Weye. Goto, bu silva anijina, gol anijina, anijimuna kë blëge blëge motomabë fësoha nane. Weye. Goto bu sebobë lowenenawa na tobana kë blëge blëge nogotomabë wesibiha nane.

30 Ëtani, oneho bu fëso fëso mëtëglana kwe kë nalë Gotome lowene hana mëtletla. Kwe Goto bume hwiwa latlome na bume li wesibiha hana totle. Kwe ebë olë Goto iniwa li life li life mago onehome anisasana megali lalëlagume, 'Sobobë iniwa tëbo lowene aholokwana ti ekoujome na bome fwa lowene ekoutëname.'

31 Bu olë li waaniji tlole, iniwa onehobë lowene hwi lolometëmeme na abiabi lëselokwame. Na Goto ho lime waaniji tlole, onehobë lowene hwi naloglometëmeme na lëselokwame. Kë ho bu wafi gli tle na Goto bume matëmatë mago wahuju totle. Na Goto bu kë huju togotlebë seme melebotane latëtätëna, bume kë lëselokwabë wege fame waaniji tlole."

³² Bu matëmatë mago huhuju mëglabë gali yafe aholokwane motlola, fliye Polme sosonatlëtlë memototla. Kwe fliye bume gali motlola, “Sebo metole nanëletëyo, ju tokwafe kë galime seme ita gali lalowa okokwe sle eglonamene.”

³³ Na kwe Pol kë letitabo enëneme hune totome na tuju.

³⁴ Kwe fli ho bu Jisame lowene sle mëtletla na bu Polna ilawa mëtebëya. Na bu mago ho li tafa tle, bubë weniji Dionisius. Kë ho bu Areopagus fatini mëta, kë loko mëglelëkefëyabë ho. Na mëse li bubë weniji Damaris, na fli oneho mata Jisame lowene sle mëtletla.

18

Pol Korin lifate mëta gali të tëtätëme

¹ Tokwafe, Pol Atens lifate kile tle na Korin lifatewa tuju.

² Na bu kë mëta, Israelbë afenëbo lime esune tlële. Bubë weniji Akwila. Bu Pontus provins mago ho. Buna no Prisilana, Itali lifate tokwafe kile mëtelo na Korin lifewa mitisijo. Rom provins magobë tako eso ho, Klodius, megali tëgleme nëgeme, “Iniwa Israelbë afenëboni, Rom lifate kile mlame na li lifatewa mujame.” Na bu Rom lifate këme kile mëtelo. Na Pol kë tlemalëme hwime tujutëme.

³ Kë tlemalë bu lo këna giglijji mëglabë selë blëge blëge mototokwefëmo, baliti këna glo namëgelome. Na Pol

bu mata kë wege melatlekefe. Këme nëgeme Pol, buna këme tafa mëtla na buna wege mëtla.

⁴ Na iniwa lotu olëna, Pol, Israelbë afenëbonibë lotu lowa tëkaklukëfe na buna gëgali hihijika mëtlekefëya. Bu metole latle, Israelbë afenëbonibë lowene na Israelbë afenëboni mëtabëya jwa mëglabë enënebë lowene Jisame lowene sle mëgletlabë huju tëtakefëtëme.

⁵ Sailasna, Timotina, Masedonia life kile mëtelo na Pol belë mëtëyeu. Bu fata mëtelo na këme Pol selë susu wege kile tle na Jisabë gali iniwa olë të tëtakefëtëme. Bu Israelbë afenëbonime anisasana megali tlokwefëme, “Goto Jisame waaniji tlole, bubë onehome tëbo lowene mago nëno lëglebëme.”

⁶ Kwe Israelbë afenëboni këha gali aholokwaneme tole hana mëtletla. Na bume wame motlola na tetëbo galina gali motlola. Këme nëgeme, Pol bubë ato ëho mago obo, bubë naba li mëta bubu tletëme. Na bume megali tlome, “Goto some tokwafe tëbo lëgetona, ebë sobobë wesibiwa, ebë bobë wesibi nane. Na eli bo some hune nëgëtome na Israelbë afenëboni mëtabëya jwa mëglabë enëneme fwa gali të nugutatemëme.”

⁷ Na kwe Pol bu kë lotu lo kile totle. Na bu Titius Jastusbë lowa tuju, këme tafa nalëgleme. Kë ho Israelbë afenëboni nane, kwe bu mata Gotome lotu lëlekefëtlebë ho. Na bubë lo Israelbë

afenëbonibë lotu lo lime tlibetle.

⁸ Kë lotu lobë eso hobë weniji Krispus. Buna, bubë lo mëta kë tafa tēglelēmēbë onehona Tako Ho Jisame lowene sle mētletla. Na Korin lifate mago oneho lebutako, bu mata jisame lowene sle mletla. Na Pol bume iniwa baptais totome.

⁹ Li klabë na, Pol nimitelēha wesibina wesibi li hwi tlole na Tako Ho Jisas, bume megali tlole, “Ju bobë gali tēme uli asa ele. Ju itaita gali eglokwefēmeme. Ju asa kaju ebemu.

¹⁰ Bo juna nētabome na jume nēgaitēme, na ho li jume hana tēbo lēgētāmēme. Bome kë lowene mēgletēnabë oneho, ebë lifate mëta feilawa tafa mēglame nēgeme.”

¹¹ Pol kë gali aholokwane tle na këme nēgeme bu Korin lifate mëta jowa tlibutu na yeme tobali ita jowa kēniji tafa tle. Na bu onehome Gotobë galime okokwe tlolkwefēme.

¹² Galio, Akaia provinsbë eso home tētabetēme. Na kë nalë, Israelbë afenëboni, blalo bu loko mētletlëya na Polme fa mototla, na eso ho Galio belë mētletlula, Pol kë tēbo logotlebēme gēgali namēglelëlame.

¹³ Na bubë naba lime megali mētla, “Kë ho, Goto Mosesme kë tēglëlebë tafa sle gali boblo mogotlabēme, onehome feilawa okokwe

lolokwefēme. Na Gotome li lowenena lotu namēgletlabēme okokwe lolokwefēme.”

¹⁴ Pol gēgali lēgleme kofene, kwe Galio efalëbona bluju metotle na Israelbë afenëbonime gali tlole, “Sobo Israelbë afenëboni, kë ho bu wesibi tako tēbo logotlebë o sebobë, Rom life mago gavmanbë gali, boblo logotlebë kwe lalowa, bo sobobë gali aholokwane noglëyome.

¹⁵ Kwe sobo bo belë tisijo, na sobo sobobë semleninobë tafa sle gali mefwa gēgali tlenëna. Bo sobobë këha gali hana sle nēgētātēyome. Ebë sobobë wesibi wa. Sobo lalo sle ejuwetlo.”

¹⁶ Na bume kë mago kë telëkakēme.

¹⁷ Na Korin lifate enëne, Israelbë afenëbonibë lotu lo hwi loglokweflebë eso ho, Sostenesme, fa mototla na Galio bë naba li mëta tēkle mototla. Kwe Galio bume hwiwa latlome na kë wesibime feilawa lowene hana tlekëfe.

Pol bu Antiok lifate elë ita tuju

¹⁸ Pol bu Korin lifate mëta tako olë tafa tle. Na tokwafe bu Kristen onehome kaiyo tlole na bume hune totome. Na bu, Prisila, Akwilana, Senkria lifatewa iniwa mutuja. Na Pol bu kë life mëta bubë eslehuba mana le tlë, bu Gotome kakëne gali gali togloleme nēgeme.* Ètani Pol Gotome wesibi lēglebë galime wagali sle tlole. Na

* **18:18** Israelbë afenëboni bu melë lamëtletkëfëya; Gotome kë kakëne mēgletlabë olë, yawe sle moloma kwe bu eslehuba mana le le melëma.

Israelbë afenëboni fene mëtla, bubë eslehuba le jwa tlë. Bu eslehuba le jwa mana tafa tle. Na kë tëglebë wesibime, Gotome kë gali sle toglolebë, yawe tlole. Na bubë eslehuba mana le tlë. Na Polna, Prsilana, Akwilana, Siria provinswa kë tugujubë sibu lo mëta fëfe mëtla na këna mutuja.

19 Na bu Efesus lifatewa fata mutula. Na Pol Akwilana, Prsilaname kë mëta hune tle. Na Pol buwa Israelbë afenëbonibë lotu lowa sigli tëkake. Na bu Israelbë afenëbonina gëgali hihijika mëtkefëya.

20 Na bume megali motlola, “Ju sebona awi tafa nëla.” Kwe Pol bume gali tlome, “Weye. Bo sobona hana tafa nëglame.”

21 Na tokwafe bume kayo tlome na gali tlome, “Goto bu tole lëgletenëna kwe bo sobelë ita nigisime.” Na bu Efesus lifate mago enëneme hune tle na sibu lo mëta fe tle. Na Efesus lifate kile tle.

22 Na sibu lo bu Sisaria lifatewa fwa tule. Na Pol bu Jerusalem lifatewa tuju. Na bu kë lifate mago, Jisame lowene sle mëtletlabë tokwëfo gëgaliwa tlelëme. Na bume hune totome na Siria provins li mago Antiok lifatewa tuju.

23 Pol bu Antiok lifate mëta tako tafaha tle na mana tuju. Na bu Galesia provinsbë na Frigia provinsbë li life li life tekou. Na bu Kristen onehome, Gotobë lale gali të tëttaguteme, bume lëgaitame nalëgleme.

Apolos bu Efesus lifate onehome gali të tëtätëme

24 Israelbë afenëboni mago li, Efesus lifatewa tisi na këme tafa tle. Bu Aleksandria lifate mago ho na bubë weniji Apolos. Kë ho bu lale lowenebëme gëgali tëglekëfëbë ho. Na bu Gotobë bogo mago gali lowene sle tëgletlebë ho.

25 Ho bume Jisasbë lale gali waokokwe motlola. Bu Jisas kë togotomebë wesibi gali, onehome okokweme tako tole latle. Na bu Jisas kë togotomebë wesibibë gali abiabi toba të slemu tëtakefëtëme. Kwe bu Jon kë baptais totomebë mefwa lowene sle latletle. Kwe, bu Jisame lowene sle mëgletlabë onehome, baptais logotomebë lowenebëme, lowene hana tle.

26 Apolos bu Israelbë afenëbonibë lotu lowa tujukefëtëme. Na bu gali anisasana të tëtakefëtëme. Na bu uli hana tletëme. Prsilana Akwilana bubë gali yafe aholokwane motlolo na bubë lowa mëtletlulo. Na bume Gotome lowene sle lëgletlebë lakalebëme, okokwe sle motlolo, bu lowene sle nalëgletlememu.

27 Apolos bu Akaia provinswa lugujubëme tole latle. Na Efesus mago, Kristen oneho bume jine mëglëlabëme fleflesu lamëtletla. Këme nëgeme bu Akaia provins mago, Kristen onehome, pasë meyahi mëtëkakëtëma, “Apolos sobelë fata lëkakina sobo no elëlome na ululu sle saetlo.”

Na Apolos bu belë tuhu tle. Goto kë life mago Kristen onehome wafi maninibo tletëme na wafi taitame na bu Jisame lowene sle këme mletla. Na Apolos kë life mago, Kristen onehome taitame.

²⁸ Apolos bume metëgaitamelatle. Bu iniwa onehobë naba li mëta, Gotobë bogo mago gali anisasana të tëtätëme. Na bu Israelbë afenëbonibë memelë yaya gali lowene këna boblo tëtätëme. Na bume Gotobë bogo mago gali metë sle latëtätëme, “Goto Jisame kë aniji toglolebë ho, Israelbë afenëboniname na iniwa onehona neno nalëglebëme.”

19

Pol Efesus lifate mëta gali të tëtätëme

¹ Apolos bu Korin lifate mëta mana tafa tle na Pol fatini lufu mëta kë metëgëbagubë lifate elë asë tëbelëfa. Na bu Efesus lifatewa mana fwa təkaki. Na kë lifate mëta, Kristen onehome esune tlëkakime.

² Na bume metakune tlome, “Sobo Jisame alako kë lowene sle tęgletelobë, Gotobë Amtëtomba sobelë latisitëyone o hanane?” Na bu metafufu metëtätla, “Weye. Sebo, ëtani meaholokwane hana tla Gotobë Amtëtomba lalëtabetle.”

³ Na Pol bume takune tlome, “Sobo yalëbë gali aholokwane telone na mana baptais fa totlo.” Na bu gali metafufu metëtätla, “Sebo Jonbë gali aholokwane

toglolame nëgeme na baptais këme fa totla.”

⁴ Na Pol gali tlome, “Ëtani, tëbo lowene aholokwana kë ti metëglabë onehome, Jon bume baptais totome. Na bume gali tlome, ‘Bobë nagi kë ligisibë home sobo mana lowene sle naegletelome.’ Këbë home Jon kë gali tęgletlebë bu Jisas.”

⁵ Kë gali yafe aholokwane mëta, na Pol bume Tako Ho Jisabë wenijina baptais totome.

⁶ Na Pol jowa jowa hobë eso mëta toba gogwa tokoutëme na Gotobë Amtëtomba mana tisitëme. Na bu lili anigawa galina gëgali motokouja. Na Goto bume kë tęgëlëmebë gali të metëtäguma.

⁷ Kë onehobë tabei we ita tële kënijija.

⁸ Na Pol bu Israelbë afenëbonibë lotu lowa təkaklu. Na bu Jisabë lala gali onehome anisasana të tëtätëme. Na Goto bubë onehome eso home tafa lëgletëmebë galibëme, onehome feilawa të tëtakefëtëme. Na bu onehome taitame, këbë galibë lowene sle namëgletlame. Na bu melë kë tęgletlebë aona yeme.

⁹ Kwe bu mago fli, kë galibë aholokwaneme tole hana mëta. Na bu fli onehobë naba lime megali mëtlekefëya, “Kristen oneho kë lowene mëgletlabë wesibi bu tëbo wesibi.” Këme nëgeme, Polna, Kristen onehona, bu Israelbë afenëbonibë lotu lowa hana metëkaklukefëya. Iniwa olë,

Pol bu Tiranusbë okokwe lo mēta, Jisasbë lale gali onehome anebo gali tlēlēkefēme.

¹⁰ Na bu kē mēta melē kē tēglebē, tēle tlibutu. Kēme nēgēme, feilawa onehomu, Esia provins mēta kē tafa mētlabē, bu Jisasbë lale gali aholokwane mētlekefēya. Fliye Israelbë afenēboni na fliye Israelbë afenēboni mētabēya jwa mēglabē enēne.

Skevabë bowenenino ahwaneme yafe hehë mētletla

¹¹ Goto, afutuku, Polme tlēle. Na Pol bu kē afutukuna, memelē klelegowa wesibi blēge blēge totome.

¹² Kēme nēgēme oneho bu lablab tētlē tabo glo mētla na Polbë ato mēta lēlesili mototoma. Na bu kē ēho, ato tēbona enēneme mutujuwelēma. Na kē tēbo atobē laslewa mētletēme. Na ahwane bubë ato mago lamētlēboukakuwa.

¹³ Israelbë afenēboni fli, bu hobë ato mago, ahwane heheēme asē metēbelēfaya. Fliye Tako Ho Jisasbë wenijina ahwane onehobë ato mago hehë namēgletēmame fene. Bu megali lamētlekefēya, “Pol bubë gali kē tē lētakefētlebē, Jisasbë wenijina gali nolēyo, sobo eyeu.”

¹⁴ Na Skevabë tobali ita tēle bowenenino bu kē galina ahwaneme gali mētlagukefēma. Skeva bu lotu lo mēta wege lēglebē eso ho.

¹⁵ Li olēna, Skevabë bowenenino, Jisasbë wenijina ahwane yafe hehë

mētēkoutēma. Na ahwane li, bubë gali metafū latētātēme, “Bo Jisasmē kwe lowene nanēletelē na Polme mata lowene nanēletelē kwe sobo fēye enēnēne?”

¹⁶ Na ahwane kē tēbo togotlebē ho, kē home okli tēkakētēme na tētēkle tēta na unalēmēmu tēbo totome ēhona kaka kaka metotometēme. Kēme nēgēme kē lo mago ēho flatabowa mētlēbouja, winona nohwa feli mētlelēla.

¹⁷ Israelbë afenēboni iniwa na Israelbë afenēboni mētabēya jwa mēglabē enēne iniwa, Efesus lifate mēta kē tafa mētlabē, wesibi Skevabë bowenenime kē fata tēgletēmēbē gali aholokwane mētla. Na bu tako uli memētla. Na iniwa bu Tako Ho Jisasmē melowene mētletla, “Bubë weniji blawa hana fē nogotlame bu tako afutukuna weniji.”

¹⁸ Na lebutako tiho Kristen oneho mitisiya. Na bubë ētanifu iniwa tēbo wesibime onehobē naba li mēta gēgali mētēkakēja.

¹⁹ Na humēi kē lowene mētlabē enēne, na memelē olo kē mētlēsēmabē oneho, bu tetēbo sakei gali bogo loko mētētagijaya. Na bu iniwa onehobē naba li mēta ahoju tako agoti mētlelēla na kē iniwa bogo ahojuwa sisike mētla, temu namēgleme. Ho ebē bogo balitina glo lēglebēme tole lēglēna kwe bubë baliti kēniji 50,000 silva baliti.

²⁰ Na kēha melē kē mētlabē, feilawa oneho bubë lowene mago lowenena melowene

sle mëtletla, “Jisashë gali, iniyafe galimufe.” Na feilawa oneho bu Jisasmë këme lowene sle mëtlegefëta.

Efesus enëne, Polme tako wamemu memotlola

²¹ Kë iniwa wesibi mefata wamëtla, na Gotobë Amtëtomba Polme lowene huju tëtatile na Pol bu melowene fa totle, “Bo Jerusalem lifatewa nuguwina, Masedonia provins na Akaia provins kukuwa nuguwime. Bo kë belë afina nuwime na mana Rom lifate elë mata nuwime.”

²² Na Pol, bume kë mëtaitakeflobë home afina jine tlëme Masedonia provinswa. Bubë weniji Timoti na Erastus. Na bu afina motouto. Kwe Pol, buwe, Esia provins mëta mana tafa tëtëkake.

²³ Na kë nalë, Efesus lifate mëta, fli oneho bu Kristen onehome, wame lamotloma. Na bu anisasana wame gali huju mëtletëla.

²⁴ Na ho li kë wame lowene tufiji totle. Bubë weniji Demitrius. Bu wesibi, silva anijina blëge blëge totokwefëme. Buna bubë wege hona, bu mëse goto lotu lobë amtëtomba wesibi, silva anijina, blëge blëge mototokwefëma. Na bu feilawa balitimu këna glo mëtlegefëya. Kë mëse gotobë weniji Artemis.

²⁵ Na kwe, Demitrius, bubë wege honame, na tokwëtokwë fëso amtëtomba wesibi, silva anijina kë blëge blëge mototokwefëmabë

honame, iniwa loko tëtamë. Na bu megali tlome, “O yabenino. Sebo melowene nëglame, ebë wege kë nëgebëye, sebo tako baliti këna fa nëtakefëya na sebo lale tafa këme fa notla.

²⁶ Sobo Polme wafi lowene eletelo, na sebo bubë gali wafi aholokwane tletla. Bu Efesus lifate mago onehome fwa nane gali lolome. Weye. Bu Esia provins mago onehome mata gali latlagume. Bu onehome anisasana megali tlagukefëme, ‘Kë fëso amtëtomba, tobana kë blëge blëge mogotomabë, bu gotomu nane na bu some hana lëgaitome.’ Oneho kë gali aholokwane mëtla kë fëso amtëtomba tole hana mëletëma.

²⁷ Polbë gali kë nëgebë, bo tutune nanëletelëfe. Sebo amtëtomba kë blëge blëge nogotomabë wege, tëbo lëgetatëname. Na oneho sebobë wege sisile mëtatëname. Na li wesibime mata, bo melowene nanelë, ‘Oneho bu Polbë gali esogo mëglelëlana kwe bu sebobë tako goto, Atemisbë lotu lowa ita hana migisiyame, bume lotu namëgletëyame. Na oneho bu Artemisme aholokwana ti mëglame na bume ita hana lotu mëgletëyame.’ Sobo walowene elo, Esia provins mago oneho tëkeji na iniwa life mago oneho mata bume lotu mëlekefetëya.”

²⁸ Oneho Demitriusbë gali aholokwane mëtla na tako

enisusu memëtla na anisasana këkale mëtla, “Sebobë, Efesus lifate mago goto, Atemis, bu takomu.”

²⁹ Na kë gali Efesus life oneho belë fifiji tle na iniwa anisasana këkale mëtla. Na oneho mutuja na Masedonia provins mago tlemalë home, Polna kë asë mëtlabë home, fafa mutula. Na tlemalëme, oneho këme loko mëtlelekefëyabë lifekuwa, hokweinawa ki motokouja. Kë tlemalë hobë weniji melë, Gaius na Aristarkus.

³⁰ Na Pol, loko kë mëtleleýabë onehome gali nalugujelëmeme fene kwe Kristen oneho bume lëkle memototla.

³¹ Na Esia provins mago gavmanbë wege ho fli, bu Polbë yabenino nëgeme, na bume këme lëkle gali, gali mëtelëkakla, “Yabe, ju oneho këme loko mëlelekefëyabë lifeku elë asa eiju. Matëbe.”

³² Na loko kë mëtleleýabë onehobë lowene yaya mëtletëme na bu anisasana këkale mëtëbelëfaya. Fli hobëye, li lowene mëta këkale mëtëbelëfaya na fliye li lowene mëta këkale mëtëbelëfaya. Na feilawa oneho, bu loko kë mëtleleýabë wayo gali lowene hana mëtletla.

³³ Israelbë afenëbo li bubë ku mëta tëtabetëme, bubë weniji Aleksander. Na Israelbë afenëboni fli, bume kë onehobë naba li mëta so mëtelëkakla. Fli oneho bume hwi motlola na meweniji mëtla, “Ebë ho kë nëgebë ebë kë wame nëglabë eso ho

ekëwa.” Kwe Aleksander toba momale totle, oneho bu kaju namëgebëyame. Bume megali naloglomeme fene, ebë wame kë nëgebë, Israelbë afenëbonibë wesibi nane.

³⁴ Kwe oneho bume hwi sle motlola na melowene mëtletla, “Israelbë afenëbonife.” Këme nëgeme, iniwa oneho bu anisasana këkale mëtlekefëya, “Sebobë, Efesus life mago goto, Atemis, bu takomu!” Na bu kë galina, tako olë, anisasana gëgali mëtlekefëya.

³⁵ Na kë life magobë gavmanbë yahi wege fa lëgëtatlebë ho onehome këkale tlome na bume megali tlome, “Sobo, Efesus life mago oneho, aholokwane elo. Iniwa life mago oneho, seme walowene mëletëna. Mëse fësobë, Artemisbë lotu lo, sebobë lifate mëta lilibe, na sebo kë lotu lo ekë tafa nëlelëla. Na Artemisbë fëso amtëtomba, matafa mago kë tëtetibakebë, semëta ebamë na sebo tafa nëlelëya.

³⁶ Iniwa oneho kë galime melowene lamëtla, ‘Ebë nëgali galimu.’ Këme nëgeme, sobo kaju ebo, blawa asa enisusu eletemo.

³⁷ Sobo aholokwane elo. Kë tlemalë home sobo sebelë kë téglesumobë, bu sebobë lotu lo mago wesibi tokli hana mëtelo. Na bu sebobë mëse gotome tëbo galiha, hana mëtlëyo.

³⁸ Demitriusna bubë wege enëna bu ho flime wame moglomana, kwe bu onehobë gali aholokwane loglomebë ho belë

samëlesuma. Onehobë gali aholokwane moglomabë ho buwa sasle mëtatëyome.

³⁹ Na sobo fli galina nëgena, kwe sobo kë gali, ebë life mago oneho kë gëgali mëglekefëyabë olëna sasle egotomome.

⁴⁰ Ebëha gëgali tëbo, teiyo elekëlo. Sobo hwi elo. Rom life mago gavmanbë eso enëne, bu ëje sebo kë nëglabë wesibi aholokwane mëglana, kwe bu seme onehobë gali aholokwane loglomebë ho belë mëglenunane na megali molonane, ‘Kë enëne, bu tëbo lowene huju motokweflabë enëne.’ Sebo ëje kë loko nëglelëyabëye na anisasana kë gëgali nëgëbelëfayabëye, kwe hobota fata nogotlabë mefwa gëgali nëla. Na gavmanbë eso enëne bu seme ëje kë nëglabë wesibime takune moglonana, kwe sebo habë tafu nëgëtatëmamene? Hanane.”

⁴¹ Gavmanbë yahi wege fa lëgëtatlebë ho wagali tlome, na bu onehome jine tëbelëkakëme.

20

Pol bu Masedonia provins mëta na Grik provins mëta asë tëbelëfa

¹ Kë anisasana gëgali kuju mëtebëya, na Pol bu Kristen onehome mana gali telokwakeme, bu belë loko namokweitlame. Na bu loko motokweitla na bume mana

lale gali të tëtatëme na bume ululu sle mëglabë gali mana të tëtatëme. Na bume kayo gali tlome na Masedonia provinswa mana tuju.

² Bu kë provins mëta asë tëbelëfa na Kristen onehome megali tlagume, “Sobo Jisame kë lowene egletelobë lowene asa elëkëlo, mana lowene sle saelekefëtelo.” Na bu Grik provinswa fwa tule.

³ Bu Grik provins mëta aona yeme tafa tle. Na bu sibu lo mëta fe nalëgleme fene, Siria provinswa luguju nalëgleme fene. Kwe bu megali aholokwane tëgleme nëgеме, Israelbë afenëboni bume kë sibu lo mëta, mogo nalë tëke moglolame. Na bu lowene këme hihijika tle. Na bu Masedonia provins elë kë tugujubë alëge elë këme tuju.

⁴ Fli ho bu Polna mutuja. Kë enënebë weniji melë, Pirusbë bowene Sopater, bu Beria lifate mago ho. Na Aristarkus na Sekundus, bu Tesalonaika lifate mago ho. Na Gaius, bu Derbe lifate mago ho. Na Timoti na Esia provins mago ho Tikikus na Trofimus.

⁵ Kë enëne motoutaya na bu seme* Troas life mëta hwi mëtletëna.

⁶ Sebo Filipai life mëta mana tafa tēgelobë na Israelbë afenëbonibë tako lotu olë mana yawe tletëme. Bu kë lotu olëna, sëse wesibi jwa bletë nage hi mëtlekefëya. Na sebo mana sibu lowa fëfe

* **20:5** Feilawa lowene ho, melowene lamëtla, “Pol Filipai lifewa fwa tle, na Lukme notlële na buna mutuja. Na Luk bu kë gali yahi tle na ebë gali melëgebe këme lële, “Seme.””

telo na Filipai life kile totlo. Sebo sibu lo mēta nilina olē telo na tobali olēbēna Troas lifate mēta kē hwi mētletēnabē ho belē fwa telo. Na sebo iniwa Troas lifate mēta tobali ita tēle olē kēniji tafa tla.

Pol bu Troas lifate mēta Yutikusme gli mago huju totle

⁷ Sande klabēna, sebona, fli Kristen onehona, Jisame lowene nēgletlabē hi wesibi hime loko tlelēya. Na Pol bu Gotobē gali mana tē tētātēme. Na bu Gotobē gali metē tētātēmebēē, klabē ku tētehulu metlelēle. Bu kē olēna luguju mago nēgeme.

⁸ Kē matawa ke lo mēta feilawa lamo u mētēkou. Na kē lo bu akolalo.

⁹ Na falake ho li, bubē weniji Yutikus, kē lo flelu ino mēta tafa tole. Na Polbē gali mana aholokwane tlagule. Pol bu gali metē togotlebēē, na Yutikus bu nilafale tle na kēme ni tobe. Na kē mago lifewa latetetigowa. Na bu kle mētla na fa mototowetla na yafe hwi motlola kwe bu wagli tle.

¹⁰ Pol mata kle tle. Na kē falake hobē ato mēta matawa towetigotle na hwē tlēle. Na onehome lēkle totome, “Sobo tutune asa eletelo, bu mana hwi lēta.”

¹¹ Na bu ita lowa fēfe motokwaka. Na Jisame lowene mēgletlabē hi wesibi hi mētla. Na Pol ita gēgali tēglelēmebēē, olē fetina loko na mana hune totome.

¹² Na kē falake ho bu lalowa tafa tle. Na bume mētletlula. Na bubē lowenebē lalowa tēbetēme.

Pol Troas lifate kile totle na Miletus lifate elēme tuju

¹³ Na kwe sebo Polme kile totla na sebo sibu lowa fēfe tla na sebo afina Asos life elē toutaya. Na sebo Polme Asos life mēta hwi tletla. Pol bu life nagi tigisime nēgeme na bu seme Asos life elēme afina kēme jine tlēna.

¹⁴ Na Pol bu seme Asos life mēta esune tlēkakina. Na sebo sibu lowa tlelula. Na sibu lona Mitilini lifatewa iniwa tuja.

¹⁵ Na li olē Mitilini lifate kile totla na Kios afayoliwa fwa tula. Na kē mēta jowa olē tla na sebo Kios afayo kile totla na Samos lifate elē fwa tēkakija. Na kē mēta jowa olē tla na sibu lona Samos lifate kile totla na Efesus life sigliwa totla na Miletus lifate elē fwa tēkakija.

¹⁶ Pol ēbame melowene latle, “Esia provins mēta feilawa olē hana tafa lēgleme.” Kēme nēgeme bu Efesus life sigliwa kēme mototla. Bu metole latle, Israelbē afenēbonibē tako lotu olē, Pentikos olē, Jerusalem lifate mēta, hwi naloglōleme. Na bu hokwehokweinawa kēme tokou.

Pol, Kristen onehobē letitabo home, Efesus lifate mēta kē tafa mēglabē, kayo tlome

¹⁷ Sebo Miletus lifewa fwa tla na Pol, Kristen onehobē letitabo home, Efesus life mēta kē tafa mēglabē, gali tuku tēkaketēme, bu belē migisitla namēglame.

¹⁸ Na bu belē mitisitla na iniwa loko mētletlēya. Na Pol megali tlome:

“Bo ëtani Esia provins elë tisi na bo sobona tafa tula. Na bo sobona kë tafa tugulabë, bo wesibi bo melë kë totomëbë, sobo wafi lowene tletëna.

¹⁹ Sobo walowene tletëna. Bo ebë wege mëta kë tafa tugulëbë tako hobota mëta tafa tulë. Israelbë afenëboni bome tëbo mëtëtakefename nëgeme. Na bo anisasana ye tlekefë. Kwe bo bome nane lowene telë, bo Jisasbë wegewa fa tëtakefëtelë.

²⁰ Iniwa gali të tęgëtatëyobëme bo some kikli hana tletëyo na li gali ha ëho hana tëtatëyo. Iniwa gali bo some lëgaitobëme të totometëyo. Oneho këme loko mëlelekefëyabë lifeku mëta, na sobobë lo mëta, bo some okokwe tlokweyëyo. Këbëme sobo walowene eletelo.

²¹ Bo Israelbë afenëbonibëme na Israelbë afenëboni mëtabëya jwa mëglabë enëneme mata gali anisasana të tëtakefëtemë. Bo bume megali tломë, ‘Sobobë tëbo lowenebë aholokwana ti elome na lale lowenewa esogo elelelome, na sobobë Tako Home, Jisame lowene sle eletelome.’

²² Na eli, bo Gotobë Amtëtombabë tolewa esogo nëgletelëme na bo Jerusalem lifatewa këme nuguwime. Iniwa tëbo wesibi, bome kë mëta fata mëgletenëbëme, bo lowene hana nelë.

²³ Bo kwe ebëwa lowene nëletelëmu. Iniwa tako lifate, bo kë asë nëgëbelëfëbë, Gotobë Amtëtomba bome megali latlonë, tako hobota

na kalabusu lo mëta gwa mëgëtoobë mana hwi lëkeketë.

²⁴ Bo bobë ato uli hana nëlelë. Lalowa, bome melë matëtana. Bo metole nanelë, Tako Ho Jisas bome kë tęglenëbë wege, bo yawe sle noglolëme. Kë wege melë lëgëbelalële; bo iniwa onehome metë sle nanëgëtatëmëme. Goto iniwa onehome maninibo tletëme. Na bu metole latle, iniwa oneho Jisame lowene sle namëgletlame.

²⁵ Ètani bo sobona kë tafa tęglabë, Goto bubë onehome, eso home, kë tafa lëgletëmebë gali, të tëtatëyo. Èje kwe bo walowene nelë, ita kwe sobo bome hana hwi egloname.

²⁶⁻²⁷ Këme nëgeme bo some ekë gali sle nolëyo. Iniwa olë bo sobona kë tafa tlekefëyabë, bo some Gotobë iniwa gali watë tëtatëyo. Bo bubë gali tëme tëbojiwa hana telë. Këme nëgeme bo some gali nolëyo. So mago ho li tëbo liglitana, ebë bubë wesibiwa. Bobë wesibi nane.

²⁸ Sobo some ululu sle saelo. Na Jisame kë lowene mëgletlabë onehome tafa sle elelëmome. Gotobë Amtëtomba some kë wegeme wafi aniji tlëyo. Gotobë nëba Jisas, bu gli tletëme na bubë wino wafi tuju tle. Na bu këna kë onehome wataitame, bubë oneho tafa namëgletlame.

²⁹ Sobo bume tafa sle eglelëmome. Bo melowene nanelë, ‘Tokwafe bo some hune nëgelëna, sosogëna ho sobelë migisiyame. Na bu

Jisame kë lowene mëgletlabë onehobë lowene tëbo mëgëtatëmame.

³⁰ Na tokwafe somago, fli oneho kë nëgebë, bu Gotome kë lowene mëgletlabë onehome sosogëna mëglagumame. Bubë tëbo lowenewa esogo namëglelëtëmame na bume mata esogo mëglelëmame.

³¹ Këme nëgëme, sobo ululu sle këme eglekefome. Bo melë kë tëgelëbë wesibime, aholokwana asa ti elo. Aona tlibutu, bo sobona kë tafa tëglabë, klijina, klabëna, some lale galime okokwe tlokwefëyo, some lëgaito nalëgleme. Bo some kë okokwe tëglëyobë, naba tuna okokwe tlëyo.

³² Eli bo some Gotobë toba elë, ekë gogwa nelë, some ululu sle nalëgëtagujome. Na bo metole nanelë, Goto some kë maninibo lëgletëyobë gali lowene naeglekefëtelome. Kë maninibo gali some lëgaitome, Gotome lowene sle naegletelobëme. Na tokwafe sobo lale tafa fa egotlome, Goto bubë iniwa onehome kë aniji toglotëmebë tafa.

³³ Bo ëtani sobobë wesibi hana mëmaune tlëmë. Bo ho libë balitiha o ëhoha hana mëmaune tlëmetelë.

³⁴ Sobo bome wafi hwi tlonä. Bo lo këna gigliji nëglabë selë susu totokwefëmë na baliti këna fa tètakefë. Bo bobë tafa këna taitakeflë na bobë yabe, bona kë tafa tëglabë home, mata taitakefëmë.

³⁵ Iniwa wege bo melë kë togotlëbë, some melëme olafa

tëtätëyo. Iniwa wege sebo kë lowene nëgletlabë, anisasana wege nëglame, ato tëbonabë enëneme na wesibi jwa enëneme mata nanëgaitamame. Sebo, Tako Ho Jisabë gali, salowene sle nëlekefëta. Bu megali latle, 'Li ho, li home, wesibi lëglëlena kwe bu tako fleflesu malële. Kwe li ho, wesibi li ho mago kë fa logotlebë kwe bu tokwëfo fleflesuwa lëgleme.'

³⁶ Pol kë gali wayawe tole na bu Kristen onehobë lotu letitabo enënena, sëkefo miti tafa mëtëkouja na Gotome mana gëgali mëtletlëla.

³⁷⁻³⁸ Na bu këme tako maninibo memëtletla. Pol megali toglomeme nëgëme, "Bome ita hana hwi egloname." Na bu Polme howwë metlëla na ye mëtletlëla na sësle sësle mototla. Na bume sibu lowa sei mutujelëla.

21

Pol bu sibu lona, Jerusalem lifatewa tuju

¹ Sebo, Kristen onehobë lotu letitabo enëneme hune tla. Na sibu lo mëta fëfe tla na Kos afayowa tuja. Na li olëna Kos afayo mago Rodes afayowa tuja. Na Rodes afayo mago Patara lifatewa fwa tula.

² Na sebo sibu lo mago fëfe təkaka Patara lifate mëta. Na sebo Fonisia provinswa kë tugujubë sibu lo hwi tujuwelëla. Na sebo kë sibu lo mëta fëfe tula na këna tuja.

³ Na kwe sebo Saiprus afayo, yemane toba elë hwi

telokwakla na sebo sigli tokouja. Na sebo Siria provinswa fwa tula. Na kë sibu lo Tair lifatewa tuju, wesibi hune naluguleme.

4 Na sebo Tair lifate mëta sibu lo mago fëfe təkaka. Na Kristen onehome hwime tuja. Na sebo buna tafa tēglabē, tobali ita tēle olē tla. Kë nalē, Gotobē Amtētomba, kë enēneme lowene tlēme. Na bu kë lowenebēme Polme gēgali mētēlēla, “Ju Jerusalem lifatewa asa eiju, bu jume tēbo mēgētome.”

5 Sibu lo Tair lifate kile nalēgleme kofene na Kristen oneho bubē onena, nēbalena seme nutu helefo mëta sei mētēna. Na sebo kë mëta sēkefo miti tafa tla na Gotome mana gēgali tlelēla.

6 Na bu seme kayo motlona na sebo bume mata kayo tloma. Na sibu lowa mana fëfe tla na bu bubē lowa ita mutuja.

Gotobē lowene mago gali tē totokweflebē ho, Agabus, Sisaria lifate mëta Polme gali tole

7 Na kwe sebo sibu lona, Tair lifate kile tla, na sebo Tolemes lifatewa fwa tula. Na sebo kë life mago, Kristen onehome, sēsle totoma. Na sebo buna jowa olēwa tafa tla.

8 Na li olēna sibu lo mëta fëfe tla na Tolemes lifate mago tuja. Na sebo Sisaria lifewa fwa tula na sibu lo mago fëfe tokwaka na Filipbē lowa tuja. Ebē ho kë nēgebē, bu Jisasbē lale gali tē tētakefētēmebē ho. Na buna fli tobali ita jowa hona ēbame

Jerusalem lifate mëta meaniji lamotloma, Aposel enēneme mēgaitakefēma namēglame.

9 Kë ho bu ononeglē nēbale kēniji nilina. Na bu home yo hana tlome. Na kë nilina ononeglē Gotobē lowene mago gali tē mototokwefla.

10 Sebo Sisaria lifate mëta habenuju olēwa tafa tla. Na ho li Judia provins kile tle na Sisaria lifatewa tisi. Bubē weniji Agabus. Bu Gotobē lowene mago gali tē totokweflebē ho.

11 Bu sebelē tisi. Na Polbē alitaba fa tētamē na bubē tobana kijuna lalei totome. Na bu megali tle, “Gotobē Amtētomba bome lowene watlënë. Kë lowene galibē melēgebe lalēle, ‘Israelbē afenēboni, Jerusalem lifate mëta kë tafa mēglabē, ebē alitababē bolijayabē toba na kijuna melalēi mogotometlame, bobē tobana kijuna fene lalei notomē. Na bume Israelbē afenēboni mētābēya jwa mēglabē enēneme yo molomame, bume tēbo namogotlame.”

12 Na kwe sebo Agabusbē gali aholokwane tlola. Na sebona, kë life mago enēnena, Polme anisasana lēkle totla na gali tlola, “Ju Jerusalem lifatewa asa eiju. Matēbe.”

13 Kwe Pol sebobē gali metafū latētātēna, “Sobo bome asa maninibo eletēna na bobē lowene kēna asa sisile etātēna. Sobo aholokwane elo. Bo Tako Ho Jisasbē wege fa nogotlēna, na bu bome, Jerusalem lifate

mëta, kalabusu mëgëtanana, na bu bome mogo nalë tëkle mëgëtanana, kwe lalowa bome melë matëtana. Bo kë wesibi uli hana nëletemë.”

¹⁴ Sebo Polme yafe gali tlola kwe sebobë gali aholokwane hana tlotëna. Kë wesibime nëgeme sebo bume feilawa gëgali hana tlelëla na bume megali tlola, “Wesibi, Tako Ho bu melë logotomebëme kwe bu melë malotome.”

Pol bu Jerusalem lifatewa fwa tule

¹⁵ Na tokwafe li olëna, sebo wesibi sle totoma, Jerusalem lifatewa nuguja nanëglame. Na sebo Jerusalem lifatewa tuja.

¹⁶ Na Kristen oneho fli, Sisaria life mago, sebona tuja. Sebona tuja na sebo Jerusalem lifatewa tuhu tula, na bu seme, Saiprus afayo mago hobë lowa sei mutujenëna. Na sebo kë lo mëta tëtebëya. Lo bolijayabë weniji Nason na bu ëtani anebomu Jisame lowene sle tletle.

¹⁷ Na Jerusalem lifate mago Kristen oneho bu seme yafe hwi motlona kwe bu tako fleflesu memëtletëna.

¹⁸ Li olë na sebo Polna, Jemsme hwime tuja. Na Kristen onehobë letitabo ho, sebona loko tlelëya.

¹⁹ Na Pol bume hohwë tokou na sësle tëtagume. Na iniwa wesibi Israelbë afenëboni mëtabëya jwa mëglabë enënebë li mëta kë totomebë Pol kë gali të tëtätëme.

Kristen onehobë lotu letitabo enëne, Polme megali motlola, “Ju Gotobë tako lotu lowa ejumo”

²⁰ Kristen onehobë lotu letitabo enëne, Polbë gali aholokwane motlola na bu Gotome tako fleflesu memëtletla. Na bu Polme megali motlola, “O afa, ju walowene sle ele, Israelbë afenëboni feilawamu, bu Jisame walowene sle mletla. Na kë enëne bu, Goto Mosesme kë tëglëlebë tafa sle gali esogo mëglëläbëme lowene anisasana mana mehola aholokwana ti hana mla.

²¹ Kwe kë oneho bu sogëna gali meaholokwane lamëtla, ‘Pol, bu Israelbë afenëbonime, Israelbë afenëboni mëtabëya jwa mëglabë enënebë provins mëta kë tafa mokoujabë, megali latlagukefëme, “Sobo Goto Mosesme kë tëglëlebë tafa sle gali asa esogo elelëtelo.” Na bu mata megali latle, “Sobo sobobë iko nëbalebë ato jibo asa tëtlë etometemo. Na sobo Israelbë afenëbonibë lowene asa esogo elelëmetëmo.”

²² Sebo walowene nëla. Ju ebelë kë tigrisibë gali bu aholokwane mëglana bu jume wame mëglëyome. Sebo kë wesibi habelë nogotlamene?

²³ Ju, sebobë gali esogo eglëlëtënanana, kwe lalowa. Semago ho nilimalë, Gotome Gotobë wenijina wakakëne mëtla wesibi melë mogotomabëme.

²⁴ Ju kë nilimalë home nëno elëme, na Gotobë tako

lotu lowa elelëkakumeme. Na sobo iniwa, Gotobë naba li mëta lale tafa egløbë lowenebë, esogo elelëlome, Goto Mosesme kë tëglëlebë tafa sle gali fene lëbe. Na sipsip kleli, ju li ho mago, balitina glo eletëmeme. Na lotu lo mëta wege mëglabë home elëmeme, bu Gotome ahojume namëgletlame. Sipsip kleli ahojumbë yawe mololame na kë nilimalë ho bu bubë eslehuba mana le melëmame.* Ju melë eglena, feilawa oneho melowene namëgletëyome, 'Kë gali jume kë gali mëtletëyobë gali, ebë sogëna gali.' Na bu jume melowene namëgletëyome, 'Goto Mosesme kë tëglëlebë tafa sle gali esogo eglëlebë ho.'

²⁵ Na Israelbë afenëboni mëtabëya jwa mëglabë enëneme, Jisame tokwafe kë lowene mëtletlabë, sebo pasëna megali tloma, 'Sobo kë lowene esogo eglëlëlona kwe lalowa. Sobo fësoma kë gogwa mëglabë hi wesibi asa hi elo. Na bu ko iniwa lugujutle slejwabë kleli asa hi elo. Na kolei mata asa hi elo. Na sobo lisei lowene asa elo.'

²⁶ Li olëna, Pol kë nilimalë home nëno tle. Na buna iniwa, Gotobë naba lime lalowa tafa mëglabë lowene esogo mëglëlame, Goto Mosesme kë tëglëlebë tafa sle gali fene lëbe. Na tokwafe bu Gotobë tako lotu lowa mëtëkakluja. Na Pol bu Gotobë tako lotu lo mëta

wege mëglabë home megali tlome, "Tobali ita tële olë mugujuna, na sebo iniwa Gotobë naba li mëta lalowa tafa nëglame. Na sebo sipsip kleli bwa bwa mana nehweijame, Gotome ahojume namëgletlame."

Israelbë afenëboni, Polme Gotobë tako lotu lo mëta fa mototla

²⁷ Kë tobali ita tële olë yawe lëgleme kofene na Israelbë afenëboni, Esia provins mago, Polme hwi motlola, Gotobë tako lotu lo mëta tafa tle. Na bu onehobë wame lowene tufiji mëtëtatëma, na Polme mana fa mototla.

²⁸ Na bu anisasana këkale mëtla, "O Israelbë afenëboni, sobo seme aitaname esijo. Ebë ho kë nëgebë, bu li life li life mago onehobë naba lime, seme, Israelbë afenëbonime sisile latëtakefëna. Na bu iniwa onehome meokokwe latlagume, 'Sobo Goto Mosesme kë tëglëlebë tafa sle gali asa esogo elelëtelo.' Na bu Gotobë tako lotu lo mata sisile tëtatëna. Bu kë wesibiwa nane tle. Weye. Bu Israelbë afenëboni mëtabëya jwa mëglabë enëneme, Gotobë tako lotu lowa tlelëkakume. Na këna, ebë lale lotu lo sisile totle na kë lo, Gotobë naba li mëta tëbowa tlibetle."

²⁹ Ètani, Polna, Efesus life mago ho, Trofimusna, Jerusalem lifate mëta asë mëtelo. Na kë enëne mana hwi motloma. Na këme

* **21:24** Israelbë afenëboni bu melë lamëtlekefëya, Gotome kakëne gali kë moglobabë olë yawe sle moloma na bu eslehuba mana le melëma.

nëgeme bu Polme meweniji lamëtletla, “Bu kë Israelbë afenëboni lëtabejwa lëglebë home, Gotobë lotu lowa wafi tlelëkakulewa.”

³⁰ Na feilawa oneho, Jerusalem lifate mago, kë gali aholokwane motokouja na bu hokweinawa loko motokweija. Na Polme fa mototla na Gotobë tako lotu lo mëglëbo elë ki motokouja. Na bu hokweinawa ino titiji mëtla.

Rom life mago wame home boblo mogotomabë enëne, Polme fa mototla

³¹ Bu Polme tëkle mototokweflabë, na Rom life mago wame home boblo mogotomabë enënebë eso ho li, meaholokwane tle, “Jerusalem lifate mago ho blalo momogli mëtagujaya.”

³² Na hokweinawa, bu wame home boblo mogotomabë enëneme, bubë eso enënename nëno tle na wame këme mëtlabë oneho belë tlelume. Polme kë tëkle mototlabë oneho, kë eso hona, wame home boblo mogotomabë enënename yafe hwi motloma, na Polme tëkle hana mototla.

³³ Na wame home boblo mogotomabë enënebë eso ho loliwa tisi na Polme fa totle. Na bu wame home boblo mogotomabë enëneme gali tloime, “Sobo kë home tële senë tabana lei etlome.” Na bu Israelbë afenëbonime takune tloime, “Ebë ho yalëne? Na bu fëye tëbo wesibi fa totlene?”

³⁴ Na feilawa oneho li li galina feilawa gëgali mëtla. Na bu feilawa se mototla na

wame home boblo mogotomabë enënebë eso ho bu gali aholokwane sle hana tloime. Këme nëgeme bu wame home boblo mogotomabë enëneme gali tloime, “Sobo Polme sebobë lowa elelulome.”

³⁵ Bu Polme mëtlelula na bubë lo mago mitigo mëta kofene mëtlebila. Na wame home boblo mogotomabë enëne, onehome mehwi lamotloma, Polme mogo nalë tëkle moglotlamefe. Këme nëgeme, Polme tëkle mogotlalime, kë mago lafeijiwa mëtlëla.

³⁶ Feilawa onehomu bume nagi esogo mëtlaguma na anisasana megalì mëtlaguma, “Mogo nalë tëke elolo, mogo nalë tëke elolo.”

Pol, Jisame kë lowene lëgletlebë lowenebëme, Israelbë afenëbonime, gali sle tloime

³⁷ Wame home boblo mogotomabë enëne, Polme bubë lowa mëglelëkakulame kofene kwe Pol bu wame home boblo mogotomabë enënebë eso home, Grik galina gali tlole, “Bo jume gali lime lalowa gali noglëmene?” Na bu klelego metletle na Polme gali tlole, “Ju Grikbë gali habëna lowene elene?”

³⁸ Bo jume mewenijiwa nanelë, “Ju Isip life mago howa. Ètani onehobë wame lowene kë tufiji tètatebë ho, gavman enëneme wame namoglomame. Na bu, 4,000 ho, kosina wame kë lowene sle mëtëglabë home, ho jwa tabo elë tlelume.”

39 Na Pol bubë gali tafu têtatle, “Bo kë ho nane. Bo Israelbë afenëbo. Bo Tarsus lifate mago ho, Silisia provins mago. Bu lale na tako lifatemu lëbetenë. Bo jume tokwëfo takune noglëme fene. Bo ebë onehome lalowa gali noglomëmene?”

40 Wame home boblo mogotomabë enënebë eso ho bume gali tlole, “Lalowa.” Na Pol bu mitigo mëta tlibe na toba momale têtatëme, oneho gëgali kaju namëgebëyame. Bu iniwa kaju mëtebëya na Pol, bume, Hibru galina mana gëgali tle.

22

1 Na Pol bume megali tlome, “O ayani na afanino, sobo aholokwane elo. Bo some ekë gëgali sle nëlelëyo. Bo li wesibiha fa hana totlë.”

2 Oneho aholokwane motlolabë, Pol Hibru galina gëgali tle na bu kujunamu këme mitlibaguja.

Na Pol bume megali tlome.

3 “Bo kë nëgebëye, Israelbë afenëbo. Beë bome Tarsus lifate mëta fu têtanë, Silisia provins mago lifate tokwëfo. Kwe bo ebë lifate mëta sigli telë. Na bo Gamaliel okokwe loglonëbëme towë. Na bu bome sebobë semleninome, kë gwa têtatëmebë tafa sle galibëme okokwe slemu tlonë. Na bo Gotobë tafa sle gali anisasana esogo slemu tletëtelëmu, sobo tei elo.

4 Èbame bo Jisame kë lowene mëgletlabë onehome tëbo latotokwefëmë. Bo bume mog nalë tètëkle

nëtagwibëme tako tole latelë. Na kë onehome senë tabana lalei totokwefëmë na kalabusu lowa tlelukwefëmë.

5 Gotobë tako lotu lo mëta wege lëglebë tako eso ho na Israelbë afenëbonibë lotu eso enëne, bome lowene lamëletëna, bo ebë fene melë kë tëgelëbëme. Na bu kë wesibibëme some gali mëglëyome. Na kë enëne bu pasë yahi mëtla na bome mëtlëna. Bo sebobë ilawa mago enëneme, Damaskus lifate mëta kë tafa mëtëglabë kë pasë tehutemë. Ebë pasë bome kë mëtlë nabë, bome megali sle lamotlona, Jisame kë lowene mëtletlabë onehome kalabusu nanotomëme fene. Bo Damaskus lifewa tuguwibë, kë pasëbë gali fene gali tla melë nanugulëme fene. Na bume Jerusalem lifatewa nëlesumëme na bu mana tëbo motomame.”

Pol kë nalë Jisame kë lowene tëgletlebë gali, të têtatëme

6 Ita, Pol bu megali tètëkake, “Bo tuguwibë, na kliji kuna bo Damaskus life nounou totlë. Na hokweinawa tako elulego, matafa mago, bome iniwa lahwegënëwa têtanë.

7 Na bo life mëta latitigwëwa. Na bo we lego mana aholokwane telë na megali tlonë, ‘Sol, Sol, ju bome fëyeme sisile etakefënëne?’

8 Na bo metakune tlole, ‘Tako ho, ju yalëne?’ Na kë we lego metafu têtatenë, ‘Bo Nasaret life mago Jisas. Ju bome sisile latakefënë.’

9 Bona kë tiglijabë enëne kë elulego hwi lamotlola. Kwe bome kë gali toglonëbë we lego aholokwane hana mëtla.

10 Na bo megali tlole, 'Tako Ho, bo habelë nëgelëmene?' Na Tako Ho bome megali tlonë, 'Ju huju elëme na Damaskus lifatewa ejume. Na kë lifate mëta, iniwa wesibi ju egotomebëme, Goto jume kë tole lëgletëbë, ho li jume kë lifate mëta gali lugujuwelëme.'

11 Kë elulego, tako elulego nëgëme na bobë naba këme kilego mëtletënë. Këme nëgëme, ho bona kë tugujabë bome toba fana Damaskus lifatewa mëtlenuna.

12 Ho li kë lifate mëta tafa tle. Bubë weniji Ananiaas. Bu Gotome fwa lotu lëgletlebë ho. Na bu Goto Mosesme kë tēglëlebë tafa sle gali esogo sle lëglelëtlebë ho. Na Israelbë afenëboni iniwa, Damaskus lifate mëta kë tafa mëglabë bu melowene lamëtletla, 'Lale ho.'

13 Kë ho bo belë tisi na bobë lime tlibetenë. Na bome megali tlonë, 'Afa, Sol, jubë naba tika mëgletëme.' Bu fene gali tlonë, na bobë naba tika mëtletënë na bo bume hwi tlole.

14 Na bu gali tlonë, 'Sebobë semleninobë Goto, melëme tole lëletë, ju bubë tole lowene na egleleme. Bu jume melëme aniji tolë, ju Gotobë lale lowenewa kë esogo lëglelëtlebë home hwi naeglolëme. Na ju bubë ëfalëbo mago gali aholokwane naeglometleme.

15 Na iniwa wesibi ju kë hwi toglobebë na gali ju kë aholokwane toglometlebë onehome të naegëtagutëmeme.

16 Na ju fëyeme hwi elene? Mana baptais fa etole. Ju Tako Home Jisame gali eloleme, jume lëgaita nalëgleme na jubë tëbo lowene sle nalogotometëme.'"

Goto Polme jine tlële, Jisasbë gali Israelbë afenëboni mëtabëya jwa mëglabë enëneme të nalëtatëmeme

17-18 Pol ita megali tlome, "Bo Jerusalem lifatewa ita tigrisina, na bo mana Gotobë tako lotu lowa tekakuli. Na bo Gotome mana gëgali tlelëkeflëbë na bo Tako Ho, Jisame, nimitelënaha mana hwi tlole. Bu bome megali latlonë, 'Ju Jerusalem lifate mago hokweinawa eiju. Ju bobë gali kë lifate mëta të egotlena kwe bu hana aholokwane mëgletëyome.'

19 Na bo megali telë, 'Tako Ho, bu kwe bome walowene mëletëna. Ètani bo iniwa lotu lowa kë asë tēgëbelëfëbë na jume kë lowene mëgletëyobë onehome iniwa tētëkle latëtakëfë na kalabusu lowa sisike tlekefë.

20 Na jubë gali të logotlebë ho Stivenme mogo nalë kë tëkle mototlabë, kwe bo këme tlibë na bo kë wesibi tako fleflesu latletelëmu. Na Stivenme anijina kë tëkle mototlabë, hobë heletanëno ëho, bo hwi tlometemë.'

21 Kwe Tako Ho bome megali tlonë, 'Ju eiju. Bo

jume, Israelbë afenëboni mëtabëya jwa mëglabë enëne belëme jine nëgelëkakëme, kakë kē tafa mugulabë oneho belëme. Ju bume egaitame naegleme.”

Pol wame home boblo mogotomabë enëne megali tlome, “Bo Rom lifate mago ho”

²² Israelbë afenëboni, Polbë gali aholokwane motlola. Kwe Pol, Israelbë afenëboni mëtabëya jwa mëglabë enëne lëgaitame nalëglebëme gali tlomena, kwe bume ita tako enisusumu memëtletla. Na bubë kē gali aholokwaneme tole hana mëtletlamu na bu anisasana gali mëtla, “Mogo nalë tëke elolo! Mogo nalë tëke elolo! Kēha hobë, ebë life mëta asa tafa malële! Gli malële!”

²³ Bu anisasana gali mëtëbebokwakabë, na bubë heletanëno ëho titika mëtla na sisike mëtebokwaka na life obona mesisike motokwaka. Bu këna melëbëme lëlekuju mëtla, bu Polbë gali tole hana mëtletlamu.

²⁴ Këme nëgëme wame home boblo mogotomabë enënebë eso ho, bubë wege home gali tlome, “Sobo Polme, sebobë lowa elëlekakulome na bume taba afona lëlafa etlome. Na kē enëne wame kē moglolibë lowene wayobëme takune elolome. Bo melowene nanëgelëme, ‘Israelbë afenëboni, bume mogo nalë tëkeme fëyeme tole mëlane?’”

²⁵ Këme nëgëme, bu Polme kijuna tobona lei

mototometla. Na bume taba afona tëkle mogotlame kofene. Kwe Pol wame home boblo mogotomabë enënebë eso ho lime hwi tlole, lolime tlibetle. Na bume takune tlole, “Rom provins mago gavmanbë gali melë lëgëbetle lalële. Sobo Rom provins mago hobë tëbo lowene afina sahwi elotelo. Sobo Rom provins mago ho blawa lalowa tëkle egotlomene o hanane? Weye, hanane. Bowe, Rom provins mago ho, na sobo bome blawa fëyeme tëkle egëtanamene?”

²⁶ Kē eso ho, kē gali aholokwane tle, na bubë tako eso home tuju tle na gali tujuwelële, “Ju habelë egotlemene? Kē ho bu Rom lifate mago ho!”

²⁷ Na kē tako eso ho Pol belë tisi tle na takune tlole, “Ju bome gali enonë. Ebë nëgali o sogëna. Ju Rom life mago hone o hanane?” Na Pol gali tlole, “Nëgali.”

²⁸ Na kē tako eso ho megali latlole, “Bo tako baliti Rom lifate magobë gavmanme watlële na bo mefata wanelë, Rom life mago ho.” Kwe Pol megali latle, “Bo kwe hanane. Ayana, beëna bu Rom life mago. Këme nëgëme, bo mata Rom life mago ho.”

²⁹ Wame home boblo mogotomabë enëne, bu Polme tëkle namogotlame kofene, kwe Polbë gali meaholokwane motlolana, “Bo Rom life mago ho,” kwe bu uli memëtla na fo mëtëkaka. Na kwe tako eso ho bu mata tako uli metle.

Bu wame home boblo mogotomabë enëneme megali toglomeme nêgeme, “Sobo Polme senë tabana lei etlomo.” Bubë lowene metêgëbetle latle, Rom life mago home blawa asa lalei etlo.

Pol Israelbë afenëbonibë lotu eso enëneme gali të têtatême

³⁰ Wame home boblo mogotomabë enënebë eso ho, bu metole latle, melowene sle nalêgleme, “Israelbë afenëboni, Polbë fëye tēbo lowene hwi motlotlane?” Kēme nêgeme, jowafe niwa tēbe na bu Polme kēna lalei mototlabë senë taba titika totometle. Na bu lotu lo mēta wege mēglabë eso ho na Israelbë afenëbonibë lotu eso enëneme, gali telokwakēme, loko namokwētlame. Na Polme kē enēne belë tlelule. Na bubë naba lime tlibetême.

23

¹ Na kwe, Pol Israelbë afenëbonibë lotu eso enëneme wēya tlelême na megali tlome, “O afani, bo Gotobë naba lime kē asë nêgelëbë, bo tēbo lowene mēta hana asë nelë. Bo melowene nanelë, ‘Bo wesibi liha hana totlë.’”

² Pol megali tle, na Gotobë tako lotu lo mēta wege lēglebë tako eso ho, Ananias, Polbë lime kē mitlijabë enëneme gali tlome, “Sobo ēfalēbo elë bu elo.”

³ Na Pol kēme gali tlole, “Goto jume mata tēke loglême. Ju waholo lebotabo ti ha. Oneho jume matawa hwi moglëyobëye, lale klisomu, kwe lokwalêfe waholo lebotabo ti ha

lëlubetë. Ju melowene lalene, ‘Ju Goto Mosesme kē tēglëlebë tafa sle gali esogo eglëlebë ho, na kē galina bobë tafa hwi sle loglotenême.’ Na ju kē gali fëyeme boblo etlene, na bome ēfalēbo elême bume fëyeme gali elomene?”

⁴ Na kē enēne Polbë lime kēme tlijabë, Polme megali motlola, “Ju Gotobë tako lotu lo mēta wege lēglebë tako eso home fëyeme tēbo gali elolene?”

⁵ Na Pol kēme gali tle, “O afani, masiwafe, bo melowene hana nēletelë, kē ho bu Gotobë tako lotu lo mēta wege lēglebë tako eso ho. Gotobë bogo megali eglame nêgeme, ‘Sobo, sobobë eso home, tēbo gali asa elolo.’”

⁶ Pol melowene latletême, “Israelbë afenëbonibë lotu eso enēne, fliye bu Farisi enēne na fliye Sadyusi enēne.” Kēme nêgeme, bu anisasana gali tlome, “Afanino, bo kē nēgebëye, Farisi ho. Na bobë afuna, ayana, bu mata Farisi ho. Bo melowene nanelë, gigli enēne bu matēmatë mago huhuju mēglame. Na kē wesibime fwa bome so namētātēname.”

⁷ Pol kē galime gēgali tle, na Farisi enēne na Sadyusi enēne blalo wame mētla na li li lowene mēta mētētābëya.

⁸ Ebë wame wayobë melêgëbetle lalële. Sadyusi enēne megali lamētlekefëya, gigli enēne matēmatë mago hana huhuju mēglame. Na

ensel na alibaho hanane tafa mēle. Kwe Farisi enēne bu kē wesibi iniwa lowene sle mētletēma.

⁹ Kēme nēgeme, anisasnamu gēgali mētla. Na Farisi enēne fli, Gotobē galime kē okokwe moglomabē ho, bu hujuna mitlija na anisasana megali mētla, “Sebo ebē hobē tēbo lowene hana hwi nolotla. Ensel li o alibaho li bume wagali mololenawa. Bu melē lēglena, na sebo bume tēkle nogotlana kwe sebo Gotobē wege sisile nogotlame.”

¹⁰ Na wame home boblo mogotomabē enēnebē eso ho bu mehwi tlome, anisasana wame gali feilawa hujū mētletlēla na bu uli metletēme. Bu melowene tle, “Farisi enēne na Sadyusi enēne Polbē ato memelē ki tei mletlafe, na bubē ato bule lēgletlemefe na bu gli lēleme.” Kēme nēgeme bu wame home boblo mogotomabē enēneme gali tlome, “Sobo loko kē mēglelēyabē enēne belē eyeume na Polme kē enēnebē mago no ejuwelolome na elesulome na sebobē lowa elēkakuome.”

¹¹ Bu melē kē mēglabē. Na klabē kuna Tako Ho Jisas, Polbē li mēta tlibetle. Na gali tlole, “Ju uli asa ele. Ju bobē gali, Jerusalem mēta fene tē etle, Rom lifate mēta, melē, tē egotleme.”

Israelbē afenēboni gali sle mototla, Polme mogo nalē tēkle namogotlame

¹² Na kwe li olobalēna, Israelbē afenēboni fli mana loko mētletlēya. Na gali sle

mototla, Polme mogo nalē tēkle namoglotlame. Bu Gotobē wenijina kakēne mētla, “Sebo Polme mogo nalē satēkle notla. Sebo mogo nalē tēkle jwa nogotlana kwe sebo hi wesibina tuna hana hi nēglame.”

¹³ Polme mogo nalē tēkle gali kē kakēne mētēglabē hobē tabei kēniji niliafewe (40) sogē sigliwa.

¹⁴ Kē ho, bu lotu lo mēta wege mēglabē eso ho belē na Israelbē afenēbonibē letitabo enēne belē mutujutēma na megali motloma, “Sebo Gotobē wenijina gali mekakēne sle wanēla, ‘Sebo Polme mogo nalē satēkle noglotlame. Sebo tēkle jwa nogotlana kwe sebo hi wesibina tuna hana hi nēglame.’

¹⁵ Kēme nēgeme, sobona, Israelbē afenēbonibē lotu eso enēnena, wame home boblo mogotomabē enēnebē eso home sagali elolo. Na bume mesogēna elolome, ‘Sebo metole nanēla, ju Polme sebelē sei elēfatēna, sebo bume fli wesibime takune nanoglotlame. Sebo melowene sle nanēgletlame, “Bu fēye wesibi totlene?”’ Sobo melē egelona, kwe sebo alēgeme ekē tafa nēla. Na bu Polme sebelē sei mēglēlana, kwe sebo bume alēgeme mogo nalē tēkle noglotlame.”

¹⁶ Kwe Polbē blola, kē gali aholokwane tle. Kēme nēgeme tuju na wame home boblo mogotomabē enēnebē lowa tēkaklu. Na bolumama Polme gali tlole.

17 Na Pol, wame home boblo mogotomabë enënebë eso ho lime, bu belë nalistleme gali telokwakle. Na bu tisi tle na Pol megali tlole, “Ebë falake home jubë tako eso ho belë sei ejuwelële. Bume li galime gali naloglome.”

18 Këme nëgeme, kë eso ho, kë falake home, bubë tako eso ho belë tlelule na megali tle, “Kalabusu mëta kë tafa lëglebë Pol, bome megali lalolonë, ‘Ebë falake home jubë tako eso ho belë sei ejuwelële. Bume gali lime gali naloglome.’”

19 Na këme, kë tako eso ho kë falake home tobame fa totle na mëglëbo elë tlelule. Na tlemalë buwa mutujuwelibo na mana takune tlole, “Ju bome fëye galibëme gali eglonëmene?”

20 Na kë falake ho megali tlole, “Israelbë afenëboni bu gali wafi sle motla, uniji jume takune nameglëyome, Polme, Israelbë afenëbonibë lotu eso enëne belë mëglelutëma namëglame. Bu jume sogëna mëglëyome na megali tlole, bu Polme fli wesibime takune namoglolame na melowene sle namëgletlame, ‘Bu fëye wesibi tlene?’

21 Kwe ju bubë gali asa aholokwane elome. Bu mago fli ho, bu këniji niliafewe sogë sigliwa, bu Gotobë wenijina gali mekakëne wamla, ‘Sebo Polme mogo nalë satëkle notla. Sebo tëkle jwa nogotlana kwe sebo hi wesibina tuna hana hi

nëglame.’ Bu jume mana kë hwi meletëyo, bume megali naeglomeme, Pol bu belë maluju.”

22 Na kwe, kë tako eso ho, kë falake home gali tlole, “Ju bome galime kë egisitenëbë, li home kë galibëme asa gali elole.” Na bu kë falake home jine telëkakle.

Bu Polme, tako eso ho Feliks belë jine metlëla

23 Na kwe wame home boblo mogotomabë enënebë tako eso ho bubë tokwëtokwë eso home tlemalëme gali telëkakëme. Na bu belë mitisijo na bume gali tlole, “Sobo wame home boblo mogotomabë enëneme 200 këniji, loko etome. Na hos klelina kë asë mëglabë home 70 këniji loko etome. Na sëfana kë wame mëglabë enëneme 200 këniji loko etome. Sobo Sisaria lifewa egëyeume sagli elëlome na klabëmuwa eyeume.

24 Sobo Polme hos kleli fli aniji elotelome, bu këna luguju nalëgleme. Na sobo bume eso ho Feliks belë sei sle ejuwelëlome.”

25 Na wame home boblo mogotomabë enënebë tako eso ho, pasë yahi tle na bu megali latle,

26 “Lale globalë eso ho Feliks, ju sebobë tako eso ho mu. Bobë weniji Klodius Lisias. Na bo ebë pasë jume ekë yahi nëletë. Na ebë pasë Polme megali latlatle.

27 Israelbë afenëboni, ebë home fa mototla na mogo nalë tëkle namogotlame fene. Kwe bo gali meaholokwane

telë, 'Bu Rom provins mago ho.' Këme nëgeme, bona, bobë wame home boblo mogotomabë enëne bume kë wame motlolabë enënebë mago no tlëla.

²⁸ Bume kë so mëtatlabë gali wayobëme bo lowene sle nanëgletelëme. Këme nëgeme, bo Israelbë afenëbonibë lotu eso enëne belë këme tlelulë.

²⁹ Bo bume kë tëbo wesibime takune tломë. Na bubë onehobë tafa sle galime fwa anebo gali mëtlelëna. Na bu kë tafa sle galime fwa so mëtëtatla. Kwe bo bubë fëye wesibiha hwi hana tlotelë. Na sebo bume mogo nalë manawa hana tëkle nogotlame o manawa hana kalabusu nogotlame. Matëbe.

³⁰ Na ëje bo ebë gali meaholokwane nanolomë, bu bume mogo nalë tëkle mogotlabë gali wa sle mëtatla. Na këme nëgeme bo ju belë hokweinawa këme jine nelëbäklë. Na bume kë so mëtatlabë enëneme gali nolomëme, bu jubë naba li mëta gëgali sle namëglame. Bobë gali tei."

³¹ Na kwe, wame home boblo mogotomabë enëne, bubë eso hobë gali esogo mëtlelëtlä na bu kë klabëna Polme Antipatris lifatewa sei mutujuwelëla.

³² Jowa klabë tle na wame home boblo mogotomabë enëne, hos kkelina kë asë mëtlekefëyabë, Polme Sisaria lifatewa sei mutujuwelëla. Na wame home boblo mogotomabë enëne fliye, Jerusalem lifatewa ita

mutuja na bubë lowa fëfe motokwaka.

³³ Bu Sisaria lifatewa fwa mutula na eso ho Feliksme pasë mëtlëla. Na Polme mata mëtlesula na bubë naba li mëta tlibetle.

³⁴ Bu kë pasë hwi tlagwi na Polme këme metakune tlole, "Ju fëye provins mago hone?" Na Pol gali metafufë tëtatlë, "Bo Silisia provins mago ho."

³⁵ Na kwe eso ho këme megali tlole, "Jume tëbo loweneme so mëtatëyobë enëne migisiyana kwe bo jubë gali aholokwane nolotëme." Na bu këme wame home boblo mogotomabë enëneme megali tlole, "Sobo Polme, ëtanifu eso ho, Herotbë lowa elelëkakulome na sobo mana hwi sle elokweflome, lëglëboukakulime."

24

Israelbë afenëbonibë letitabo enëne, Polme so mëtëtatla

¹ Na bu tobali olë wamutuju na Gotobë tako lotu lo mëta wege lëglebë tako eso ho, Ananias, Sisaria lifewa mana tuju. Na Israelbë afenëbonibë letitabo enëne fli, na oneho tafa sle mëglabë gali, lowene sle lëgletlebë ho li, buna mutuja. Bubë weniji Tertulus. Na bu Polme so kë mëtëtatlabë galibëme, eso home gali motlola.

² Na kwe, eso ho Polme gali telokwakle, ligisi tle nalëgleme. Na bu tisi tle na Tertulus, Pol kë tafa tëglebë galime mana gëgali tle. Na bu megali latle, "Eso ho Feliks,

ju seme lale tafame
laitakefëna. Ètani kë tafa
tëglaginabë na mana ekëne fe
lëkaki wame hana tokweija
ëbelë mana ekë fe lëkaki.
Ètani feilawa wesibi kë tëbo
mëtletë nabë, jubë lale
lowenena sle tëtagimetëna. Ju
seme feilawa wesibime
taitagina.

³ Sebo kë wesibi hwi
tlagima na sebo maninibona
sle tla. Na sebo jume tako
fleflesu latokweitëyo na
megali tokweija, 'Yahala
fëyemene.'

⁴ Kwe bo jume gëgalina kiki
hana nëgëtëme. Ju seme
maninibo naegletëname fwa
takune nolë na ju sebobë
tokwëfo gali aholokwaneme
aholo bo naegëtatëname."

⁵ Na bu Polbë galime
megali tletle, "Sebo ebë
home mehwi nanolola, bu
memele tëbo lowene mëta
tafa lëglebë ho. Bu iniwa
lifate mëta, Israelbë
afenëbonibë wame lowene
tufiji tëtagutëme. Na bu
Nasaret lifate mago Jisasbë
lowene esogo mëgglëtlabë
onehobë eso ho. Kë enëne bu
lale enëne nane.

⁶⁻⁸ Bu melëbëme fene su tle.
Gotobë tako lotu lo, tetëbo
lowenena tëbo nalogotleme
fene na kë lo, Gotobë naba
lime tëbowa lilibetleme. Kwe
sebo bume mana kë fa totla.

Këme nëgeme, bu kë tafa
lëglebë galime, sebo kë gali
nëglëyobë, ju sa takune elole.
Ju bubë ëfalëbo mago gali
lowene sle naegletleme."*

⁹ Israelbë afenëboni bu
këbë loweneme, Tertulusme
mëtaitala na bu këme megali
mëtla, "Ebë gali kë nëgebë,
nëgali galimu."

*Pol, Feliksbë naba lime,
Tertulusbë gali tafu tëtatle*

¹⁰ Na kwe, eso ho Feliks,
Polme esuwalëwa tlole, gëgali
nalëgleme. Na Pol këme
megali tle, "Bo jume
walowene sle nëletë. Ju ebë
life mago onehobë gali
aholokwane eglomebëme,
ètani anebomu tëtabetëme na
mana ekëne etabe. Këme
nëgeme bo jume fleflesu
këme nëletë, ju bobë gali
aholokwane sle eglonëme.

¹¹ Ju tëtakune ekouna, kwe
ju mehwi sle eglome, we
ita tële olë wamutuju, bo
Jerusalem lifatewa lotume
këtuguwibë.

¹² Na Israelbë afenëboni
bome mehwi hana motlona,
bo ho lina Gotobë tako lotu lo
mëta wame gali nëlelëgome.
Weye. Bo Israelbë
afenëbonibë iniwa lotu lo
mëta o iniwa lifeku mëta, fli
hobë wame lowene tufiji
hana tëtatemë. Weye.

* **24:6-8** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, "Na sebo bume sebobë, lotu eso enënebë naba li elë yafe tlelula, bu kë tafa lëglebë galime gëgali nanëgglëmame fene, kwe eso ho Lisiasna, bubë wame home boblo mogotomabë enënenana mana kë mitisiya, na seme enisusuna hehë mëtletëna na sebobë toba mago bume mana ki mëtëkaka. Na Lisias këme gali tle, 'Fli oneho ebë home, onehobë gali aholokwane moglomabë enëne belëme mëgglëlulame tole mëglana ta jubë naba li elë samëgglësulame na bu kë tafa lëglebë galibëme sa gëgali mëgglëyome.'"

13 Ebë gali bu bome kë so mētatēnabē, nēgali gali nane. Weye. Bome kë so mētatēnabē gali eso olafa sle hana mētatēyo.

14 Kwe bo some megali sle nēlēyo. Bo kwe ētani sebobē semleni kë lotu mētletlabē Gotome fwa mana lotu nēletelē na bo Tako Ho Jisasbē lakale mata esogo nēlelētēlē. Israelbē afenēboni mēfē lamototla, 'Tako Ho, Jisame esogo mēglelēlabē, tēbo lakale.' Kwe bo melowene nanelē, Goto Mosesme kë tēglēlebē tafa sle gali iniwa bu nēgali gali mu. Na iniwa gali, Gotobē lowene mago gali tē mototokweflabē ho kë yahi mētēglabē, kë mata nēgali gali mu.

15 Na bo Gotome melowene nanēletelē. Tokwafe li olēna iniwa gigli enēneme matēmatē mago huhuju logotomeme. Lale lowenena gigli mētlabē enēne na tēbo lowenena gigli mētlabē enēne bume iniwa huhuju logotomeme. Bona, ebē enēne kë tafa mēglabē, jowa lowenewa nehola.

16 Kēme nēgeme bo kë nēgeholēbē gali esogo sle nēglelēlēbēme feilawa afutuku kēme nelē. Na bo Gotobē naba lime na onehobē naba lime tafa sle nanēgletemēme.

17 Bo Jerusalem lifate kile totlē. Na bo li life mēta kë tafa tugulēbē, feilawa tlibutu tafa tulē. Na tokwafe, bo Jerusalem lifatewa ita tisi. Na baliti jwa kë tafa mētlabē yabe enēneme, nēgaitamēbēme baliti

tehweitemē. Na bo sipsip kleli Gotome ahøjume nanēgletelēmeha tisi.

18 Bo Gotobē tako lotu lowa nuguwime tole latelē, kēme nēgeme, bo Gotobē naba lime lala tafa nēgelēbē lowene afina sle totlē na bo mana tako lotu lowa tēkakuli. Na oneho bome Gotobē tako lotu lo mēta hwi motlonabē, bo Gotobē naba lime lalawa tētābē. Bo feilawa enēnena hana tafa tla. Na sebo fēyeha hana totoma. Na fli enēneha hana flikale motlona.

19 Kwe Esia provins mago Israelbē afenēboni mitisiya na bome blawa wame motlona. Bome kë so mētētatēnabē enēne jubē naba lime bo kë tēbo togotlēbē wesibime bu gēgali mēkakijame. Kē enēne bu migisiya jwa fēyeme mēlane kë galime gēgali namēglame?

20 Bo melowene nanelē, bu gēgali hanane. Kwe ebē iniwa enēne, bo Israelbē afenēbonibē lotu eso enēnebē naba lime kë tiglibēbē, bu bobē tēbo wesibi o tēbo lowene wafi hwi motlotēnabē kwe bo metole nanēletemē bu jume kë tēbo lowenebēme sagēgali mēglelēyome. Bu jume lalowa gēgali mēglelēyomene o hanane.

21 Kwe bo melowene nanelē, bo tokwēfo wesibi kë tēgelēbē, kēme fwa wame molona. Kē wesibi melē, bo bubē gali aholokwane moglomabē hobē lime kë tiglibēbē, bo megali latelē, 'Bo Gotome melowene sle nanēletelē, lebo enēneme, matēmatē mago huhuju logotomeme.' Kē wesibime

fwamu bome sobobë naba li elëme këme mëlesuna.”

²² Feliks, Tako Ho Jisasbë lakale kë esogo mëglelëlabë onehobë lowene walowene sle tletëme. Pol gëgali tēglebë yawe tlole na Feliks mana megali tlome, “Sobobë gali eme fwa tou lēgletëyome. Tokwafe wame home boblo mogotomabë enënebë eso ho, Lisias, ebelë ligisina, kwe bo sobobë gali sasle nëgetatëyome.”

²³ Na bu wame home boblo mogotomabë enënebë eso ho li, megali tlole, “Ju Polme sahwi elokwefle jubë lokwalëfe mëta fwa tafa lëleme. Kwe bume naba feilawa asa ahwatle. Weye. Bubë yabeni bume wesibina mëgaitalabëme asa lëkle etome kwe bu matisitla.”

Eso ho Feliks, Polme kalabusu lowa tuku tēglebë, tēle tlibutu tafa tle

²⁴ Fli olë wamutuju. Na Feliks, bubë no Drusilana mitisijo. Drusila kë nëgebëye, Israelbë afenëboni mago mëse. Na Feliks, Polme gali telokwakle, bu belëme ligisi tle nalëgleme. Na Pol tisi tle na buna gëgali mëtelo. Na bu Polbë gali aholokwane tlagule. Na Pol, Jisas Klaisme lowene slebë lowenebëme mana okokwe sle tlole.

²⁵ Na Pol, oneho lalë lowene esogo mëglelëlabëme gëgali tle. Na oneho bubë asë ululu sle mogotlabëme gëgali tle. Na tokwafe Gotobë naba li meta onehome gali aholokwane loglomebë na onehome fu fu logotomebë

olë mata gëgali tle. Feliks kë gali yafe aholokwane tlole na bu tako tutune metle na megali tle, “Ju ejumo. Tokwafe bo tole nēgelëna mana sagali nēgelëkakëme, bo belë ita egisi naegleme.”

²⁶ Feliks Polme metole fene latletle, Pol bume baliti lëlële nawa, na bu bume kalabusu lo mago jine lelëkakleme. Këme nēgeme, itaita këme gali telokwakëkefle, bu belë gëgalime ligisikefëtle nalëgleme.

²⁷ Bu melë kë tēglebë tēle tlibutu latle na mana Porsius Festus, Feliksme hihijika tle na eso home tafa tle. Kwe Feliks bu metole latle, Israelbë afenëboni bume fleflesu namēgletlame. Këme nēgeme Polme kalabusu lo mëta fwa këme kile tle.

25

Eso ho Festus, Polbë gali aholokwane tlole

¹ Festus, Sisaria lifatewa tisi na Judia provins mago enëneme eso home tētabetëme. Na bu kë mëta aowafe ni tēbe. Na bu Sisaria lifate kile tle na Jerusalem lifatewa tuju.

² Na Israelbë afenëbonibë lotu lo mëta wege mëglabë eso ho na bubë letitabo enëne, Festus belë mutujutla. Na Pol tēbo lowene mëta kë tafa tēglebë gëgalibëme gëgali mëtlelëla. Na bume këme anisasana megali motlola,

³ “Ju seme lalowa aitanamene? Sebo metole nanëla. Ju Polme Jerusalem lifatewa jine elëbakleme.” Bu kë galina këme gali motlola,

fli home alëgeme ëhome gali motlomame nëgeme, na Polme mogo nalë tëkle namogotlame.

⁴ Na Festus bubë gali metafu têtatëme, “Pol, Sisaria lifate mago kalabusu lo mëta mana tafa lëleo. Bo sogë tafawa nanelë, na bo Sisaria lifewa nuguwi nanëgelëme.

⁵ Këme nëgeme, sobobë eso enëneme jine elëmo, bona nuguja nanëglame. Na kë ho, tëbo lowenena tafa lëglena, kwe lalowa bu bobë naba lime bubë tëbo lowene lalowa gëgali mëgletlame.”

⁶ Festus Jerusalem lifate mëta tobali ita aona olë o welujuwa olë tafa tle, na bu Sisaria lifatewa ita tuju. Jowa klabëwa ni tëbe na kë olobalëna hobë gali këme aholokwane mëglekefëtëmabë lo mëta tafa tle. Na Festus, Polme mëglesutla namëglame gali tlome.

⁷ Bu Polme sei mëtelëfatla. Na Israelbë afenëboni, Jerusalem lifate mago kë mitisiyabë bume loko mëtleletla na bume gali blawa soso mëtëtatla. Na Pol bu tetëbo lowenebë mëta kë tafa tëglebëme gëgali mëtleletla. Kwe Festus bubë galime melowene hana tletëme, “Bubë gali nëgali galimu.” Bu meolafa hana mëtëtatla, bubë gali nëgali gali.

⁸ Bu gali blawa wafi soso mëtëtatla na Pol bubë gali mana metafu têtatëme, “Bo fëye wesibiha hana totlë. Bo Israelbë afenëbonibë tafa sle gali boblo hana têtatemë. Na

bo Gotobë tako lotu lo, tëbo lowenena tëbo hana têtatemë. Na bo Rom lifate mago gavmanbë eso home tëbo hana totlë.”

⁹ Kwe Festus melëme tole tle, Israelbë afenëboni bume fletlesu namëgletlame. Këme nëgeme, Polme këme takune tlole, “Ju metole lalene? Jerusalem lifatewa ejume na bo kë mëta bubë gali aholokwane nolomëme.”

¹⁰ Kwe Pol megali tle, “Hanane mu. Bo kë mëta kë tafa nëgelëbë lo, bu Rom lifate mago eso ho, Sisarbë lo, onehobë gali këme aholokwane mëglekefëyabë lo. Bome blawa kë so mëtatënabë gali, eme fwa aholokwane eglomeme. Ju bome walowene eletenë, bo Israelbë afenëbonime fëye wesibiha hana totometemë.

¹¹ Bo li wesibiha tëbo nogotlëbë, kwe lalowa bo gli manelë. Bu bome li fëye tëbo wesibiha hwi moglotënana, na megali moloname, ‘Ju ebë tëbo wesibi mëta gli egleme,’ kwe lalowa bo kë mëta gli manelë. Kwe bome kë so mëtëtatënabë gali, sogëna nëgebë, ho bubë toba elë hana gwa mëgëtaname. Bo metole nanelë, Rom lifate magobë tako eso ho, Sisar, bome blawa kë so mëtëtatënabë gali, buwa saaholokwane lëgleme.”

¹² Na kwe Festus, bume lalë lowene kë mëglëkeflabë enënena blalo gëgali mëtla na Polme megali tlole, “Ju megali waele, ‘Eso ho Sisar, jume blawa kë so mëgëtatëyobë gali bu

saaholokwane lëgletëme,
kwe ju eso ho Sisar belë
egujume.”

*Festus, eso ho Agripame,
Polbë galime gëgali tlelële*

¹³ Habenuju afe niwa tëbe.
Na eso ho Agripama, bomulu
Bernaisina, Sisaria lifatewa
mitisijo, Festusme hwi
namoglolome.

¹⁴ Na kë tlemalë tako
tafaha mëtelo. Na Festus eso
ho Agripame Polbë galime
mana megëgali tlelële,
“Èbame, Feliks li home
kalabusu lowa kë tuku
tëglebë, bu kalabusu lo mëta
mana tafa lële. Bubë weniji
Pol.

¹⁵ Bo Jerusalem lifate mëta
tafa tëgelëna, Israelbë
afenëbonibë letitabo enëne
na lotu lo mëta wege mëglabë
eso ho, gali bume so
mëtëtatla. Bu metole lamëtla,
bo megali nanoglomëme
fene, ‘Bu wafi tëbo tlitawa, na
wame home boblo
mogotomabë enëne, bume
mogo nalë tëke
namoglolame.’

¹⁶ Kwe bo bubë gali metafu
latëtatemë, ‘Sebo Rom
provins mago enëne, sebo
lowene melë lëgëbelalële,
bume kë so mëtatabë
enënebë toba elë blawa hana
gwa nëgëtatëmame. Fli ho bu
li home so mëtatlana, kwe
bubë gali tafu mëgëtatlabëme
aholo bo sle samëtagutla.
Bubë so gali afina tafu
lëtatëmeme na tokwafe
onehobë gali aholokwane
lëgletëmebë ho, bubë gali hwi
sle lolotëmeme.’

¹⁷ Këme nëgeme kë enëne
ebë lifatewa, bona tisiya. Na
bo haha tafu hana totlë. Bo
jowa klabëwa ni tebë na bo
hobë gali këme aholokwane
mëglekefëyabë lowa mana
tuwi. Na bo wame boblo
enëneme gali tlomë, ‘Kë home
elesulo.’

¹⁸ Na bobë naba lime,
bume kë so mëtëtatlabë
enëne, bu mitlija na mana
gëgali motokouja. Bo
melowene latelë, ‘Bu tëbo
wesibi kë togotlebëme gëgali
mëgletlamewa. Kwe bu
këbëme hana gëgali mëtla.
Weye.’

¹⁹ Buna, bubë lotu
lowenebëme anisasana
momata mëtlogwaya. Na bu
li ho kë gli tëglebëme
anisasana momata
mëtlogwaya. Kë hobë weniji
Jisas. Kwe Pol këme megali
tle, kë ho kë gli tëglebë mana
hwi lëta.

²⁰ Bo ebë gali sle
nogotlëbëme lowene hohwi
nanëtatelëmu. Kwe bobë
lowene yaya lalëletenë. Këme
nëgeme, bo Polme metakune
tlole, ‘Ju metole lalene?
Jerusalem lifatewa ejume na
bo kë mëta jubë gali
aholokwane nolëme.’

²¹ Kwe Pol megali tle, ‘Bo
kwe kalabusu lo mëta tafa
manelë. Tokwafe, Rom lifate
magobë tako eso ho, Sisar,
bome blawa kë so
mëgëtatënabë gali
saaholokwane lëgletenëme.’
Këme nëgeme bo megali telë,
‘Bu kalabusu lo mëta tafa
lëglekëfebëë, na bo mana
Rom lifate mago eso ho belë
jine nelëkälëme.’”

²² Eso ho Agripa kë gali aholokwane tle na Festusme megali tlole, “Bo ebë hobë gali aholokwaneme tole nanëletelë.” Na Festus këme gali tlole, “Uniji saaholokwane eglolome.”

²³ Na li olëna, Agripa Bernaisina bu lale negli wesibina negli mototlo na bu mana mitisijo. Na kë tlemalë, wame home boblo mogotomabë enënebë eso hona, Sisaria lifate mago letitabo hona, oneho këme loko mëtletëkefëyabë lowa iniwa mëtëkakluja. Na Festus bu wame home boblo mogotomabë enëneme jine telëkakëme, Polme bu belë mëglesula namëglame. Na bu Polme bu belë mëtlesula.

²⁴ Na Festus këme megali tle, “Eso ho Agripa, na sobo iniwa oneho, sebona kë tafa nëglabë, sobo ebë home hwi elolo. Israelbë afenëboni iniwa, Jerusalem lifate mago na ebë lifate mago, ebë home gali so mëtëtatla. Bu bome anisasana megali lamotlona, ‘Mogo nalë tëkle etole mana tafa lëglelime.’

²⁵ Kwe bo ebë hobë, li fëye wesibiha, hwi hana nolotelë. Na bo megali hana nëgelëme, ‘Gli malële.’ Bu metole lalële, eso ho Sisar bume blawa kë so mëtëtatlabë gali buwa saaholokwane loglomeme. Këme nëgëme bo gali wasle totlë, Polme eso ho Sisar belë jine nëgelëkaklëbëme.

²⁶ Bo eso home Sisarme ebë hobë tëbo lowenebëme pasë yahi nëkakëtelëme fene. Kwe bo bubë li wesibiha hwi hana tlotelë, bo so kë

mëtëtatlabë gali wayo lowene hana nëletelë. Na bo pasë mëta sebobë eso home fëye so gali wayobë yahi nëgletelëmene? Këme nëgëme, eso ho Agripa, bo ebë home jubë naba li elë këme nëlesutë, na fli enënebë naba li elë mata këme nëlesulë, bubë gali aholokwane sle naeglolome. Bo kë so galibë wayo lowene sle nëletelëme na bo pasë mana yahi nëkakëtelëme.

²⁷ Bo kalabusu lo mago ho li, eso ho belë jine nëglëläna, na bubë so galibë wayo hana yahi nëgletelëna, kwe bo melowene nanelë, ‘Këha lale lowene nane.’”

26

Pol eso home Agripame gali tlole

¹ Na Agripa Polme gali tlole, “Jubë gëgalime mana gëgali ele.” Na Pol tobana lëkle totome, oneho gëgali kuju namëgebéyame. Na bu megali tle,

² “O eso ho Agripa, Israelbë afenëboni, bome blawa kë so mëtëtatë nabë gali jume të nëgëtatëme. Na bobë gali jubë naba li mëta gëgali nëgelëbëme tako tole nanelë.

³ Ju sebobë, Israelbë afenëbonibë iniwa lowenebë wafi lowene sle eletëna. Na kofe kofe gali kë gëgali nëglelogwayabë, kë wesibime mata ju wafi lowene eletëna. Këme nëgëme bo metole nanelë, ju alabujuwa tafa eleme. Na iniwa galime aholokwane bo sle etagwime.

4 Israelbë afenëboni iniwa, bobë lakalebëme wafi lowene sle mëletëna. Bo tokwëfome bobë lifate mëta kë tafa tokweibë na ita Jerusalem lifate mëta kë tafa tokweibë, bu bobë lakalebëme wafi lowene mëletëna.

5 Na bu tole mëglana kwe bu bobë lakalebëme jume lalowa gëgali mëglelëyome. Bu bome melowene lamëletëna, 'Bo falakeme nëgena, bo Farisi ho li tëtabë. Na bo Farisibë lowenewa anisasana esogomu tlelëtemë.' Farisi enëne Mosesbë tafa sle anebo gali iniwa anisasana esogo mëtlelëla.

6 Bo ëje ekë nilibë. Na bu bome sobobë naba li elë mëlesuna bobë lakaleme some gëgali namëglelëyome. Na kë gëgali wayobë, melëgebe lalële; bo melowene nanelë, ëtani Goto bobë semlenime megali sle latlome, bu gigli enëneme huhuju logotomeme. Na bo kë wesibi melowene sle nëgletelëme na bo këme hwi nëkakatelë.

7 Sebobë semle, Israelbë we ita tële nëbalebë afenëboni, bu klabëna olëna Gotome fwa lotu mëtlekefëtla. Na bu melowene sle këme mëtletla, 'Goto gigli enëneme huhuju logotomeme na bu kë wesibi hwi mëtëkaketla.' Eso ho, kë wesibime fwa Israelbë afenëboni, bome sobelë këme mëtlesuna.

8 Sobo fli emëta kë eglibobë enëne, melowene fëyeme elone, 'Goto gigli kë mëtlabë enëneme hana huhuju logotomeme.'

9 Ëtani bo melowene latelë, Nasaret lifate mago Jisasme, kë lowene sle mëgletlabë onehome sisile manotomë.

10 Na bo kë wesibi Jerusalem lifate mëta melë totlë. Lotu lo mëta wege mëglabë eso ho, bome iniwa afutuku mëtlëna kë wesibi togotlëbëme. Na bo kë iniwa afutukuna Jisasme lowene sle kë mëtletlabë onehome feilawa sisile totomë na kalabusu lowa tlelukefëmë. Na eso enëne bu giglime gali mëtlana kwe bo mata helawawa latelë, gigli matla.

11 Feilawa olë bo melatlekefë, Israelbë afenëbonibë lotu lowa nëkakuliwa nëgelëbë, na Jisasme kë lowene mëgletlabë onehome fafa nëkouwi na sebo mana tëtëkle nelutaya. Bo melëme tëbo fene totomë, bu Jisasme klëë gali namoglolame na bume kë lowene mëtletlabë lowenebë mëlëkëla namëglame. Bo ebëha wesibi Jerusalem lifate mëta fwa nane telë. Weye. Bo bume tako enisusumu metletemë, na bo kakë lifate enëneme mata melatëtagumë."

Pol bu Jisasme kë lowene tēgletlebē galime gēgali tle

12 Pol megali tle, "Lotu lo mëta wege mëglabë eso ho, bome metole lamëtletëna, Kristen onehome tëtëkle nanëgëtagwime. Na bome Damaskus lifewa kë esome fwa jina mëtelëkakëna.

13 O eso ho, bo Damaskus lifewa tuguwibëë, kliji kume tlibe. Na bona kë tugujabë hona tako elulego hwi tlola,

matafa mago tisitëna. Kë elulego kë nëgebë bu klijiha nane. Weye. Bu tako elulegomu. Kë elulego, bona kë tugujabë enëne name iniwa lahwegënëwa tëtana.

14 Sebo iniwa latitiwagujawa. Na bo li hobë gali aholokwane tlolē, Hibru galina megali latlonë, 'Sol, Sol, ju bome fëyeme sisile etakefënëne? Ju bome tēbo egëtakefënëna kwe, ju jume tēbo elitamë.'

15 Na bo metakune tlolē, 'Tako ho, ju yalëne?' Na Tako Ho bu këme tafu tëtatenë, 'Ju kë sisile egëtakefënëbë Jisas.

16 Kwe ju huju ele. Bo jume ebë olëna këme nisitë, jume aniji nanoglëme, bobë wege fa naegëtatenëme. Ju wesibi nabana ëje kë hwi eglomebë, kë galibëme onehome sagali elëwagume. Na ita fli wesibi bo jume tokwafe olafa nogotometëme, kë wesibi galime, onehome mata gali elomeme.

17 Bo jume nëgaitëme. Na jubë ilawa mago enëne na Israelbë afenëboni mëtabëya jwa mëglabë enëne jume tēbo hana mëgëto. Hanane. Bo jume Israelbë afenëboni mëtabëya jwa mëglabë enëne belë jine nëgelëkakëme,

18 bubë lowene sle naegëtagutëmeme. Na bu tlukufini kile namokoujame na elulego tabome natafa mokoujame. Na bu Satanbë tēbo lowene kile mokoujame na Gotobë lale lowenewa mehwagulame. Na bu bome lowene sle mokoutëname na

Goto bubë iniwa tēbo lowenebë aholokwana ti nalëkoutëmeme. Na bu bobë oneho tafa namokoutëname.' Tako Ho Jisas bome kë gali tlenë."

Pol, Jisasbë gali tē wege, bu kë fa tētagulebëme, Agripame gali tole

19 Pol eso ho Agripame gali tole, "Eso ho Agripa, bo nimitelëha wesibina heven lifate mago kë hwi togolöbe, boblo hana totlë. Hanane mu.

20 Bo Damaskus lifate mago onehome afina gali tē tutatemë. Na ita Jerusalem lifate mago onehome, na Judia provins mago onehome, na Israelbë afenëboni mëtabëya jwa mëglabë enëneme mata tē tētagutemë. Bo gali metë latëtagutemë, 'Sobo sobobë tēbo lowenebë kile elome na Gotome fwa lowene eletelome. Sobobë lakale melebotane saetlo, sobobë tēbo lowene iniwa kile tēkoujo na sobo Gotome wafi lowene ekoutelo.'

21 Bo ebëha gali onehome tē tētagukefëtemëme nëgeme na Israelbë afenëboni bome kë wesibime fwa Gotobë tako lotu lo mëta këme fa mëtelutana. Na bome mogo nalë tēkle namëgëtaname fene.

22 Kwe Goto bome feilawa lataitanë. Goto bome tēgaitawaginëbëë na ëje mana ekë laitakefënë. Këme nëgeme ëje bo ekë nilibë. Na bo iniwa enëneme, atwati enënena eso enënename, Jisasbë gali ekë tē nëtatemë. Na bo li gali hana tē nëtatemë. Mosesna,

Gotobë lowene mago gali të mototokweflabë ho fene yahi mëtla, bo kë galiwa të notokweflë.

²³ Ètani bu meyahi lamëtla, ‘Goto kë aniji toglolebë ho, bubë onehome nëno lëleme, bu tako elili fa logotleme na gli lëleme. Na lebo enëne matëmatë mago huhuju mëglabëme bu afina logoutatëmeme. Na bu Gotobë lale gali, olë fenene, Israelbë afenëbonime na Israelbë afenëboni mëtabëya jwa mëglabë enëneme mata të lëgëtatëmeme.’”

Pol Agripame megali latlole, “Ju Jisasme salowene sle eletle”

²⁴ Pol kë gali të tëtagulebëë, na Festus anisasana mekëkale tlole, “Pol ju yaya lale. Ju tako lowene fa egotleme nëgeme. Na kë lowenebë jume yaya këme lëta.”

²⁵ Na Pol gali tle, “Eso ho Festus, bo yaya nane nelë. Weye. Bobë iniwa gali nëgali galimu. Ebë yaya gali nane.

²⁶ Na iniwa gali bo kë të nogotlëbë, eso ho Agripa lowene lalëletëme. Këme nëgeme, bo bume kë gali të nëgëtatelëbëme uli hana nelë. Bo walowene nëletelë, Jisas iniwa wesibi kë totomebë, bu li mumu hana lëbetle. Iniwa wesibi Jisas kë totomebë bubë naba lime èho hana lëgleme nëgeme na bu lowene sle këme lëletle.”

²⁷ Na Pol, eso ho Agripame gali tlole, “Eso ho, Agripa, ju Gotobë lowene mago gali të mototokweflabë hobë gali

lowene sle laletlene o hanane? Bo walowene nelë, ju wafi lowene sle eletle.”

²⁸ Eso ho Agripa Polme këme metakune tlole, “Ebë tokwëfo olëna ju gali kë të etatenëbë, ju melowene laletenëne, ‘Bo Jisasme lowene sle nanëgletelëmene?’”

²⁹ Na Pol bubë gali metaflu tëtatile, “Bo Jisasbë gali tokwëfo olëna të nogotlëna o tako olëna të nogotlëna, bo Gotome megëgali nanëlelëlë, ju na fli enënena kë tafa egelobë, sobo iniwa Jisasme lowene sle eletelo, bo fene lowene sle nëletelë. Kwe bome senë tabana fene lei mëtëtana some këha lei mëgëtoëme bo tole hana nëletëyo.”

³⁰ Na kwe eso ho Agripa na Bernaisi na eso ho Festus na buna kë tafa mëtlabë enëne huhuju mëtëkouja,

³¹ na kë lo mago totho mëtëkaka. Na bu blalo megëgali mëtla, “Kë hobë, li fëye wesibiha, hwi hana nolotla na sebo megali hana nëglame, ‘Bume lalowa, mogo nalë tëkle etlo o kalabusu malële. Weye.’”

³² Na Agripa, Festusme megali tlole, “Sebo bume kalabusu lo mago jine nëgelëkakëlame fene kwe bu megali tëgleme nëgeme, ‘Rom lifate magobë eso ho, Sisar, bome blawa kë so mëtatënabë gali bu saaholokwane lëgleme.’ Na sebo bume kalabusu lo mago jine jwa këme nëlëkakla. Sebo bume eso ho Sisar belë fwa sajine nëglëlame.”

27

Pol Rom lifatewa tuju

¹ Festus gali mesle latotle, sebo sibu lome fe nêlame na Itali provinswa nujame. Na bu Polname, fli kalabusu enênename, wame home boblo mogotomabê enênebê eso ho belê sei mutujuwelêma, bu mëglêboujalime hwi sle namoglomame. Kê hobê weniji Julius. Buna bubê wame home boblo mogotomabê enênena, bu eso ho Sisarbê lo mēta sei mëglêkeflabê enêne.

² Na sebo* Adramitium lifate mago kê tigusibê sibu lo mēta fêfe tla. Kê sibu lo, nutu helefo mēta, kê tafa mokoujabê lifate elême lugujume kofenene, Esia provins mēta. Na Aristarkus bu sebona tuja. Kê ho bu Masedonia provins mago na bubê lifate weniji Tesalonaika. Na kwe sebo Sisia lifate kile totla.

³ Jowa klabê tēkaka na sibu lo Saidon lifate mēta fla tule. Na Julius, Polme lalê lakale lebotane tētatle na bume megali tlole, “Jubê yabenime hwime lalowa egujume, bu jume hi wesibiname, fli wesibiname mëgaito namēglame.”

⁴ Na kwe tokwafe Saidon lifate kile totla. Na tako flelu, sibu lo miti nagi fo tētagule. Kēme nēgeme, sebo Saiprus afayo amlebo elê kēme hwagēnē tokwokwēya. Na kê

afayo aflokobê tako flelu hana tle.

⁵ Sebo tako nutu su tēkaka na Silisia provins na Pamfilia provins loli elê sigli tokouja. Na Lisia provinsbê lifate mēta, Maira mēta fla tula.

⁶ Na sebo kê lifate mēta sibu lo mago fêfe tēkaka. Na wame home boblo mogotomabê enênebê eso ho Aleksandria lifate mago kê tigusibê sibu lo hwi tlole. Kê sibu lo, Itali provinswa luguju nalēgleme. Kēme nēgeme bu seme kê sibu lowa mētlenuna. Na sebo kê sibu meta fêfe tula.

⁷ Na sebo Maira lifate kile totla, na sibu lo feilawa olê alabujuwa tujukêfe. Flelu bume miti nagi fo tētagukefleme nēgeme. Sebo Nidus lifatewa nounou watla kwe flelu sibu lo mana kê tēbetokwakle na sebo tuguja hana tla. Kēme nēgeme sebo sibu lo jelê tetokwakla na Krit afayo elê tuja. Na sebo Krit afayo flelu jwa tabo elê tuja, Salmone hwetu li elê tuja.

⁸ Na sebo kê afayo mëglêbo elê alabuju tujukefēya. Na sebo li afloko elê mana fwa tla. Kê aflokobê weniji melê, “Lale Ku Tako.” Bu Lasea lifate li mēta lēbe.

⁹ Na kwe, lebutako olê wafi mutuju na Gotome hi jwa tafa mētletlabê olê mata wafi tuju. Na nutu feilawa sosogli lēglebê yeme wafwa tla. Kēme nēgeme, Pol megali tlome,

* **27:2** Feilawa lowene ho, melowene lamētla, “Luk bu kê gali yahi tle na ebê gali melêgebe kēme lēle, ‘Sebo.’”

10 “O sibu lo mago enëne, sobo aholokwane elo. Bo melë lowene nanelë, sebo eli nugujana, kwe sebo alëgeme tēbo niglitayame. Na kwe kë sibu lo na lebutako wesibi tēbo mëgleme. Wesibiwa tēbo mëgleme nane. Weye. Sebo fli kë mëta gigli nëglame.”

11 Kwe wame home boblo mogotomabë enënebë eso ho, Polbë gali aholokwane hana tlole. Bu sibu lo bolijayabë lowene na sibu lo kë asë tēglelëlebë hobë lowene esogo tlelëtëme.

12 Ebë sibu lo këkesi labu kë nëgebë, lale tabo nane. Tako flelubë olë ligisi nëgena, sibu lo flelume habëna ëho lëglemene? Flelu sibu lome bubluju logotleme. Këme nëgeme lebutako ho, sibu lo mëta kë tafa mëtlabë, gali sle mototla, kë lifate kile namëglame. Bu melowene mëtla, “Sebo ebë lifate kile nëlame na Finiks lifatewa najame. Na kë lifate mëta, tako flelu ligisi olë tafa nëlame. Bale, fwa nugulame nawa o hanane.” Finiksbë sibu lo këkesi tala Krit afayo nëgemowe mëglëbo elë lëbetëme. Na sibu lo kë tēbo lotokwefëmebë flelu, kë belëme fe hana lulekefe.

Labasagli flelu tako nutu mëta huju tle

13 Negemowelë mago flelu tisi na bu tako flelu nane. Këme nëgeme, bu melowene mëtla, “Sebo Finiksbë sibu lo këkesi labuwa lalowa nugujame.” Këme nëgeme bu sibu lo kë fa logotlebë hobota tabo ainë buhe mototla na bu kë tala kile mëtla. Na Krit

afayobë helefo mëglëbo mëglëbowa mana mutuja.

14 Bu mutujabëë, na hokweinawa Krit afayo elë mago labasagli flelu tako mana tisi. Bu kë flelu mefë lamotla, “Nëgetuje elë mago flelu.”

15 Na kë flelu sibu lome feilawa bēbē totle na ku takowa fo tētagule. Sibu lo mëta kë wege mëglabë ho bu sibu lo yelu, flelu kë belëme tigusibë elëme yafe swaya mototla kwe hanane. Flelu bume tako boblo metotome. Këme nëgeme bu flelubë tolewa esogo mëtlelëtla. Na sibu lo ku tako elë mana fo fowa tētagule.

16-17 Sebo Kauda afayo nëgemowe mëglëbo elë tuja. Na kë tala tako flelu hanane. Na sibu lo mëta kë wege mëtlabë enëne, sibu lona kë ki tokweijabë ihe, sibu lo elo li elë tako afutukuna ki motokweija. Na sibu lowa mana ki motokwaka na tabana tafu mëtëtagujaya. Na bu tatakotaba glo mëtla. Na sibu lo lokwalëfe elë blou mototolelëma na mana kë tabana sibu lo tafu mëtëtagula, flelu kë sibu lo yayei logotlelime. Bu Afrika lifate li mago tu lokwalëfe mago yenëba mëta lesilime, uli memëtla. Këme nëgeme sibu lo kë asë mëglelëmebë selë ki mëtëtëkekëya na bu flelubë tolewa esogo mëtlagutla.

18 Fleluna, nutuna sibu lome feilawa boblo mototlo. Këme nëgeme, jowa klabë tla na sibu lo mëta kë wege mëglabë enëne, fli wesibi

nutuwa sisike mëtla, sibu lo fogolego nalëgleme.

¹⁹ Tële olë wamutuju na aona olëbëna bu sibu lo kë asë mëglelëmebë selë fli na selë kë mëta kesi mëglebë ti flina nutuwa sisike mëtëtëkaka, sibu lo fogolego nalëgleme.

²⁰ Lebutako olë sebo klijina, sëgetobana hwi hana noloma. Na tako flelu seme sibu lona feilawa bebë tëtäguna. Këme nëgame, sebo melowene hana nëla, “Sebo tuja ato nëtabëyame.” Weye. Sebo melowene nanëla, “Sebo iniwa gigli nëglame.”

²¹ Lebutako olë bu iniwa hi jwa tafa mëtla. Na tokwafe, Pol huju tle na ku mëta tlibe na bume megali tlome, “Sobo bobë gali esogo tëglelëtë nabë na Krit afayo kile jwa nëlame kwe seme ebë tëbo olë esune hana lëglëname fene.

²² Kwe bo some gali nëlëyo, sobo ebë tëbo olëme feilawa asa tutune eletelo. Semago ho li hana gli lëgleme. Kwe sibu lowa tëbo lëgleme.

²³ Bo Gotome fwa tafa nëglekefëtëlëbë ho. Na Gotome fwa lotu nëglekefëtëlëbë ho. Èje klabë, Gotobë ensel bobë lime lilikakitenë,

²⁴ na megali lolonë, ‘Pol ju ebë wesibi kë fata lëglebëme uli asa ele. Ju tokwafe Rom lifatewa tuhu eguleme na Sisarbë naba lime elibeme. Aholokwane ele. Goto some lëgaitome. Na iniwa ho juna sibu lo mëta kë tafa egelobë bu gigli hana mëglame.’

²⁵ Ensel megali loglonëme nëgame na bo some këme gali

nëlëyo, sobo uli asa elo. Bo Gotome melowene nanëletelë, ‘Iniwa wesibi bu bome fene gali lolonë, bu melë fata mëgleme.’

²⁶ Kwe flelu ebë sibu lo lëgehuleme na li afayobë yenëba mëta bubluju luleme.”

²⁷ Na kwe sebo kë nutu mëta tëtäbëyabëë, olë këniji latla we ita aona. Kë nutu mëtë lamotla Mediterenian nutu. Nilifu klabë kuna, sibu lo mëta kë wege mëglabë enëne melowene mëtla, “Sibu lo li afayo belë fwa lëgleme lololi lalëlefe.”

²⁸ Këme nëgame, hobota tabo wesibi taba heletabo mëta kesi mototla na yenëba mëgëselëlabëme nutuwa tuku mëtëtëkaka na yenëba këna mëtëselëla. Na ita buhe mëtetofakla na bubë lëlekuju tabei ebë këniji niliafewe. Na ita sibu lona kli mëtëkaka na ita yenëba këna lëlekuju mëglabë wesibi tuku mëtëtëkaka. Na ita buhe mëtetokwakla na bubë lëlekuju tabei ebë këniji aowafewe. Këme nëgame bu melowene mëtla, “Yenëba lololi tei notlafe.”

²⁹ Na bu uli memëtla, sibu lo, aniji mëta bubluju lëglelime. Këme nëgame bu sibu lo këna hobota lëglebë ainë nilina, sibu lo elo elëme sike mëtëtëkaka, sibu lo kë mëta fwa lëgemule nalëgleme. Na bubë gotome gali tuku mëtletëma, hokweinawa feti nalëgleme, bu hwi sle namëkakame.

³⁰ Sibu lo mëta kë wege mëglabë ho, sibu lo kile

namëglame fene, alëge hohwi mëtëtatla. Këme nëgeme bu sibu lo mago ihe tabana nutu mëta tuku mëtëmalitaya. Na mesogëna mëtla, “Sebo kë ihena, ainëna taba eso, sibu yelu mëta kë kesi nanokoujame na ainë mana nutuwa sisike nëtëkakame.”

³¹ Kwe Pol wame home boblo mogotomabë enënebë eso honame wame home boblo mogotomabë enënename megali tlome, “Kë enëne sebõna sibu lo mëta tafa jwa nëglana kwe sobo gigli egelome.”

³² Këme nëgeme, wame home boblo mogotomabë enëne tële taba, ihe mëta kë kë kesi mëtlabë, tëtëlë mototoma. Na nutu ihe mana fo tëtagwi.

³³ Feti lololi tle. Na Pol iniwa home, hi wesibi hi namokoujame anisasana gali tlome. Na bu megali tlome, “Sobo we ita nilina olë tafa sle hana telo, tutune mëta fwa tafa tokweijo na hi wesibi hana hi tokweijo.

³⁴ Këme nëgeme bo some anisasana këme gali nëlëyo, sobo hi wesibi mana hi naekoujome. Some kë hi wesibi afutuku namëglelëyome. Sobo aholokwane elo. Semago ho li ato li hana tëbo logotleme, sebo iniwa lalowa nëtabëyame.”

³⁵ Na Pol kë gali yawe tlole na bletë nage fa totle na bu kë enënebë naba lime Gotome lalë gali tlole, “Ebë bletë nage, yaha fëyeme enënëne.” Na bu bletë nage fufu totle na mana hi tle.

³⁶ Iniwa ho bu Polbë gali aholokwane mëtla na bubë tutune lowene, sle tletëme. Na bu mata hi wesibi glo motokouja na hi motokouja.

³⁷ Sebo sibu lo mëta kë tafa tëglabë tabei bu këniji 276 ho.

³⁸ Sebo hi tokoujabë, imo soslo mëtëtagujaya. Na sebo witi liji begë manogwa nutuwa sisike tëtëkaka, sibu lo fogolego nalëgletëname.

Sibu lo tëbo tle

³⁹ Olë wafeti tēbe na sibu lo mëta kë wege mëglabë ho yenëba hwi mëtelokwakla. Kwe kë yenëba mëtëselëla hana mëtla. Na bu wakona tëglebë yenëbabë hwi mëtelokwakla. Na bu gali mëtla, “Sebo ebë sibu lo, ebë wakoha tabo elë manehula na kë mëta fla nulelëlame.”

⁴⁰ Këme nëgeme bu ainë mago taba tëtëlë mototoma na nutu mëta hune mëtëkaka. Na bu sibu lo këna kë asë mëglelëlabë yegu mago taba totohwa mototoma. Na bu sibu lo kë asë mëglelëlebë selë kli mototokwakla, flelu hoho nalogotleme. Na sibu lo yenëba elë mana lujume.

⁴¹ Kwe sibu lo yelu, nutu lokwalëfe mago yenëba mëta lalesiliwa totole. Na nutu bu sibu lo elo bubluju totle.

⁴² Na wame home boblo mogotomabë enëne, bu kalabusu home hao mëtletëma, bume mogo nalë tëtëkle namëgëtayame fene. Bu fofolou mokoujame na mana mëlëboukakujalime.

⁴³ Kwe wame home boblo mogotomabë enënebë eso ho Polme lëgaitalëme tole lëgletleme nëgeme. Na bu

wame home boblo mogotomabë enëneme melëkle totome, “Kalabusu home mogo nalë asa tètëkle eto. Matëbe.” Na bu seme iniwa gali tlon, “Sobo foloume lowene lalo kwe sobo afina lalowa okokli ekako na yenëba elë folou ekoujome.

⁴⁴ Na sobo fli, sibu lo mago agwihe glo elome na këna some nutu mana yenëbawa fo lëtagujome.” Sebo melë tla na sebo iniwa yenëba elë fëfe tula. Na semago liha hana tëbo tliita.

28

Pol bu Malta afayo mëta tafa tle

¹ Sebo iniwa helefowa fëfe tla. Na kë lifate mago enëne seme megali lamotlona, “Ebë afayobë weniji Malta.”

² Këbë lifate mago enëne seme fleflesuna mëtaitana. Tu mana tetokëfe na kë lifeku tlilego metle. Këme nëgeme bu ahoju këme hoho mëtla. Na bu seme iniwa ahoju labuwa mëtlenuna, sebo ahojume sa nanugulame.

³ Pol ahoju hoho ti glo tle na ahoju mëta gogwa tole. Na tëbo taiju, kë ahoju hoho ti kufe ke telulamë. Na kë taijume ahoju atëte tësëlëkakë. Na latohowa tëkakëyamë na Polme toba mëta tëtou tlële. Na mana kesi tokwakëyatle.

⁴ Na kë lifeku mago oneho kë taiju Polme tobame kë tëtou tēglëlebë mehwi motlotla, tobame mana kesi tlatle, na bu blalo megëgali lamëtla, “Hwi elolo. Ebë ho

kë nëgebë, mogo nalë kë tètëkle tètakëfëbë ho. Bu nutu mëta gli hana tle. Kwe tëbo loweneme kofayame kë tëbo lotokwefëmebë goto, bu kë home mogo nalë tēke nalaglolome.”

⁵ Kwe Pol kë taijume ahoju elëme bile tetokwakë na bume li wesibiha fata hana tletle.

⁶ Oneho bu melowene lamëtletla, “Polbë ato sësë lëgletlemewa o bu hokweinawa mogo nalë letigomewa.” Na bu Polme mana yafe hwi motlokwefla. Kwe li wesibiha bume fata hana tletle. Këme nëgeme bu lowene hihijika mëtla na bu megali mëtla, “Kë ho ebë li goto tekwe nëge!”

⁷ Këbë ahoju labu lime kë tēgëbebë life, ebë kë afayobë eso hobë life. Bubë weniji Publius. Kë ho seme bubë lowa nëno tle na bu seme aona olë tafa tlenëna na ululu sle memutëtana.

⁸ Publiusbë bolijaya tako tëbo latle. Bu ato ahojutena, aliji tuna melatle. Na Pol bu belë tuju tle na Gotome takune tlole. Na bu toba gwa totatle na bubë ato sle tletle.

⁹ Pol bu melë tle, na kë afayo mago atowelili enëne fli mata Pol belë mitisiya na Pol bubë ato mata sle totometëme.

¹⁰ Iniwa oneho bu seme fleflesu mëtletëna na seme feilawa wesibi mana mëtlëna. Sebo aona yeme Malta afayo mëta tëtäbëya na sebo bume hune nëglame kofene. Na bu seme hi wesibi mëtlëna. Na sebo kë afolo tēgletëmabë wesibi

mata mētlēna. Na bu sibu lo mēta gogwa mētletēna.

Pol Rom lifatewa tuhu tule

¹¹ Sebo li sibu lo mēta fēfe tla. Kē sibu lo kē nēgebē bu tako flelu yemena kē afayo mēta temule. Bu Aleksandria lifate mago. Na Sus gotobē tlemalē iko nēbalebē amtētomba tina kē blēge blēge mototomabē, sibu lo yelu mēta mētēbetēme. Na sebo kē lifate kile tla na tuja.

¹² Sebo Sirakyus lifatewa fwa tula na kēme aona olē tafa tla.

¹³ Na sebo Sirakyus lifate kile tla na Regium lifatewa fwa tula. Jowa klabēwa tla na mana nēgemowelē mago flelu tisi. Kēme nēgeme sebo Regium lifate kile tla na sebo tēle olē tuja na Puteoli lifatewa fwa tula.

¹⁴ Na kē lifate mēta, sibu lo mago fēfe tēkaka. Na Kristen oneho flime esune tlēma. Na bu seme, buna tafa nanēglame takune motlona. Na sebo buna tobali ita tēle olē kēniji tafa tla. Na ita sebo bume hune totoma na Rom lifatewa tuja.

¹⁵ Kristen oneho, Rom lifate mēta kē tafa mētlabē, gali aholokwane mētla, “Polna kē misiya.” Na bu seme alēgeme esune mēglēnabēme mitisiya. Fliye bu seme Apiusbē wesibibē hihijika lifeku mēta esune mētlēna na fliye Aona Ni Lo kē mēta mēglibebē lifeku mēta esune mētlēna. Pol bume yafe hwi tlome na bu tako fleflesu metle na maninibona sle tle na

Gotome fleflesu gali telokwakle.

¹⁶ Sebo Rom lifatewa fwa tula. Na Rom lifate mago gavmanbē ho megali tle, “Pol buwa li lome lalowa tafa lēgleme kwe wame home boblo logotomebē ho li bume mana sei lēlēkefētleme.”

Pol bu Jisasbē gali Rom lifateme tē totle

¹⁷ Pol Rom lifate mēta aona olē tafa tle, na bu Israelbē afenēbonibē eso enēneme mana gali telokwakēme, bu belē migisitla namēglame. Na bu mitisitla na Pol bume gali tlome, “Bobē afani, bo sebobē enēneme hana tēbo totomē, na bo sebobē semleninobē gali hana boblo totlē. Kwe Israelbē afenēboni, bome Jerusalem lifate mēta wakalabusu mētētana. Na bu bome Rom lifate mago gavmanbē toba mēta gwa mētētana.

¹⁸ Na kwe, Rom lifate mago gavman, Israelbē afenēboni, bome blawa kē so mētētātēnabē gali aholokwane motlona. Kwe bobē li fēye wesibiha, hwi hana motlotēna na megali hana mētla, ‘Bume lalowa, mogo nalē tēkle etlo.’ Weye. Kēme nēgeme bome kalabusu lo mago jine namēgelēkakēname fene.

¹⁹ Kwe, kē Israelbē afenēboni, bome kalabusu lo mago jine mēglēnabē gali boblo mototla. Na bo gali fēye mago fa nogotlēmene? Kēme nēgeme, bo megali telē, ‘Bo metole nanelē, bome blawa kē so mētētātēnabē gali, Rom lifate magobē eso

ho, Sisar, saaholokwane loglonëme.' Kwe bo kë Israelbë afenëbonime, tëbo gali noglomëme nane tisi.

²⁰ Këme fwa nëgeme bo some këme gali nolëyo, bome kë kalabusu mëgëtanabë wesibi lowene sle naegletelome. Tako tafa watokwëija, na sebo, Israelbë afenëboni, seme lëgaitanabë home, Goto jine gali kë lëgelëbaklebë home, mana ekë hwi nëlekefëtla. Na bo melowene nanelë, 'Goto jine gali kë lëgelëbaklebë ho wafi tisi.' Na kë loweneme fwa nëgeme, bome këme kalabusu mëtëtana."

²¹ Na bume gali motlola, "Judia provins mago ho, bu jubë loweneme pasëna seme hana gali mëtelëbakëna. Na Judia provins mago ho li, sebelë, jubë li tëbo galiha, hana tehitëna.

²² Kwe lebutako enëne, li life li life mago megali lamëtkefëya, 'Jisame lowene sle mëglekefëtlabë enëne bu tëbo enënemu.' Këme nëgeme, sebo jubë lowene mago lowene aholokwane sle nanëgletëyome."

²³ Na kwe bu olë li aniji motlola, Polbë gali aholokwane namoglolabëme. Na kë olëna, lebutako oneho, Pol kë mëta kë tafa lëglebë lowa loko motokweija. Na Goto bubë onehome, eso home, kë tafa lëgletëmebë galime, Pol okokwe sle tlome. Na bu, Moses, Jisabë gali kë yahi tëgletlebë, galime mata okokwe tlome. Na Gotobë

lowene mago gali kë të mototkweflabë enëne, Jisabë gali kë yahi mëtletlabë galime mata okokwe tlome. Pol metole latle, oneho melowene namëglame, "Jisame kë gali mëgletlabë gali nëgali galimu." Pol bu olobalëmu oto tëglebë na olë ki na loko metleblemu.

²⁴ Na kwe fli enëne Polbë gali melowene sle lamëtletla, "Bubë gali nëgali gali fe." Kwe fliye melowene hana mëtla.

²⁵ Na bu blalo momata mëtlelogwaya. Na Pol bu li galime mana gali tlome, "Gotobë Amtëtomba, Gotobë lowene mago gali të totokweflebë home, Aisaiame, gali metëglële latle. Na kë gali kë nëgebë nëgali gali mu. Na Aisaia kë gali sebobë semleninome gali tlome. Bu megali latlole,

²⁶ 'Ju kë oneho belë ejume na ju megali elomeme, "Sobo gali itaita aholokwane eglekefëtelome kwe sobo kë gali wayobë lowene sle hana egetelome. Na sobo itaita hwi eglokweflome kwe sobo hwi sle hana eglolome."

²⁷ Kë enënebë lowene wakalëlego tletëme. Na Gotobë gali aholokwaneme wafi tëboijiwa mletla. Na Goto kë totomebë wesibi bubë nabana hwi moglomabëme tëboijiwa wamla. Kwe bu Goto kë totomebë wesibi hwi sle moglomana na Gotobë gali aholokwane sle mëglana, na kë wayo gali lowene sle mëgletlana, kwe bu tëbo lowenebë kile mlame na

aholokwana ti mlame. Na bu bo belë misiyame na bo naitamëme na bume sle notomëme.”

²⁸⁻²⁹ Na Pol megali latle, “Sobo sobobë semlenino fenene, Gotobë gali aholokwaneme metëbojiwa lalo. Këme nëgeme bo some këme gali nëlëyo. Goto onehome nëno lëglebë gali, Israelbë afenëboni mëtabëya jwa mëglabë enëneme wafi telëkakëme. Kë enëne bu aholokwane mëglame.”

³⁰ Pol bu, li lo mëta, Rom lifate mëta, tële tlibutu tafa tle. Na bu kë lo bolijayame baliti tlëkefle, bu kë lo mëta tafa nalëgleme. Iniwa oneho, Pol belë kë mitisikefëtlabë, Pol bubë lowa fleflesuna nëno tlekëfe.*

³¹ Na, Goto bubë onehome, eso home, kë tafa lëgletëmebë galime Pol okokwe tlokwefëme. Na bu Tako Ho, Jisas Klaisbë galime lebutako onehome okokwe tlokwefëme. Na bu kë gali tëme uli hana tle. Na ho liha bume lëkle hana totle.

* **28:30** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Pol bu kë galime wagali tle. Na Israelbë afenëboni bume kile mototla na mutuja. Na bu blalo kë galime feilawa momata mutula.”

Filipai **Polbë pasë, Filipai** **onehome kë yahi** **tëgletëmebë**

*Pol Filipai lifate mago Kristen
onehome fleflesu tletëme,
bume kë mëtaitalabëme*

¹ Bo Pol na Timotina, sebo Jisas Klaisbë wege ho. Sebo some, Filipai lifate mago Kristen onehome na lotu mogoutatlabë eso enënename na lotu wegeme kë mëgaitobë enënename pasë ekë yahi nëkeketëyo.

² Bo sebobë aya Gotome na Tako Ho Jisas Klaisname itaita takunë nanolokwefëmë, some maninibo tli lowene namëglëyome.

*Pol Gotome fleflesu galina
gali tlole*

³ Iniwa olë, bo some kë lowene nëglekefëtëyobë, bo bobë Gotome megali nanolokweflë, “Bo bobë Gotome mefleflesu gali nanolokweflë, yahala fëyemene.

⁴ Iniwa olë, Goto some lëgaitobëme, bo gëgali nanëlelëkeflë, bo fleflesuna gëgali nëlelëkeflë.

⁵ Automemu bo sobelë Jisasbë gali kë tëgehilebë, sobo bome kë gali tëme taitana, na sobo bome mana ekë aitagina. Na bo some tako fleflesu këme nëlekefëtëyo.

⁶ Bo melowenemu nanelë, Goto sobobë lowene mëta lale tafa lowenebë gwa tëtätëyo. Na kë lale tafa lowenebëme mana lalaitakefëyo. Na Klais Jisasbë ligisi olëna bu kë lowene mana slemu sle lëgëtatëyome.

⁷ Sobo bobë maninibo mago mu. Këme nëgeme, bo some këha lowene nëgletëyobë ebë lalemu. Kë wege, Goto bubë tolenawa, bome kë tëglënëbë, sobo bona kë wegeme iniwa kahwë slemu latla. Bo kalabusu lo mëta kë tafa nëgelëbë o bo kalabusu lo mëta tafa jwa tëgelëna, bo onehome, Jisasbë gali esobëme, gali sle tlomë. Na bo Jisame kë lowene sle namëgletlabë ëhwati gali onehome okokwe tlome bu Jisame lowene slemu namëgletlame. Na sobo bona mana kahwë sle tëglana.

⁸ Bo some iniwame maninibomu nanëletëyo, Klais fene maninibo tletëyo na bo some ita hwime këme tole nëletëyo. Goto lowene lalële, bo some nëgali gali gali nolëyo.

⁹ “Bo Gotome megali nanolokweflë, fli enëneme tole egletemobë lowene, sobobë lowene mëta, takowa nalëgebetëyome. Na kë lowenebë, Gotome kë lowene sle egletelobë lowenebë, some laitome. Na sobobë lowene lalowa nalëbetëyome. Na sobo kë lowenena wesibi melowene naegletemome, lale wesibi o tëbo wesibi.

¹⁰ Sobo melë egelona, na Klaibë ita ligisibë olë fo lokoketlena kwe Goto some mehwi lëglëyome, lale onehomu. Na bu some li fëye tēbo wesibiha hana hwi loglotëyome. Na sobo iniwa lowene, lowene sle naegletemome na fëye lowenebë lale lëgebena kë lowenebëwa esogo sle elelëlome.

¹¹ Na iniwa lale lowene Jisas Klaibë mago kë migisibë, bu somëta nohwa mëgëbetëyome.” Na iniwa oneho bu kë lowene somago hwi mololame na Gotome fleflesu mletlame na megali mlame, “Goto bu tako homu. Iniwa wesibi bubë lokwalëfe mëta fwa mëbetle. Bu lale mu.”

Pol kalabusu lo mëta tafa tēglena, fli ho Jisas Klaibë lale gali mana tē mëtëtagula

¹² O Kristen afani na oneglëni, bo metole nanelë, sobo melowene egelome; ebë wesibi bome kë fata mëtëgletenëbë, bu Jisasbë lale galime lëkle hana mototle. Weye. Kë wesibi, Jisasbë lale gali fli oneho betelë fifiji tēglebëme lataitale.

¹³ Iniwa wame home boblo mogotomabë enëne, eso ho Sisarbë lo mëta kë sei mëglëkeflabë, na fli enëne mata, bu melowene lamëtla; bo Jisas Klaibë gali tē nëtakefëtelëme nëgëme, bome kalabusu lowa këme tuku mëtla.

¹⁴ Na lebutako Kristen oneho bome melowene mëtletëna; bo kalabusu lo mëta tafa telë. Na këbë lowene bume Jisame

anisasana lowene sle mëgletlabëme taitame. Na bu uli mëtlëkëla na Gotobë gali anisasana tē mëtëtatla.

¹⁵ Fli oneho, mehwi lamëtla, fli oneho bobë wenijime fleflesu lamëtletëna. Na bome tēbo mëgëtanabë lowene fa mototla na bobë weniji lëlë mogotlabë lowene mata fa mototla. Na bu metole lamëtla, oneho bubë wenijime fleflesu namëgletëmame. Na këme fwa nëgëme, Klaibë lale gali këme tē mototla. Kwe fliye bu lale lowenenamu tafa mla na Klaibë lale gali këme tē mëtatla.

¹⁶ Kë oneho bome tole lamëtletëna na melowene lamëtletëna, Goto bome melëme aniji tlonë, Klaibë lale gali esobëme, onehome okokwe sle nanoglomëme. Na bume lebotane sle nëtatëmëme, kë gali nëgali galimu. Na këme nëgëme bu Klaibë lale gali këme tē mototla.

¹⁷ Kwe bobë weniji kë lëlë mogotlabë oneho metole lamëtla, fli oneho bume melowene namëgletëmame, “Bu lale enënemu.” Na bume fleflesu na mletëmame. Na bu Klaibë lale gali këme tē mëtëtagula. Kwe bu lale lowene nane fa mototla. Weye. Bu metole lamëtla, bo kalabusu lo mëta kë tafa nëgelëbë, bo hobota feilawa fa nanogotlëme. Këme nëgëme bu melë këme mëtla.

¹⁸ Kwe oneho Klaibë gali lale lowenena tē mogotlana o tēbo lowenena tē mogotlana, bo këbëme welili

hana nëletemëme. Bo melëme fwa fleflesu nelë, bu Klaisbë lale galiwa të mëtagutlame. Na kwe këbë bome fleflesu lëgëtanëme.

Pol melowene latle, “Bo tuja ato mana tafa nelëme na Filipai lifate mago Kristen onehome naitamëme”

¹⁹ Na bo kwe fleflesuwa nëglekefëme. Bo melowene nëgelëme nëgëme, Iniwa olë sobo Gotome takune elokweflo, bome lëgaitanë nalëgleme. Na Gotobë Amtëtomba, Jisas kë tëglë nabë, bobë lowene kalëlego lalëtakefëtenë. Na këme fwa Gotobë bome litanëme na bo kalabusu lo kile nelëme na manawa ho tafa nanëgelëme.

²⁰ Këme nëgëme bo metole nanelë, bo li tëbo wesibiha hana nëgelëme, na bo këme tiniji nëlëme. Hanane. Kwe bo metole nanelë, elë na tokwafe bo Gotobë lale gali tëme uli hana nëgelëme. Bo gli nëgelëna o tuja ato mana tafa nëgelëna, iniwa wesibi bo melë kë nëgelëbë, Klaisme fwa nëlelelë. Na kë iniwa wesibi bume weniji tako melëleme.

²¹ Bobë lowene melë lëgëbelalële, Bo tuja ato mana tafa nëgelëna, iniwa wesibi bo melë kë nëgelëbë, kwe Klaisme fwa nëlelelë. Na bo gli nëgelëna kwe bo lale tafa fa nogujetlëme na bo ëje kë tafa nëgelëbë tafame boblo logotleme.

²²⁻²³ Kwe bo tuja ato mana tafa nëgelëna, bo melowene nanelë, bo feilawa onehome, Klaisbë lowene esogome

mëglelëtlabëme okokwe noglomëme. Bo gli nëgelëna o tuja ato mana tafa nëgelëna, bo melowene hana nelë, fëye lowene esogo nëglelëlelëme? Bome kë tële lowene, tabaha kiki mële. Bo gli nëgelëbëme. Na Klaisna tafa nogulobëme, tako tole nanelë. Kë kwe lalëmu.

²⁴ Kwe bo some lowene nëgletëyome nëgëme na bo melowene këme nelë, bo tuja ato tafa manelë, some nëgaito nanëgelëme. Kë kwe lalowamu.

²⁵ Bo melowene slemu nanelë, bo some nëgaitobë wege mana lëbe. Këme nëgëme bo melowene nanelë, bo tuja ato mana tafa nëgelëna na some feilawa nëgaitome, Jisame esogo eglelëlobë lowene, lowene sle naegletelome na këbë loweneme fwa fleflesu naegelome.

²⁶ Na ita bo sobelë nigisina na sobo bome hwi enonana, sobo Jisas Klaisme fleflesu eletelome, bu bome sobelë ita leglesunëme nëgëme.

Pol, Filipai lifate mago Kristen onehobë lowene kalëlego tëtatëme

²⁷ Tako wesibi melë. Sobobë asë sle etlome na Klaisbë lale lowenewa esogo elelelome. Sobo melë egelona, na bo some hwi noglokwakijona o bo tafa nëgelëna na galiwa aholokwane negletëyona, kwe bo melowene nëgletëyomemu, sobo Jisame lowene sle lowene mana esogo elelekeflo na sobo

yonane mēta mana tafa elekefo na jowa lowene nawa Klaisbē iniwa wege fa etlome.

²⁸ Bo some megali nolēyo, some kē wame mēglēyobē enēneme uli asa eletemo. Bu some mehwi mēglēyona, sobo bume uli hana eletemo, kwe bu melowene namēglame, Goto seme tēbo lēgētanamefe. Kwe Goto some ululu sle lēgētome na lale tafa lēlelēyome.

²⁹ Aholokwane elo. Goto some tēle lale lowene wafi tlēyo. Li lowene, Jisas Klaisme lowene sle eglotelobē lowene. Na li lowene, Klaisme lowene sle eglotelobē mēta hobota eglibe telobē lowene.

³⁰ Sobo ētani bome wafi hwi tlonā, bo Jisame kē lowene sle nēgletelēbē wame mēta tafa telē. Na sobo bobē gali waaholokwane telo, ēje bo kē wame mēta mana ekē nētabē. Na ēje sobo elili kē fa egotlobē, sobo melowene egelome, bona iniwa Jisame kē lowene sle nēgletlabē wame mēta nētabēya.

2

Klaisbē lowene fene tēbetle, melowene egelome

¹ Klais sobobē lowene kalēlego malētātēyo. Bu some feilawamu tole lalēletēyo na kēme nēgeme sobobē lowene lēgēbetēyo sle kēme lēle. Sobo Gotobē Amtētombabē lowene mēta tafa egelome nēgeme, sobo flime kēme maninibo eletemo na sobo flime mata kēme tole eletemo.

² Kē gali nēgali gali nēgebē kwe sobo melē saelo, sobo iniwa jowa lowenenawa yonane elome. Na sobo iniwa jowa lowenenawa, ho flime tole eglitemobē lowene esogo elelēlome. Na sobo iniwa jowa lowene nawa tafa elome. Sobo melē egelona kwe sobo bobē lowene feilawa fleflesu egētātēname.

³ Sobo some fwa asa lowene elo. Na sobo fli enēneme melowene asa eletemo, sebo bu fene kēha enēne nane, sebo kwe lalemu. Sobo flime salokwalēfe eletemo, na bume melowene eletemome, bu sebo fene kēha nane bu kwe lale enēnemu.

⁴ Sobobē wesibiwa asa ululu sle etomo. Weye. Sobo fli enēnebē wesibi mata ululu sle egotometemome. Na bume aitamome tafa sle namēglame.

Klais atwati hoha kē fata tēglebēye, bume fwa hana lowene tle na Goto bume tako fleflesu kēme tletle

⁵ Sobobē lowene Jisabē lowene fene tēbetle, kēha salēbetēyo. Bubē lowene melē:

⁶ Iniwa wesibi fata jwa mētlēna Jisas bu Goto fene metafa latle. Kwe bu Gotoha tafa lēglebē lowene tēgehōle hana tle. Weyewa.

⁷ Bu Gotoha tafa tēglebē lowene kile tle na home manawa wege lēgletēmebē hobē lowenēha tēbetle na life mago hoha fata tle.

⁸ Na oneho bume mehwi motlola, life mago ho fenene.

Na bu bume fwa hana lowene tle kwe iniwa onehome lokwalêfe tletême na Gotobê galiwa esogo tlelêtle. Bu melê tle na bu mana gli tle. Bu kê gli tēglebē, bume tēbo homeha ti mēta bu mētla.

⁹ Bu mēle tēgleme nēgeme na Goto bume kēme fleflesu tletle. Na bume kēme no tlēle, buna eso home weife tafa namēgelome. Na Goto bume iniwa wesibime eso home tafa lēgletēmēbē weniji tlēle. Kē weniji kē nēgebē iniwa onehobē wenijime boblo lalotometēme.

¹⁰ Bu Jisame kē weniji kēme tlēle bu metole tēgleme nēgeme. Iniwa hēhēna wesibi, Heven life mēta kē mētābēbē, na life mēta kē mētābēbē na life lokwalēfe mēta kē mētābēbē, bu iniwa Jisame sēkefo miti tafa mletlame. Na Jisasbē lokwalēfe mēta fwa metabētlame.

¹¹ Na bu iniwa megali mlame, “Jisas Klais bu tako homu. Iniwa wesibi bubē lokwalēfe mēta fwa mēbetle.” Na kē lowenena, bu melē lowene olafa motlame, “Goto bu lalena Tako Ho mu.”

Sebo elulego tabo fene menēgētābēame. Onehome, Goto belē lugujubē alēge lebotane nanēgētātēmame

¹² O yabeni. Bo sobona ētani kē tafa tēglabē, sobo bobē gali aholokwane tlonā na esogo tlelēlo. Na ēje bo sobona nane tafa nēla. Bo kakē tafa nulē. Kwe bo some megali nolēyo, ēje mata sobo bobē gali saesogo sle elelētēna. Goto some bubē maninibo nawa tēbo lowene

mago wafi nēno tle. Na sobo tutune lowenena bume fwa lokwalēfe etelome. Na sobobē lowene sle etomome. Na bu kê gali sle tēglebē wesibi fame fwa, afutukuna wege elekefētēmome.

¹³ Melēme nēgeme. Goto some, bubē lowene esogo eglelēlobēme huhuju lalētakefēyo. Na bu some afutuku lēlelēkefēyo na lalaitakefēyo, bubē tolewa esogo naeglelētēlobēme.

¹⁴ Na sobo iniwa wesibi melē kē egotomobē, sobo falego tafa naeglelēmome.

¹⁵⁻¹⁶ Sobo melē egelona kwe sobo Gotobē nēbalemu tafa egelome. Na oneho some li fēye wesibiha hwi hana moglotēyome. Na Goto mata some li fēye wesibiha hwi hana loglotēyome. Na sobo Klaisbē lalē gali egehōlo sle elome. Na sobo ebē life mago tetēbo lowene kē esogo mēglelēkeflabē onehobē naba li mēta kilego tabo mēta lamo fene u elamē. Kēme nēgeme, sobo melē egelona, na Klais onehome hwi sle loglōmēbē olē fata lēglēna, na bu some li tēbo wesibiha hana hwi loglotēyona, kwe bo kēme tako fleflesu nēgletēyome. Na kwe bo melowene nēgelēme, iniwa wesibi, bo sobobē ku mēta melē kē togotomēbē, blawa hana kēkē telē.

¹⁷ Bo lowene hana nelē, Tokwafe ho bome mogo nalē tēkle mēgētāname nawa o hanane nawa. Fēyeme tēkle mēgētānamene. Melēme nēgeme bo Jisasbē gali tē nēgētāukefētēlēmē nēgeme

na sobo na fli enëne kë gali lowene sle eglételome nëgeme. Kwe melë nëgena kwe bo fleflesu nëgelëme.

¹⁸ Na sobo mata fleflesu elo, sobo bona fleflesu nëglame.

Pol, Timotime Filipai lifatewa jine lëgelëkaklebëme, gali lële

¹⁹ Tako Ho Jisas bu tole lëglena kwe bo Timotime sobelëme hokweinawa jine nëgelëbaklëme. Na ita bu bo betelë lisime, bu bome sobo kë tafa egløbë lowenebëme gali nalëglëkwakinëme. Na bo kë gali aholokwane nololëme na bo fleflesu nelëme.

²⁰ Bobë li mëta, Timotiha ho li tafa hana lële. Weyewa. Timoti bu bona yonane sle nanelo na bona jowa lowene mëta fwa tafa nelo. Na bu some kë maninibo lëglekefëtëyobë maninibo, bobë fene lëbe. Na bu some lëgaitome feilawa lowene lëlekefëtëyo.

²¹ Fli oneho, bume fwa lowene melekefëya. Na bu Jisas Klaisbë wege fabëme feilawa hana tole mletla.

²² Sobo Timotime wafi lowene eletelo. Bu lale homu na bu bume fwa lowene lëglebë lowenebë mëta hana lëtabe. Sobo bume walowene eletelo, bu bome Klaisbë lale gali të nëgëtatëmëbëme lalaitakefënë, nëba bolijayame fene laitakefle.

²³ Këme nëgeme bo bume sobelë jine nëglëlëme këme tole nelë. Kwe bome kalabusu lo mëta fata gali kë lëgletenëbë wesibi afina lowene nëletelëme na bo

Timotime sobelë hokweinawa mana jine nelëbaklëme.

²⁴ Bo melowene nanelë. Tako Ho bome lëgaitanëme, na ho bome kalabusu lo mago jine mëglëname nounou. Na bo mana sobelë nigisime.

Epafroditusme Filipai lifatewa jine lëgelëkaklebëme, Pol gali tle

²⁵ Bo Timotime tokwafe jine nëgelëbaklëme kwe ebë olëna bo melowene nanelë, bo sebobë afame, Epafroditusme afina sobelë jine nelëbaklëme. Bu bona Klaisbë lale gali wegeme wege nelo. Na Klaisbë lale gali të wegebë hobota weife fa notokweflo. Sobo bome lëgaitanëbëme kë jine tēgelëbaklobë.

²⁶ Bu some tako maninibomu lalëletëyo. Na some hwime tolemu lalëletëyo. Na bu melowene lalële, sobo bubë gali waaholokwane tletelo, bu tēbo latle. Na kë lowenebë, bu some maninibo lëgletëyobë lowene, bubë lowene mëta takomu lëbetle.

²⁷ Nēgalimu. Èbame bu tēbo latle na gli lëgleme kofene. Kwe Goto bume maninibo tletle. Na bume gli afe kë tēglebë mago sle totle. Na Goto bume fwa nane maninibo tletle. Weye. Bu bome mata maninibo latletenë, Epafroditus gli lëglebë welili bome boblo lëgëtanëlime.

²⁸ Bo bume sobelë jine nëgelëbaklëme tole nanelë, sobo bume ita hwi

naeglolome na fleflesu eletelome. Epafroditus sobona tafa egelona, sobobë maninibo lowene mana satli lëbetëyome na tafa sle elome. Melë nëgena, kwe bobë maninibo lowene mata tli lëgëbetenëme na tafa sle nelëme.

²⁹ Sobo Epafroditusme, Jisasbë wenijina no elëlome na fleflesu eletelome. Na sobo këha home mata mefë naegotomome, “Lale homu.”

³⁰ Bu Jisas Klaisbë wege fa togotlena, ëjeha gli lëleme. Kwe bu bume fwa nane lowene tle. Weye. Bome tegaitanëbë wegeme fwa, sobo kë jine tëgelëbaklobë wegewa lowene sle tletle. Sobo kakë tafa egulome nëgeme na sobo bome habëna egaitanamene? Këme nëgeme bume këme jine telëfaglo bo belë.

3

Klaisme kë lowene sle mëgletlabë oneho, bu lalemu

¹ O Kristen afani na oneglëni. Bobë lowene mëta li gali mana lëbe. Kë galibë melë. Klais somëta walëtabetëyo, na sobo bume fwa safleflusu eletelo. Autome bo some gali li, pasë mëta wayahi tletëyo. Na bo kë gali some ita yahi nëgletëyobëme, kokasa hana nelë. Ebë gali some lëgaito sle nalëgleme. Ho some sogëna moglëyolime. Ebë gali melë.

² Ato jibo tëtälë gali kë të motokweflabë enënebëme ululu sle saelo. Kë enëne kë nëgebë fifli tabo amale

fenene. Sobo bubë gali asa aholokwane elomo, sobobë lale lowene hihijika mëgletëyolime. Kë tëbo enëne megali lamëlekefëya, “Sobo Judabë afenëbobë tafa sle gali iniwa esogo jwa eglelëlona na ato jibo tëtälë jwa egotomona kwe Goto some lale oneho fë hana logotome.”

³ Kë enëne bu Gotobë nëbalemu nane. Weye. Kwe sebo kwe, Jisame kë lowene sle nëgletlabë enëne, sebowa, Gotobë nëbalemu tafa nëla. Gotobë Amtëtombabë afutukuna, sebo Gotome lotu nëlekefëtla na Jisame mata fleflesu nëlekefëtla. Sebo melowene nanëla, sebo ato jibo kë tëtälë notomabë, kë wesibi, seme Gotobë naba lime lale tafa sle nëglabëme hana lëgaitaname.

⁴ Sobo aholokwane elo. Ato jibo tëtälë gali kë të motokweflabë enëne bu metëtane lamelekefëya. Sebo Judabë afenëbobë tafa sle gali feilawa esogo sle nelelëkefla na ato jibo tëtälë lowene mata esogo nelelëkefla. Na këbë lowene seme Gotobë naba lime sle mëtakefëna. Kwe këbë lowene onehome, Gotobë naba lime tafa sleme mëgaitamena, kwe bo feilawamu tëtane nëgebëmemu na ato jibo tëtälë gali kë të motokweflabë enëneme boblomu nogotomëme.

⁵ Bo ëtani kë esogo tëglelëlëbë lowene, sobo lowene laletelo. Ètani beë bome kë fu tetanëbë, tobali ita aona olë tafa tlenënë na

bu bobë ato jibo mana tlë mëtëtatëna. Bo Israelbë afenëbomu na bo Benjaminbë afenëbo mëta fata telë. Bobë ayana beëna bu Judabë afenëbo. Na bo Judabë afenëbo mago këme tafa nelë. Bo sigli telë na bo Farisi lotu eso enënebë lowene esogo tletëtëmë. Na Mosesbë tafa sle anebo gali esogo tletëlëmu.

6 Bo Gotobë wege fame feilawa afutukumu telë. Këme nëgeme, ëtani bo Jisasmë kë lowene sle mëtletlabë enëneme, feilawamu wame tломë. Onoho bome Mosesbë tafa sle gali esogobëme, hwi moglonana kwe bome li tëbo wesibiha hana hwi moglotëname.

7 Ëtani bo meweniji latelë, këbë lowene lalowa lëbëwa. Bo meweniji latelë, kë iniwa lowene esogo neglelëmëna, bo Gotobë naba lime lale ho tafa nëgelëmefe. Kwe bo Klaismë yafe lowene sle tletelë na ëje bo ëtanifu lowene, tëbo wesibi fene mehwi nanolomë.

8 Bo Judabë afenëbobë tafa sle galime fwa nane gali nelë. Weye. Iniwa wesibi bo ëtani melë kë tëgelëbë, bo mewenijiwa latelë, Gotobë naba lime lalowa nëgelëmewa. Kwe bo ëje kë wesibi kleli kibo fene mehwi nanolomë. Bo Klaismë melowene sle nëgletelëme nëgeme, bu bobë Tako Ho. Na bo kë loweneme fwa melowene nanelë, nëgali wesibimu. Bo kë iniwa tëbo lowene wahune telë, Jisasmë

fwa lowene slemu nanëkakettelëme.

9 Na bo bunamu lesili sle nanëgelome. Ëtani bo melowene latelë, bo Judabë afenëbobë tafa sle gali esogo neglelëlëna, kwe bo Gotobë naba lime lale ho fata nëgelëmewa. Kwe ëje bo kë lowene hana nelë. Weye. Ëje bo melowene nanelë. Sebo Jisasmë fwa kë lowene nëgletlabë onoho, Goto seme mefë këme lëtana, "Lale onoho."

10 Bo metole nanelë, Klaismë lowene slemu nanëgletelëme. Goto bubë tako afutukuna Klaismë matëmatë mago huju totle. Na bo metole nanelë, bo kë afutukuna tafa nanëgelëme. Bo metole nanelë, Klaismë seme taitanabëme elili fene fa totle, bo mata bubë wege kë fa nogotlëbë mëta, këha elili mefa nogotlëme. Na bu fene gli tle, bo megli nëgelëna, kë kwe lalowa.

11 Bo këha lowene mëta tafa nëgelëna kwe bo melowene nanelë Goto bome mata matëmatë mago huju lëgëtanëme.

*Pol melëbëme afutuku tle,
wege toula elë fwa
naluguleme*

12 Bo melowene hana nelë, bo Klaismë lowene iniwa wafa totlë na bo lale homu tafa nelë. Weyewa. Kwe Klaismë bome buha fatabëme këaniji toglonëbë, ëje bo këha fatame feilawa afutuku nëlekefëmu.

13 O Kristen afani na oneglëni. Bo melowene hana nelë, bo Klaisha wafata nelë.

Weyewa. Kwe jowa lowenewa lebetenë. Kë lowene melë, bo ètani kë fa togotlëbë wesibi aholokwana ti sle nanëgelëme na tokwafe fa nogotlëbë wesibime fwa feilawa afutuku nanëgelëme.

¹⁴ Bo wege toula elëme fwame feilawa afutuku nelë, na kë wege toula mago wesibi fa nanogotlëme. Kë wesibi melë, Goto bome megali lolonë, “Ju bona heven life mëta ëhwati tafa nëgelome.” Klais ti mëta gli tle seme lëgaitana nalëgleme na nëno lëleme. Këme fwa nëgeme, Goto buna heaven life mëta ëhwati tafa nëgelome këme gali tle.

¹⁵ Sebo Gotome lowene nëgletlabëme. Na kë letitabo nëgletlabë ho, sebo iniwa jowa lowenewa neholame, na wege toula elëme fwame, feilawa afutuku nëlame, bo ëje fene gali nelë. Kwe somago fli, li lowenena nëgena kwe Goto some lale lowene lebotane lëtatëyome.

¹⁶ Kwe tako wesibi melë, sebo kë esogo nëglelëkeflabë lale lowene, Goto seme kë lebotane tëtätë nabë, kë lowenebë nëgehola sle nëglame na aholokwana asa ti manëla. Weye!

¹⁷ O Kristen afani na oneglëni, sobo iniwa, bo kë esogo neglelëkeflëbë lowene saesogo elëlëlo. Sebo sobona kë tafa tëglabë, sobo sebo këtafa tëglabë lowene wahwi tlotëna. Na sebobë lowene kë esogo mëglelëlabë onehobë lowene, hwi sle eletemome na sobo bubë lowene esogo

elëlëtemome.

¹⁸ Bo some itaita gali wafi tlëyo na ita bo some nabatuna ekë gali nolëyo. Lebutako enëne tetëbo lowene esogo mëtlelëla na kë lowene seme melë lebotane lalëtana, bu Klaisme wame lamolola. Na Klais ti mëta seme tegaitanabëme, këgli tëglebë wege, tëbo namëgëtatlame fene. Bo kë enënebë lowene wafi hwi nolotemë. Bu sobobë lale lowene tëbo nametateyome.

¹⁹ Kë enëne, bubë ato kë tole mëgletëmebë lowenewa esogo esogo melelëkefëma na këbë ato tole lowene bubë Goto fene mefata lamëlekefëtëme. Kë enëne ebë life mago wesibi fame fwa lowene melekefëya. Na bu ebë life mago tiniyi wesibi fame fwa tako fleflesu lamelekefëya. Goto këha enëneme hel life mëta tëbo logotomememu.

²⁰ Kwe sebo, Jisame kë lowene sle nëgletlabë enëne, sebo këha enëne nane. Weye. Sebo kwe heven life mago enëne. Na ëje sebo Tako Home Jisas Klaisme hwi nëletla, bu heven life kile loleme na seme nënome letujuleme.

²¹ Klais, bubë afutukunawa, iniwa wesibi melë logotomeme, bubë lokwalëfe mëgëbetleme. Kë afutukunawa, bu sebobë tëbo ato jibo hihijika lëletëname na sebobë ato bubë lale ato fene mefata mëletëname.

Sebo yonane nēlame na fleflesu nēlame na lale lowene mēta nētabēyame

1 O bobē Kristen afani na oneglēni, sobo tako hobē lowene esogo elelētelome na kē lowene mēta fwa satafa elo, bo ebē pasē fene yahi nēletēyo. Bo some tako tolemu nanēletēyo. Bo sobobē weniyane hwi jwa noglometēyome nēgeme, na bo some kēme maninibo nēlekefētēyo. Bo sobo kē tafa egelobē gali yafe aholokwane telē na bo tako fleflesumu mētletēyo na bo melowene latelē, Goto some metēglēnēlatle, lale wesibimu fenene.

2 Yuodia na Sintike, sobo tlemalē one aholokwane elo. Sobo Tako Home wafi lowene sle eletelo na sobo bubē lowene mēta weife tafa elo. Kēme nēgeme sobolalo momata asa elelēkoiyo. Sobo jowa lowenewa saeholo na sobolalo yonane sle elome.

3 Na ju bona weife kē wege nēgelobē ho, bo jume gali nolē, ju kē tlemalē oneme, lale galina sasle etome, bu yonane sle namēgelome. Tlemalē bonamu kahwē sle latla, Jisasbē lale gali asē tēglelētlabēmē. Klemen na bobē fli weife wege enēne mata bona kahwē sle latla, Jisasbē lale gali asē tēglelētlabēmē. Kē enēnebē weniji, Gotobē ēhwati bogo mēta mēbetēme.

4 Sobo Tako Hobē oneho etabo, ta sobo kēbēme safleflesu elekefo. Bo some ita ekē gali nēlēyo, sobo fleflesu elo.

5 Sobo iniwa onehome alabujuwa tafa lowenena satafa elelēmo na bu melowene namēgletēyome sobo kēha enēne. Sobo aholokwana asa ti elo, Tako Ho ligisi olē nounou ekē lēletle.

6 Sobo li wesibimeha asa tutune elo. Weye. Sobobē iniwa hobotame, Gotome fwa sagali elokweflo. Sobo Gotome fwa gali elokweflome na sobo bume itaita megali elokweflome, “Yahala fēyemene” na some lēgaitobēme takune elokweflome.

7 Sobo melē egelona kwe Goto sobobē maninibo tli lētakefētēyome. Sobo Klaisme lowene sle egletelome nēgeme, Goto sobobē maninibo kēme tli lētakefētēyome. Goto seme flalego lowene kē lēlēkefēnabē, bu lale wesibimu. Na sebo kē wesibi esobēme habēna lowene nēgletlamene?

8 O Kristen afani na oneglēni, bo some li galime gali nolēyo. Sobobē lowene nēgali lowenename lale lowenename fwa salowene elekefētēmo. Na onehobē naba lime tafa sle egelobē lowene, na fleflesu kē egelobē lowene, na onehome yonane eglelēmōbē lowene salowene elekefētēmo.

9 Iniwa wesibi bo some kē okokwe toglēyobē, sobo kē wesibiwa saesogo elelēmo. Sobo bome wahwi tlonā na iniwa wesibi bo fene telē sobo mata melē saelo. Sobo melē egelona, kwe sobobē flalego tafa eso ho Goto

lêtabetëyo, sobona tafa
egelome.

*Pol, Filipai life mago Kristen
onehome fleflesu tletëme,
bume wesibi mëtlëlame nëgëme*

¹⁰ Sobo bome egaitaname
ita lowene telo. Këme nëgëme
bo Tako Home tako
fleflesumu nanëletelë. Ètani
sobo bome tegaitanabëme
lowene latlekefo kwe alëge
hanane.

¹¹ Bo ebë galime kë gali
nëgelëbë melëbëme nane, bo
wesibime afolo nëletelëme.
Weye. Bo alabujuwa
tafabëme, wafi lowene nelë.
Bo hobotana o hobota jwa
tafa nëgelëna o wesibina o
wesibi jwa tafa nëgelëna, bo
këme hobota hana nëgelëme.
Bo këha lowenebëme
alabujuwa kaiselo tafa
nëlekefë.

¹² Bo wesibi jwa ho tafa
nëgelëna o bo lebutako
wesibina ho tafa nëgelëna bo
alabujuwa kaiselo metafa
nëlekefë. Bo hi wesibina
nëgena o bo hi wesibi jwa
nëgena bo alabujuwa kaiselo
metafa nëlekefë. Bo
alabujuwa tafa lowene wafi
lowene sle nëletelë. Iniwa
wesibi bome kë fata
mëglekefëtenëbëme bo
alabujuwa tafa lowene wafi
lowene sle nëletelë.

¹³ Klais bome afutuku
lalëlelëkefëne na iniwa
wesibi bome kë fata
mëglekefëtenëbë, bo kë
afutukuna alabujuwa
kaiselo metafa nëlekefë.

¹⁴ Bo hobota kë fa
notokweflëbëme, sobo bome
kaiselo aitakefëna. Yahala

fëyemene! Bo këbëme tako
fleflesumu nanëletëyo.

¹⁵ O Filipai lifate mago
Kristen oneho, sobo wafi
lowene elo, bo Jisasbë gali të
wege somëta afina të totlë.
Na sobobë Masedonia
provins kile telë na li life li
lifewa të tetagulëna, kwe kë
mago Kristen enëne balitina
hana mëtaitana. Weyewa.
Sobowamu aitana.

¹⁶ Bo Tesalonaika lifate
mëta tafa tëgelëna kwe sobo
bome aholokwana hana ti
telo, sobo bome balitina
itaita lataitana.

¹⁷ Sobo bome melowene
asa eletëna. Some balitime
ita takune noglëyome. Weye.
Kwe some melëme tole
nëletëyo. Sobo onehome
agaitamobë lowene, Goto
hwi lolotëyome na some
fleflesu lëletëyome na ululu
sle lëtome.

¹⁸ Sobo melowene
egelome, iniwa wesibi, sobo
bome Epafroditusbë tobame
kë tëgelëbakë nabë, bo kë
wesibi wafi glo telë. Èje bo
lebutako wesibina tafa nelë.
Bo li wesibimeha hana afolo
nëletelë. Sobo bome kë
tëgelëbakë nabë wesibi ebëha,
ho kleli Gotome, fene
ahojume lëletle, lale sinikibo
hëhë nalëgletleme na Goto
bume fleflesu lëletleme.

¹⁹ Bo kë lotu nëgletelëbë
Goto, bu iniwa lale wesibina
lëtabe. Sobo Jisas Klaisme
lowene sle egletelobë oneho
nëgëme, këme fwa Goto some
iniwa wesibi sobo kë afolo
egletelobë some lëglëyome.

²⁰ Goto, bu sobobë Goto na
sobobë Aya. Sebo bume

iniwa olë fleflesumu
 nëglekefêtlame, bu Tako
 Homu nëgeme. Nëgali mu.

*Pol Filipai onehome yawe
 galime gali tlome*

²¹ Sobo Jisas Klaisbë
 onehome bobë sësle gali gali
 nolëyo. Na bona kë tafa
 nëglabë afani mata some
 sësle gali gali mëlëyo.

²² Iniwa Jisasbë oneho ebë
 lifate mëta kë tafa mëglabë,
 some sësle gali gali mëlëyo.
 Na Jisasbë oneho, eso ho
 Sisarbë lo mëta kë wege
 mëglabë, bu mata some sësle
 gali gali mëlëyo.

²³ Bo metole nanelë, Tako
 Hobë, Jisas Klaisbë maninibo
 somëta lëbeteyome na some
 laitome. Ta tei.

1 Tesalonaika Polbë oto pasë, Tesalonaika onehome kë yahi tëgletëmebë

*Polna Tesalonaika lifate
mago onehome tako
maninibomu lamëtletëma*

¹ Bo Pol, Sailas na Timoti, sebo aomalë, pasë some, Tesalonaika lifate mago Kristen onehome, ekë yahi nëletëyo. Sobo aya Gotobë na Tako Ho Jisas Klaisbë oneho. Bo metole nanelë, Goto na Tako Ho Jisas Klaisna bubë maninibo lowene matlëyo na flalego tafa naegelome.

*Pol, Tesalonaika oneho,
Jisame kë lowene sle
mëgletlabë lowenebëme,
fleflesu tletëme*

² Sebo Gotome fleflesuna gëgali nelelëkefla sebo some lowene nëglekefëtëyome nëgëme. Sebo some lowene nanëlekefëtëyo Gotome gëgali nëglelëkeflana. Some aholokwana hana ti nëlekefëya.

³ Sebobë aya Gotome kë gëgali nëglelëkeflabë, sebo some ebë wesibibëme lowene nëlekefëtëyo. Sobo Jisame kë lowene sle eglotelobë lowene, some lalë wegebëme huju lëtakefëyo. Sobo fli enëneme tole egletemome nëgëme na bume aitamobë wegëme këme afutuku elekefo. Sobo Tako Ho Jisas Klaisme

melowene sle eglotelome, tokwafe seme nënome ligisime. Inywa hobota some kë fata lëglekefëtëyobë, këbë lowene bu some laitakefëyo, sobo tafa sle naegëlobëme. Na këme nëgëme, sebo Gotome këme fleflesu nëlekefëtla.

⁴ O Kristen afani na oneglëni, Goto some tako tolemu lalëletëyo. Na sebo some melowene nanëletëyomu, Goto some wafi aniji tolëyo, bubë enëne egëtabetelobëme.

⁵ Jisabë lalë gali, sebo some kë tëgehitëyobë, somëta galiwa nane tisitëyo. Weye. Bu afutukuna Gotobë Amtëtombana iniwa tisitëyo. Na sebo Jisame kë lowene sle nëgletlabë lowene, sobo hwi sle tlometëna. Na sobo seme melowene tletëna, sebo kë të togotlabë lalë gali, sebo melowene slemu nanëletla, nëgali gali mu. Sebo sobobë ku mëta kë tafa tëglabë lalë tafa, wafi hwi tlotëna. Sebo melë kë tëglabë, Jisabë lowene esogobëme, some lebotane tëtätëyo.

⁶ Sebobë tafa fene tëbekefëtëna, sobo këha tafa esogo tlelëkeflo. Na Jisabë tafa fene tëbetle sobo këha tafa esogo tlelëkeflo. Sobo Gotobë lalë gali yafe aholokwane telo na esogo tlelëlo. Na fli oneho some mana kë wame motlëyo na lebutako tëbo wesibi some mana fata mëtletëyo, kwe sobo këbëme welili hana telo. Weye. Gotobë Amtëtomba some lataito na sobo Gotobë lalë gali fleflesuna

aholokwane tletelo.

⁷ Kēme nēgeme, Jisame kē lowene sle mēglekefētlabē oneho, Masedonia provins mēta na Akaia provins mēta kē tafa mēglabē, sobobē kē lale tafa hwi motloteyome nēgeme na bu melowene mētlame, bubē lale tafa fene lēbetēme, sebo mata kēha tafa manēla.

⁸ Tako Hobē Jisasbē gali, sobo kē tē togotlobē, kakēmu metugujutēyo latle, fwamo lego fene tiwatēyo. Na kē galibē, Masedonia provins magowa na Akaia provins magowa nane aholokwane motokouja. Weye. Sobo Gotome kē lowene sle eglotelobē gali, iniwa life mago oneho mata aholokwane lamotokouja. Kēme nēgeme, kē galibē, ita hana gali nēglame.

⁹ Sebo sobelē kē tigusiyabē, na iniwa wesibi kē fata mētlebē, oneho kē gali buwa tē mētētagula. Bu some gali mētē lametakefētēyo, sobobē iniwa fēso fēso lowenebē aholokwana ti telo na unalēme lēgētābē Gotome fwa lowene eletelome na bume fwa tafa eletelo na bubē wege enēne tafa elo.

¹⁰ Bu seme mata megali motlona, Sobo Gotobē Nēbame melowene eglotelome, bu heven lifate kile luguleme na ita lisime. Jisas bu seme, bubē glina Gotobē enisusu mago wafi nēno tle. Tokwafe Gotobē enisusu ligisina sebo nēgētābēya sle nanēglame.

2

Pol Tesalonaika lifatēme kē wege tēglebēme, gali tle

¹ O Kristen afani na oneglēni, sobo seme walowene eletēna sebo sobelē kē tigusiyabē kēbē asēbē tuwati asē nane.

² Sobo seme wafi lowene eletēna. Sebo sobelē tigusiya jwa tēglana, Filipai lifate mēta sebo aomalē tako elili fa totlamu, na seme tako lēlafa lamētētanamu. Na sebo tako elili kē mēta fa totla. Na sebo sobelē kē tigusiyabē, Filipai lifate mago enēne fene wame motlona bu seme melē lamētētana. Kwe sobobē Goto, sobobē lowene afutukumu latlēmētēna na sebo kēbē wamebē kikli hana tēkaketlamu na sebo mana Gotobē lale gali tē tētātēyo.

³ Sebo some, Jisame lowene sle eglotelobē galime, gali tolēyona, kēbē mēta yaya galiha hana gali tla. Sebo some meyaya lowenena nane tisitēyo, sebo sobobē wesibi manawa glo nanēgletēyome. Weye. Na sebo some sogēna sogēname nane tisitēyo.

⁴ Weye. Goto sobobē lowene wahwi sle tlotēna, na bubē tolenawa seme Jisasbē lale gali tēbē wege tlēna. Kēme nēgeme sebo melēme nane wege nēla, oneho sobobē wegeme na fleflesu mēgletēname. Weye. Sebo metole nanēla, Goto sobobē lowene hwi loglomeme, na sobobē wege buwa fleflesu lēletleme.

⁵ Sobo wafi lowene tletēna sebo sobobē lowene lale lale

galina hana sisile totometëyo. Weyewa. Na sebo lale lale galime mata gëgali hana tla na sebobë mëmaune lowene këna lëlamu notlame. Weye. Goto bu mata kë wesibime walowene lëletëna.

⁶ Sebo kë wege kë fa nogotlabë, sebo melëme nane fa notla, sebo fli enëneme flesu ho fata nanëgletëmame o sobo seme flesu ho fë naetaname. Weye.

⁷ Sebo Jisas Klaisbë ëfalëbo enëne nëtabetla na sebo flesu enëneha këme nëtabëya. Këme nëgëme, sebo metole nëglabë kwe, some megali noglëyome fene, “Sobo seme aitana.” Kwe sebo some megali hana tloleyo. Weye. Sebo somëta kë tafa tëglabë, flalego tafana tafa tla nëbale tokwëtokwë fenene.

⁸ Sebo some tako tolemu latletëyo. Këme nëgëme Gotobë lale gali some fleflesuna këme tlëyo. Sebo some Gotobë lale galiwa nane tlëyo. Weye. Sebo iniwa wesibi melë nëglabëme, wafi sagli tlëla, some nëgaito nanëglabëme. Sobo sebobë yabenimu tafa tëgelome nëgëme.

⁹ O kristen afani na oneglëni, sobo wafi lowene elo. Sebo somëta kë tafa tëglabë na Gotobë lale gali kë të tëtätëyobë, sebo baliti glo wege mata anisasanamu fa totla. Melëme nëgëme, sebo wesibi kë balitina glo nanëglekefëyame, some sosalë nëgëtolime. Këme nëgëme,

sebo olëna klabëna sebobë tobana këme wege tlekefëya, sobo seme wesibime egaitanalime.

¹⁰ Sebo somëta kë tafa tëglabë loweneme, sobo walowene eletëna na Goto mata seme lowene lalëletëna. Sobo, Jisame kë lowene sle eglételobë onehobë ku mëta, tafa tëglana, sebo Gotobë naba lime, lale tafawa latla. Na sebo li wesibiha kë mëta hana tëbo totla. Weyewa.

¹¹ Sobo seme lowene laletëna. Bolijaya bubë nëbaleme fene laitame, sebo some melë tegaito latla.

¹² Sebo melë latla, sobobë lowene tufiji tëgëtatëyobë gali tolëyo, na sebo some tegaito gali mata gali tolëyo. Na sebo some anisasana megali tolëyo: “Sobo Goto kë tole lëgletlebë tafana satafa elo. Goto bu some wawe tolëyo, bu eso home kë tafa lëgletëmebë oneho belë naekaklijome. Na bubë onehona iniwa lale tafa naegelome.”

Kristen oneho, bume kë fata mëtletëmebë tëbo wesibime boblo lamototoma

¹³ Sebo itaita kë wesibime mata Gotome fleflesu galina gali nolokwefla. Sebo some Gotobë gali alako të tëtätëyona sobo melowene hana telo, hobë gali. Weye. Sobo melowene latelo, Gotobë nëgali galimu. Nëgali, kë gali ebë Gotobë gali. Na kë galiwa, sobo Jisame kë lowene sle eglételobë lowene, buwa sle lotokwefëmetëyo.

14 O Kristen afani na oneglëni, Jisas Klaisme kë lowene mëgletlabë oneho, Judia provins mëta kë tafa mëglabë fenene, sobo mefata lalo. Sobobë yabenino, some tëbo lamëtakefëo. Israelbë afenëboni, bu Jisame kë lowene sle mëgletlabë onehome, Judia provins mëta kë tafa mëglabëme, fene tëbo motokwefëma.

15 Kë Israelbë afenëboni, Gotobë ëfalëbo mago gali ëtani anebo kë mëtehilabë home mogo nalë tëtëkle mëtëtakefëya. Na bu mata, Tako Home Jisame mogo nalë tëkle mototla. Na bu seme mata hehë mëtletëna. Bu Goto kë tole lëgletlebë lowene boblo mëtakefëtla. Na bu iniwa onehome wame molokwefëma.

16 Kë Israelbë afenëboni seme yafe lëkle mëtëtakefëna, Goto onehome tafa sle logotomebë gali, Israelbë afenëboni mëtabëya jwa kë mëglabë enëneme, të jwa nanëtatëmame. Bu melëme tole jwa mëtëglame nëgeme, Israelbë afenëbo mëtabëya jwa kë mëglabë onehome Goto nëno lëgoukëfelime, seme këme lëkle mëtakefëna fene. Bu tëbo lowene feilawa fafa motokwefla na kë tëbo lowene bubë ëtanifu tëbo lowenena iniwa loko lokweitëmeme. Këme nëgeme, Gotobë enisusu bume wafata tletëme na tëbo logotomeme nounou lalële.

Polbë lowene huju tletle, Tesalonaika lifate mago onehome ita hwi nalugujelëmeme

17 O Kristen afani na oneglëni, ëbame Israelbë afenëboni seme somago heheë mëtletëna. Na kë afolo olëna, sebo some maninibo latletëyo, bolijaya nëbale kakë tafa moguletlabë fenene. Sebo sobobë wenyane hwi hana nolometëyo kwe sebobë lowene somëta mana lëbetëna. Këme nëgeme sebo alëge feilawa hohwi këme nëtakefëtla, so betelë ita nigisiya nanëglame na some ita hwi nanoglëyome. Sebo some ita hwime tako tolemu nanëla.

18 Sebo sobelë nigisiyame tole nanëla. Na bo Pol, bo sobelë nigisitëyome yafe yafe nanëlekefë. Kwe Satan seme lëkle lalëtakëfëna, na sebo sobelë nigisiya jwa këme nëla.

19 Unina, sebobë Tako Ho Jisas, ita ligisina, seme fëye wesibi, afutuku lëglelënamene, na sebo këna bubë naba lime fleflesuna nilibetlame. Sebo bume fëye wesibi lebotane nëgëtatlamenë bu melowene nalëgletëname, sebo bubë wege, wege sle latëtatla. Sebo kwe some fwa fleflesu nëletëyome. Na some fwa lebotane nëtome.

20 Nakwefëyemene, sebo some fleflesu nanelekefëtëyo na lëlou nëlekefëtëyo.

3

Pol Timotime jine tlële, Tesalonaika lifate mago onehome lëgaitame nalëgleme

1 Na kwe, sebo Atens life mëta tafa tëglabë, sebo some ita tako maninibomu

latletëyo na melowene tletëyo, sebo some ita hwi nëglëyobëme, tako tole latla, këme nëgеме sebo hwi hana tla. Na sebo melowene tla, sebo Sailasna, Atens life mëta tafa nelome.

² Na Timotime sobelë jine nelëbaklome. Bu sebobë Kristen afa na bu Gotobë wege ho na sebo Gotobë wegeme ilawa wege nëla, Jisas Klaisbë lale gali ilawa të nëtagula. Sebo bume sobelë jine tlëlo, some lëgaito nalëgleme, Jisame kë lowene sle eglletlobë lowene, esogo sle naeglelëtélome.

³ Na su wesibi some kë fata lëgletëyobë, somago fli tutune eglolime na Jisame kë lowene sle eglletlobë lowene kile eglolime. Sobo lowene lalo, seme ebë su wesibi kë fata mëgletë nabë Gotobë toleme fata mëletëna.

⁴ Sebo sobona mana tafa tëglana, sebo some megali latlëyo, “Tokwafe seme lili hobota fata mëgletëname.” Na sobo melowene wafi eletelo, sebo fene gali tolëyo, kë tëbo olë seme wafata lëletëna.

⁵ Bo melowene hana tletëyo, sobo Jisame kë lowene sle eglletlobë lowene mana eholo o hanane, na bo feilawa mehwi hana tëtëkakë. Këme nëgеме bo Timotime sobelë këme jine telëbaklë. Bo metutune tēgelëme nëgеме, Satan some susu lëgëtolime na sobo Jisame kë lowene sle eglletlobë lowene aholokwana ti eglolime. Na sebo somëta kë wege tëglabë wege manawa tëbo

lëgletënalime.

Timoti lale gali tehitleme nëgеме, Pol këme fleflesu tle

⁶ Kwe Timoti sobona tafa tulo na some hune tuto na bu se mëta tokwafe fata tēkaki. Na sobo kë tafa egllobë lale gali seme të tētātēna. Bu some megali latletëyo, “Sobo Jisame feilawa mana lowene sle elekefëtelo. Na sobo fli onehome mata mana tole elekefëtemo. Na sobo seme mana lowene elekefëtēna, na fleflesu lalekefëtēna. Sebo some hwi nanogloyome fene maninibo nëlekefëtëyo, sobo mata seme hwi naegloname memaninibo lalekefëtēna.”

⁷ O Kristen afani na oneglëni, ho seme kë wame moglonabë, sebo kë wesibi mëta nëtabëya. Kwe sebo some meaholokwane latleteyo, sobo Jisame feilawa mana lowene sle elekefëtelo, na këbëwa seme taitana na sebobë lowene sle tētātēna.

⁸ Sebo ebë gali meaholokwane tla, sobo Tako Home Jisame mana lowene sle elekefëtelo. Na sebo flalego tafana këme tafa nëla.

⁹ Sebo some Jisame kë lowene sle eglletlobë loweneme, lowene nëletëyo, na sebo Gotome fleflesu galina gali nanolokwefla. Sebobë Gotobë naba lime, sebo feilawamu fleflesu nëla. Na kë fleflesu galibëme Gotome habëna gali noglolamene.

¹⁰ Sebo kljijina klabëna, Gotome itaita metakune nanolokwefla, bu seme

lëgaitana nalëgleme, some hwibëme nigisiteyo nanëglame. Na sobo Jisasme kë lowene sle egletelobë loweneme afolo egletelona, kwe sebo some nanëgaitome, sobo Jisasme feilawa lowene sle naegletelome.

Pol, Gotome gali tlole, bume lëgaitale nalëgleme, Tesalonaika lifate mago onehome hwime lugujutëme nalëgleme

¹¹ Sebo metole nanëla; sebobë aya Goto na sebobë Tako Ho Jisas Klais, sebobë alëge sle nalëtatëname, sebo some hwime nigisiya nanëglame.

¹² Sebo metole nanëletëyo. Tako Ho Jisas, fli onehome tole egletemobë lowenebë, some feilawamu lëglëyome. Na sobolalo feilawa tole eglelëgome na iniwa onehome mata tole eletemome, sebo some fene tole nëletëyo.

¹³ Sebo metole nanëla, Goto këbë lowenena, sobobë lowene lëgaitatëyome. Na sebobë Tako Ho Jisas, bubë onehona iniwa ita migisiyana, kwe Jisas some ëhwati tafa hwi egletelobë oneho hwi lëglëyome na sobo lale oneho egëtabome. Na kwe sebobë aya Gotobë naba lime, tëbo wesibiha hana lëgebetëyome.

4

Sebo Goto kë tole lëgletlebë tolewa sa esogo neglëlëlame

¹ O Kristen afani na oneglëni, sebo some Gotobë tole esogo eglelëlobë lowene

iniwa wafi okokwe tolëyo. Na sobo kë iniwa lowene esogo elelëkeflo, sebo fene gali tolëyo. Kwe sebo ëje some, Tako Ho Jisasbë wenijina megali nanolëyo, sobo kë lowene anisasana itaita saesogo elelëkeflo.

² Iniwa gali, sebo Tako Ho Jisasbë wenijina kë gali toglëyobë, sobo walowene sle eletelo.

³ Gotobë tole, melëgëbetle lalële: Sobo iniwa tetëbo lowene aholokwana ti elome na ëhwati oneho etabome. Sobo iniwa lisë lisë loweneme hëhele, egelome na aholokwana ti elome.

⁴⁻⁵ Sobo, jowa jowa, lisei lowene, sobobë lowene mëta kë mëgebebë lëlë etokwefëmome. Sobobë lowene, one mëmaunebë lowene mëta asa gwa etokweflo. Na bume lisei lisei eglelëmobë lowene asa huju malëletëyo. Weye. Këha tole asa esogo elekeflo, Gotome lowene jwa mëgletlabë oneho fene melekefëya. Sobo Goto kë tole lëgletëmebë lale lowenewa esogo elelëkefëtelome.

⁶ Sobo Kristen afanime na oneglënime sosogëna asa elëmo na bubë ho o mëse liseë nabana hwi elotleme. Sobo melë egelona kwe sobo bume tëbo lowene mëta gogwa egelome. Ètani sebo some anisasana megali latolëyo, “Iniwa ho bu këha wesibi mëglabëme, Tako Ho Goto, bume tëbo logotomememu.”

⁷ Goto seme lisë lowene

esogo nēgglēlābēme nane aniji tlonā. Hanane mu. Bu seme kē aniji toglonabēye melē: sebo bē lowene bume nēglēla nanēglame na ēhwati lowenewa, esogo nanēgglēlāme.

⁸ Kēme nēgēme, ho ebē gali boblo logotlena, kwe bu hobē galiwa nane boblo lētātēme. Weye. Bu Gotobē gali boblo lētātē, some bubē Amtētomba kē lēglēkefēyobē Goto.

Sobo sobolalo yonane egelome

⁹ Sobolalo kē yonane eglēlēgobēme, hana yahi nēgletēyome. Melēme nēgēme, Goto some onehome yonane eglēlēmobē loweneme wafi okokwe tolēyo.

¹⁰ Na ebē bu nēgalimu; sobo Masedonia provins mēta kē tafa mokoujabē Kristen onehome tole lalekefētēmo. Kwe Kristen afani na oneglēni, sebo some anisasana megali nolēyo, sobo kēbē lowene feilawamu saesogo elelēkeflo.

¹¹ Sobo aholabu lowene jwa na wame lowene jwabē onehoha tafa eglēlobēme, sa afutuku elo. Sobo fli enēne kē fa motokweflabē wesibime asa gali elokwefēmo. Sobo kē eglēlobē wesibiwa lowene elekefētēmome. Na sobobē tobana wesibi etomome, sobobē tafa kēna egaitalo naegelome, ētani sebo some fene gali tolēyo.

¹² Sobo melē egelona, kwe sobo wesibime afolo hana eglētēmome na fli onehome, some mēgaitobēme takune

hana eglokwefēmome. Na Jisame lowene sle jwa mēgletlabē oneho bu sobo kē tafa eglēlobē tafa hwi moglotēyona bu some fleflesu mēgletēyome na some megali mlame, “Lale enēnemu.”

Tako Ho Jisas ita ligisime

¹³ O Kristen afani na oneglēni, sebo metole nanēletēyo, gigli kē mētebēyabē Kristen onehome, wesibi fata lēgletēmebē wesibime, sobo lowene sle naegletēmome. Sobo, gigli mētebēyabē Kristen enēneme feilawa maninibo asa eletemo, Gotome lowene jwa mēgletlabē oneho fene mla. Kēbē enēne, gli mago huhuju mēglabē lowene hana lēbetēme.

¹⁴ Sebo melowene nanēla, Jisas gli tle na gli mago huhuju tle. Kēme nēgēme sebo melowene nanēla, Jisasbē afutukuna, Goto, Kristen onehome, gigli mago huhuju logotomeme na bu Jisasna iniwa misiyame.

¹⁵ Sebo ēje kē tē nēgētātēyobē gali, ebē bu Tako Hobē gali. Bu melē lēgēbetle lalēle. Tokwafe, Tako Ho Jisas ita ligisina, sebo tuja ato mana kē tafa nēglabē oneho, sebo afina hana nokwalame, Jisame oloba mēta esune nanēglēlāme. Weye. Hanane mu.

¹⁶ Goto feilawa we loglomeme, na bubē eso ensel mata we lēgleme na Gotobē funiji elamēme. Na Tako Ho Jisas, Heven life kile

luleme na lisime. Na Jisasme kë lowene sle mëtletlabë oneho, gigli kë mëglabë, bu afina huhuju mlame.

¹⁷ Kë olëna, sebo tuja ato mana kë tafa nëglabë oneho na gigli mago kë huhuju mëglabë oneho, sebo iniwa Tako Ho Jisasme oloba mëta esune nowelëlame. Na sebo Tako Ho Jisasna unaunalëme tafa nëlame.

¹⁸ Na kwe, sobolalo, kë gali të etokweflome, sobobë lowene këna aitakefëmome.

5

Sebo Jisas ligisibëme sagli nëglëtlame

¹ O Kristen afani na oneglëni, sebo Jisas ligisibë olëme, hana gali sle noglëyome.

² Sobo wafi lowene eletelo. Jisas ligisibë olë, bu lafatawa lëgleme, tokli ho klabë fene lisi.

³ Oneho megali mëglame, “Ëje sebobë lale fleflesu olë lemotëna. Na seme wame moglonabë enëne hana tafa mla. Weyewa.” Kë olëna, bume tēbo logotomebë wesibi, lafatawa lëletëmeme, mëse nēba amlebo fene fale etamë. Na kwe bu kë wesibi hana elë mëglëlame.

⁴ O Kristen afani na oneglëni, sobo klabë mëta tafa egelobë oneho nane, klelego kë egelome. Weye. Këme nēgeme some kë olë fata lëglana klelego hana egletelome, ho tokli home hwime fene klelego lële. Weye.

⁵ Sobo iniwa, elulego mëta asë egelobë oneho. Sebo tlkofini mago oneho nane. Weye.

⁶ Këme nēgeme, sebo lili sloslowa asa manëla. Gotome lowene jwa mëgletlabë oneho fene mla. Sebo sagli nëglëlame, Jisas ligisibë olëme mana hwi nēkaketlame.

⁷ Sebo lowene nanela, bu nini mëgebëyabë enëne bu klabë nini lamebëya. Kye mëglabë enëne bu klabë kye kye mëla.

⁸ Kwe sebo kwe kliji elulego mëta tafa nëglabë oneho. Sebo këme lowene sle nëglame. Sebo Gotome lowene slemu nëletlame na fli onehome mata tolemu nëletëmame. Kë lowenebë seme, Satanbë tetëbo lowenebëme title lëtaname, yako lamu kaba soldiame fene title etole. Na Jisas seme nēnome ligisibë lowene, lowene sle nëletlame. Kë lowenebë seme, Satanbë tetëbo lowenebëme title lëtaname, eso kaba soldiame fene title etole.

⁹ Goto seme melëme nane aniji tlonā, Gotobë enisusu mëta tafa nëlame. Weye. Bu seme melëme aniji tlonā, sebobë Tako Ho Jisas seme nēno nalëgleme.

¹⁰ Ètani Jisas wafi gli tle, seme legaitanabëme. Këme nēgeme, sebo tuja ato mana tafa nëglana o sebo gigli nëglana na bu mana lisina, kwe sebo bunā ëhwati atobëna tafa nëglame.

¹¹ Këme nēgeme, sobolalo, këbë lale galina gëgali

elelēgome na sobolalo,
sobobē lowene aitamome,
sobo fene elekefo.

*Jisame kē lowene mēgletlabē
onehome, lale lowene fabēme,
Goto lēgaitameme*

12 O Kristen afani na
oneglēni, sebo some megali
nolēyo! Some kē moutatēyobē
na kē mēgaitakefēyobē hobē
gali aholokwane elomome
na esogo elēletēmome. Tako
Ho, some kē mougoutatēyobē
home, aniji tloime, some tafa
namēglelēyome. Bu some
Gotobē galime okokwe
lamolokwefēyo na sobobē
tēbo lowene sle
motokwefēmetēyo.

13 Sobobē kume, wege kē
fa motokweflabē enēneme
lowene eletemo na bume
lale lowenenamu yonane
elelēmome na bume tolemu
sle eletemome. Na sobo
iniwa jowa lowene mēta fwa
etabome na yonanewa
elome.

14 O Kristen afani na
oneglēni, sebo some
anisasana megali nolēyo!
Sobobē ku mēta, wege jwa kē
tatafa mēglabē onehobē
lowene anisasa galina sasle
etometemo. Na tutune na uli
kē mēglabē onehobē lowene
alabuju galina sle
etometemome. Na afutuku
jwa kē tafa mēglabē onehome
aitamome. Na sobo iniwa
onehome alabuju elelēmome.

15 Oneho some gēglē
mēglelēyona, kwe sobo
kofaya bume asa gēglē
elelēmo. Weye. Iniwa olē
sobo Gotobē onehome ululu
etomome na iniwa onehome
mata ululu sle etomome.

16 Sobo itaita fleflesu
eglekefome.

17 Na sobo Gotome gēgali
elelēkeflome.

18 Lale wesibi o tēbo wesibi
some fata legletēyona, sobo
Gotome fleflesu gali nawa sa
gali elokweflo. Goto metole
lalēle, Jisasbē lowene mēta kē
asē egelobē enēne, sobo kēha
lowenewa saehokweflo.

19 Gotobē Amtētomba some
li wesibi fa egotlobēme huju
lēgētona, sobo lēkle asa etlo.

20 Na Gotobē ēfalēbo mago
gali some kē tē
mēgētātēyobēme heheē asa
elo.

21 Kwe sobo iniwa gali kē
aholokwane eglomobē,
sobobē lowene mēta
obobwelē elujuwetomome.
Na iniwa lale gali, ehwēyome
na esogo elelēmome.

22 Na sobo iniwa memelē
tetēbo galime na tetēbo
loweneme hēhele egelome.

23 Bo metole nanelē,
Gotobē maninibo tli lowene,
buwa sobobē iniwa tēbo
lowene sle malotometēyo,
ēhwati onehomu fata
naegletelome. Na bu sobobē
atona lowenēna iniwa ululu
sle nalotometēyome, sobo
lalowamu tafa naegelome.
Na sebobē Tako Ho Jisas ita
mana lisime, Gotobē naba li
mēta tēbo wesibi liha hana
lēgebetēyome.

24 Some bubē oneho fata
egelome kē aniji toglēyobē
Goto, bu kē wesibi some fata
lēgētātēyome. Bu melēme
nēgeme, bubē iniwa gali
esogo lalēlelēkefle.

25 O Kristen afani na
oneglēni, sobo Gotome

sagëgali ešelëlo, bu seme
lëgaitana nalëgleme.

²⁶ Sebo Gotome kë lowene
nëgletlabë onehobë lowene
fene lëbetëna, sobo fli Kristen
afanime na oneglënime
sasësle etomo.

²⁷ Bo Tako hobë wenijina
some, anisasana megali
nolëyo, sobo ebë pasë
Jisame kë lowene mëgletlabë
iniwa onehobë aholo li mëta
sahwi elëyo.

²⁸ Sebo metole nanëla,
sebobë Tako Ho Jisas Klais
some ululu sle malëto.

Jems

Jems kë yahi tëglebë pasë

¹ Bo Jems Gotonabë, Tako Ho Jisas Klaisnabë manawa wege ho. Bo some pasë ekë yahi nëkeketëyo. Sobo we ita tële Israelbë afenëbo lilife lilife mëta kë nibowai ekoujobë oneho. Sobo lale kljimu.

Hobota wesibi kënegebëye, seme kalëlego mëgëtanabë wesibi

² O bobë, Jisame kë lowene sle eglotelobë afani na oneglëni, some tetëbo hobota wesibi fata mëgletëyona, na sobo kë wesibi hwi eglomona, kwe sobo kë wesibi mehwi eglomome, fleflesu wesibiwa.

³ Këme nëgëme, sobo melowene egelome. Këha su kë nëgebëye some melëme olafa mëto, sobo Gotome lowene slemu laletelomu. Këha su some hobota eglibetembëme laito na ebë life mago tetëbo lowene aholokwana ti elome.

⁴ Na hobota eglibetelobë afutuku bubë wege yawe malolole. Kwe sobo melë egelona, sobo hobota eglibetelowa egelona kwe sobo ebona flo egelome, na sobo Goto kë tole lëgletlebë lowenebëme hana afolo eglomemu.

Ho li lale loweneme, afolo lëglena, kwe Gotome fwa satakune lolole

⁵ Kwe loweneme yalë afololëglena, kwe bu Gotome takune lololeme, na lëlëme. Melëme nëgëme Goto bu tako fleflesumu lalële iniwa onehome lowene lëglëmebëme bu wame hana loglomeme.

⁶ Kwe bu Gotome melowene sle lëletleme bu lëgëtatënëme na mana takune lololeme. Lebutako lowenena asa takune malolole. Matëbemu. Fëyemene? Ho bu lebutako lowenena wesibime takune loglolena kwe bubë lowene haliji tu fenene melë asa malëletle.

⁷ Bo some tutuneme gali nolëyo, sobo melë asa elo. Fëyemene? Këha lowenena ho Gotome wesibime takune loglolena, wesibi Tako Ho mago fa hana logotleme. Hanane mu. Bu melowene asa malëletle, "Goto bome wesibi lëglënëmeffe." Wëyewa.

⁸ Bu tële lowenena ho lëtabe. Këbë tële lowene bume kiki lalëbobukwake na bu këme nëgëme bu jowa lowene mëta fwa hana lëtabe.

Wesibi jwa enëne name, wesibi feilawa enënename, Jems okokwe tlome

⁹ Jisame kë lowene sle mëgletlabë afani na oneglëni, wesibi jwa nëgena kwe lalowa bu fleflesu matla. Goto bume mehwi loglomeme nëgëme, letitabo enëneha mëtabëyame.

¹⁰ Jisame kë lowene sle mëgletlabë oneho balitina kë

nëgebë. Melëme, bu kwe
fleflesu mëglame Jisas
Klaishë lokwalëfewa mëtabëa.
Këme nëgeme bu iniwa
wesibina bu kwe tëbo
mëglitayame bu ti tahweji
fene mablëfa mle na mitigo.

¹¹ Bo megali, kliji bubë
atëtena, lokwalena na kaka
lëkekeme, bubë atëtena
agosaba lakokowa lëtamëme,
na bubë tahweji mata
lamaklëfawa lëtamë na bubë
tahweji laegëtikwawa na bubë
lale wenyane latëbowa lëletë.
Bu baliti ho fene, bu iniwa
wege motla motla, kwe bu
hokweinawa gigli mëglame.
Këbë wesibi bubë kwe tëbo
mëgletëmeme.

*Goto bu seme ululu sle
lalëtakefëna, tëbo lowene
belëme hana ki lëkake*

¹² Feilawa hobota
onehome fata mëgletëmema
na bu hobota mëglibetlawa
mlame, kwe këha oneho bu
fleflesu matla. Këme nëgemë.
Tokwafe kwe Goto bume lale
ëhwati tafa lëglëmeme. Goto
bu megali sle wafi tle, “Bume
kë tole mëgletlabë enëneme kë
ëhwati tafa lëglëmeme.”

¹³ Hobë tëbo lowene huju
lëgëtatlena, bu melowene asa
malële, “Goto bome tëbo
lowene elë bu ki lëkake.”
Weye. Tëbo lowene Gotome
hana ki lëkakeme. Na Goto
home, tëbo lowene elë hana
ki lëkakeme.

¹⁴ Kwe sebobë tëbo lowene
kë nëgebëye, buwa seme tëbo
lowene elë kiki lëbebokwake.
Kë lowene tëbowa seme
sosogëna lolona na kiki
lëbebokwake, tëbo lakale
notlabëme.

¹⁵ Bo gali nelë ebë wafle
galime. Ebë tëbo lowene
loglotle wame huju lëglena
bu mëse nëba fene ehole. Na
ke maninibo tëbo takowa na
bu tetëbo wesibi lotle, na kë
tetëbo wesibi logotlebëye,
naglime fata lotle.

¹⁶ O bobë afanino na
oneglënino, këbë maninibo
tëbo seme ki asa
malëbebokwake.

¹⁷ Iniwa lale lale wesibi kë
glo nëglekefëyabë, kë heven
life mago metujukefle.
Klijina, yemena, sëgetobana,
kë blëge togotomebë Aya, kë
lale wesibi iniwa buwa seme
lëtelëbakëkefëna. Kë Aya kë
nëgebë bu lowene hihijika
hana lëlekëfe. Bu kë nëgebë,
kliji elulego mago amtëtomba
fenene këha hana lële. Bu
melëbë nane, heletabo lële
na ita afluja lële, amtëtomba
fenene. Weye. Goto bu
melëgëtabekëfewa lalële.

¹⁸ Bu melë bëme tole lële
sebo bubë nëbale fene
nëtabetla nëlame. Bu sebobë
aya fene mefata lëletëname.
Na bu kwe bubë nëgali galina
seme jine lëletëna. Na sebobë
maninibo kwe bu mëta fwa
kesi mëleme. Na kë onehome
Goto meaniji latlome bubë,
bu wesibi blëge blëge
totomena.

*Sobo gali aholokwane elome
na esogo elelëlome*

¹⁹ O bobë afanino na
oneglënino. Sobo ebë wesibi
şalowene sle eletemo. Sobo
iniwa aholo bo sle etome, na
alabuju galina mana tafu
etatemome na sobo
hokweinawa momatame asa
ëjuwetigo.

²⁰ Sobo enisusu asa elo matêbe, ho li hokweinawa enisusu lëglena bu Gotobë naba li mëta lale ho nane.

²¹ Kême nêgeme tetêbo lowene, sobobê lowene mëta kê fata mëglekefêtêyobê, aholokwana ti elome. Na flalego tafana Gotobê gali mana fa etlome. Goto kê gali somëta wafi gwa telutatêyo. Kêbê gali kê nêgebê sobo lale unaunalême êhwati tafa këna fa egotlome.

²² Sobo Gotobê tafa sle gali aholonawa asa aholokwane elo. Weye. Sobo esogo esogo eglelêmome. Aholokwanewa egelona, kwe sobo sobolalo, kule kule lalologo.

²³ Kwe ho li Gotobê tafa sle gali aholo nawa aholokwane lëglena na esogo hana lëglelêlêna. Kwe ho bu weniyane tu mëta hwi loglolebê fenene.

²⁴ Bubê weniyane hwi lolole, kwe ita bu hokweinawa bubê weniyane lamëmêtewa lëkakettle. Bobê weniyane habetabone?

²⁵ Kwe kê lale tafa sle gali kênegebêye, têbo loweneha li hana lelube. Na bu têbo loweneme boblo logotleme na seme êhwati tafa lëlêname. Na ho li kê lale tafa sle gali hwi sle loglomena na esogo sle lëglelêmena na aholokwana hana ti lëglena kwe Goto sle logotometleme na lalowamu fata mëletleme.

²⁶ Kwe ho li megali lëglena, “Bo lale Jisame kê lowene sle nêgletelêbê ho na Gotobê lowenewa esogo sle nêglelêlêbê ho,” kwe bu bubê

aleji ululu sle jwa logotlena kwe bu bume fwa kule kule lële. Kême nêgeme Gotome kê lotu lëgletlebê lowene, waiyo jwa kême lëbetle.

²⁷ Jisame kê lowene sle mëgletlabê onehobê lakale, Aya Gotobê naba lime lalowa lëgëbetêmebê, bu melê; Sebo flinêba nêbaleme inainagi nêglame. Na seiyo oneme mata naitamame. Na bu hobota fa mogotlabême na wesibi nêglêmabême mata naitamame. Na li wesibi mata melê lëgëbelalêle, sebo sebobê lakale ululu sle nêtagulame, ebê life mago têbo lowene sebobê lale lowene, Gotobê naba lime lëlalê lëgëtatênalime.

2

Sebo iniwa onehome jowa lakalewa olafa nêgëtatêmame

¹ O bobê afanino na oneglênino, sebo iniwa Jisame Klaisme kê lowene sle nêgletlabê oneho. Bu kênegebêye heven lifate mago lale wesibibê eso ho lêtabe. Kême nêgeme, sobo melê asa elo, wenijiatena enêneme fwa sle etomome kwe atwati enêneme têboijiwa elomome.

² Ho li lale lale êho gëgelo lëleme na golna blëgetabo toba baliti toba kume lehwamême, na lotu lowa mana lëkaklina. Na wesibi jwa ho kaka tabo êhona mata lëkaklime.

³ Na sobo melê egelona, lale êhona negli sle kê logotlebê home fwa megali elolome, “Ebê lale labume tafa ele,” kwe wesibi jwa home megali elolome, “Eme

ejuwelibe” o megali elolome, “Bobë kiju li mëta tafa ekoketenë.”

⁴ Kwe sobo kë fene melë egelona, na wesibi jwa enëneme tēbojiwa eglomona kwe sobo tēbo lakale fa etlo. Melë kë egelobë, sobo onehome eselëkwëyo lowenena hwi elomo na iniwa onehome jowa lowene nawa hana hwi elomo na melowene hana elo, sebo iniwa mëtabowa tafa nēlafe.

⁵ Bobë afanino na oneglënino, sobo aholokwane elo. Wesibi jwa kë mëtabëyabë, oneho ebë life mago onehobë naba lime Goto bume meaniji latlome, Jisas Klaisme lowene sle mu mëgletlame. Ètani Goto bu megali sle latle, oneho bume tako tole kë mëgletlabë, Goto esohome kë tafa lëglebë lifate mëta tafa mëglame.

⁶ Sobo kë wesibi jwa enëneme sisile latokwefëmo. Kë wesibi lowene sle ekaketelo. Some tiniji ya lëlëkefëyone na hobota ya gwa lëtakefëtëyone na plis enëne belë lëlelukefëyo. Wesibi feilawana oneho buwa melë lamëtakefëyo.

⁷ Sobo Jisas Klaisbë oneho etabetelo. Na kë Jisas Klaisbë lale weniji yalë sisile lëtakefëtlene. Kë feilawa wesibina enënefe.

⁸ Goto bubë bogo mëta tafa sle gali tlëna. Bubë auto mago gali melëgëbe lalële, “Ju jubë yabeme metole egletleme, ju jubë ato fene tole etle.” Sobo melë eglelona, kwe sobo lale lakale blëge egotlome.

⁹ Sobo balitina onehome eselëmona bu lale, kwe wesibi juwa tēbo onehome tēbo etomome, kwe sobo tēbo lakalemu fa etlomu. Gotobë tafa sle gali some meolafa lëgëtome sobo tafa sle gali boblo egotlobë enëne etabomu.

¹⁰ Ho li iniwa tafa sle gali esogo sle lëglelëmena. Na bu li tafa sle gali boblo logotlena, kwe bu tēbo lalilitamu na bu iniwa tafa sle gali boblo logotomebë ho lëtabemu.

¹¹ Sebo walowene nëla. Goto megali kë tëglebëme, “Sobo hona one asa lisei lisei elelëmo.” Na bu ita megali latle, “Onehome mogo nalë asa tëtëkle eto.” Kwe ju lisei lisei hana eglena, na kwe ju home mogo nalë tëkle etle, kwe këha melë eglena, kwe ju iniwa tafa sle gali boblo egotomebë ho etabemu.

¹² Lowene elo tokwafe sobo Gotobë koto mëta eglibome wesibi sobo kë egotomobëme, na kë gëgali egelobëme. Sobo fli onehome tole egletemona kwe sobo egëtabo sle egelome.

¹³ Ho li, li home maninibo jwa lëgletlena, kwe Goto kë hobë lakale hwi loglotlëna kwe këha home Goto hana maninibo lëgletlememu. Kwe ho li, li home maninibo lëgletlena, Gotobë maninibo nawa bu Gotobë enisusu boblo logotleme na bu kwe tafa sle lëleme.

Gotome lowene sle nëgletlabë lowene na lakale esogo nëlelëtlame

14 O bobë Jisame kë lowene sle mëgletlabë afanino na oneglënino, somago ho li megali lëglena, “Bo Gotome lowene sle nanëletelë.” Kwe bu fli onehome ululu sle juwa logotomena, këha Gotome lowene slebë lowene wayo hanamu lëbetle. Na këha lowene Goto onehome bubë koto mëta hwi loglomena bume habëna lëgaitalemene? Weyewa.

15 Jisame kë lowene sle mëgletlabë afa li o mësenëba li bu ëhome afolo melome o hi wesibime afolo melome,

16 na somago, li afa megali lolomeme, “Goto some ululu sle malëto, sobo fleflesuna eyeu. Sobo lale ëho gëgelo elome na hi egelobëë, imo tëtafumu etomome.” Kwe sobo bume bubë ato lëgaitametëmbë wesibi eglëmo jwa nëgena, këha blawa gëgali. Bume habëna lëgaitamemene? Weyewa.

17 Jisame lowene sle nëgletlabë lowene, mata, kë fenene. Këbë fli onehome nëgaitamabë lakale juwa nëgena, këbë meolafa sle lalotle Jisas Klaisme lowene slebë hanane. Këme nëgeme bume habëna lëgaitalemene? Weyewa.

18 Kwe ho li megali lëleme, “Ho li Gotome lowene sle lëgletlebë lowenena, kwe ho li onehome lëgaitameme.” Bo kwe bume metafu nëgëtatelëme, “Kwe fli onehome agaitamo juwa egelona Jisame lowene sle egletlebë lowene hanane.”

Kwe bo some bo Jisame kë lowene sle nëgletelëbë lowene, lebotanë nëtatëyo, bo onehome kë nëgaitamëbë lowenena.

19 Sobo melowene sle lalo, “Jowa Gotowa lëtabemu.” Kë kwe nëgali lowenemu. Masiwafe, alibaho, ahwane na tijeli mata Gotome melowene sle lamletle, jowa Gotowa lëtabe. Na bu tutune lowenena tafa mle.

20 Sobo eso ka juwa etabone! Gotome lowene sle nëgletlabë lowene onehome nëgaitamabë lowene juwa nëgena, këbë lowene hi wesibi juwa ti fenene. Sobo kë galibë wayo lowene naegletelomene? Sobo aholokwane elo.

21 Sebobë semle Abrahamme lowene ekaketelo. Goto bume lale ho fëye melëna totle. Bu bowene Aisakme, ahøjumbë amasei mëta yafe gwa towetle Gotome lëglële nalëgleme. Abraham kë blëge togotlebë Goto yafe hwitlotle bu lale ho fë këme totle.

22 Lowene sle elo, Abraham Gotome lowene sle tletle na bubë gali esogo sle tletle. Na tële wesibi iniwa sago mëtle, Abraham Gotome lowene sle tëgletlebë lowene olafatletle.

23 Abrahamnabë, Aisaknabë, anebo galime, Gotobë bogo megali kë eglabë, “Abraham Gotome lowene sle tletle na Goto bume lale ho fë totle.” Na bume mefë mototla, “Gotobë yabe.”

24 Sobo melowene egelome, ho Gotobë naba

lime lalowa lëgëtabebëme,
sobo hwi elo bu Gotome
lowene sle lëletle na
onehome laitameme këme
fwa Goto bume mefë lotleme
lale ho. Weye.

²⁵ Kë fenene, Rahap bu
lisei mëse. Bu melë latle,
Josua kë jine tëglëmebë home
lowa nono tle na ëho totome
na li alëge elë jine telëkakëme.
Kë lakalena Goto bume lale
mëse fë këna tëtamë.

²⁶ Alibaho ato mëta
lëgëlutabe jwa nëgena, kwe kë
ato wagli lële. Kë fenene,
onehome nëgaitamabë lakale
jwa nëgena kwe Gotome
lowene sle negletlabë
lowene wagli lële.

3

*Sebobë gëgali ululu sle
nogotlame*

¹ O bobë Jisame kë lowene
sle mëgletlabë afanino na
oneglënino, somago feilawa,
onehome okokwe
moglomabë ho fata asa elo.
Këhabëme gali nelë. Sobo
wesibi walowene eletelo.
Tokwafe sebo onehome kë
okokwe noglomabë ho, Goto
onehome koto loglomena
seme feilawa obobwelë
lëgëtaname.

² Sebo Jisame kë lowene
sle nëgletlabë fli olëna tetëbo
lowene meblëge blëge notla.
Ho li kleë gali juwa lëglena bu
tafa sle lalële këha ho bu
bubë iniwa tafa ululu sle
lalotle.

³ Sebo hos klelibë ëfalëbo
mëta ainë afo susu
nanotometëma na bu sebobë
tolewa naesogo
mëglelëmetëname. Sebo kë

ainë afo nawa
nëbebotokwakëma.

⁴ Aholokwane elo, sibu lo
mata bu tako wesibi. Ho sibu
lo mago yegu tokwëfo nawa
tei fa mëbebotokwakla, tako
kalëlegona flelu yafe lehule
jelime këbë yegu mëta tei fa
mëbebotokwakla.

⁵ Kë fenene aleji mata këha,
bu tokwëfo wesibi, kwe bu
tako hobota lalowa fata
loglotleme.

Aholokwane elo, tokwëfo
ahoju naflëbo, tako ahojume
fata logotlememu. Na iniwa
walujume latemuwa lëtagule.

⁶ Sebobë ëfalëbo bu ahoju
fenene, bu helbë ahoju leslië
lotle. Ëfalëbo bu tetëbo wesibi
blëge lotle, sebobë
amtëtomba sisile lotometëna.

⁷ Oneho waluju mago
wesibi olome memëlëma,
fole, taiju, kleli na tu mago
wesibi mata olome
memëlëma, bubë tolewa
esogo mëglelëmetëmebëme.

⁸ Kwe ho li semago aleji
lëkle logotlebë afutuku
hanane mu. Aleji bu tëbo
wesibimu, bu motaba
fenene. Ho hana
lëbebotokwaklememu.

⁹ Kë alejiwa sobo mesosaia
latlomu, Gotome këna
fleflesu eletelo na kwe ita
Goto bu fene, kë blëge blëge
totomebë onehome tëbo gali
elomo.

¹⁰ Jisame kë lowene sle
mëgletlabë afanino na
oneglënino, kë jowa
ëfalëbowa melë lalële,
Gotome fleflesu lëletle na ita
tetëbo gali lële. Kë tèle
lowene ilawa asa yonane
matelo.

11 Yefi tu mago lale tu na tēbo tu na jowa tala magowa hana sisibo mēlukwokeme.

12 Jisame kē lowene sle mēgletlabē afanino na oneglēnino, atowai mēta niji logowalēmene? Hee! Binibi mēta wei logowalēyamene? Hee! Kējina yefi tu, bu lale tume fata logotlemene? Weyewa.

Lale lowenena ho, bu lale lakale olafa, lotleme

13 So mago ho li megali lēglena, “Bo ebē life mēta asē nēglabē lale lowene, lowene sle nanēletelē.” Kēha ho sobobē ku mēta tafa lēglena kwe bu meolafa salotle, bu onehome laitamebē ho. Na fli enēneme lokwalēfe lēgletēmēbē lakale blēge lotleme.

14 Kwe mēmaune lowene, na gēglē lowene, wenijiate fa egotlobēme boblo lowene, sobobē lowene mēta mana mēgēbena kwe sobo mējiaklē asa elo sebo lowenena tafa nēla.

15 Kēha yaya lowene Goto mago nane misi. Weye. Kēha lowene hobē lowene magowa, ebē flēke mago wesibiwa na bu Satan mago misi.

16 Sobobē ku mēta mēmaune lowene, na gēglē lowene, na wenijate fa egotlobē lowene, kēha lowene tēbo lowene, na gēglē lowene bu fata motle sobobē ku mēta.

17 Lale lowene Goto mago kē migisibē lakale ekē, tēbo lowene lēgēbetle juwa lēleme na Gotobē tolewa esogo lēlelēleme. Kēme keibē, fli

enēnena mogweliha tafabē lakale. Kēme keibē, onehome lēnalēna loglomebē lakale. Kēme keibē, fli onehome boblo jwa logotomebē lakale. Kēme keibē, fli onehome maseiwa lēgletēmēbē lakale, na ululu sle notomame. Kēme keibē, onehome kēha lakalewa blēge nētātēmame. Kēme keibē, ju sogēna na able eglēbē lakale ju mēta asa ehole.

18 Kēme keibē, fli onehome yonane sle mēgletēmabē lakale. Goto kē tole lēgletlebē lale lowene nuju mēta lale hi wesibi fenene hulu mle.

4

Oneho ebē lifebē lakale kē tole mēgletlabē, bu Gotome wame moglolabē enēne

1 Sobolalo wame na momata fēyeme elelēgone? Ebē esome fwa fata lēle. Kē tēbo lowene sobobē lowene mēta lelubetēyo na some kē tētēke lētakefēyo. Bo sogēna gali nanēlēone? Hee!

2 Sobo wesibi fa egotlobēme tako tole lalo, kwe sobo hana fa etlo. Kēme nēgame sobo sobolalo moumou kēme elelēgo, sobo fli eneneme mogo nalē tētēklebēme kēme sagli elolo bubē wesibi glo naegletemobēme. Meleme nēgame sobo bubē wesibi mēmaune lalometemo, kwe sobo glo hana elo. Sobo gēglē kēme elo kē wesibi glo naegelome. Sobo Gotome takune jwa eglolome nēgame, sobo wesibi glo jwa kēme elo.

³ Sobo Gotome takune lalëkweflo, kwe sobo wesibi fa hana etlo. Fëyemene? Sobo tëbo lowenena takune eglëkeflome nëgame. Sobobë ato fleflesu tëbo lowenebë tole këna yawe naeglolome.

⁴ Sobo labeso totoho mëglabë oneha. Sobo melowene hana elone? Oneho ebë life mago lakale tole mëgletlana, kwe bu Gotome wame moglolabë enëne. Këme nëgame fëye enëne ebë life mago lakalena yonane mëglabëme tole mëglana bu, bu tobana melëlekuju lamela, sebo Gotome wame noglolabë enëne nëtabëya.

⁵ Sobo melowene lalone, ëtani Gotobë bogo mëta blawame yahi mëtlane? Weyewa. Bu megali lala. “Goto bubë amtëtomba ho mëta kë gwa tëgelujuwetlebë, Goto bu seme metole lalëletëna ho mëseme fene tole lëletë, kwe bu bume sisile egotlana fli home mëmaune eglëmebë lowenena.”

⁶ Kwe, Goto seme lalaitakefëna, tëbo lakale boblo nogotomabëme. Gotobë bogo megali lala, “Goto tuwetuwe mëglabë onehome tëbo ijiwamu lalolokwefëme. Kwe Goto bu fli onehome kë lokwalëfe mëgletëmabë onehome bu ululu sle lalotokwefëme.”

⁷ Sobo Gotome salokwalëfe eletelo na bubë tole mëta fwa asë eletelome. Na sobo Satanme feilawa boblo egotlome kwe sobo melë egelona, kwe bu somago lëglëboukakume.

⁸ Sobo Goto nawa lesili eulome, na bu somëta mata lesili lëkakime. Tële lowenebë mëta kë tafa egelobë oneho, sobo sobobë lowene sle etomome. Tëbo lowene sakile elo na Gotome fwa lowene sle eletelome.

⁹ Sobo nabatuna feilawa saye elo na somalëfana temutu enitome. Sobo tëbo lowene mëta feilawa etabome nëgame. Sobo soso lakale mëta ke tafa egelobë, ye lakale elë sahihijika ekako na ye feilawa kle etlome na sobobë fleflesu lowene hihijika ekakome na witina tafa ekoujome.

¹⁰ Sobo Gotobë naba lime lokwalëfe lowenena satafa elo. Sobo melë egelona, kwe bu some fleflesu lëletëyome na wenijiatena oneho hwi lolëyome.

Fli enëneme, sebo blawa asa so manëtatëma

¹¹ O afanino na oneglënino blawa asa so etatemo na eselëmome. Ju mëglana, kwe tafa sle gali, tëbo gali lalolemu, kwe jubë wege nane tafa sle gali sle egotlebëme, weye. Jubëye, esogowa eglelëleme.

¹² Goto tafa sle gali buwa lehole sle lëlemu, na buwa onehome koto loglomebë ho lëtabe. Na gigli mëglabë onehome lëgaitamebë ho, na bu onehome Hel elëme lalowa mejine lëglëmeme. Sobo ebë life mago howa. Sobo habëtabo hone, onehome eselëmo këme elo?

Sebo aholabu asa manëla

¹³ Sobo aholo bo eto, sobo megali kë egelobë enëne, “Eli

o uniji bo tebë lifate takowa nuwime na jowa tlibutu tafa nulëme na baliti loko nëgëtëbë wege mana fa notlëme.”

¹⁴ Sobo megali asa elo. Sobo uniji fata lëglebë wesibi lowene laletelone? Weye. Sobo ebë life mëta kë tafa egelobë tafa, tokwefo olëwa etabo, olobalë, oloba fene mekesiwa lalële, kwe kliji yafe u lëkeke kwe lagëgewa lëkake.

¹⁵ Sobo megali egelome. Goto seme ebë life mëta tafa nëglabëme tole lëgletëna, kwe sebo kë wesibi nogotlamemu.

¹⁶ Sobo aholabu asa elo na megali ebokwako, këha lakale bu tëbo wesibi.

¹⁷ Ho li lale lowenebë lakale walowene lëgletlëna kwe bu kë lowenebë lakale blëge jwa logotlëna kwe bu tëbo lowene blëge lotle.

5

Feilawa wesibina enëne bu fuflu fa mogotlame

¹ Hai! Wesibi lebutakona enëne aholokwane elo. Sobo tako ye sakle etlomu na witina asë elome. Melëme nëgëme, tako hobota some esogo lalëlagijo na some lamu logotobëme nounou lalëkeke.

² Sobobë iniwa lale wesibi kë nëgebë wafla meletëyo, na lale lale ëho mata lahwë watëtlë motometëyo, na wanëhou watiji meletëyo.

³ Sobobë silva baliti na gol baliti gu wafi mëleletëyo. Kë balitibë gu, Gotobë naba lime gali sle mëleme, bu sobobë tëbo lakalebëme.

Këbë balitibë gu sobobë ato aholunaha bu temu lëgëtatëyome. Yawe olë lololi lalëkeke na sobo lale lale wesibi loloko eto.

⁴ Aholokwane elo. Nuju mago olo wesibi kë wawa mëglekefëtëyobë wege home baliti eglëmo sle hana elo, baliti wali tokli lalekefëtëmo. Tako Kalëlegona Goto, këbë tëbo lakale wahwi lolole, na wege enënebë afeflei mata wahalokwane lolome.

⁵ Sobo ebë life mëta lale tafa fa etlo. Sobo iniwa wesibina etabo. Na sobo li wesibi meha hana afole eletelo. Sobo sëse tabo tobaluku luku hime sagli lëglëlebë fenene.

⁶ Kwe sobo lale lakale mëta kë tafa egelobë onehobë lakale lasëletëmo na mogo nalë tëtëkle eto. Sobobë afutuku hana boblo mëgëtatëyome kwe sobobë wame tafu mëgëtatëyomene? Weyewa.

Sobo lowene tafuwa etlome na Jisas ligisibëme mana hwi eletelome

⁷ Jisasma kë lowene sle mëgletlabë afanino na oneglënnino, sobo lowene tafuwa etlome Jisas ligisibë olë, mana hwi eletelome. Olo wesibi ola mëglabë home lowene eletemo. Bu memelë lamla, tlibutu awi hwi lëletlee, tlibutu ye lëkake na wanagli fata lële na nuju mago olo wesibi mana wawa lële.

⁸ Sobo mata hobota fa egotlona lowene tafuwa egotlome, na eglibe telowa elome. Jisas Klais ligisibë olë

lololi walëletle, këme nëgeme sobo titiwa laeglibowa.

⁹ Jisame kë lowene sle mëgletlabë afanino na oneglënino. Sobo fli Jisame kë lowene sle mëgletlabë afanime naba asa tutuhu etometemo. Aholokwane elo. Sobobë gali aholokwane lëglëyobë ho wafi lisi. Ino ëfome ekë lilibe.

¹⁰ Jisame kë lowene sle mëgletlabë afanino na oneglënino, Gotobë ëtanifu profet onehome lowene ekaketemo. Bume oneho wame lamotloma kwe bu lowene tafuwa lamototla, na bume blouwa lamëtletëma. Sobo bubë lakale fene mefa saetlo.

¹¹ Aholokwane elo, sobo megëgali lalekefo, Gotobë profet oneho, bu hobota memëtalebila na bu kë wesibi hana uli mëtletla na lowenewa tafu mototla. Sobo megëgali këme elekefëtemo, “Goto bume fleflesu latletëme.” Sobo Jobbë anebo gali wafi lowene eletelo. Bu tatako hobota fafa totle. Kë hobota boblo latotome na kë wesibi bume lëlë hana mototle. Sobo kë wesibi, wafi lowene eletelo, kë iniwa hobota wafi ye tlelële na Goto bume mana iniwa wesibina taitale. Goto bu melë këme lële, bu tako maninibo eso ho, bu onehobë tëbo lowene aholokwane ti lëgletëmebë ho.

Sebo Gotobë wenijina blawa asa kakëne manëla

¹² Jisame kë lowene sle mëgletlabë afanino na oneglënino, sobo ebë jowa

wesibiwa salowene eletelo. Sobo matafa mago wesibina asa kakëne elo o life mago wesibina mata asa kakëne elo. Sobo nëgali galime gali egelona, kwe nëgali galiwa gali egelome. Sobo hanane galime gali egelona, kwe sobo hanane galiwa gali egelome. Goto some tëbo lëgëtolime.

Lale lowenena ho, bu Gotome gali loglolena, kwe Goto bubë kë gali aholokwane logloleme

¹³ So mogo ho li hobota mëta tafa lëglëna, kwe bu Gotome sagëgali lëlelële. Ho li fleflesu lëglëna kwe Gotobë fleflesu sawa safë lëtamë.

¹⁴ So mago ho li ato elili lëglëna kwe bu lotu eso enëneme satakune lolomeme, bume migisitla namëglame. Na bu mujutlame, na Gotome gëgali melelëlame, na welë tu Jisas Klaibë wenijina mana ju mletlame,

¹⁵ ato elili mago titika nalëgleme. Ho Gotome melowenena sagëgali mëlelëla, “Sebo Gotome melowene slemu nanëletla, ato elilina home sle logotleme.” Kwe ato elili kë home kile logotleme. Na ëtani bu kë fa totlebë tëbo wesibi, Goto aholokwana ti lëgletleme.

¹⁶ Këme nëgeme, sobo jowa jowa, sobo kë tafa egelobë lakalebëme sobolalo gëgali elelëgome. Na Gotome mana kofaya kofaya gëgali elelëlome. Na Goto sobobë kë tëbo lakale aholokwana ti lëletëyome. Gotobë naba lime

asë sle lëglebë ho, Gotome
gëgali lëglelëna kwe bubë
gëgali tako afutukunamu na
tatako wesibi logotomeme.

¹⁷ Elaija bu sebo fenene
kwe bu Gotome itaita gëgali
tlelële, na tu tēgeto juwa tle.
Nëgalimu tu tēgeto hana tle, tu
tēgeto juwa këniji tlibutu,
aona tlibutu tle na tobali ita
jowa yeme.

¹⁸ Na Elaija bu ita Gotome
gëgali tlelële na tu mana teto.
Na life mëta hi wesibi ita
hulu motokou.

*Ho li lale lowene aholokwana
ti lëglena, ta kë hobë lowene*

sasle etatelo

¹⁹ Jisame kë lowene sle
mëgletlabë afanino na
oneglëninino. So mago ho li
Gotobë nëgali gali
aholokwana ti lëglena na li
yaya lëglena, na ho li bubë
lowene sle lugutatlena na bu
lowene hihijika lëglena,

²⁰ sobo melowene
egelome, tēbo lowenena
home yalë lëgaitalena, na ita
Jisame esogo lëlelëme bu
melëbëme laitale Helwa
luguju juwa nalëgleme Goto
bubë iniwa tēbo lowene
aholokwana wati lëletle.